



রমাযানের ফাযায়েল

ও

রোযার মাসায়েল

আবদুল হামিদ ফাইযী

রুমায়ানের ফাযায়েল

ও

রোযার মাসায়েল

আবদুল হামীদ কাইযী আল-মাদনী

প্রকাশনায়

তাওহীদ পাবলিকেশন্স

ঢাকা-বাংলাদেশ

রমাযানের ফাযায়েল ও রোযার মাসায়েল  
আবদুল হামীদ ফাইযী আল-মাদানী  
বই নং-২৩

বাংলাদেশ সংস্করণ :  
প্রথম প্রকাশ : আগস্ট ২০১০ ইসারী

প্রকাশনায় :  
তাওহীদ প্রেস এন্ড পাবলিকেশন  
৯০, হাজী আবদুল্লাহ সরকার লেন, বংশাল, ঢাকা-১১০০  
ফোন : ০২৭১১২৭৬২, ০১১৯০৩৬৮২৭২, ০১৭১১৬৪৬৩৯৬  
ইমেল : tawheedpp@gmail.com

প্রচ্ছদ : আল-মাসরুর

মূল্য : ২০০ (দুই শত) টাকা মাত্র

ISBN : 978-984-8766-32-6

মুদ্রণ :  
হেরা প্রিন্টার্স.  
হেমন্দ দাস লেন, ঢাকা

## সূচীপত্র

ক্রম.	বিষয়	পৃষ্ঠা
১.	ভূমিকা	১৩
	<i>প্রথম অধ্যায়</i>	
২.	সিয়াম শব্দের তাৎপর্য	১৫
৩.	পূর্ববর্তী ধর্মমতে রোযা	১৬
৪.	ইসলামী শরীয়তে রোযা ও তার পর্যায়ক্রম	১৮
৫.	সাধারণভাবে রোযার ফযীলত	২১
৬.	রোযার উদ্দেশ্য, লক্ষ্য, উপকারিতা ও যৌক্তিকতা	২৪
	<i>দ্বিতীয় অধ্যায়</i>	
৭.	রোযার প্রকারভেদ	৩৯
৮.	রমায়ানের রোযার মান	৩৯
৯.	রমায়ান মাসের বৈশিষ্ট্য ও তার রোযার মাহাত্ম্য	৪০
১০.	বিনা ওযরে রোযা ত্যাগ করার সাজা	৪৪
	<i>তৃতীয় অধ্যায়</i>	
১১.	মাস প্রমাণ হবে কিভাবে?	৪৭
১২.	❖ সাক্ষ্য দ্বারা মাস প্রমাণ :	৪৭
১৩.	❖ জ্যোতিষ-গণনার উপর নির্ভর করা যাবে না :	৪৮
১৪.	❖ চাঁদ দেখার জন্য দূরবীন ব্যবহার :	৫০
১৫.	❖ উদয়স্থলের বিভিন্নতা :	৫০
১৬.	কেউ একা চাঁদ দেখলে কি করবে?	৫৩
১৭.	কাফের দেশে বসবাসকারী কি করবে?	৫৩
১৮.	সউদিয়ার চাঁদ অনুসারে রোযা-ঈদ চলবে না	৫৪
১৯.	ফজরের পর চাঁদ হওয়ার খবর পেলে	৫৪
২০.	আমরা রমায়ান মাসকে কি দিয়ে স্বাগত জানাব?	৫৬
২১.	শা'বানের শেষ দুই বা একদিন রোযা রেখে রমায়ান বরণ করা	৫৮
	<i>চতুর্থ অধ্যায়</i>	
২২.	রমায়ানের রোযায় মানুষের শ্রেণীভেদ	৫৯
২৩.	কাফের	৫৯
২৪.	নামায-ত্যাগী	৬১
২৫.	শিশু	৬২
২৬.	পাগল	৬৪
২৭.	অক্ষম ব্যক্তি	৬৫
২৮.	❖ খাদ্যদানের নিয়ম :	

২৯.	গর্ভবতী ও দুগ্ধদাত্রী মহিলা	৭০
৩০.	রোযা ভাঙ্গতে বাধ্য ব্যক্তি	৭১
৩১.	❖ দিন যেখানে অস্বাভাবিক লম্বা :	৭৪
৩২.	মুসাফির	৭৬
	মুসাফিরের জন্য রোযা রাখা ভালো, না কাশা করা ভালো?	৮০
৩৩.	❖ মাসআলা :	৮৩
৩৪.	❖ মাসআলা :	৮৩
৩৫.	নিফাস ও ঋতুমতী	৮৪
৩৬.	<b>পঞ্চম অধ্যায়</b>	
৩৭.	রোযার আরকান	৮৮
	<b>ষষ্ঠ অধ্যায়</b>	
৩৮.	রোযার বিভিন্ন আদব	৯৩
	সেহরী বা সাহরী খাওয়া	৯৩
৩৯.	❖ কি খেলে সেহরী খাওয়া হবে?	৯৪
৪০.	❖ সেহরীর সময় :	৯৫
৪১.	❖ ফজর উদয় হওয়ার ব্যাপারে সন্দেহ হলে :	৯৬
৪২.	ইফতার	১০১
৪৩.	❖ শীঘ্র ইফতার :	১০১
৪৪.	❖ সূর্য ডোবার পর আবার সূর্য দেখলে :	১০৩
৪৫.	❖ সূর্য ডুবে গেছে মনে করে ইফতার করলে :	১০৪
৪৬.	❖ কি দিয়ে ইফতারী হবে?	১০৪
৪৭.	❖ ইফতারের সময় :	১০৭
৪৮.	রোযা অবস্থায় দুআ	১০৭
	রোযার অন্যান্য আদব	১০৯
৪৯.	❖ রোযাবিরোধী কর্ম থেকে বিরত থাকা এবং রোযা নির্মল করা :	১০৯
৫০.	❖ জিভের রোযা :	১১১
৫১.	❖ হৃদয়ের রোযা :	১১৪
৫২.	❖ চোখের রোযা :	১১৫
৫৩.	❖ কানের রোযা :	১১৫
৫৪.	❖ পেটের রোযা :	১১৬
৫৫.	❖ উভয় হাত ও পায়ের রোযা :	১১৭
	<b>সপ্তম অধ্যায়</b>	
৫৬.	রোযা অবস্থায় যা বৈধ	১১৮
৫৭.	১. পানিতে নামা, ডুব দেওয়া ও সাঁতার কাটা :	১১৮
৫৮.	২. মিসওয়াক বা দাঁতন করা	১১৯

৫৯.	৩. সুরমা লাগানো এবং চোখে ও কানে ওষুধ ব্যবহারঃ	১২১
৬০.	৪. পায়খানা-দ্বারে ওষুধ ব্যবহার :	১২২
৬১.	৫. পেটে (এণ্ডোসকপি মেশিন) নল সম্বালন :	১২২
৬২.	৬. বাহ্যিক শরীরে তেল, মলম, পাওডার বা ক্রিম ব্যবহার :	১২২
৬৩.	৭. স্বামী-স্ত্রীর আপোষের চুম্বন ও প্রেমকেলি :	১২৩
৬৪.	৮. দেহের দূষিত রক্ত বহিষ্করণ :	১২৫
৬৫.	৯. নাক অথবা কোন কাটা-ফাটা থেকে রক্ত বের হওয়া :	১২৭
৬৬.	১০. রক্তদান করা :	১২৮
৬৭.	১১. দাঁত তোলা :	১২৮
৬৮.	১২. কিডনী (বৃক্ক বা মূত্রগ্রস্থি) পরিষ্কার :	১২৮
৬৯.	১৩. আহারের কাজ দেয় না এমন (ওষুধ) ইঞ্জেকশন ব্যবহার করা :	১২৮
৭০.	১৪. ক্ষতস্থানে ওষুধ ব্যবহার :	১২৯
৭১.	১৫. মাথা ইত্যাদি নেড়া করা :	১২৯
৭২.	১৬. কুল্লি করা ও নাকে পানি নেওয়া :	১২৯
৭৩.	১৭. সুগন্ধির সুঘ্রাণ নেওয়া :	১৩০
৭৪.	১৮. নাকে বা মুখে স্প্রে ব্যবহার :	১৩১
৭৫.	যা থেকে বাঁচা দুঃসাধ্য ভাতে রোযা নষ্ট নয়	১৩২
৭৬.	১৯. থুথু ও গয়ের :	১৩২
৭৭.	২০. রাস্তার ধূলা :	১৩৩
৭৮.	রোযা অবস্থায় যা করা চলে	১৩৩
৭৯.	১. লবণ বা মিষ্টি চাষা :	১৩৩
৮০.	২. সেহরীর শেষ সময় পর্যন্ত পানাহার করা :	১৩৪
৮১.	৩. ফজর উদয় হওয়ার পরেও নাপাক থাকা :	১৩৪
৮২.	৪. দিনে ঘুমানো :	১৩৫
৮৩.	৫. সফর করা :	১৩৫
	<b>অষ্টম অধ্যায়</b>	
৮৪.	রোযাদারের জন্য যা করা অপছন্দনীয়	১৩৬
	<b>নবম অধ্যায়</b>	
৮৫.	যাতে রোযা নষ্ট ও বাতিল হয়	১৩৭
৮৬.	১. স্ত্রী-সঙ্গম :	১৩৭
৮৭.	২. বীর্যপাত :	১৪০
৮৮.	৩. পানাহার :	১৪১
৮৯.	৪. যা এক অর্থে পানাহার :	১৪২
৯০.	৫. ইচ্ছাকৃত বমি করা :	১৪৩
৯১.	৬. মহিলার মাসিক অথবা নিফাস শুরু হওয়া :	১৪৩

৯২.	৭. দূষিত রক্ত বের করা :	১৪৪
৯৩.	৮. নিয়ত বাতিল করা :	১৪৪
৯৪.	৯. মুরতাদ্দ হওয়া :	১৪৪
৯৫.	১০. বেহুশ হওয়া :	১৪৫
৯৬.	রোযা নষ্ট হওয়ার শর্তাবলী	১৪৫
<b>দশম অধ্যায়</b>		
৯৭.	রমাযানে যে যে কাজ রোযাদারের কর্তব্য	১৪৯
৯৮.	১। তারাবীহর নামায বা কিয়ামে রামাযান	১৫০
৯৯.	❖ তারাবীহর নামাযের মান ও তার মাহাত্ম্য :	১৫১
১০০.	❖ তারাবীহর সময় :	১৫২
১০১.	❖ তারাবীহর নিয়ত :	১৫২
১০২.	❖ তারাবীহর রাকআত-সংখ্যা :	১৫২
১০৩.	❖ তারাবীহর জামাআত :	১৫৪
১০৪.	❖ তারাবীহর জামাআতে মহিলাদের অংশগ্রহণ	১৫৫
১০৫.	❖ মহিলাদের আপোসে তারাবীহর জামাআত :	১৫৬
১০৬.	❖ তারাবীহর জন্য অর্থের বিনিময়ে ইমাম নিয়োগ :	১৫৭
১০৭.	❖ তারাবীহর নামাযের পদ্ধতি :	১৫৮
১০৮.	❖ প্রত্যেক দুই রাকআতের মাঝে যিকর :	১৬১
১০৯.	❖ এই নামাযের কিরাআত :	১৬২
১১০.	❖ তারাবীহর নামাযে কুরআন খতম :	১৬৩
১১১.	❖ তাড়াছড়া না করে সুন্দরভাবে তারাবীহ পড়া :	১৬৪
১১২.	❖ কুরআন দেখে কিরাআত পড়া :	১৬৫
১১৩.	❖ মুজাদীর কুরআন দেখা :	১৬৬
১১৪.	❖ কিরাআত পড়তে পড়তে কান্না করা :	১৬৭
১১৫.	❖ আযাতের পুনরাবৃত্তি :	১৬৮
১১৬.	❖ নামাযে কুরআন-খতমের দুআ :	১৬৯
১১৭.	❖ খতমের দুআয় শরীক হওয়া :	১৭০
১১৮.	❖ কুনূতের কতিপয় আনুষঙ্গিক মাসায়েল :	১৭০
১১৯.	❖ দুআয় ছন্দ ব্যবহার :	১৭১
১২০.	❖ লম্বা দুআ কি বৈধ ?	১৭২
১২১.	❖ একবচন শব্দের দুআকে বহুবচন করে পড়া :	১৭৩
১২২.	❖ কুনূতের জবাব :	১৭৩
১২৩.	❖ কুনূতের দুআর শেষে মুখে হাত বুলানো :	১৭৩
১২৪.	❖ কুনূতের মান :	১৭৪
১২৫.	❖ ইমামের সাথে নামায শেষ করার মাহাত্ম্য :	১৭৪

১২৬.	❖ জামাআতে নামায পড়ার পর শেষ রাতে নামায :	১৭৫
১২৭.	❖ তারাবীহর জামাআতে এশার নামায :	১৭৬
১২৮.	❖ কাছের মসজিদ ছেড়ে দূরের মসজিদে নামায :	১৭৭
১২৯.	❖ তারাবীহ ও শেষ দশকের কিয়ামের মাঝে পার্থক্য :	১৭৮
১৩০.	❖ কিয়ামুল লাইল-এর কাযা :	১৭৯
১৩১.	২। সদকাহ বা দান করা	১৮০
১৩২.	৩। ইফতার করানো	১৮০
১৩৩.	৪। কুরআন তেলাঅত	১৮১
১৩৪.	❖ কুরআন তেলাঅতের সময় কান্না :	১৮৫
১৩৫.	৫। উমরাহ	১৮৭
১৩৬.	৬। শেষ দশকের আমল ও ইবাদত	১৮৭
১৩৭.	৭। ই'তিকাফ	১৯০
১৩৮.	❖ ই'তিকাফের অর্থ :	১৯০
১৩৯.	❖ ই'তিকাফের মান :	১৯০
১৪০.	❖ ই'তিকাফের রহস্য :	১৯২
১৪১.	❖ ই'তিকাফের প্রকারভেদ :	১৯৩
১৪২.	❖ ই'তিকাফের সময় :	১৯৩
১৪৩.	❖ ই'তিকাফের শর্তাবলী :	১৯৫
১৪৪.	❖ ই'তিকাফ-গাহে প্রবেশ করার সময় :	১৯৭
১৪৫.	❖ ই'তিকাফকারীর জন্য যা করা মুস্তাহাব :	১৯৮
১৪৬.	❖ ই'তিকাফকারীর জন্য যা করা বৈধ :	১৯৯
১৪৭.	❖ ই'তিকাফকারীর জন্য যা করা মকরুহ :	২০০
১৪৮.	❖ ই'তিকাফ যাতে বাতিল হয়ে যায় :	২০১
১৪৯.	❖ ই'তিকাফ ভঙ্গ এবং তার কাযা করা :	২০১
১৫০.	❖ নির্দিষ্ট মসজিদে ই'তিকাফের নয়র :	২০২
১৫১.	৮। শবে কদর অন্বেষণ	২০৩
১৫২.	❖ শবে কদরের নাম শবে কদর কেন?	২০৩
১৫৩.	❖ শবে কদরের মাহাত্ম্য :	২০৪
১৫৪.	❖ শবে কদর কোন্ রাতটি?	২০৭
১৫৫.	❖ শবে কদরের আলামতসমূহ :	২১০
১৫৬.	❖ শবে কদরের দুআ :	২১১
	<b>একাদশ অধ্যায়</b>	
১৫৭.	ফিতুরার বিবরণ	২১৩
১৫৮.	❖ সাদাকাতুল ফিতুরার মান :	২১৩
১৫৯.	❖ সাদাকাতুল ফিতুরার হিকমত :	২১৩



১৬০.	❖ কার উপরে ওয়াজেব :	২১৪
১৬১.	❖ ফিতরার যাকাতের পরিমাণ কত?	২১৭
১৬২.	❖ সাদাকাতুল ফিতুর কোন খাদ্য থেকে আদায় করতে হবে?	২১৮
১৬৩.	❖ ফিতরা কখন ওয়াজেব হয়?	২২১
১৬৪.	❖ ফিতরা কখন দিতে হবে?	২২১
১৬৫.	❖ যাকাত কোথায় দিতে হবে?	২২৩
১৬৬.	❖ যাকাতের হকদার ও বন্টন-পদ্ধতি	২২৪
<b>দ্বাদশ অধ্যায়</b>		
১৬৭.	ঈদ ও তার বিভিন্ন আহকাম	২২৫
১৬৮.	❖ ঈদের নামাযের গুরুত্ব :	২২৬
১৬৯.	ঈদের আদব	২২৭
১৭০.	❖ ঈদের জন্য গোসল করা :	২২৭
১৭১.	❖ ঈদের জন্য সাজসজ্জা ও সুগন্ধি ব্যবহার :	২২৮
১৭২.	❖ ঈদের নামাযের জন্য বের হওয়ার পূর্বে কিছু খাওয়া :	২২৯
১৭৩.	❖ ঈদগাহে বের হওয়া :	২৩০
১৭৪.	❖ পায়ে হেঁটে যাওয়া :	২৩০
১৭৫.	❖ শিশু ও মহিলাদের ঈদগাহে যাওয়া :	২৩১
১৭৬.	❖ ঈদের দিন তকবীর পাঠ :	২৩২
১৭৭.	❖ তকবীরের শব্দাবলী :	২৩৩
১৭৮.	❖ ঈদের নামাযের সময় :	২৩৪
১৭৯.	❖ ঈদের নামাযের জন্য আযান ও ইকামত :	২৩৫
১৮০.	❖ ঈদের নামাযের জন্য সুতরাহ :	২৩৫
১৮১.	❖ ঈদের নামাযের পদ্ধতি :	২৩৬
১৮২.	❖ ঈদের নামাযের কিরাআত :	২৩৮
১৮৩.	❖ ঈদের নামাযের আগে ও পরে নামায :	২৩৮
১৮৪.	❖ ঈদের নামায পুরো অথবা কিছু অংশ ছুটে গেলে :	২৩৯
১৮৫.	❖ ঈদের খুতবাহ :	২৪১
১৮৬.	❖ মিন্বরে চড়ে খুতবা :	২৪২
১৮৭.	❖ খুতবা কি দিয়ে শুরু হবে?	২৪৩
১৮৮.	❖ খুতবার মাঝে মাঝে তকবীর :	২৪৩
১৮৯.	❖ খুতবা একটি না দুটি?	২৪৩
১৯০.	❖ ঈদের খুতবায় মহিলাদের জন্য খাস নসীহত :	২৪৪
১৯১.	❖ খুতবা শোনার গুরুত্ব :	২৪৫
১৯২.	❖ ঈদের দুআ কি?	২৪৫
১৯৩.	❖ রাস্তা পরিবর্তন করা :	২৪৬

১৯৪.	❖ ঈদের মুবারকবাদ :	২৪৭
১৯৫.	❖ ঈদের খুশী প্রকাশ :	২৪৭
১৯৬.	❖ জুমআর দিনে ঈদ হলে :	২৫০
১৯৭.	ঈদ সংক্রান্ত আরো কিছু মাসায়েল	২৫২
১৯৮.	❖ ঈদের চাঁদ :	২৫২
১৯৯.	❖ কেউ একা চাঁদ দেখলে :	২৫২
২০০.	❖ রোযা ২৮টি হলে :	২৫৩
২০১.	❖ রোযা ৩১টি কখন হয়?	২৫৩
<b>ত্রয়োদশ অধ্যায়</b>		
২০২.	রমায়ান পরে কি?	২৫৫
<b>চতুর্দশ অধ্যায়</b>		
২০৩.	রমায়ানের রোযা কাযা করার বিবরণ	২৫৮
২০৪.	❖ আগামী রমায়ান পর্যন্ত কাযা রোযা রাখতে না পারলে :	২৬০
২০৫.	❖ ইচ্ছাকৃত ছাড়া রোযার কাযা :	২৬১
২০৬.	❖ চিররোগা খাদ্যদানের পর সুস্থ হলে :	২৬৩
২০৭.	❖ কাযা রাখার পূর্বে কি নফল রাখা চলবে?	২৬৩
২০৮.	❖ রোযা কাযা রেখে মারা গেলে :	২৬৪
<b>পঞ্চদশ অধ্যায়</b>		
২০৯.	রোযা ও রমায়ান সম্পর্কিত কিছু যযীফ ও জাল হাদীস	২৬৮
<b>ষষ্ঠদশ অধ্যায়</b>		
২১০.	রমায়ানের কিছু বিদআতের নমুনা	২৭৬
<b>সপ্তদশ অধ্যায়</b>		
২১১.	সুন্নত ও নফল রোযা	২৮০
২১২.	নফল রোযার জন্য নিয়ত :	২৮০
২১৩.	নফল রোযার প্রকারভেদ	২৮১
২১৪.	শওয়ালের ছয় রোযা	২৮১
২১৫.	আরাফার রোযা	২৮৩
২১৬.	মুহাব্বরাম মাসের রোযা	২৮৪
২১৭.	আশুরার রোযা	২৮৪
২১৮.	যুলহজ্জের প্রথম নয় দিনের রোযা	২৮৭
২১৯.	শা'বান মাসের অধিকাংশ দিনের রোযা	২৮৮
২২০.	সোম ও বৃহস্পতিবারের রোযা	২৯০
২২১.	প্রত্যেক মাসে তিনটি রোযা	২৯১
২২২.	দাউদী রোযা	২৯২
২২৩.	যৌন-পীড়িত যুবকদের রোযা	২৯৩

২২৪.	সাধারণ নফল রোযা	২৯৪
২২৫.	নফল রোযা ভাঙ্গা বৈধ	২৯৪
	<b>অষ্টদশ অধ্যায়</b>	
২২৬.	যে দিনগুলিতে রোযা রাখা নিষিদ্ধ	২৯৬
২২৭.	দুই ঈদের দিন	২৯৬
২২৮.	তাশরীকের তিন দিন	২৯৬
২২৯.	কেবল জুমআর দিন রোযা	২৯৭
২৩০.	কেবল শনিবার রোযা রাখা	২৯৮
২৩১.	কেবল রবিবার রোযা রাখা	২৯৯
২৩২.	সন্দেহের দিন রোযা	৩০০
২৩৩.	বছরের প্রতিদিন রোযা রাখা	৩০১
২৩৪.	সওমে বিসাল	৩০২
২৩৫.	স্বামীর বর্তমানে স্ত্রীর রোযা রাখা	৩০২
২৩৬.	রজব মাসের রোযা	৩০৩
২৩৭.	শবেবরাতের রোযা	৩০৩

## ভূমিকা

إِنَّ الْحَمْدَ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ  
 أَنْفُسِنَا وَسَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ فَلَا  
 هَادِيَ لَهُ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ  
 مُحَمَّدًا عَبْدُهُ وَرَسُولُهُ. ﴿يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ  
 نَفْسٍ وَاحِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا  
 اللَّهَ الَّذِي تَسَاءَلُونَ بِهِ وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا يَا أَيُّهَا  
 الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ- يَا أَيُّهَا  
 الَّذِينَ آمَنُوا اتَّقُوا اللَّهَ وَقُولُوا قَوْلًا سَدِيدًا- يُضْلِحْ لَكُمْ أَعْمَالَكُمْ  
 وَيَغْفِرْ لَكُمْ ذُنُوبَكُمْ وَمَنْ يُطِيعِ اللَّهَ وَرَسُولَهُ فَقَدْ فَازَ فَوْزًا عَظِيمًا﴾

আম্মা বা'দ, সহীহ দলীলকে ভিত্তি করে রমাযানের ফাযায়েল ও  
 রোযার মাসায়েল প্রসঙ্গে বহু লিখা পড়ে এবং বক্তৃতা শুনে ও করে মনে  
 মনে নিজে কিছু লিখার প্রেরণা জাগে। হক জেনে তা পৌছে দেওয়ার  
 দায়িত্ব প্রত্যেক মুসলিমের। সেই তাকীদেই এবং বিশেষ করে আল-  
 মাজমাআহ দাওয়াত অফিসের বিশেষ উৎসাহে আমি এ বিষয়ে লিখতে  
 শুরু করি আরবীতে। কথা আছে এ বই অনূদিত হবে বিভিন্ন ভাষায়।  
 আল্লাহ যেন সেই তওফীক দেন। আমীন।

দীর্ঘ তিন বছর যাবৎ আরবীর লেপ মুড়ো দিয়ে ঘুমিয়ে থাকার পর  
 এক্ষণে তাকে জাগিয়ে বাংলার লেবাস পরাই আমার স্বভাষী বাঙালী ভাই-  
 বোনদের জন্য। রোযার ও রমাযানের মত একটি মহান উৎসাহ ও  
 উদ্দীপনা তথা আনন্দ-মুখর মৌসমকে ঘিরে যে সকল জানা ও মানার কথা  
 এতে পরিবেশিত হয়েছে, আশা করি তা সকল মুসলিমের জানা প্রয়োজন।  
 হয়তো বা নতুন কথা কিছু নয়, তবে অনেক কথা জানার আছে, মানার

আছে। যদিও বইটির কলেবর বৃহৎ, তবুও আমি মনে করি যে, কোন কথা পরিত্যাজ্য নয়, অপ্রাসঙ্গিক নয়। আশা করি পাঠক মাত্র অলসতা কাটিয়ে বারবার পড়ে নেবেন; বিশেষ করে রমাযানের মৌসমে।

তদনুরূপ যদি মসজিদের ইমাম সাহেবগণ কোন এক নামাযের পর - বিশেষ করে রমাযান মাসে- জামাআতকে পড়ে শোনান, তাহলে বড় উপকার সাধিত হবে বলে আশা করি।

যা কিছু লিখি আল্লাহ তোমার সন্তুষ্টির জন্যই। তুমি এই বইটিকে কবুল করো এবং এই আমলের অসীলায় লেখক, প্রকাশক, প্রচারক ও পাঠককে আখেরাতে বেহেশতের বাসা দিও। আল্লাহুমা আমীন।

১০ই মহররম, আশূরা ১৪২৪ হিজরী  
১৩/৩/২০০৩ খৃঃ

বিনীত :  
আবদুল হামীদ ফাইযী  
আল-মাজমাআহ, সউদী আরব

## প্রথম অধ্যায়

# সিয়াম শব্দের তাৎপর্য

অভিধানে صِيَام (সিয়াম)-এর সাধারণ অর্থ হল, বিরত থাকা। আর এ জন্যই কথা বলা থেকে যে বিরত থাকে -অর্থাৎ চূপ ও নিস্তরু থাকে তাকে صَائِم (সায়েম) বলা হয়। মহান আল্লাহ হযরত মারয়্যাম (আঃ)-এর ইতিহাস উল্লেখ করে বলেন,

﴿فَإِمَّا تَرِينَنَ مِنَ الْبَشَرِ أَحَدًا فَقُولِي إِنِّي نَذَرْتُ لِلرَّحْمَنِ صَوْمًا فَلَنْ

أَكْلَمَ الْيَوْمَ إِنْسِيًّا﴾

অর্থাৎ, (সন্তান ভূমিষ্ঠ করার পর) যদি তুমি কাউকে (কোন প্রশ্ন বা কৈফিয়ত করতে) দেখ, তবে তুমি বল, ‘আমি দয়াময় (আল্লাহর) জন্য (কথা বলা থেকে) বিরত থাকার নয়র মেনেছি। সুতরাং আজ আমি কিছুতেই কোন মানুষের সাথে কথাই বলব না।’ (কুরআনুল কারীম ১৯/২৬)

বলা বাহুল্য, এখানে ‘সওম’-এর অর্থ হল কথা বলা থেকে বিরত থাকা।

শরীয়তের পরিভাষায় ‘সওম’ বা ‘সিয়াম’-এর অর্থ হল, ফজর উদয় থেকে সূর্যাস্ত পর্যন্ত পানাহার, স্ত্রী-সঙ্গম ইত্যাদি যাবতীয় রোযা নষ্টকারী কর্ম হতে বিরত থাকার মাধ্যমে আল্লাহর ইবাদত করা।<sup>1</sup>

অবশ্য এই সংজ্ঞায় অসারতা ও অশ্রীলতা থেকে বিরত থাকাও शामिल রয়েছে। কারণ, প্রিয় নবী ﷺ বলেন, “কেবল পানাহার থেকে বিরত থাকার নামই সিয়াম নয়; বরং অসারতা ও অশ্রীলতা থেকে বিরত থাকার নামই হল (আসল) সিয়াম। সুতরাং যদি তোমাকে কেউ গালাগালি করে অথবা তোমার প্রতি মূর্খতা প্রদর্শন করে, তাহলে তুমি (তার প্রতিশোধ না নিয়ে) তাকে বল যে, ‘আমি রোযা রেখেছি, আমি রোযা রেখেছি।’”<sup>2</sup>

‘রোযা’ আভিধানিক অর্থে সিয়ামের সমার্থবোধক না হলেও পারিভাষিক অর্থে ফারসী, উর্দু, হিন্দী ও বাংলা ভাষায় সিয়ামের জায়গায়

<sup>1</sup> (আশ্শারহুল মুমতে’ ৬/৩১০, ভাগ ৯ পৃঃ)

<sup>2</sup> (হাকেম, মুত্তাদ্রাক, বাইহাকী, ইবনে খুযাইমাহ, সহীহ, ইবনে হিব্বান, সহীহ, সহীহুল জামেইস সাগীর, আলবানী ৫৩৭৬নং)

‘রোযা’ শব্দটি ব্যবহার হয় বলেই সাধারণ জনসাধারণের বুঝার সুবিধার্থে আমিও এই পুস্তিকায় রোযা শব্দই প্রয়োগ করেছি। আর এ ব্যবহারে শরীয়তগত কোন ক্ষতি নেই।

## পূর্ববর্তী ধর্মমতে রোযা

মানুষের জন্য রমাযানের রোযাই প্রথম রোযা নয়। কারণ, রোযা হল এমন ইবাদত, যা আল্লাহ তাআলা মানুষ সৃষ্টির পর থেকেই নিজের বান্দার জন্য ফরয করেছেন। তিনি কুরআন মাজীদে বলেন,

﴿يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن

﴿قَبْلِكُمْ لَعَلَّكُمْ تَتَّقُونَ﴾

অর্থাৎ, হে ঈমানদারগণ! তোমাদের উপর রোযা ফরয করা হল, যেমন তোমাদের পূর্ববর্তী উম্মতের উপর ফরয করা হয়েছিল। যাতে তোমরা পরহেযগার হতে পার। (কুরআনুল কারীম ২/১৮৩)

এ থেকে বুঝা যায় যে, পূর্ববর্তী সকল উম্মতের জন্য রোযা ফরয ছিল। অবশ্য ইসলাম, খ্রিষ্টান ও ইয়াহুদী ধর্মের পূর্বের ধর্মানবলম্বী মানুষরা কিভাবে কোন পদ্ধতিতে রোযা পালন করত, তা নির্দিষ্টরূপে জানা যায় না। তবে ইয়াহুদ ও খ্রিষ্টানরা নির্দিষ্ট সময়ে নির্দিষ্ট জিনিস থেকে বিরত থেকে রোযা পালন করত। তাওরাত ও ইঞ্জীলের বর্তমান সংস্কারগুলো থেকেও জানা যায় যে, আল্লাহ তাআলা রোযাকে তাঁর পূর্ববর্তী বান্দাদের উপর ফরয করেছিলেন।

বুখারী-মুসলিমের একটি হাদীসে পাওয়া যায় যে, মহানবী ﷺ যখন মক্কা থেকে হিজরত করে মদীনায় এলেন, তখন দেখলেন, ইয়াহুদীরা আশুরার দিনে রোযা পালন করছে। তিনি তাদেরকে জিজ্ঞাসা করলেন, “এটা কি এমন দিন যে, তোমরা এ দিনে রোযা রাখছ?” ইয়াহুদীরা বলল, ‘এ এক মহান দিন। এ দিনে আল্লাহ মূসা ও তাঁর কণ্ঠকে পরিষ্কার দিয়েছিলেন এবং ফিরআউন ও তার কণ্ঠকে পানিতে ডুবিয়ে ধ্বংস করেছিলেন। তাই মূসা এরই কৃতজ্ঞতা জ্ঞাপনের উদ্দেশ্যে এই দিনে রোযা পালন করেছিলেন। আর সেই জন্যই আমরাও এ দিনে রোযা রেখে থাকি।’

এ কথা শুনে মহানবী ﷺ বললেন, “মূসার স্মৃতি পালন করার ব্যাপারে তোমাদের চাইতে আমরা অধিক হকদার।” সুতরাং তিনি ঐ দিনে রোযা রাখলেন এবং সকলকে রোযা রাখতে আদেশ দিলেন।<sup>1</sup>

অবশ্য আহলে কিতাব (ইয়াহুদী-খ্রিষ্টান) ও মুসলিমদের রোযার মাঝে একটি পার্থক্য এই যে, আহলে কিতাবরা সেহরী (২) খায় না। কিন্তু মুসলিমরা খায়।<sup>3</sup>

তদনুরূপ আহলে কিতাবরা ইফতার করতে দেরী করে। পক্ষান্তরে মুসলিমরা সূর্য ডোবামাত্র তড়িঘড়ি ইফতার করে থাকে।<sup>4</sup>

ইনসাইক্লোপেডিয়া বৃটানিকাতে বলা হয়েছে যে, জল, বায়ু, জাতি, ধর্ম ও পারিপার্শ্বিকতা ভেদে রোজার নিয়ম-পদ্ধতি বিভিন্ন হইলেও এমন কোন ধর্মের নাম উল্লেখ করা কঠিন যাহার ধর্মীয় বিধানে রোযার আবশ্যিকতা স্বীকার করা হয় নাই।<sup>5</sup>

যাই হোক না কেন, এই খবরের মাঝে মুসলিমদের জন্য রয়েছে সান্ত্বনা ও আশ্বাস। কারণ, শুধু উম্মতে মুহাম্মাদীর উপরেই নয়; বরং পূর্ববর্তী সকল উম্মতের উপরেই রোযা ফরয ছিল। আর সে মনে করেই মুসলিমদের উপরেও রোযার ভার অনেক হালকা হয়ে যায়। কারণ, মুসলিম যখন জানতে পারে যে, এই রোযা রাখার পথ হল পূর্ববর্তী আশিয়া ও তাঁদের অনুগামী নেক লোকদের, তখন সে এই পথ অবলম্বন করে আনন্দবোধ করে এবং রোযার কোন কষ্টকেই সে নিজের জন্য ভারী মনে করে না।<sup>6</sup>



<sup>1</sup> (বুখারী ২০০৪, মুসলিম ১১৩০নং)

<sup>৪</sup> সেহরী কথাটি সাহারীর অপভ্রংশ। এটি *شاذ في القياس وفصيح في الاستعمال*। সেহরী শব্দটি উর্দু অভিধানে পাওয়া যায়, কিন্তু সাহারী শব্দটি কোন অভিধানে পাওয়া যায় না।

<sup>3</sup> (মুসলিম ১০৯৬নং)

<sup>4</sup> (আবু দাউদ, হাকেম, মুত্তাদ্রাক, ইবনে হিব্বান, সহীহ, সহীহুল জামেইস সাগীর, আলবানী ৭৬৮৯নং)

<sup>5</sup> (বাংলা মিশকাত, এমদাদিয়া লাইব্রেরী ছাপা ৪/২৬৪ পৃঃ)

<sup>6</sup> (দুরুসু রামায়ান অকাফাত লিস-সায়েমীন ৫পৃঃ)



## ইসলামী শরীয়তে রোযা ও তার পর্যায়ক্রম

মহাবিজ্ঞান ও হিকমতময় মহান আল্লাহর একটি হিকমত ও অনুগ্রহ এই যে, তিনি বান্দার উপর যে আদেশ-নিষেধ আরোপ করেছেন তার মধ্যে বহু বিষয়কেই পর্যায় অনুক্রমে ধীরে ধীরে ফরয অথবা হারাম করেছেন। অনুরূপ তাঁর এক ফরয হল সিয়াম বা রোযা। যা তিনি উম্মতে মুহাম্মাদীর উপর পর্যায়ক্রমে কিছু কিছু করে ফরয করেছেন। যেমন :-

### ❖ প্রথম পর্যায় :-

প্রিয় নবী ﷺ প্রত্যেক মাসে ৩টি করে রোযা পালন করতেন। আর এ দেখে সাহাবাগণও (رضي الله عنه) তাঁর অনুসরণে ঐ রোযা রাখতেন। যাতে করে রোযার অভ্যাস তাদের জন্য সহজ হয়ে ওঠে।

### ❖ দ্বিতীয় পর্যায় :-

কুরাইশদল জাহেলী যুগে আশুরার রোযা রাখত।<sup>1</sup> অতঃপর তিনি মক্কা থেকে হিজরত করে মদীনায় এলে হযরত মূসা (عليه السلام)-এর অনুকরণে তাঁর স্মৃতি পালন করে আশুরার দিনে খুব গুরুত্বের সাথে রোযা রাখলেন এবং সাহাবাদেরকেও এ রোযা রাখতে আদেশ করলেন। তখন এ রোযা রাখা ফরয ছিল।

### ❖ তৃতীয় পর্যায় :-

অতঃপর রোযার বিধান নিয়ে কুরআন কারীমের উপর্যুক্ত আয়াত অবতীর্ণ হল। কিন্তু শুরুতে তখনও রোযা পূর্ণ আকারে ফরয ছিল না। যার ইচ্ছা সে রোযা রাখত এবং যার ইচ্ছা সে না রেখে মিসকীনকে খাদ্য দান করত। তবে রোযা রাখাটাই আল্লাহর নিকট অধিক পছন্দনীয় ছিল। এ ব্যাপারে মহান আল্লাহর নির্দেশ ছিল :-

﴿وَعَلَى الَّذِينَ يُطِيقُونَهُ فِدْيَةٌ طَعَامَ مِسْكِينٍ فَمَنْ تَطَوَّعَ خَيْرًا فَهُوَ

خَيْرٌ لَهُ وَأَنْ تَصُومُوا خَيْرٌ لَكُمْ إِنْ كُنْتُمْ تَعْلَمُونَ﴾

<sup>1</sup> (বুখারী ১৮৯৩, মুসলিম ১১২৫)

অর্থাৎ, যারা রোযা রাখার সামর্থ্য থাকা সত্ত্বেও রোযা রাখতে চায় না, তারা এর পরিবর্তে একজন মিসকীনকে খাদ্য দান করবে। যে ব্যক্তি খুশীর সাথে সৎকর্ম করে, তা তার জন্য কল্যাণকর হয়। আর যদি তোমরা রোযা রাখ, তাহলে তা তোমাদের জন্য বিশেষ কল্যাণপ্রসূ; যদি তোমরা উপলব্ধি করতে পার। (কুরআনুল কারীম ২/১৮৪)

### ❖ চতুর্থ পর্যায় ৪-

অতঃপর সন ২ হিজরীর শা'বান মাসের ২য় তারীখ সোমবারে (১) প্রত্যেক সামর্থ্যবান ভারপ্রাপ্ত মুসলিমের পক্ষে পূর্ণ রমাযান (২) মাসের রোযা ফরয করা হল। এ ব্যাপারে মহান আল্লাহ বলেন,

﴿شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ

الهُدَى وَالْفُرْقَانِ فَمَنْ شَهِدَ مِنْكُمُ الشَّهْرَ فَلْيَصُمْهُ﴾

অর্থাৎ, রমাযান মাস; যে মাসে মানুষের দিশারী এবং সৎপথের স্পষ্ট নিদর্শন ও সত্যাসত্যের পার্থক্যকারীরূপে কুরআন অবতীর্ণ হয়েছে। অতএব তোমাদের মধ্যে যে কেউ এ মাস পাবে সে যেন এ মাসে রোযা রাখে। (কুরআনুল কারীম ২/১৮৫)

সুতরাং সামর্থ্যবান ভারপ্রাপ্ত (জ্ঞানসম্পন্ন সাবালক) গৃহবাসীর জন্য মিসকীনকে খাদ্যদানের বিধান রহিত হয়ে গেল এবং বৃদ্ধ ও চিররোগীর জন্য তা বহাল রাখা হল। অনুরূপ (কিছু উলামার মতে) এ বিধান গর্ভবতী ও দুগ্ধদাত্রী মহিলার জন্যও বহাল করা হল; যারা গর্ভকালে বা দুগ্ধদান কালে রোযা রাখলে তার সন্তানের বিশেষ ক্ষতি হবে বলে আশঙ্কা করে।

মুসলিমদের প্রতি আল্লাহর বিশেষ রহমত এই ছিল যে, রোযার বহু কষ্টভার তিনি লাঘব করে দিয়েছেন। যেমন; শুরুৰ দিকে এ রোযা ফরয ছিল এশার নামায বা রাত্রে ঘুমিয়ে যাওয়ার পর থেকে পর দিন সূর্যাস্ত পর্যন্ত। অর্থাৎ, রাত্রে একবার ঘুমিয়ে পড়লে পানাহার ও স্ত্রী-সহবাস হারাম হয়ে যেত। এতে মুসলিমরা বড় কষ্টবোধ করতে লাগলেন। সময় লম্বা থাকার কারণে তাঁরা বড় দুর্বল হয়ে পড়তেন। অতঃপর মহান আল্লাহর

1 ফিকহস সুন্নাহ ১/৩৮৩ দ্রঃ

2 রমাযান কথাটি আরবী রামাযান-এর অপভ্রংশ ও বাংলায় চলিত রূপ।

তরফ থেকে সে ভার হাঙ্কা করা হল। পরিশেষে ফজর উদয়কাল থেকে শুরু করে সূর্যাস্ত কাল পর্যন্ত হল রোযা রাখার সময়।

আনসার গোত্রের সিরমাহ নামক এক ব্যক্তি রোযা রাখা অবস্থায় সন্ধ্যা পর্যন্ত কাজ করতেন। একদিন তিনি বাড়ি ফিরে এসে এশার নামায পড়ে ঘুমিয়ে পড়লেন এবং কোন প্রকার পানাহার না করেই তাঁর ফজর হয়ে গেল। সুতরাং এ অবস্থাতেই পরদিন রোযা রাখলেন। আল্লাহর রসূল ﷺ তাঁকে সেই কঠিন দুর্বল ও ক্লিষ্ট অবস্থায় দেখে জিজ্ঞাসা করলেন, “কি ব্যাপার! আমি তোমাকে বড় দুর্বল দেখছি যে?” তিনি বললেন, ‘হে আল্লাহর রসূল! আমি গতকাল কাজ করার পর যখন এলাম তখন এলাম। তারপর (পরিশ্রান্ত হয়ে) শুয়ে পড়তেই ঘুমিয়ে গেলাম। তারপর ফজর হয়ে গেলে আবার রোযা রেখে নিলাম।’<sup>1</sup>

হযরত উমার (رضي الله عنه) এক রাতে ঘুমিয়ে যাওয়ার পর উঠে স্ত্রী-মিলন করে ফেললেন। তিনি মহানবী ﷺ-এর নিকট এসে ঘটনা উল্লেখ করলেন। অতঃপর এই সবের পরিপ্রেক্ষিতে আল্লাহর বিধান অবতীর্ণ হল,

﴿أَحِلَّ لَكُمْ لَيْلَةَ الصِّيَامِ الرَّفَثُ إِلَى نِسَائِكُمْ هُنَّ لِبَاسٍ لَكُمْ وَأَنْتُمْ لِبَاسٌ لَهُنَّ عَلِمَ اللَّهُ أَنَّكُمْ كُنْتُمْ تَخْتَانُونَ أَنْفُسَكُمْ فَتَابَ عَلَيْكُمْ وَعَفَا عَنْكُمْ فَالآنَ بَاشِرُوهُنَّ وَابْتَغُوا مَا كَتَبَ اللَّهُ لَكُمْ وَكُلُوا وَاشْرَبُوا حَتَّى يَبَيِّنَ لَكُمْ الْحَيْضُ الْأَبْيَضُ مِنَ الْحَيْضِ الْأَسْوَدِ مِنَ الْفَجْرِ ثُمَّ أَتَمُّوا الصِّيَامَ إِلَى اللَّيْلِ﴾

অর্থাৎ, রোযার রাতে তোমাদের জন্য স্ত্রী-সম্বোগ হালাল করা হয়েছে। তারা তোমাদের পোষাক এবং তোমরা তাদের পোষাক। আল্লাহ জানতেন যে, তোমরা আত্ম-প্রতারণা করছ। তাই তো তিনি তোমাদের প্রতি সদয় হয়েছেন এবং তোমাদের অপরাধ ক্ষমা করে দিয়েছেন। অতএব এখন তোমরা তোমাদের স্ত্রীদের সঙ্গে সহবাস করতে পার এবং আল্লাহ তোমাদের জন্য যা (সন্তান, শবেকদর, সকল বৈধ বস্তু বা আল্লাহর তরফ

<sup>1</sup> (বুখারী ১৯১৫, সহীহ আবু দাউদ ২০২৯নং)

থেকে কোন কিছুর ব্যাপারে অব্যাহতি) লিখে রেখেছেন তা কামনা কর। আর তোমরা পানাহার কর; যতক্ষণ রাত্রির কালো রেখা হতে ফজরের সাদা রেখা স্পষ্টরূপে তোমাদের নিকট প্রকাশ না পায়। অতঃপর রাত পর্যন্ত রোযা পূর্ণ কর। (কুরআনুল কারীম ২/১৮৭)<sup>1</sup>

## সাধারণভাবে রোযার ফযীলত

সাধারণভাবে রোযার ফযীলত বর্ণনা করে বহু হাদীস বর্ণিত হয়েছে। নিম্নে কতিপয় সহীহ হাদীস প্রণিধানযোগ্য :-

১। হযরত আবু হুরাইরা (رضي الله عنه) কর্তৃক বর্ণিত, তিনি বলেন, আল্লাহর রসূল (ﷺ) বলেছেন, “আল্লাহ আয্যা অজাল্ল বলেন, ‘আদম সন্তানের প্রত্যেক আমল তার নিজের জন্য; তবে রোযা নয়, যেহেতু তা আমারই জন্য এবং আমি নিজেই তার প্রতিদান দেব।’ রোযা ঢাল সুরুপ। সুতরাং তোমাদের কারো রোযার দিন হলে সে যেন অশ্লীল না বকে ও ঝগড়া-হৈচৈ না করে; পরন্তু যদি তাকে কেউ গালাগালি করে অথবা তার সাথে লড়তে চায়, তবে সে যেন বলে, ‘আমি রোযা রেখেছি, আমার রোযা আছে।’ সেই সত্তার শপথ যার হাতে মুহাম্মদের প্রাণ আছে! নিশ্চয়ই রোযাদারের মুখের দুর্গন্ধ আল্লাহর নিকট কস্তুরীর সুবাস অপেক্ষা অধিকতর সুগন্ধময়। রোযাদারের জন্য রয়েছে দু’টি খুশী, যা সে লাভ করে; যখন সে ইফতার করে তখন ইফতারী নিয়ে খুশী হয়। আর যখন সে তার প্রতিপালকের সাথে সাক্ষাৎ করবে তখন তার রোযা নিয়ে খুশী হবে।<sup>2</sup>

২। হযরত হুযাইফা (رضي الله عنه) বলেন, আমি নবী (ﷺ)-কে বলতে শুনেছি যে, “মানুষের পরিবার, ধন-সম্পদ ও প্রতিবেশীর ব্যাপারে ঘটিত বিভিন্ন ফিতনা ও গোনাহর কাফ্ফারা হল নামায, রোযা ও সদকাহু।”<sup>3</sup>

৩। হযরত সাহ্ল বিন সা’দ (رضي الله عنه) হতে বর্ণিত, নবী (ﷺ) বলেন, জান্নাতের এক প্রবেশদ্বার রয়েছে, যার নাম ‘রাইয়ান।’ কিয়ামতের দিন ঐ দ্বার দিয়ে রোযাদারগণ প্রবেশ করবে। তারা ছাড়া তাদের সাথে আর

<sup>1</sup> (সহীহ আবু দাউদ ২০২৮নং, তাফসীর ইবনে কাসীর ১/২৯১, আহকামুস সাওমি অল-ইতিকাফ, আবু সারী মঃ আব্দুল হাদী ২৩-২৫পৃঃ দ্রঃ)

<sup>2</sup> (বুখারী ১৯০৪, মুসলিম ১১৫১ নং)

<sup>3</sup> (বুখারী ১৮৯৫, মুসলিম ১৪৪নং)

কেউই ঐ দ্বার দিয়ে প্রবেশ করবে না। বলা হবে, ‘কোথায় রোযাদারগণ?’ সুতরাং তারা ঐ দরজা দিয়ে (জান্নাতে) প্রবেশ করবে। অতঃপর যখন তাদের সর্বশেষ ব্যক্তি প্রবেশ করবে, তখন সে দ্বার রুদ্ধ করা হবে। ফলে সে দ্বার দিয়ে আর কেউই প্রবেশ করতে পারবে না।”<sup>1</sup>

৪। হযরত আবু হুরাইরা (رضي الله عنه) কর্তৃক বর্ণিত, তিনি বলেন, আল্লাহর রসূল (ﷺ) বলেন, “--- আর যে ব্যক্তি রোযা রাখায় অভ্যাসী হবে, তাকে (কিয়ামতের দিন) ‘রাইয়ান’ দুয়ার হতে (জান্নাতের দিকে) আহ্বান করা হবে। ---”<sup>2</sup>

৫। হযরত আবু সাঈদ (رضي الله عنه) কর্তৃক বর্ণিত, তিনি বলেন, আল্লাহর রসূল (ﷺ) বলেন, ‘যে বান্দা আল্লাহর রাস্তায় একদিন মাত্র রোযা রাখবে সেই বান্দাকে আল্লাহ ঐ রোযার বিনিময়ে জাহান্নাম থেকে ৭০ বছরের পথ পরিমাণ দূরত্বে রাখবেন।’<sup>3</sup>

৬। হযরত আমর বিন আবাসাহ (رضي الله عنه) কর্তৃক বর্ণিত, তিনি বলেন, আল্লাহর রসূল (ﷺ) বলেছেন, “যে ব্যক্তি আল্লাহর রাস্তায় একদিন মাত্র রোযা রাখবে সেই ব্যক্তি থেকে জাহান্নাম ১০০ বছরের পথ পরিমাণ দূরে সরে যাবে।”<sup>4</sup>

৭। হযরত আবু উমামাহ (رضي الله عنه) হতে বর্ণিত, মহানবী (ﷺ) বলেন, “যে ব্যক্তি আল্লাহর পথে একটি রোযা রাখবে, আল্লাহ সেই ব্যক্তি ও দোষখের মাঝে একটি এমন প্রতিরক্ষার খাদ তৈরী করে দেবেন; যা আকাশ ও পৃথিবীর মধ্যবর্তী জায়গা সমপরিমাণ চওড়া।”<sup>5</sup>

৮। হযরত উসমান বিন আবুল আস কর্তৃক বর্ণিত, মহানবী (ﷺ) বলেন, “রোযা হল দোষখ থেকে বাঁচার জন্য ঢালস্বরূপ; যেমন যুদ্ধের সময় নিজেকে রক্ষা করার জন্য তোমাদের ঢাল হয়ে থাকে।”<sup>6</sup>

<sup>1</sup> (বুখারী ১৮৯৬ নং, মুসলিম ১১৫২ নং, নাসাঈ, তিরমিযী)

<sup>2</sup> (বুখারী ১৮৯৭, মুসলিম ১০২৭নং)

<sup>3</sup> (বুখারী ২৮৪০ নং, মুসলিম ১১৫৩ নং, তিরমিযী, নাসাঈ)

<sup>4</sup> (নাসাঈ, সহীহুল জামেইস সাগীর, আলবানী ৬৩৩০নং উক্বাহ হতে, ত্বাবারানী কাবীর ও আওসাতু, সহীহ তারগীবঃ ৭৫ নং)

<sup>5</sup> (তিরমিযী, সহীহুল জামেইস সাগীর, আলবানী ৬৩৩৩নং)

<sup>6</sup> (আহমাদ, মুসনাদ, নাসাঈ, ইবনে মাজাহ, সহীহুল জামেইস সাগীর, আলবানী ৩৮৭৯নং)

৯। হযরত আবু হুরাইরা رضي الله عنه কর্তৃক বর্ণিত, আল্লাহর রসূল ﷺ বলেন, “রোযা হল জাহান্নাম থেকে রক্ষার জন্য ঢাল ও দুর্ভেদ্য দুর্গস্বরূপ।”<sup>1</sup>

১০। হযরত আব্দুল্লাহ বিন আমর رضي الله عنه কর্তৃক বর্ণিত, আল্লাহর রসূল ﷺ বলেন, “কিয়ামতের দিন রোযা এবং কুরআন বান্দার জন্য সুপারিশ করবে। রোযা বলবে, ‘হে আমার প্রতিপালক! আমি ওকে পানাহার ও যৌনকর্ম থেকে বিরত রেখেছিলাম। সুতরাং ওর ব্যাপারে আমার সুপারিশ গ্রহণ কর।’ আর কুরআন বলবে, ‘আমি ওকে রাত্রে নিদ্রা থেকে বিরত রেখেছিলাম। সুতরাং ওর ব্যাপারে আমার সুপারিশ গ্রহণ কর।’ নবী ﷺ বলেন, “অতএব ওদের উভয়ের সুপারিশ গৃহীত হবে।”<sup>2</sup>

১১। হযরত আবু উমামাহ رضي الله عنه হতে বর্ণিত, তিনি বলেন, আমি বললাম, ‘হে আল্লাহর রসূল! আমাকে এমন কোন আমলের আঙ্গা করুন; যদ্বারা আল্লাহ আমাকে লাভবান করবেন।’ (অন্য এক বর্ণনায় আছে, ‘যার মাধ্যমে আমি জান্নাত যেতে পারব।’) তিনি বললেন, তুমি রোযা রাখ, কারণ এর সমতুল কিছু নেই।’ পুনরায় আমি বললাম, হে আল্লাহর রসূল! আমাকে কোন আমলের আদেশ করুন।’ তিনিও পুনঃ ঐ কথাই বললেন, “তুমি রোযা রাখ, কারণ এর সমতুল কিছু নেই।”<sup>3</sup>

১২। হযরত হুযাইফা رضي الله عنه হতে বর্ণিত, তিনি বলেন, নবী ﷺ আমার বুক হেলান দিয়ে ছিলেন। সেই সময় তিনি বললেন, “লা ইলাহা ইল্লাল্লাহ” বলার পর যে ব্যক্তির জীবনের পরিসমাপ্তি ঘটবে সে জান্নাতে প্রবেশ করবে। আল্লাহর সন্তুষ্টিলাভের উদ্দেশ্যে একদিন রোযা রাখার পর যে ব্যক্তির জীবনের পরিসমাপ্তি ঘটবে সে জান্নাতে প্রবেশ করবে। আর আল্লাহর সন্তুষ্টিলাভের আশায় কিছু সাদকাহ করার পর যে ব্যক্তির জীবনের পরিসমাপ্তি ঘটবে সেও জান্নাত প্রবেশ করবে।”<sup>4</sup>

<sup>1</sup> (আহমাদ, মুসনাদ, বাইহাকী ওআবুল ঈমান, সহীহুল জামেইস সাগীর, আলবানী ৩৮৮০নং)

<sup>2</sup> (আহমাদ, মুসনাদ, ত্বাবারানী, মু'জাম কাবীর, হাকেম, মুত্তাদরাক, ইবনে আব্বিদুনয়্যার 'কিতাবুল জু', সহীহ তারগীব, আলবানী ৯৬৯ নং)

<sup>3</sup> (নাসাঈ, ইবনে খুযাইমাহ, সহীহ, হাকেম, মুত্তাদরাক, সহীহ তারগীব, আলবানী ৯৭৩ নং)

<sup>4</sup> (আহমাদ, মুসনাদ, সহীহ তারগীব, আলবানী ৯৭২ নং)

## রোযার উদ্দেশ্য, লক্ষ্য, উপকারিতা ও যৌক্তিকতা

মহান আল্লাহর ৯৯ এর অধিক সুন্দর নামাবলীর অন্যতম নাম হল ‘আল-হাকীম।’ ‘আল-হাকীম’ অর্থ হিকমত-ওয়ালা, বিজ্ঞানময়, প্রজ্ঞাময়। আর হিকমত ও প্রজ্ঞা হল সর্বকর্ম যথাযোগ্যভাবে নৈপুণ্যের সাথে সম্পাদন করা। মহান আল্লাহর এই নামের দাবী এই যে, তিনি যা কিছু সৃষ্টি করেছেন অথবা মানুষের জন্য বিধিবদ্ধ করেছেন তার প্রত্যেকটার পশ্চাতে আছে পরিপূর্ণ যুক্তি ও হিকমত; তা কেউ বুঝতে সক্ষম হোক অথবা অক্ষম।

যে রোযা আল্লাহ তাআলা বান্দার উপর ফরয ও বিধিবদ্ধ করেছেন তার মাঝে রয়েছে অভাবনীয় যৌক্তিকতা ও অচিন্তনীয় উপকারিতা। যেমনঃ-

১। রোযা হল এক এমন ইবাদত, যার মাধ্যমে বান্দা প্রভুর নৈকট্যালাভ করতে সক্ষম হয়। এতে সে প্রকৃতিগতভাবে যে জিনিস ভালোবাসে তা বর্জন করে; বর্জন করে সকল প্রকার পানাহার ও যৌনক্রিয়া। আর এর মাধ্যমে সে নিজ প্রতিপালকের সন্তুষ্টি কামনা করে। আশা করে পরকালের সাফল্য ও বেহেশতলাভ। এতে এই কথাই স্পষ্ট হয় যে, সে নিজের প্রিয় বস্তুর উপর প্রভুর প্রিয় বস্তুকে প্রাধান্য দেয় এবং ইহকালের জীবনের উপর পরকালের জীবনকেই শ্রেষ্ঠত্ব দেয়।

২। রোযাদার যথানিয়মে রোযা পালন করলে রোযা তাকে মুত্তাকী ও পরহেযগার বানাতে সহায়ক হয়। তার জীবন পথে তাকওয়া ও পরহেযগারীর আলো বিচ্ছুরিত হয়। মহান আল্লাহ বলেন, “হে ঈমানদারগণ! তোমাদের উপর রোযা ফরয করা হল, যেমন তোমাদের পূর্ববর্তী উম্মতের উপর ফরয করা হয়েছিল। যাতে তোমরা পরহেযগার হতে পার।” (কুরআনুল কারীম ২/১৮৩)

সুতরাং রোযাদার রোযা রেখে তার জীবনের প্রত্যেক চিন্তা, কথা ও কর্মে ‘তাকওয়া’ আনবে -এটাই বাঞ্ছিত। আর ‘তাকওয়া’ হল সেই আল্লাহ-ভীতির নাম, যার মাধ্যমে বান্দা তাঁর সকল আদেশ যথাসাধ্য পালন করে চলবে এবং যাবতীয় নিষিদ্ধ কর্ম থেকে সুদূরে থাকবে। বলা বাহুল্য, এটাই হল রোযার মহান উদ্দেশ্য ও প্রধান লক্ষ্য। পানাহার ও যৌনক্রিয়া নিষিদ্ধকরণের মাধ্যমে মানুষকে বৃথা কষ্ট দেওয়া রোযার উদ্দেশ্য নয়। প্রিয় নবী ﷺ বলেন, “যে ব্যক্তি রোযা রেখে মিথ্যা কথা ও

তার উপর আমল ত্যাগ করতে পারল না, সে ব্যক্তির পানাহার ত্যাগ করার মাঝে আল্লাহর কোন প্রয়োজন নেই।”<sup>1</sup>

৩। রোযা আত্মাকে তরবীয়ত দান করে, চরিত্রকে সত্য ও আদর্শভিত্তিক করে গড়ে তোলে এবং রোযাদারের আচরণে উৎকৃষ্টতার স্থায়িত্ব আনয়ন করে। মুসলিমের স্বভাব-প্রকৃতিতে রোযা গভীরভাবে প্রভাব বিস্তার করে। রোযার সংশোধনী বার্তা তার হৃদয়-মনে তাসীর রেখে যায়। রোযাদারের অন্তরে এমন জাগরণ সৃষ্টি করে এবং তার মনের দুয়ারে এমন অতন্দ্র প্রহরী খাড়া করে দেয় যে, সে নিজের আত্মাকে নিয়ন্ত্রণে রাখতে সক্ষম হয় এবং এই প্রহরীর চোখে ফাঁকি দিয়ে কোনও নৈতিকতা-বিরোধী কর্ম করতে ইচ্ছা ও চেষ্টাও করতে পারে না।

এটা কি করে হতে পারে যে, রোযাদার তার প্রতিপালকের নিকট সত্যবাদিতার পরিচয় দেবে, অথচ মানুষের সঙ্গে মিথ্যা বলবে? নিজের রোযায় আন্তরিকতা রাখবে, অথচ নিজ সমাজের সঙ্গে ধোকাবাজী ও কপটতা প্রদর্শন করবে? ইখলাস ও আন্তরিকতা একটি সামগ্রিক বস্তু; যা ভাগাভাগি হয় না। যার সর্বোচ্চ পর্যায় ও সারাংশ হল সৃষ্টিকর্তা অন্তর্যামী আল্লাহর সাথে আন্তরিকতা ও বিশ্বদ্বিগততা। সুতরাং যে ব্যক্তির আল্লাহর সাথে আন্তরিকতা থাকবে, সে ব্যক্তির ক্ষেত্রে অসম্ভব যে, সে মানুষকে ধোকা দেবে, আমানতে খেয়ানত করবে, অপরকে ঠকিয়ে খাবে, চুরি করবে, যুলম করবে অথবা অপরকে কষ্ট দেবে। পক্ষান্তরে যদি কারো চক্রান্তে পড়ে বা ভুলক্রমে এ ধরনের কোন পাপ করেই বসে, তাহলে সাথে সাথে সে সুপথে ফিরে আসে, আল্লাহর নিকট তওবা করে, অনুতপ্ত হয়, লজ্জিত হয় সীমাহীন।

সুতরাং রোযা হল একটি সুদৃঢ় ভিত্তির উপর সুচরিত্র গঠনের উপকরণ এবং তা সমৃদ্ধকরণের জন্য আভ্যন্তরীণ এক মৌলিক উপাদান। আর বিদিত যে, বাহ্যিক সৌন্দর্যের বাহার কোন মূল্য রাখে না; যদি না অভ্যন্তর সুদৃঢ় ও মজবুত হয়। তাই রোযাদারের জীবনে তার আখলাক-চরিত্র স্থায়িত্ব, স্থিতিশীলতা, বর্ধনশীলতা ও শ্রীবৃদ্ধিশীলতার গুণাবলী গ্রহণ করে

<sup>1</sup> (বুখারী ৬০৫৭, ইবনে মাজাহ ১৬৮৯, আহমাদ, মুসনাদ ২/৪৫২, ৫০৫, ফুসুলুন ফিস-সিয়ামি অত-তারাবীহি অয-যাকাহ ৬-৭৭৫)



থাকে। কারণ, তার সকল আচরণ ভিতর ও বাইরে থেকে নিয়ন্ত্রিত ও সুরক্ষিত হয়ে যায়।<sup>1</sup>

৪। রোযা রোযাদারের আচার-ব্যবহারকে সুন্দর করার কাজে বড় সক্রিয় ভূমিকা পালন করে থাকে। পূর্ণ একটি মাস ধরে তাকে পাপ থেকে দূরে রাখে, নিষিদ্ধ ও হারাম বস্তু থেকে নিরাপদে রাখে। বরং রোযা তাকে এক মহান ইবাদতে মশগুল রাখে, হীনতা ও নীচতা হতে রক্ষা করে, প্রত্যেক নোংরামীর বিরুদ্ধে সংগ্রাম করে। সুতরাং সে না চুগলী করে, না গীবত। না মিথ্যা বলে, না অশ্লীল। না ফিতনা সৃষ্টি করে, না ফাসাদ। না অসার বকে, না ফালতু। কোন প্রকারের পাপাচরণ তার দ্বারা সংঘটিত হয় না। ফলে প্রকৃত রোযাদার রোযার পরেও একটি নিষ্পাপ ও পবিত্র মানুষের মত যাবতীয় সচরিত্রতার অলঙ্কারে ভূষিত হয়ে সুখময় জীবন-যাপন করতে পারে।<sup>2</sup>

৫। রোযা মন ও প্রবৃত্তিকে দমন ও নিয়ন্ত্রণ করার অনুশীলন দেয়। জিতেন্দ্রিয় ও সংযমী হতে উদ্বুদ্ধ করে। ফলে রোযাদার তার মন ও প্রবৃত্তিকে সেই কাজে ব্যবহার করতে পারে; যাতে ইহ-পারলৌকিক সকল প্রকার মঙ্গল ও কল্যাণ নিহিত আছে। আর এমন আচরণ ও কর্ম থেকে তাকে দূরে রাখে; যাতে সে একটি ইন্দ্রিয়সেবী ও পাশবিক গুণসম্পন্ন মানুষ বলে পরিচিত হতে পারে; যেখানে সে কামনা-বাসনা ও লালসার প্রবণতা থেকে তাকে রক্ষতে সক্ষম হয় না।

সুতরাং রোযা সেই মন্দপ্রবণ আত্মার বিরুদ্ধে লড়ায়ে বিজয়ী হতে মুসলিমকে সার্বিক সহযোগিতা করে, যে আত্মা সর্বদা হারাম কাজে লিপ্ত হতে চায়, অবৈধভাবে কাম-লালসা চরিতার্থ করতে চায়। রোযা রোযাদারের ইচ্ছাশক্তিকে সর্বপ্রকার পাপ ও কুপ্রবৃত্তির স্পর্শ থেকে দূরে থাকার 'ট্রেনিং' দেয়। রোযার মাঝে রয়েছে আত্মসংযম এবং কুপ্রবৃত্তির দমন।

আধুনিক যুগের মানুষ অধিকাংশে নিজ কামনা-বাসনার কাছে বড় দুর্বল, কুপ্রবৃত্তি ও মন্দ-প্রবণ খেয়ালখুশীর বশীভূত। আর মনকে সবল ও সুদৃঢ় করতে রোযা ছাড়া আর অন্য কোন উপায়-উপকরণ নেই। কারণ, রোযাদার অত্যন্ত ক্ষুৎ-পিপাসায় কাতর থাকা সত্ত্বেও পানাহার বর্জন করে

<sup>1</sup> (ফাইযঃ ২২৪ পৃঃ)

<sup>2</sup> (সাওমু রামাযান ৪০ পৃঃ)

থাকে। আর নিঃসন্দেহে এ কাজে আত্মবিশ্বাস ও আত্মনিয়ন্ত্রণ-ক্ষমতা সৃষ্টি হয় এবং সর্বকাজে মনোবল প্রবল ও সুদৃঢ় হয়।

৬। রোযা রোযাদারকে কুঅভ্যাসের দাসত্ব থেকে মুক্তিদান করে। এমন বহু মানুষ আছে, যারা এমন বহু নোংরা অভ্যাসে অভ্যাসী হয়ে পড়ে এবং তার ফাঁদ থেকে বের হওয়ার কোন পথ খুঁজে পায় না। কিন্তু রোযা এলে তাদেরকে দেখা যায় যে, তারা তাদের সে সমস্ত কুঅভ্যাসকে পরিপূর্ণরূপে বর্জন করে ফেলেছে।

বলা বাহুল্য, এটাই হয় তাদের জন্য সুবর্ণ-সুযোগ; যার মাঝে তাদের সেই সকল মন্দ অভ্যাসের পঞ্জা থেকে নিজেদেরকে সহজ উপায়ে স্বাধীন করে নিতে পারে, যে সকল অভ্যাস তাদের মানসিক দুশ্চিন্তা ও ব্যাধির একমাত্র কারণ।<sup>1</sup>

অতএব সেই সকল রোযাদারগণ যারা ধূমপানে অভ্যাসী; যাদের অবৈধ বিড়ি-সিগারেট বিনা ৩০ মিনিটও অতিবাহত হয় না, অথবা তা পান না পর্যন্ত পায়খানাও হয় না, যাদের দৈনিক ১ প্যাকেট সিগারেট পানে তাদের ৫০ বছর জীবনে প্রায় ১ লাখ ৮২ হাজার ৫০০ টাকা এবং ১৫২০৮ ঘন্টা ২০ মিনিট সময় অপচয় হয়, তাদের উচিত, রোযার এই পবিত্র অবসরে এই শ্রেণীর 'বিষপান' চিরদিনের জন্য পরিত্যাগ করা। কারণ, এ 'সুখটান' এমন 'অগ্নিবাণ' যে, তা মানুষের সুস্বাস্থ্য, দেহ, অর্থ, ধীন, দুনিয়া ও আখেরাতের জন্য বড় ক্ষতিকর। যে মানুষ ১২/১৩ ঘন্টা আল্লাহর ওয়াস্তে তা বর্জন করে থাকতে পারে, সে মানুষ আল্লাহরই ভয়ে বাকী সময় পান না করলেও থাকতে পারবে। আর যে ব্যক্তি আল্লাহর ওয়াস্তে কোন জিনিস বর্জন করবে, সে ব্যক্তি আল্লাহর ইচ্ছায় তার চাইতে উত্তম জিনিস অর্জন করবে। এটাই হল আল্লাহর রীতি। পরন্তু এ কোনক্রমেই উচিত নয় যে, রোযাদার সারাদিন হালাল জিনিস না খেয়ে রোযা রেখে পরিশেষে হারাম জিনিস দিয়ে রোযা খুলবে!<sup>2</sup>

৭। রোযার মাঝে রয়েছে আল্লাহর প্রতি সুদৃঢ় ঈমান রাখার সবিশেষ প্রশিক্ষণ। কারণ, রোযা হল গুণ্ড ইবাদত। যেহেতু মানুষ এ ইবাদতে মুনাফেকী রাখতে পারে না। ইচ্ছা করলে সে গোপনে খেতে বা পান করতে

<sup>1</sup> (সাওমু রামাযান ৪০পৃঃ)

<sup>2</sup> (ইতহাফ ৪২পৃঃ)

পারে, অথবা উপবাস থেকেও নিয়ত ভেঙ্গে ফেলতে পারে। সুতরাং নিছক আল্লাহর প্রতি সুদৃঢ় ঈমান ও সত্য ভয় না থাকলে প্রকৃতরূপে রোযা রাখা যায় না।

বলা বাহুল্য, রোযা হল এমন একটি আন্তরিক ইবাদত, যা বান্দা ও প্রভুর মাঝে একান্ত গুপ্ত। অতএব গোপনে পানাহার করার সামর্থ্য ও সুযোগ থাকা সত্ত্বেও তা না করা এই কথাই প্রমাণ করে যে, সে বান্দা নিঃসন্দেহে এই বলে অটল বিশ্বাস রাখে যে, মহান আল্লাহ তার গোপন সব কিছুই দেখেন ও জানেন। আর এখান থেকেই রোযাদারের মনে ইবাদতে সততা ও আমানতদারী সৃষ্টি হয়। তাইতো আল্লাহ তাআলা রোযাকে পৃথক বৈশিষ্ট্য দান করেছেন; বান্দার প্রত্যেক আমলের সওয়াবকে ১০ গুণ থেকে ৭০০ গুণ; বরং আরো অনেক অনেক গুণ বর্ধিত করে থাকেন। কিন্তু রোযা নয়। রোযাকে তিনি নিজের জন্য খাস করে নিয়েছেন। আর তার সওয়াবের পরিমাণ যে কত, তা তিনি ছাড়া অন্য কেউ জানে না।

মহানবী ﷺ বলেন, “আল্লাহ তাআলা বলেন, আদম সন্তানের প্রত্যেক আমল তার নিজের জন্য; তাতে তার সওয়াব ১০ থেকে ৭০০ গুণ বাড়িয়ে দেওয়া হয়। কিন্তু রোযা নয়। রোযা হল আমার জন্য। আর আমি নিজে তার প্রতিদান দেব।”<sup>1</sup>

৮। রোযা রোযাদারের মনে পরকালের প্রতি আগ্রহ ও উৎকর্ষা বৃদ্ধি করে। কারণ, সে আল্লাহর নিকট আখেরাতে যে সওয়াব ও প্রতিদান আছে তা পাওয়ার আশায় আগ্রহান্বিত হয়ে পার্থিব কিছু সুখ-উপভোগ থেকে বিরত থাকে। সে যে নিজিতে লাভ-নোকসান ওজন করে থাকে তা হল পারলৌকিক। রোযার দিনে পানাহার ও যৌনসুখ শুধু এই আশায় পরিহার করে যে, এতে সে আল্লাহর সন্তুষ্টি পাওয়ার সাথে সাথে কিয়ামতের দিন উত্তম প্রতিদান পাবে। সুতরাং এইভাবে রোযা রোযাদারের মনে পরকালের প্রতি ঈমান বদ্ধমূল করে, পরলোকের সাথে অন্তরকে জুড়ে রাখে এবং ক্ষণস্থায়ী এই ধরাধামের পার্থিব ভোগ-বিলাসে বিতৃষ্ণা সৃষ্টি করে; যে ভোগ-বিলাস অনেক সময় মানুষকে আখেরাতের কথা বিস্মৃত করে এই ধারণা দেয় যে, সে পৃথিবীতে অমর ও চিরকাল থাকবে।<sup>2</sup>

<sup>1</sup> (আহমাদ, মুসনাদ ২/৫০৩)

<sup>2</sup> (দুরুসু রামায়ান অকাফাত লিস-সায়েমীন ১০পৃঃ)

৯। রোযা পরিপূর্ণরূপে আল্লাহর নিকট আত্মসমর্পণ এবং তাঁর পূর্ণ দাসত্ব করার কথা শিক্ষা দেয়। রোযা মুসলিমকে প্রকৃত দাসত্বের অনুশীলন দেয়। তাই তো সে রাতের বেলায় খায়, পান করে। কারণ, তার প্রভু যে বলেছেন,

﴿وَكُلُوا وَاشْرَبُوا حَتَّى يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ﴾

অর্থাৎ, আর তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে।

(কুরআনুল কারীম ২/১৮৭)

বলা বাহুল্য, এ জন্যই ইফতার ও সেহরীর সময় খাওয়া হল সন্নত ও মুস্তাহাব এবং না খেয়ে একটানা পরপর কয়েকদিন রোযা রাখা মকরুহ। অতএব রোযা রাখার জন্য সেহরী খাওয়া এবং রোযার শেষে ইফতারী খাওয়া হল এক প্রকার আল্লাহর ইবাদত ও তাঁর নির্দেশের আনুগত্য।

তদনুরূপ ফজর উদয় হলে মুসলিম পানাহার সহ সেই সকল বস্তু ও বিষয় থেকে দূরে থাকে, যাতে রোযা নষ্ট করে ফেলে। আর এর মাঝেও সে একমাত্র আল্লাহরই দাত্ত্ব ও আনুগত্য করে। কারণ, তিনি বলেন,

﴿ثُمَّ أَتَمُّوا الصِّيَامَ إِلَى اللَّيْلِ﴾

অর্থাৎ, অতঃপর তোমরা রাত পর্যন্ত রোযা পূর্ণ কর।

(কুরআনুল কারীম ২/১৮৭)

সুতরাং এইভাবে মুসলিম মহান আল্লাহর পূর্ণ দাসত্ব ও আনুগত্যের উপর দীর্ঘ প্রশিক্ষণ লাভ করে থাকে।<sup>1</sup>

১০। রোযা মুসলিমের জন্য আল্লাহর এক প্রকার রহমত, করুণা ও অনুগ্রহ। মহান আল্লাহ মুসলিম জাতির প্রতি অনুগ্রহ ও করুণা প্রদর্শন করেই রোযা ফরয করেছেন। কারণ, এরই মাধ্যমে তিনি মুসলিমের পাপরাশি মার্জনা করে থাকেন, তার মর্যাদা উন্নীত করে থাকেন এবং বহুগুণ হারে তার সওয়াব বৃদ্ধি করে থাকেন।<sup>2</sup>

<sup>1</sup> (দুরুসু রামাযান অকাফাত লিস-সায়েমীন ১০পৃঃ)

<sup>2</sup> (ইতহাফ ৪১পৃঃ)

১১। রোযা হল গোনাহের কাফফারা। কারণ, নেকীর কাজ গোনাহর কাজের গোনাহ নাশ করে দেয়। আর রোযা হল বড় নেকীর কাজ। মহান আল্লাহ বলেন,

﴿إِنَّ الْحَسَنَاتِ يُذْهِبْنَ السَّيِّئَاتِ﴾

অর্থাৎ, নিশ্চয় পুণ্যরাশি (সওয়াবের কাজ) পাপরাশিকে দূরীভূত করে।

(কুরআনুল কারীম ১১/১১৪)

আর প্রিয় নবী ﷺ বলেন, “মানুষের পরিবার, ধন-সম্পদ ও প্রতিবেশী সংক্রান্ত পাপরাশিকে নামায, রোযা এবং সদকাহ মোচন করে দেয়।”<sup>১</sup> অর্থাৎ, মুসলিম যে গোনাহ তার পরিবারকে অন্যাযভাবে উচ্চবাচ্য করে, কষ্ট দিয়ে অথবা কোন বিষয়ে তাদের প্রতি ক্রটি ও অবহেলা প্রদর্শন করে, অথবা প্রতিবেশীকে কোন কথায় বা কাজে কোন প্রকার কষ্ট দিয়ে, অথবা আর্থিক কোন প্রকার ক্রটি ঘটিয়ে অথবা অনুরূপ অন্যান্য সাগীরা (ছোট) গোনাহ করে থাকে, সে সবকে তার নামায, রোযা এবং দান-খয়রাত মোচন করে দেয়।

পরন্তু প্রিয় নবী ﷺ বলেন, “যে ব্যক্তি ঈমান ও সওয়াবের আশা রেখে রমাযানের রোযা রাখে, তার পূর্বকার সকল গোনাহ মাফ হয়ে যায়।”<sup>২</sup>

হযরত আবু হুরাইরা (رضي الله عنه) হতে বর্ণিত, আল্লাহর রসূল ﷺ বলেন, “কাবীরাহ গোনাহ না করলে পাঁচ ওয়াস্ত নামায, এক জুমআহ থেকে অপর জুমআহ এবং এক রমাযান থেকে অন্য রমাযান -এর মধ্যবর্তীকালে সংঘটিত পাপসমূহের কাফফারা (প্রায়শ্চিত্ত)।”<sup>৩</sup>

তদনুরূপ রোযা হল কসম ভঙ্গার কাফফারা (জরিমানা)। (কুরআনুল কারীম ৫/৮৯) যিহারের কাফফারা। (কুরআনুল কারীম ৫৮/৪) কোন মুসলিমকে বা চুক্তিবদ্ধ কোন যিম্মীকে ভুলবশতঃ হত্যা করে ফেলার কাফফারা। (কুরআনুল কারীম ৪/৯২) ইহরামে নিষিদ্ধ কর্ম করে ফেলার কাফফারা। (কুরআনুল কারীম ২/১৯৬, ৫/৫) তামাত্তু' হজ্জের কুরবানী দিতে না পারলে তার কাফফারা। (কুরআনুল কারীম ২/১৯৬) ইত্যাদি।

<sup>১</sup> (বুখারী ১৭৯৬, মুসলিম ১৪৪নং)

<sup>২</sup> (বুখারী ৩৮, মুসলিম ৭৬০নং)

<sup>৩</sup> (আহমাদ, মুসনাদ, মুসলিম ২৩৩নং, তিরমিযী)

১২। রোযা রোযাদারের মনে ধৈর্য ও সহনশীলতা সৃষ্টি করে। কষ্টে ধৈর্য ধারণ ও সহনশীলতা অবলম্বন করতে অভ্যাসী বানায়। রোযা তাকে তার প্রিয় বস্তু ব্যবহার বর্জন করতে ধৈর্যের শিক্ষা দেয়। যেমন শিক্ষা দেয় কাম-দমন ও মনের যথেষ্টাচার দমন করার; যা নিশ্চয় সহজ কাজ নয়।

বলা বাহুল্য, রোযা পালনে রয়েছে ৩ প্রকার ধৈর্য। মহান আল্লাহর আনুগত্যে ধৈর্য, তাঁর হারামকৃত বস্তু পরিহার করার উপর ধৈর্য এবং তাঁর নির্ধারিত তকদীরের বালা-মসীবতের উপর ধৈর্য। এই ৩ প্রকার ধৈর্য যে বান্দার মাঝে একত্রিত হবে, সেই হবে ইহকালে পরম সুখী এবং পরকালে আল্লাহর ইচ্ছায় সে জান্নাতে প্রবেশ করবে। মহান আল্লাহ বলেন,

﴿إِنَّمَا يُؤْتِي الصَّابِرُونَ أَجْرَهُمْ بِغَيْرِ حِسَابٍ﴾

অর্থাৎ, ধৈর্যশীলদেরকে তো অপরিমিত পুরস্কার ও সওয়াব দান করা হবে।

(কুরআনুল কারীম ৩৯/১০)

এতে কোন সন্দেহ নেই যে, ক্ষুৎ-পিপাসা ও যৌনক্ষুধায় ধৈর্যধারণ করাই হল ধৈর্যের শেষ পর্যায়। সুতরাং যে ব্যক্তি এই শ্রেণীর ধৈর্য ধারণ করতে পারঙ্গম হবে, সে ব্যক্তির জন্য অন্য শ্রেণীর ধৈর্য ধারণ করা সহজ হয়ে যাবে। আর যে ব্যক্তি আল্লাহর সন্তুষ্টি লাভের উদ্দেশ্যে ধৈর্য ধারণ করবে, সে ব্যক্তি লাভ করবে শুভপরিণাম।

মহান আল্লাহ বলেন,

﴿وَالَّذِينَ صَبَرُوا ابْتِغَاءَ وَجْهِ رَبِّهِمْ وَأَقَامُوا الصَّلَاةَ وَأَنفَقُوا مِمَّا

رَزَقْنَاهُمْ سِرًّا وَعَلَانِيَةً وَيَدْرَأُونَ بِالْحَسَنَةِ السَّيِّئَةِ أُولَئِكَ لَهُمْ عُقْبَى

الدَّارِ - جَنَّاتٌ عَدْنٍ يَدْخُلُونَهَا﴾

“যারা তাদের প্রতিপালকের সন্তুষ্টিলাভের জন্য ধৈর্যকষ্ট বরণ করে, যথাযথভাবে নামায পড়ে, আমি যে রুখী তাদেরকে দান করেছি তা হতে গোপনে ও প্রকাশ্যে দান করে এবং যারা ভালো দ্বারা মন্দকে দূর করে- তাদেরই জন্য রয়েছে শুভ পরিণাম; (আদন) স্থায়ী বেহেশত, ওতে ওরা প্রবেশ করবে---।”

(কুরআনুল কারীম ১৩/২২-২৩)

১৩। রোযা হল ঢালস্বরূপ; দোযখ থেকে রক্ষার ঢালস্বরূপ।<sup>1</sup> একটি মাত্র রোযা জাহান্নামকে রোযাদার থেকে ৭০ বছরের পথ দূরে সরিয়ে দেয়।<sup>2</sup> সুতরাং যে ব্যক্তি পূর্ণ রমাযান মাসের রোযা রাখে এবং প্রত্যেক মাসে ৩টি রোযা অথবা আরো অন্যান্য নফল রোযা রাখে, সে ব্যক্তি থেকে দোযখ কত বছরের পথ দূরে সরে যায় তা অনুমেয়।

১৪। রোযা হল চরিত্রহীনতা ও ব্যভিচার ইত্যাদি অশ্লীলতা থেকে ঢালস্বরূপ। রোযা রোযাদারকে অবৈধ যৌনাচার থেকে হিফযতে রাখে, যেমন ঢাল মুজাহিদ (যোদ্ধা)কে শত্রুপক্ষের তীর ও তরবারির আঘাত থেকে রক্ষা করে থাকে।

হযরত আব্দুল্লাহ বিন মাসউদ (رضي الله عنه) কর্তৃক বর্ণিত, প্রিয় নবী (ﷺ) বলেন, “হে যুবকদল! তোমাদের মধ্যে যে ব্যক্তি (বিবাহের অর্থাৎ স্ত্রীর ভরণপোষণ ও রতিক্রিয়ার) সামর্থ্য রাখে সে যেন বিবাহ করে। কারণ, বিবাহ চক্ষুকে দস্তুরমত সংযত করে এবং লজ্জাস্থান হিফযত করে। আর যে ব্যক্তি ঐ সামর্থ্য রাখে না, সে যেন রোযা রাখে। কারণ, তা যৌনক্ষুধা উপশমকারী।”<sup>3</sup>

বলা বাহুল্য, যে যুবক বিবাহের খরচাদি বহন করতে সক্ষম নয়, সে যুবককে মহানবী এই নির্দেশ দিলেন যে, সে যেন তার কামক্ষুধা ও যৌন-উত্তেজনা প্রশমিত করতে রোযার সাহায্য নেয়। কারণ, রোযা উক্ত ক্ষুধা ও উত্তেজনা দমন ও নিবারণ করে। আর অনেকের অভিজ্ঞতা দ্বারা উক্ত নববী চিকিৎসা প্রমাণিত ও পরীক্ষিত যে, কামপীড়িত যুবকের জন্য যে কোনও সেব্য ঔষধ অপেক্ষা রোযাই হল উত্তম ও অব্যর্থ ঔষধ।

১৫। রোযা হল বেহেশতেগামী পথ। হযরত আবু উমামাহ (رضي الله عنه) জান্নাতে প্রবেশ করাবে এমন আমল প্রসঙ্গে যখন আল্লাহর নবী (ﷺ)-এর নিকট নির্দেশ চাইলেন, তখন তিনি তাঁকে বললেন, “তুমি রোযা রাখ। কারণ, তার মত অন্য কোন আমল নেই।”<sup>4</sup> তাছাড়া মহানবী (ﷺ) রোযাদারকে বেহেশতে ‘রাইয়ান’ নামক এক বিশেষ দরজা দিয়ে প্রবেশ

<sup>1</sup> (ভাবারানী, মু'জাম, সহীহুল জামেইস সাগীর, আলবানী ৩৮৬৭নং)

<sup>2</sup> (বুখারী ২৬৮৫, মুসলিম ১১৫৩নং)

<sup>3</sup> (বুখারী ৪৭৭৯, মুসলিম ১৪০০, মিশকাতুল মাসাবীহ ৩০৮০নং)

<sup>4</sup> (নাসাঈ ২২২১নং)

করার সুসংবাদ দিয়েছেন।<sup>1</sup> আর 'রাইয়ান' (তৃষ্ণাহীন) দ্বারা আমল অনুযায়ী রোযাদারের জন্য বড় উপযুক্ত। কারণ, রোযা রাখার ফলে দুনিয়াতে সে পিপাসায় কাতর হয়। তাই তারই বিনিময়ে পরকালে "সেই দ্বারে যে প্রবেশ করবে সে (বেহেশতী পানীয়) পান করবে। আর যে ব্যক্তি একবার তা পান করবে, সে ব্যক্তি আর কোন কালেও পিপাসিত হবে না।"<sup>2</sup>

১৬। রোযা পালনের মাধ্যমে রোযাদার তার মহান প্রভুর সন্তুষ্টি লাভ করে থাকে। যার জন্য তার উপবাস-জনিত মুখের দুর্গন্ধও আল্লাহর নিকট কষ্টকরী অপেক্ষাও অধিক সুগন্ধময় হয়!<sup>3</sup> অথচ খালি পেটে থাকা অবস্থায় মুখ থেকে বের হওয়া ঐ দুর্গন্ধ কোন মানুষ পছন্দ করে না; বরং ঘৃণাই করে থাকে। কিন্তু তা মহান স্রষ্টার নিকটে অতি পছন্দনীয়। কারণ, এ গন্ধ তাঁরই আনুগত্য ও সন্তুষ্টির পথে নির্গত হয়ে থাকে।

১৭। রোযাদার ব্যক্তির দুআ রোযা রাখা অবস্থায় কবুল হয়ে থাকে। প্রিয় নবী ﷺ বলেন, "তিন প্রকার দুআ আল্লাহর নিকট কবুল হয়ে থাকে; রোযাদারের দুআ, অত্যাচারিতের দুআ এবং মুসাফিরের দুআ।"<sup>4</sup>

১৮। রোযা কিয়ামতের ভীষণ বিচার দিনে রোযাদারের জন্য আল্লাহর দরবারে সুপারিশ করবে; বলবে, 'হে আমার প্রভু! আমি ওকে দিনের বেলায় পানাহার ও যৌনক্রিয়া থেকে বিরত রেখেছিলাম। সুতরাং ওর ব্যাপারে তুমি আমার সুপারিশ গ্রহণ করে নাও।' অতঃপর মহান প্রভু তার সে সুপারিশ গ্রহণ করে নেবেন।<sup>5</sup>

১৯। রোযা রোযাদারের জন্য ইহ-পরকালের খুশী ও সুখের হেতু। যেমন মহানবী ﷺ বলেন, "রোযাদারের জন্য রয়েছে ২টি খুশী; প্রথম খুশী হল ইফতার করার সময় এবং দ্বিতীয় খুশী হল প্রতিপালকের সাথে সাক্ষাতের সময়।"<sup>6</sup>

<sup>1</sup> (বুখারী ১৭৯৭, মুসলিম ১১৫২নং)

<sup>2</sup> (আহমাদ, মুসনাদ, নাসাই, সহীহুল জামেইস সাগীর, আলবানী ৫১৮৪নং)

<sup>3</sup> (বুখারী ১৮০৫, মুসলিম ১১৫১নং)

<sup>4</sup> (বাইহাকী ওআবুল ঈমান, ইবনে আসাকের, সিলসিলাহ সহীহাহ, আলবানী ১৭৯৭নং)

<sup>5</sup> (আহমাদ, মুসনাদ ২/১৭৪, হাকেম, মুত্তাদরাক ১/৫৫৪)

<sup>6</sup> (বুখারী ১০৮৫, মুসলিম ১১৫১নং)



রোযাদারের ইফতার করার সময় যে খুশী, তা হল সেই সুখ ও তৃপ্তির একটি নমুনায়াত্র; যা মুমিন ব্যক্তি নিজ প্রভুর আনুগত্য ও তাকওয়ার মাধ্যমে অর্জন করে থাকে। আর প্রকৃতপ্রস্তাবে এটাই হল আসল সুখ। এই সুখ ও তৃপ্তি দুইভাবে অনুভূত হয়ে থাকে :-

(ক) আল্লাহ তাআলা ঐ ইফতারের সময় রোযাদারের জন্য পানাহার বৈধ করে দিয়েছেন। আর নিঃসন্দেহে মানুষের প্রকৃতি এই যে, (বিশেষ করে খিদে থাকা অবস্থায়) খাবার দেখলে মন আনন্দে নেচে ওঠে। আর এ জন্যই তা বর্জন করা হল আল্লাহর ইবাদত।

(খ) সে মুহূর্তে রোযাদার তার একটি রোযা সম্পন্ন করে থাকে। সুতরাং আল্লাহর তওফীক অনুযায়ী সে সেদিনকার রোযা ও ইবাদত যে পালন ও পূর্ণ করতে পারল, তারই খুশী তার মনকে আন্দোলিত করে তোলে।<sup>1</sup>

পক্ষান্তরে সবচেয়ে বড় খুশী যা, তা রয়েছে পরকালে; যখন তাঁর সাথে সাক্ষাৎ হবে যার জন্য রোযাদার রোযা রেখে থাকে।

২০। রোযা হল পরহেয়গার ও নেক লোকদের ট্রেনিং-ময়দান; যার মাঝে আল্লাহর দেওয়া পৃথিবীর খেলাফতের দায়িত্ব পালন করার উপর নিজেদের কর্তব্যের বিভিন্ন ট্রেনিং নিয়ে থাকে। বলা বাহুল্য, রোযা দেহ-মনের জন্য একটি বড় রহমত। রোযার মাঝেই হৃদয় ও সকল চিন্তা-ভাবনা আল্লাহ তাআলার সাথে যুক্ত থাকে। সকল মনোবল তাঁর ভালোবাসা, আনুগত্য ও তাঁর পথে জিহাদের কাজে বর্ধিত ও সংবদ্ধ হয়ে থাকে। যার পশ্চাতে উদ্দেশ্য থাকে এই যে, আল্লাহর বাণীই সমুন্নত হোক এবং কাফেরদের বাণী হোক অবনত; সে কাফের যেমনই হোক, তার যে নাম বা উপাধি হোক অথবা যে প্রতীকই হোক।<sup>2</sup>

২১। রোযা হল কচি-কাঁচা শিশুর মনের মাটিতে ‘আমানতদারী’র বীজ রোপণ করার এক বাস্তবভিত্তিক ইতিবাচক ও কার্যকর প্রক্রিয়া। শিশু-কিশোরকে রোযা রাখতে অভ্যাসী করার সময় যখন তাকে পানাহার করতে নিষেধ করা হয় এবং খাবার ও পানি হাতের কাছে থাকা সত্ত্বেও সে শুধু এই বিশ্বাসে তা খেতে পারে না যে, এ নিষেধ হল আল্লাহর এবং তিনি তাকে দেখছেন। অথচ এ ব্যাপারে কেবল তার মন ও বিবেক ছাড়া অন্য কেউ পর্যবেক্ষক নেই। সুতরাং কাঁচা মনে আমানতদারী বদ্ধমূল করতে এই অনুভূতি অপেক্ষা অধিক প্রতিক্রিয়াশীল আর অন্য কি হতে পারে?

<sup>1</sup> (দুরুসু রামাযান অকাফাত লিস-সায়েমীন ১৭পৃঃ)

<sup>2</sup> (ফাইযঃ ১০৭পৃঃ)

যার ফলে শৈশব থেকেই শিশু আমানতদারীর মত এক নৈতিকতাপূর্ণ কর্মে অভ্যাসী হয়ে গড়ে ওঠে এবং বয়ঃপ্রাপ্ত হওয়ার পরেও তার যথার্থ হিফায়ত করতে ও তার মনে তা আজীবন বহাল রাখতে কোন প্রকার কষ্টবোধ করে না।<sup>1</sup>

২২। রোযা মানুষের হৃদয়কে নরম করে, আল্লাহ-প্রেমী করে এবং সর্বদা তাঁর যিকুর ও শুকুর করতে অভ্যাসী করে।

২৩। রোযা মানুষের মাঝে শয়তানের প্রবেশ ও প্রবাহ-পথ রুদ্ধ করে। এর ফলে তার দেহ-মনে শয়তানের আধিপত্য কমে যায়। পক্ষান্তরে যখনই মানুষ নিজ প্রবৃত্তির লাগাম ছেড়ে দেয়, তখনই শয়তান তা লুফে নিয়ে তাকে যেদিকে ইচ্ছা সেদিকে পরিচালিত করতে থাকে।<sup>2</sup>

২৪। রোযা হল আল্লাহর দেওয়া নেয়ামতের শুকুরিয়া আদায় করার অন্যতম মাধ্যম। কারণ, রোযা হল পানাহার ও যৌনমিলন থেকে বিরত থাকার নাম। আর মানুষের উপর আল্লাহর যে সকল বড় বড় নেয়ামত রয়েছে তার মধ্যে পানাহার ও যৌনমিলন হল অন্যতম। সুতরাং মানুষ এ নেয়ামতের কদর তখনই বুঝবে, যখন সে এ নেয়ামত থেকে নির্দিষ্টকাল পর্যন্ত বঞ্চিত থাকবে। কারণ, হারিয়ে না গেলে কোন নেয়ামতের কদর বুঝা যায় না। আর যখনই উক্ত নেয়ামতের কদর সে বুঝবে, তখনই তার অবশিষ্ট অধিকার আদায়ের জন্য শুকুরিয়া জ্ঞাপন করবে। পক্ষান্তরে নেয়ামতের শুকুর আদায় করা ফরয; শরীয়তে এবং বিবেক মতেও। রোযার আয়াতে মহান আল্লাহ ঐ কথার প্রতি ইঙ্গিত করেই বলেন,

(وَلِعَلَّكُمْ تَشْكُرُونَ) অর্থাৎ, যাতে তোমরা শুকুর আদায় কর।

(কুরআনুল কারীম ২/১৮৫)

রোযাদার যখন ক্ষুধার জ্বালা অনুভব করে, তখন সে সেই গরীব-নিঃস্বদের কষ্টের কথাও উপলব্ধি করে; যারা ক্ষুধার সময় পেটে এক মুঠো ann ও যোগাড় করতে সমর্থ নয়। এর ফলে ঐ উপলব্ধি তাকে তাদের জন্য দান-খয়রাত করে সহানুভূতি প্রকাশ করতে উদ্বুদ্ধ করে। কারণ, নিজের দেখা বিষয় শোনা বিষয়ের মত নয়। নিজের দেখা ও পরীক্ষা করা বিষয়ে অভিজ্ঞতালব্ধ প্রতীতি জন্মে অধিক। যেমন একজন ঘোড়সওয়ার লোক

<sup>1</sup> (সাতমু রামায়ান ৩৯ পৃঃ)

<sup>2</sup> (ফাইযঃ ১০৮ পৃঃ)

পথ চলার কষ্ট ততক্ষণ অনুভব করতে সক্ষম নয়; যতক্ষণ না সে নিজে পায় হেঁটে পথ চলে দেখেছে।<sup>1</sup>

২৫। রোযার মাধ্যমে রোযাদার ক্ষুধা-জনিত দুর্বলতার ফলে সে আল্লাহর কতটা মুখাপেক্ষী তা আন্দাজ করতে পারে। আর যে ব্যক্তি নিজের মাঝে নিজের দুর্বলতা চিনতে পারে, সে ব্যক্তির মিথ্যা অহংকার দূরীভূত হয়ে যায়। পরন্তু আল্লাহ সেই ব্যক্তির প্রতি রহম করেন, যে নিজের কদর নিজে জেনেছে।<sup>2</sup>

২৬। রোযাতে রোযাদার ফিরিশ্তামণ্ডলীর অনুরূপ কর্মে शामिल হতে পারে; যে ফিরিশ্তামণ্ডলী আল্লাহর কোন প্রকার অবাধ্যাচরণ করেন না। তাঁরা তাই করেন, যা করতে তাঁদের প্রতিপালক তাঁদেরকে আদেশ করেন। দিবারাত্র তাসবীহ পাঠ করতে থাকেন এবং কোন প্রকার ক্লাস্তিবোধ করেন না। যারা খান না এবং পানও করেন না।<sup>3</sup>

২৭। রোযা রোযাদারের ঈমান বৃদ্ধি করে। এই রোযাতে মানুষ অধিকাধিক নামায পড়ে, কুরআন তেলাঅত ও যিক্র করে, দান-খয়রাত করে, দুআ ও ইস্তিগফার তথা তওবা করে, ওয়ায-নসীহত শোনে। রোযা তাকে মন্দ কাজ করতে বাধা দেয়। বলা বাহুল্য, এ সবে পাপ বন্ধ থাকে এবং ঈমান বর্ধিত হয়।<sup>4</sup>

২৮। রোযার মাসে রোযাদারের দ্বীনী জ্ঞান বর্ধিত হয়ে থাকে। কারণ, রমাযান হল ইবাদতের মাস, আল্লাহর আয়াত নিয়ে ভাবনা-চিন্তা ও গবেষণা করার মাস। কুরআন মাজীদ তেলাঅত করা ও শোনার মাস।<sup>5</sup>

২৯। এ মাসে দ্বীনের আহবায়কদের জন্য রয়েছে সুবর্ণ সুযোগ। এ মাসে অধিকাংশ মুসলিম জনসাধারণ মসজিদের দিকে ধাবিত হয়। এদের মধ্যে কেউ বা তার জীবনে প্রথমবার প্রবেশ করে, কেউ বা অনেক দিন হল মসজিদ ত্যাগ করেছিল। এ সময় তাদের হৃদয় এক প্রকার দুর্লভ নম্রতা ও তরঙ্গায়িত ভক্তিতে গদগদ করে।

সুতরাং এ সুযোগের সদ্ব্যবহার করে মন-গলানো উপদেশমালা এবং

<sup>1</sup> (ফাইযঃ ১৪পৃঃ, সাবউনা মাসআলাহ ফিস-সিয়াম ৪নং)

<sup>2</sup> (ইতহাফ ৪৫পৃঃ)

<sup>3</sup> (ঐ ৪৫পৃঃ)

<sup>4</sup> (ঐ ৪৫পৃঃ)

<sup>5</sup> (সাতমু রামাযান ৪১পৃঃ)

উপযুক্ত ওয়ায ও দর্স প্রয়োগ করে তাদের ঈমান বাড়াতে সাহায্য করা উচিত। আর এ কাজে অবশ্যই সৎ ও আল্লাহতীতির কাজে সহায়তা হয়ে থাকে।<sup>1</sup>

পরন্তু রমাযানের রোযা বছরান্তে একবার ফরযরূপে এসে থাকে। যা হজ্জের মত জীবনে একবার নয়। যাতে প্রত্যেক বছর ঈমানী দর্সের পুনরাবৃত্তি হয় এবং রোপিত ঈমানী বৃক্ষ সহসায় বেড়ে ওঠে।

৩০। রোযার মাধ্যমে মুসলিমদের সামাজিক উপকারিতা সাধন হয়ে থাকে। রোযা হল মুসলিম জাতির ঐক্যের নিদর্শন, সারা উম্মাহর মাঝে সংহতির প্রতীক, গরীব-ধনীর মাঝে সাম্য ও সম্প্রীতির চিহ্ন। এতে আম-খাস, আতরাফ-আশরাফ, আমীর-ফকীরের ভেদাভেদ চূর্ণ হয়ে যায়। সকলের মনে একটাই বোধ জাগে যে, মুসলিম জাতি হল এক জাতি। সকলে একই সময়ে পানাহার করে, একই সময়ে রোযা রাখে। একই জামাআতে মসজিদে তারাবীহর নামায পড়ে। যেন সকলের হৃদয় এক, মাস এক, কর্মও এক, যাদেরকে তাদের নবী ﷺ বলেছেন, তারা হল একটি দেহের মত।

৩১। রোযার উপবাস স্বাস্থ্যের জন্য বড় উপকারী। রোযাতে তুলনামূলকভাবে কম খাওয়া হয় এবং নির্দিষ্ট সময় ধরে পাকস্থলীকে বিরতি দেওয়া হয়। এর ফলে শরীরের মেদ, ক্রোধ ও আর্দ্রতা ইত্যাদি দূরীভূত হয়ে যায়।<sup>2</sup> আর একথা বিদিত ও স্বীকৃত যে, শরীরের মধ্যে পেট হল রোগের বাসা এবং ব্যবস্থাপিত ও নিয়ন্ত্রিত খাদ্য আহার করা হল শ্রেষ্ঠ চিকিৎসা। বলা বাহুল্য, এ কথা বহু চিকিৎসকই স্বীকার করেছেন যে, রোযাতে রয়েছে বহু দীর্ঘস্থায়ী ব্যাধি থেকে নিরাপত্তা, বিশেষ করে যক্ষ্মা, ক্যানসার ইত্যাদি।

রোযায় রয়েছে শরীরের ওজন বৃদ্ধি, হ্যাপাটাইটিস, জন্ডিস, প্লীহা, যকৃৎ, বদহজম, প্রভৃতি রোগের চিকিৎসা।

রোযা ফরয হয়েছে সুস্থ মানুষের উপর। যাতে আক্রমণের পূর্বেই ঐ সকল বা আরো অজানা বহু রোগের হাত থেকে বাঁচার উপায় পাওয়া যায়। তাছাড়া বহু গবেষণা এ কথা প্রমাণ করেছে যে, পানাহার থেকে বিরত থাকা একটি প্রকৃতিগত ব্যাপার; যা মহান সৃষ্টিকর্তা নিয়মিতভাবে নির্দিষ্ট

<sup>1</sup> (সাওয়ু রামাযান ৪১ পৃঃ)

<sup>2</sup> (ফসূল ৮ পৃঃ)

সময় ব্যাপী জীবজগতের জন্য অনিবার্য করেছেন। আর তা শুধু এই জন্য যে, যাতে করে প্রাণীজগৎ ধ্বংসের হাত থেকে রক্ষা পায়, বাঁচার জন্য শক্তি পায় এবং নিজ নিজ বংশবিস্তারে যথানিয়মে সক্রিয় থাকতে পারে।

জীবজন্তু ও কীটপতঙ্গের উপবাস করার কথা অনেকের অজানা নয়। কোন কোন জন্তু লম্বা সময় ধরে প্রায় কয়েক মাস যাবৎ উপবাস করে। কোন কোন জন্তু কয়েক দিন ধরে উপবাস করে। বরং উদ্ভিদজগৎও উপবাস পালন করে থাকে। যার ফলে নতুন, সুন্দর ও লকলকে পাতা বের হয়ে আসে এবং শান্ত শীতে নিদ্রার পর ফুল-ফলে সুশোভিত হয়ে শক্তিশালী ও সজীবরূপে শুরু হয় বৃক্ষ-তরুলতার আনন্দময় বসন্তকাল।

ডাঃ সলোমন মানব-দেহকে ইঞ্জিনের সাথে তুলনা করে বলেন, 'ইঞ্জিন রক্ষাকল্পে মধ্যে মধ্যে ডকে নিয়া চুল্লি হইতে ছাই ও অঙ্গার সম্পূর্ণরূপে নিষ্কাশিত করা যেমনটা আবশ্যিক - উপবাস দ্বারা মধ্যে মধ্যে পাকস্থলী হইতে অজীর্ণ খাদ্যটি নিষ্কাশিত করাও তেমনটা দরকার।'<sup>1</sup>

৩২। রোযা মানুষের চিন্তাশক্তির প্রখরতা বৃদ্ধি করে। কারণ, পেট খালি থাকলে চিন্তা-গবেষণা নির্মল হয় এবং মন-মগজের কর্ম সুন্দর হয়।

পক্ষান্তরে যারা ধারণা করে যে, রোযা মানুষের খরচ বাড়ায় এবং অতিরিক্ত অর্থ ব্যয় হয় এই রোযার মাসে, তাদের ধারণা সঠিক নয়। কেননা, খাবারের নানান ভ্যারাইটিজ তৈরী করা এবং প্রয়োজনের তুলনায় বেশী খাবার প্রস্তুত করা, রমাযানের জন্য বিশেষ বিশেষ ধরন ও বরনের খাদ্যপণ্যের বিপণন ঘটানোতে ইসলামের অনুমোদন নেই। বরং তা হল অপচয়। আর অপচয় ইসলামে নিষিদ্ধ; রমাযানে এবং অন্য মাসেও।

বলাই বাহুল্য যে, রোযাতে রয়েছে মঙ্গলই মঙ্গল। ব্যক্তি ও সমাজের জন্য দুনিয়া ও আখেরাতে সেই মঙ্গল অনস্বীকার্য। আর মহান আল্লাহর এই বাণীর মধ্যে সেই মঙ্গলের প্রতিই ইঙ্গিত করা হয়েছে। তিনি বলেন,

﴿وَأَنْ تَصُومُوا خَيْرٌ لَّكُمْ إِنْ كُنْتُمْ تَعْلَمُونَ﴾

অর্থাৎ, তোমাদের রোযা রাখাটাই তোমাদের জন্য কল্যাণকর; যদি তোমরা উপলব্ধি কর। (কুরআনুল কারীম ২/১৮৪)

<sup>1</sup> (বাংলা মিশকাত ৪/২৬৩)

## দ্বিতীয় অধ্যায়

### রোযার প্রকারভেদ

রোযা হল দুই প্রকার; ফরয (বাধ্যতামূলক) ও নফল (অতিরিক্ত)। ফরয রোযা আবার ৩ প্রকার; রমাযানের রোযা, কাফ্ফারার রোযা এবং নযর মানা রোযা।

এক্ষণে রমাযানের রোযা সংক্রান্ত বিভিন্ন মাসায়েল আলোচনা করব।

### রমাযানের রোযার মান

রমাযানের রোযা আল্লাহর কিতাব, তাঁর রসূল ﷺ-এর হাদীস ও মুসলিম উম্মাহর ইজমা' (সর্বসম্মতি) মতে চিরকালের জন্য ফরয।

কুরআন কারীমে মহান আল্লাহ বলেন,

﴿يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن

﴿قَبْلِكُمْ لَعَلَّكُمْ تَتَّقُونَ - أَيَّامًا مَّعْدُودَاتٍ﴾

“হে ঈমানদারগণ! তোমাদের উপর রোযা ফরয করা হল, যেমন তোমাদের পূর্ববর্তী উম্মতের উপর ফরয করা হয়েছিল। যাতে তোমরা পরহেযগার হতে পার। তা নির্ধারিত কয়েক দিন---।”

(কুরআনুল কারীম ২/১৮৩-১৮৪)

তিনি আরো বলেন,

﴿شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ

الهُدَى وَالْفُرْقَانِ فَمَنْ شَهِدَ مِنْكُمُ الشَّهْرَ فَلْيَصُمْهُ﴾

“রমাযান মাস; যে মাসে মানুষের দিশারী এবং সৎপথের স্পষ্ট নিদর্শন ও সত্যাসত্যের পার্থক্যকারীরূপে কুরআন অবতীর্ণ হয়েছে। অতএব তোমাদের মধ্যে যে কেউ এ মাস পাবে সে যেন এ মাসে রোযা রাখে।”

(কুরআনুল কারীম ২/১৮৫)

হাদীসে মহানবী ﷺ বলেন, “ইসলামের ভিত্তি হল ৫টি কর্ম; আল্লাহ ছাড়া কেউ সত্যিকারে উপাস্য নেই এবং মুহাম্মাদ ﷺ তাঁর রসূল (দূত) - এই কথার সাক্ষ্য দেওয়া, নামায কায়েম করা, যাকাৎ প্রদান করা, রমাযানের রোযা রাখা এবং সামর্থ্য থাকলে কা'বাগৃহের হজ্জ করা।”<sup>1</sup>

হযরত তালহা বিন উবাইদুল্লাহ (رضي الله عنه) বলেন, এক ব্যক্তি নবী ﷺ-কে জিজ্ঞাসা করল, ‘হে আল্লাহর রসূল! আমার উপর আল্লাহ কি কি রোযা ফরয করেছেন তা আমাকে বলে দিন।’ উত্তরে তিনি বললেন, “রমাযান মাসের রোযা।” লোকটি বলল, ‘এ ছাড়া অন্য কিছু কি আমার কর্তব্য আছে?’ তিনি বললেন, “না, তবে যদি তুমি নফল রোযা রাখ, তাহলে ভিন্ন কথা।”<sup>2</sup>

আর মুসলিম উম্মাহ এ বিষয়ে একমত যে, রমাযানের রোযা ফরয। তা ইসলামের অন্যতম রুকন, খুঁটি বা ভিত্তি। এ ফরয হওয়ার কথা সহজ উপায়ে সকলের জানা। সুতরাং যে কেউ তা অস্বীকার করবে সে মুরতাদ্ কাফের। তাকে তওবা করার জন্য আহ্বান করা হবে। তাতে সে তওবা করলে এবং রোযা ফরয বলে মেনে নিলে উত্তম। নচেৎ, (সরকার) তাকে কাফের অবস্থায় হত্যা করবে।<sup>3</sup>

## রমাযান মাসের বৈশিষ্ট্য ও তার রোযার মাহাত্ম্য

রমাযান শব্দটি ‘রম্য’ ধাতু থেকে উৎপত্তি। এর মানে হল কঠিন গরম, জ্বালিয়ে দেওয়া। চান্দ্র মাসগুলোর যখন প্রাচীন নাম বাদ দিয়ে আরবী ভাষায় নতুন নাম দেওয়া হয়, তখন রমাযান মাসটি পরে কঠিন গরমের সময়। আর তাকেই ভিত্তি করে তার ‘রামাযান’ নামকরণ করা হয়। অবশ্য রমাযান মাসের রোযা ফরয হওয়ার পর তার নাম সার্থক হয়। যেহেতু উক্ত মাসে ক্ষুৎপিপাসায় রোযাদারের পেট জ্বলে থাকে।

<sup>1</sup> (বুখারী ৮, মুসলিম ১৬নং, তিরমিযী, নাসাঈ)

<sup>2</sup> (বুখারী, ১৮৯১, মুসলিম)

<sup>3</sup> (ফিকহস সুন্নাহ ১/৩৮৩, ফুসূল ৪-৫ পৃঃ)

রমাযানের মাসের একাধিক এমন বৈশিষ্ট্য রয়েছে, যা অন্যান্য মাসে নেই। যেমন :-

১। এই মাসের নাম কুরআন মাজীদে উল্লেখিত হয়েছে।

(দ্রষ্টব্য কুরআনুল কারীম ২/১৮৫)

পক্ষান্তরে অন্য মাসের নাম উল্লেখ করা হয়নি।

২। এই মাস আসার সময় মহানবী ﷺ তাঁর সাহাবাগণকে সুসংবাদ দিতেন।

৩। রমাযান হল বর্কতময় পবিত্র মাস। এ মাসে বর্কত অবতীর্ণ হয়।

৪। মহান আল্লাহ এই মাসের রোযা ফরয করেছেন।

৫। এই মাসে জান্নাতের দ্বারসমূহ উন্মুক্ত করা হয় এবং একটা দ্বারও বন্ধ থাকে না।

৬। এই মাসে রহমতের সকল দরজা খুলে দেওয়া হয়।<sup>1</sup>

৭। এই মাসে জাহান্নামের দ্বারসমূহ রুদ্ধ করা হয় এবং একটা দ্বারও খোলা থাকে না।

উল্লেখ্য যে, বেহেশতের সকল দরজা খুলে দেওয়ার কারণ হল, যাতে করে আমলকারী তা শুনে আমলে আগ্রহ ও উৎসাহ পায় এবং তাতে প্রবেশ করার জন্য প্রস্তুতি গ্রহণ করে। আর দোযখের সকল দরজা বন্ধ করার কারণ হল, যাতে আমলকারী এই মাসে পাপে লিপ্ত না হয় এবং তাতে প্রবেশ না করে বসে। এর অর্থ এই নয় যে, যে ব্যক্তি রমাযান মাসে মারা যাবে সে বিনা হিসাবে সোজা বেহেশতে যাবে।<sup>2</sup>

৮। উচ্ছৃঙ্খল শয়তান দলকে এই মাসে বন্দী করে রাখা হয়।<sup>3</sup> অর্থাৎ, তাদেরকে শিকল ও বেড়ি দিয়ে বেঁধে আটকে রাখা হয়। ফলে তারা রমাযানে সেই পাপাচরণ ঘটাতে সক্ষম হয় না, যতটা অন্য মাসে সক্ষম হয়। এ জন্য দেখা যায় যে, অন্যান্য মাসের তুলনায় এই মাসে শয়তানের কুমন্ত্রণা, চক্রান্ত এবং মানুষকে বিভ্রান্ত করার কাজ কম ঘটে থাকে। বরং শয়তান রমাযান মাসকে ভয় করে, যেমন ভয় করে আযান ও ইকামতকে এবং তার শব্দ শুনে পাদতে পাদতে পলায়ন করে।

<sup>1</sup> (সিলসিলাহ সহীহাহ, আলবানী ১৩০৭, সহীহুল জামেইস সাগীর, আলবানী ৪৭১নং)

<sup>2</sup> (ফাসিহ ২২৭৪)

<sup>3</sup> (বুখারী ১৮০, মুসলিম ১০৭৯নং)



কিন্তু আমরা এ মাসেও যে পাপাচরণ ও শয়তানী কর্মকাণ্ড ঘটতে দেখে থাকি তা উক্ত কথার বিরোধী নয়। কারণ, পাপ কেবল শয়তানই ঘটায় না। বরং মন্দপ্রবণ মানুষের মনও এমনিতেই পাপ করে থাকে। যে মন শয়তানের কুমন্ত্রণা সত্বর গ্রহণ করে থাকে এবং শয়তানের তাসীর কম বা বন্ধ হয়ে গেলেও সেই মন নিজেই পাপ সৃষ্টি করে। এটি হল মানুষের ‘নাফসে আন্মারাহ।’ যে নাফস বা মন শয়তানের প্রতিনিধিত্ব করে এবং সেই পাপাচরণ ঘটিয়ে থাকে। নাউযু বিল্লাহি মিন যালিক।<sup>1</sup>

৯। রমাযান মাসে আসমানের দরজাসমূহ উন্মুক্ত করা হয়।<sup>2</sup>

১০। এই মাসে দুআ কবুল হয়। মহানবী ﷺ বলেন, “(রমাযান মাসের) প্রত্যেক রাতে ও দিনে প্রত্যেক মুসলিমের দুআ কবুল করা হয়।”<sup>3</sup>

১১। এই মাসে রয়েছে এমন একটি রাত্রি, যা হাজার মাস অপেক্ষা শ্রেষ্ঠ। যে ব্যক্তি এই রাতের মঙ্গল থেকে বঞ্চিত হয়, সে আসলে সকল মঙ্গল থেকে বঞ্চিত। আর একান্ত বঞ্চিত ব্যক্তি ছাড়া সে মঙ্গল থেকে কেউ বঞ্চিত হয় না।<sup>4</sup>

১২। এই মাসের প্রত্যেক রাত্রে একজন আহবানকারী (ফিরিশ্তা) আহবান করে বলেন, ‘ওহে কল্যাণকামী! তুমি অগ্রসর হও। আর ওহে মন্দকামী! তুমি ক্ষান্ত হও।’

১৩। এই মাসের প্রত্যেক রাত্রে মহান আল্লাহ দোষখ থেকে মুসলিম মুক্ত করে থাকেন।<sup>5</sup>

১৪। রমাযান মাস হল সবর ও ধৈর্যের মাস। যেহেতু রোযা ছাড়া অন্য ইবাদতে সেইরূপ ধৈর্যের পরীক্ষা দিতে হয় না। মুসলিম এই মাসে পূর্ণ ৩০ বা ২৯টি দিনই পানাহার, স্ত্রী-মিলন এবং অন্যান্য রোযাবিরোধী সকল কর্ম থেকে ধৈর্যের সাথে বিরত থাকে। তাই মহানবী ﷺ এই মাসকে ‘ধৈর্যের মাস’ বলে অভিহিত করেছেন।<sup>6</sup> আর তিনি বলেছেন, “ধৈর্যের

<sup>1</sup> (দুরুসু রামাযান অকাফাত লিস-সায়েমীন ২১পৃঃ)

<sup>2</sup> (বুখারী ১৮৯৯, আহমাদ, মুসনাদ, নাসাঈ, সিলসিলাহ সহীহাহ, আলবানী ১৮৬৮নং)

<sup>3</sup> (বায়যার, সহীহ তারগীব, আলবানী ৯৮৮নং)

<sup>4</sup> (সহীহ ইবনে মাজাহ, আলবানী ১৩৩৩, সহীহুল জামেইস সাগীর, আলবানী ৩৫১৯নং)

<sup>5</sup> (আহমাদ, মুসনাদ ৪/৩১২, ৫/৪১১, নাসাঈ, সহীহ ইবনে মাজাহ, আলবানী ১৩৩১নং)

<sup>6</sup> (সহীহুল জামেইস সাগীর, আলবানী ৩৮০৩নং)

(রমাযান) মাসে রোযা আর প্রত্যেক মাসের তিনটি রোযা অন্তরের বিদ্বেষ ও খটকা দূর করে দেয়।”<sup>1</sup>

১৫। রমাযান হল কুরআনের মাস। কুরআন পঠন-পাঠন ও তেলাঅতের মাস। প্রশংসার অধিকারী বিজ্ঞানময় আল্লাহর তরফ থেকে কুরআন অবতীর্ণ হওয়ার মাস। এই মাসে কুরআন ‘লাওহে মাহফূয’ থেকে দুনিয়ার আসমানের প্রতি অবতীর্ণ হয়, অথবা কুরআন অবতীর্ণ হতে শুরু হয় এই পবিত্র মাসে। মহান আল্লাহ বলেন,

﴿شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ

الهُدَى وَالْفُرْقَانِ فَمَنْ شَهِدَ مِنْكُمُ الشَّهْرَ فَلْيَصُمْهُ﴾

“রমাযান মাস; যে মাসে মানুষের দিশারী এবং সৎপথের স্পষ্ট নিদর্শন ও সত্যাসত্যের পার্থক্যকারীরূপে কুরআন অবতীর্ণ হয়েছে। অতএব তোমাদের মধ্যে যে কেউ এ মাস পাবে সে যেন এ মাসে রোযা রাখে।”

(কুরআনুল কারীম ২/১৮৫)

আর কেবল কুরআনই নয়; বরং অন্যান্য আসমানী গ্রন্থসমূহও অবতীর্ণ হয়েছে এই বর্কতময় মাসেই। “ইবরাহীমের সহীফাসমূহ অবতীর্ণ হয়েছে রমাযান মাসের প্রথম রাতে, তাওরাত অবতীর্ণ হয়েছে রমাযানের সপ্তম রাতে, ইঞ্জীল অবতীর্ণ হয়েছে রমাযানের ১৪তম রাতে, যাবূর অবতীর্ণ হয়েছে রমাযানের ১৯শের রাতে এবং কুরআন অবতীর্ণ হয়েছে রমাযানের ২৫শের রাতে।”<sup>2</sup>

১৬। রমাযান মাসে বিশ্বয়কর বড় বড় বিজয় দানের মাধ্যমে মহান আল্লাহ ইসলামকে সাহায্য করেছেন, মুসলিমদেরকে মর্যাদা দিয়েছেন। এই মাসেই বদর যুদ্ধে বদর প্রান্তরে মুসলিমদের আধ্যাত্মিক শক্তিমত্তা, ঈমানী ভিত্তির সুদৃঢ়তা এবং প্রতীতির অবিচলতা প্রকাশ পায়। আল্লাহ তাআলা এই দিনে তাঁদেরকে সাহায্য করেন এবং শত্রুর উপর বিজয়ী করেন।

<sup>1</sup> (বাযযার, ড়াবারানী, মু'জাম, ইবনে হিব্বান, সহীহ, সহীহুল জামেইস সাগীর, আলবানী ৩৮০৪নং)

<sup>2</sup> (আহমাদ, মুসনাদ, ড়াবারানী, মু'জাম, সহীহুল জামেইস সাগীর, আলবানী ১৪৯৭, সিলসিলাহ সহীহাহ, আলবানী ১৫৭৫নং)

অষ্টম হিজরীর রমাযান মাসে মক্কা বিজয়ের মাধ্যমে আল্লাহ তাঁদেরকে সাহায্য করেন। যার পর মুসলিমরা স্থিতিশীলতা পেলেন এবং ইসলাম পূর্ণরূপে প্রতিষ্ঠা লাভ করল।<sup>1</sup>

১৭। রমাযান মাসে কোন কোন আমলের বহুগুণ সওয়াব লাভ হয়। এ মাসে উমরাহ আদায় আল্লাহর রসূল ﷺ-এর সাথে হজ্জ করার সমান।<sup>2</sup>

পক্ষান্তরে এ মাসের রোযা রাখার সওয়াব প্রসঙ্গে মহানবী ﷺ বলেন,

(ক) “যে ব্যক্তি ঈমান ও বিশ্বাসের সাথে এবং সওয়াবের আশা রেখে রমাযানের রোযা রাখবে তারও পূর্বকার পাপরাশি মাফ হয়ে যাবে।”<sup>3</sup>

(খ) “পাঁচ ওয়াক্ত নামায, এক জুমআহ হতে অপর জুমআহ পর্যন্ত ও এক রমাযান অপর রমাযান পর্যন্ত উভয়ের মধ্যবর্তীকালের সংঘটিত পাপরাশিকে মোচন করে দেয়; যদি কাবীরা গোনাহ থেকে দূরে থাকা হয় তবে।”<sup>4</sup>

(গ) এক ব্যক্তি মহানবী ﷺ-এর কাছে হাজির হয়ে আরজ করল, ‘হে আল্লাহর রসূল! আপনার অভিমত কি? যদি আমি সাক্ষ্য দিই যে, আল্লাহ ছাড়া কোন সত্য উপাস্য নেই এবং আপনি আল্লাহর রসূল, পাঁচ-ওয়াক্ত নামায পড়ি, যাকাত আদায় করি এবং রমাযানের রোযা পালন করি, তাহলে আমি কাদের দলভুক্ত হব?’ উত্তরে মহানবী ﷺ বললেন, “তুমি সিদ্দীক ও শহীদগণের দলভুক্ত হবে।”<sup>5</sup>

## বিনা ওজরে রোযা ত্যাগ করার সাজা

যে ব্যক্তি বিনা ওজরে রমাযানের রোযা ত্যাগ করে সে ব্যক্তির দুটি কারণ হতে পারে; হয় সে তা ফরয বলে অস্বীকার করেছে -এবং তাকে একটি ইবাদত বলে স্বীকৃতি দিচ্ছে না, (নাউযু বিল্লাহি মিন যালিক।) আর না হয় সে আলসেমি করে তা রাখছে না।

<sup>1</sup> (সাওমু রামাযান ৮-১৩৭৪)

<sup>2</sup> (বুখারী ১৮৬৩, মুসলিম ১২৫৬, আবু দাউদ, তিরমিযী, ইবনে মাজাহ, দারেমী, সুনান)

<sup>3</sup> (বুখারী ৩৮, ১৯০৮, মুসলিম ৭৬০, আবু দাউদ, নাসাই, ইবনে মাজাহ)

<sup>4</sup> (আহমাদ, মুসনাদ ২/৩৫৯, ৪০০, ৪১৪, মুসলিম ২৩৩৩)

<sup>5</sup> (বায়হার, ইবনে বুযাইমাহ, সহীহ, ইবনে হিব্বান, সহীহ, সহীহ তারগীব, আলবানী ৯৮৯নং)

সুতরাং যদি সে রোযা ফরয বলে অস্বীকার করে ও বলে যে, রোযা শরীয়তে ফরয নয়, তাহলে সে কাফের ও মুরতাদ্দ; যেমন এ কথা পূর্বে বলা হয়েছে। কারণ, সে দ্বীনের সর্ববাদিসম্মত এমন একটি ব্যাপারকে অস্বীকার করে যা আম-খাস সকলের পক্ষে জানা সহজ এবং যা ইসলামের একটি রুকুন।

আর তার এই মুরতাদ্দ হওয়ার ফলে একজন মুরতাদ্দের মাল ও পরিবারের ব্যাপারে যা বিধান আছে তা কার্যকর হবে। সরকারের কাছে সে হত্যাযোগ্য অপরাধী বলে গণ্য হবে। তার গোসল-কাফন ও জানাযা হবে না এবং মুসলিমদের গোরস্থানে তাকে দাফন করাও যাবে না। অবশ্য যদি কেউ নওমুসলিম হওয়ার ফলে অথবা ইসলামী পরিবেশ ও উলামা থেকে দূরে থাকার ফলে এ ধরনের কথা বলে থাকে, তাহলে তার কথা ভিন্ন।

পক্ষান্তরে যদি কেউ আলসেমি করে রোযা না রাখে, তাহলে ভয়ানক কঠিন শাস্তি তার জন্য অপেক্ষা করছে।

হযরত আবু উমামাহ বাহেলী (رضي الله عنه) কর্তৃক বর্ণিত, তিনি বলেন, আমি শুনেছি আল্লাহর রসূল (ﷺ) বলেছেন যে, “একদা আমি ঘুমিয়ে ছিলাম; এমন সময় (স্বপ্নে) আমার নিকট দুই ব্যক্তি উপস্থিত হলেন। তাঁরা আমার উভয় বাহুর উর্ধ্বাংশে ধরে আমাকে এক দুর্গম পাহাড়ের নিকট উপস্থিত করলেন এবং বললেন, ‘আপনি এই পাহাড়ে চড়ুন।’ আমি বললাম, ‘এ পাহাড়ে চড়তে আমি অক্ষম।’ তাঁরা বললেন, ‘আমরা আপনার জন্য চড়া সহজ করে দেব।’ সুতরাং আমি চড়ে গেলাম। অবশেষে যখন পাহাড়ের চূড়ায় গিয়ে পৌঁছলাম তখন বেশ কিছু চিৎকার-ধ্বনি শুনতে পেলাম। আমি জিজ্ঞাসা করলাম ‘এ চিৎকার-ধ্বনি কাদের?’ তাঁরা বললেন, ‘এ হল জাহান্নামবাসীদের চীৎকার-ধ্বনি।’ পুনরায় তাঁরা আমাকে নিয়ে চলতে লাগলেন। হঠাৎ দেখলাম একদল লোক তাদের পায়ের গোড়ালির উপর মোটা শিরায় (বাঁধা অবস্থায়) লটকানো আছে, তাদের কশগুলো কেটে ও ছিঁড়ে আছে এবং কশ বেয়ে রক্তও ঝরছে। নবী (ﷺ) বলেন, আমি বললাম, ‘ওরা কারা?’ তাঁরা বললেন, ‘ওরা হল তারা; যারা সময় হওয়ার পূর্বে-পূর্বেই ইফতার করে নিত---।”<sup>1</sup>

<sup>1</sup> (ইবনে খুযাইমাহ, সহীহ, ইবনে হিব্বান, সহীহ, বাইহাকী ৪/২১৬, হাকেম, মুত্তাদ্‌রাক ১/৪৩০, সহীহ তারগীব, আলবানী ৯৯১নং)

‘ওরা হল তারা; যারা সময় হওয়ার পূর্বে-পূর্বেই ইফতার করে নিত---।’  
রোযা রাখার পরেও তাদের যদি ঐ অবস্থা হয়, তাহলে যারা পূর্ণ দিন  
মূলেই রোযা রাখে না, তাদের অবস্থা এবং যারা পূর্ণ মাসই রোযা রাখে না,  
তাদের অবস্থা যে কত করুণ, কত সঙ্গিন তা অনুমেয়!

মুস্তাফা মুহাম্মাদ আম্মারাহ তাঁর তারগীবের টীকায়<sup>1</sup> বলেন, ‘উক্ত  
হাদীসের ভাবার্থ এই যে, মহান আল্লাহ তাঁর নবী ﷺ-কে রোযা  
ভঙ্গকারীদের আযাব সম্বন্ধে ওয়াকফহাল করেছেন। তিনি দেখেছেন,  
তাদের সেই দুরবস্থা; তাদের আকার-আকৃতি ছিল বড় মর্মান্তিক ও নিকষ্ট।  
কঠিন যন্ত্রণায় তারা কুকুর ও নেকড়ের মত চিৎকার করছে। তারা সাহায্য  
প্রার্থনা করছে অথচ কোন সাহায্যকারী নেই। তাদের পায়ের শেষ প্রান্তে  
(গোড়ালির উপর মোটা শিরায়) জাহান্নামের আঁকুশি দিয়ে কসাইখানার  
যবাই করা ছাগলের মত তাদেরকে নিম্নমুখে ঝুলিয়ে রাখা হয়েছে। আর  
তাদের কশ বেয়ে মুখভর্তি রক্ত ঝরছে! আশা করি নাফরমান বেরোযাদার  
মুসলিম সম্প্রদায় এই আযাবের কথা জেনে আল্লাহর নিকট তওবা করবে  
এবং তাঁর সেই আযাবকে ভয় করে যথানিয়মে রোযা পালন করবে।’

ইমাম যাহাবী (রঃ) বলেন, ‘মুমিনদের নিকটে এ কথা স্থির-সিদ্ধান্ত  
যে, যে ব্যক্তি কোন রোগ ও ওজর না থাকা সত্ত্বেও রমাযানের রোযা ত্যাগ  
করে, সে ব্যক্তি একজন ব্যভিচারী ও মদ্যপায়ী থেকেও নিকষ্ট। বরং  
মুসলিমরা তার ইসলামে সন্দেহ পোষণ করে এবং ধারণা করে যে, সে  
একজন নাস্তিক ও নৈতিক শৈথিল্যপূর্ণ মানুষ।<sup>2</sup>

<sup>1</sup> (২/১০৯)

<sup>2</sup> (মাজমু’ ফাতাওয়া, ইবনে তাইমিয়াহ ২৫/২২৫, আল-কাবায়ের, যাহাবী ৪৯পৃঃ, ফিকহুস  
সুন্নাহ ১/৩৮৪, ফাইয়ুর রাহীমির রাহমান, ফী আহকামি অমাওয়াইযি রামাযান, আব্দুল্লাহ  
তাইয়্যার ২০-২১পঃ. তাওজীহাতুন অফাওয়াএদ লিসসা-য়েমীনা অসসায়েমাত ৭৪পঃ)

## তৃতীয় অধ্যায় মাস প্রমাণ হবে কিভাবে?

রমাযান মাস প্রবেশ হওয়া প্রমাণ হবে দুয়ের মধ্যে একভাবে :-

১। রমাযানের চাঁদ দেখে। যেহেতু মহান আল্লাহ বলেন,

﴿فَمَنْ شَهِدَ مِنْكُمُ الشَّهْرَ فَلْيَصُمْهُ﴾

অর্থাৎ, তোমাদের মধ্যে যে কেউ এ মাস পাবে সে যেন এ মাসে রোযা রাখে। (কুরআনুল কারীম ২/১৮৫)

আর মহানবী ﷺ বলেন, “তোমরা চাঁদ দেখে রোযা রাখ এবং চাঁদ দেখে ঈদ কর। কিন্তু যদি আকাশে মেঘ থাকে, তাহলে গণনায় ৩০ পুরা করে নাও।”<sup>১</sup>

তিনি আরো বলেন, “তোমরা চাঁদ দেখে রোযা রাখ এবং চাঁদ দেখে ঈদ কর। কিন্তু যদি আকাশে মেঘ থাকে, তাহলে শা’বানের গুনতি ৩০ পূর্ণ করে নাও।”

বলা বাহুল্য, হাদীসে এ বিষয়ে স্পষ্ট নির্দেশ রয়েছে যে, রমাযানের রোযা ফরয হওয়া তথা তা শুরু করার ব্যাপারটা চাঁদ দেখার উপর নির্ভরশীল। আর এর মানেই হল, চাঁদ না দেখা পর্যন্ত রোযা রাখা নিষিদ্ধ।

❖ সাক্ষ্য দ্বারা মাস প্রমাণ :

মহান আল্লাহ বলেন,

﴿يَسْتَأْذِنُكَ عَنِ الْأَهْلِ، قُلْ هِيَ مَوَاقِيتُ لِلنَّاسِ وَالْحَجِّ﴾

অর্থাৎ, ওরা আপনাকে নতুন চাঁদ সম্পর্কে জিজ্ঞাসা করে। বল, তা হল মানুষ ও হজ্জের জন্য সময় নির্দেশক। (কুরআনুল কারীম ২/১৮৯)

মহান আল্লাহ চাঁদকে মানুষের জন্য সময়-নির্দেশক হিসাবে সৃষ্টি করেছেন। এর দ্বারা মানুষ নিজেদের ইবাদত ও পার্থিব জীবনের সময় ও তারীখ নির্ধারণ করতে পারে। সুতরাং বান্দার প্রতি তাঁর খাস রহমত এই

<sup>১</sup> (বখারী ১৯০০. মুসলিম ১০৮০৯)

যে, তিনি ফরয রোযা শুরু হওয়ার বিষয়টা একটি এমন স্পষ্ট জিনিস ও প্রকট চিহ্নের উপর নির্ভরশীল করেছেন, যা সকল মানুষই জানে।

অবশ্য রোযা ওয়াজেব হওয়ার জন্য এ শর্ত নয় যে, প্রত্যেক মুসলিমকেই চাঁদ দেখতে হবে। বরং কিছু সংখ্যক লোক দেখলে, বরং - সঠিক মতে- একজন দেখলেই; যদি সে নির্ভরযোগ্য ও বিশুদ্ধ ব্যক্তি হয়, তাহলে তার দেখা মতে সকলের জন্য রোযা রাখা জরুরী হয়ে যাবে। অবশ্য তাদের সকলের চন্দ্রের উদয়-স্থল এক হয় তবে।<sup>1</sup>

ইবনে উমার (رضي الله عنه) বলেন, একদা লোকেরা নতুন চাঁদ দেখতে জমায়েত হল। আমি আব্বাহর রসূল (ﷺ)-কে খবর দিলাম যে, আমি চাঁদ দেখেছি। তিনি আমার এ খবরে রোযা রাখলেন এবং লোকদেরকে রোযা রাখতে আদেশ করলেন।<sup>2</sup>

২। রমায়ান প্রবেশ হওয়ার কথা প্রমাণ করার দ্বিতীয় উপায় হল, (চাঁদ দেখা না গেলে) শা'বান মাসকে ৩০ দিন পূর্ণ করে নেওয়া। (অবশ্য এর জন্য শর্ত হল শা'বান মাসের শুরুর হিসাব রাখা।) এ ব্যাপারে পূর্বে উল্লেখিত দুটি হাদীস আমাদেরকে পথনির্দেশ করে। যাতে বলা হয়েছে, “যদি আকাশে মেঘ থাকে, তাহলে শা'বানের গুনতি ৩০ পূর্ণ করে নাও।”

❖ জ্যোতিষ-গণনার উপর নির্ভর করা যাবে না :

উপর্যুক্ত দুটি উপায় ছাড়া অন্য উপায়ে মাস প্রবেশ হওয়ার কথা প্রমাণ করা যাবে না। সুতরাং জ্যোতিষ-গণনা বা পঞ্জিকা মতে রমায়ান মাস ধরে নিয়ে রোযা ফরয হবে না। বলা বাহুল্য, যদি জ্যোতিষীদের হিসাব মতে আজকের রাত রমায়ানের প্রথম তারীখ হয়, কিন্তু সন্ধ্যায় কেউই চাঁদ না দেখে থাকে, তাহলে রোযা রাখা যাবে না। যেহেতু শরীয়ত রোযা রাখার বিধানকে একটি বাহ্যিকভাবে উপলব্ধ জিনিসের উপর নির্ভরশীল করে দিয়েছে। আর তা হল চাঁদ দেখা।<sup>3</sup> তা ছাড়া পঞ্জিকার হিসাব নির্ভুল নয়।

<sup>1</sup> (ফাইয়ুর রাহীমির রাহমান, ফী আহকামি অমাওয়াইযি রামায়ান ২৮ পৃঃ)

<sup>2</sup> (আবু দাউদ ২৩৪২, দারেমী, সুনান ২/৪, ইবনে হিব্বান, সহীহ ৮৭১নং, হাকেম, মুত্তাদরাক ১/৪২৩, দারাকুতুনী, সুনান, বাইহাকী ৪/২১২, ইরওয়াউল গালীল, আলবানী ৪/১৬)

(আশশারহুল মুমতে' ৬/৩১৪)

এক এলাকায় সচল হলেও অন্য এলাকায় অচল। অতএব তার উপর ভরসা করে চোখ বুজে রোযা রাখা বৈধ নয়।

পঞ্জিকার হিসাবের উপর নির্ভর করার কথা শরীয়ত ও বিবেকে স্বীকৃত নয়। কেননা, মুসলিম উম্মাহ হযরত মুহাম্মাদ ﷺ-এর নবুঅত কাল থেকে নিয়ে আজও পর্যন্ত চাঁদ দেখার উপরই নির্ভর করে; হিসাবের উপর ভরসা না করে, কেবল মহানবী ﷺ-এর অনুসরণে রোযা রেখে আসছে। যে সম্মানিত নবী ﷺ বলেন, “আমরা হলাম নিরক্ষর জাতি। আমরা লিখাপড়া জানি না এবং হিসাবও জানি না। মাস কখনো এই রকম হয়, কখনো এই রকম হয়। অর্থাৎ, কখনো ২৯ দিনে হয় এবং কখনো ৩০ দিনে।”<sup>1</sup>

হাফেয ইবনে হাজার উক্ত হাদীসের টীকায় বলেন, এখানে ‘হিসাব’ বলতে ‘জ্যোতিষী হিসাব’কে বুঝানো হয়েছে। আর তখন এ হিসাব খুবই কম সংখ্যক লোক ছাড়া কেউই জানত না। তাই রোযা রাখা এবং অন্যান্য ব্যাপার চাঁদ দেখার উপর নির্ভরশীল করে দেওয়া হয়েছে। যাতে এ বিষয়ে লোকেরা অসুবিধা তথা জ্যোতিষী গণনার কষ্ট থেকে রেহাই পায়।

পরবর্তীকালে কিছু লোক এ হিসাব শিখলেও রোযা রাখা-না রাখার বিষয়টা এইভাবেই চলতে থাকল। বরং হাদীসের প্রকাশ্য উক্তি মূলতঃ হিসাবের উপর নির্ভর না করতেই ইঙ্গিত করে। আর এ কথা আরো স্পষ্ট করে দেয় পূর্বোক্ত হাদীস। যাতে বলা হয়েছে, “যদি আকাশে মেঘ থাকে, তাহলে শা’বানের গুনতি ৩০ পূর্ণ করে নাও।” এখানে এ কথা বলা হয়নি যে, যদি আকাশে মেঘ থাকে, তাহলে জ্যোতিষীদেরকে জিজ্ঞাসা করে নাও।”

এই বিধানের পশ্চাতে যুক্তি এই যে, আকাশ অপরিষ্কার থাকার সময় সংখ্যা পূরণ করে নিলে তাতে সকল আজ্ঞাপ্রাপ্ত মুসলিম সমান হয়ে যাবে এবং এর ফলে তাদের মধ্যে কোন প্রকার মতভেদ ও ঝগড়া অবশিষ্ট থাকবে না।<sup>2</sup>

<sup>1</sup> (বুখারী ৪/১৯১৩নং)

<sup>2</sup> (ফাতহুল বারী ৪/১৫১)



### ❖ চাঁদ দেখার জন্য দূরবীন ব্যবহার :

চাঁদ দেখার জন্য দূরের জিনিস কাছের করে দেখার যন্ত্র দূরবীন ব্যবহার করা দোষাবহ নয়। অবশ্য দূরবীন ব্যবহার করা বা চাঁদ দেখার জন্য তা ক্রয় করা ওয়াজেব নয়। কারণ, বাহ্যিকভাবে সুন্নাহ এ কথাই নির্দেশ করে যে, এর জন্য স্বাভাবিক দর্শনের উপর নির্ভর হবে, অস্বাভাবিক কোন দর্শনের উপর নয়। তবুও যদি কোন বিশুদ্ধ ব্যক্তি ঐ যন্ত্রের মাধ্যমে চাঁদ দেখে থাকে, তাহলে তার ঐ দেখার উপর আমল করা যাবে। বহু পূর্ব যুগেও লোকেরা ২৯শে শাবান বা ২৯শে রমাযান উঁচু উঁচু মিনারে চড়ে ঐ শ্রেণীর যন্ত্রের মাধ্যমে চাঁদ দেখত। যাই বা হোক, যে কোন মাধ্যম ও উপায়ে, যে কোন প্রকারে চাঁদ দেখা গেলে সেই দেখার উপর আমল করা জরুরী হবে। কেননা, মহানবী ﷺ-এর বাণী এ ব্যাপারে সাধারণ। তিনি বলেন, “তোমরা চাঁদ দেখে রোযা রাখ এবং চাঁদ দেখে ঈদ কর।”<sup>1</sup>

### ❖ উদয়স্থলের বিভিন্নতা :

অভিজ্ঞদের ঐক্যমতে চাঁদের উদয়স্থল ভিন্ন ভিন্ন এবং উদয়কালও অনুরূপ। আর এই ভিন্ন উদয়কালের ফলেই কোথাও চাঁদ দেখা যায়, কোথাও যায় না। সুতরাং উদয়-স্থল ভিন্ন হলে প্রত্যেক এলাকার জন্য পৃথক দর্শন জরুরী। পক্ষান্তরে উদয়স্থল বা উদয়কাল একই হলে একই এলাকাভুক্ত লোকদের জন্য ২/১ জনের দর্শন অনুযায়ী আমল করা ওয়াজেব হবে। যেহেতু মহান আল্লাহ বলেন, “অতএব তোমাদের মধ্যে যে কেউ এ মাস পাবে সে যেন এ মাসে রোযা রাখে।”

(কুরআনুল কারীম ২/১৮৫)

আর যাদের উদয়স্থল ওদের মত নয়, তাদের জন্য বলা যাবে না যে, ওরা চাঁদ দেখেছে; না প্রকৃতপক্ষে, আর না-ই আপাতদৃষ্টি। অথচ মহান আল্লাহ তাদের জন্য রোযা ফরয করেছেন, যারা চাঁদ দেখেছে। মহানবী ﷺ বলেন, “তোমরা চাঁদ দেখে রোযা রাখ এবং চাঁদ দেখে ঈদ কর।” এই আজায় রোযা রাখার আদেশকে চাঁদ দেখার শর্ত-সাপেক্ষ করা হয়েছে। বলা বাহুল্য, যে ব্যক্তি এমন জায়গায় বাস করে, যে জায়গার উদয়স্থল যে চাঁদ দেখেছে তার উদয়স্থলের অনুরূপ নয়, সে ব্যক্তি (যেহেতু

<sup>1</sup> (সুআলান ফিস-সিয়াম : ৩১ পৃঃ)

তার নিজেৰ এলাকায় কেউ চাঁদ দেখেনি সেহেতু) আসলে চাঁদ দেখেনি; না প্রকৃতপক্ষে, আর না-ই আপাতদৃষ্টে।

পরন্তু মাসিক সময়কাল প্রাত্যহিক সময়কালের মতই। সুতরাং যেমন প্রত্যেক দেশ প্রাত্যহিক সেহরীর ও ইফতারের ব্যাপারে ভিন্ন ভিন্ন সময় ব্যবহার করে থাকে, ঠিক তেমনই মাসিক রোযা শুরু ও শেষ হওয়ার সময় ভিন্ন ভিন্ন হওয়া জরুরী। আর এ কথা বিদিত যে, মুসলিমদের ঐক্যমতে দৈনিক সময়ের স্বতন্ত্র প্রভাব আছে। তাই যারা প্রাচ্যে বাস করে তারা তাদের আগে সেহরী খাওয়া বন্ধ করবে; যারা প্রতীচ্যে বাস করে। অনুরূপ প্রাচ্যের লোক প্রতীচ্যের লোকদের পূর্বে ইফতার করবে।

সুতরাং যখন দৈনিক সময়ে সূর্যের উদয়াস্ত কালের ভিন্নতা মেনে নিতে বাধ্য, তখন তারই সম্পূর্ণ অনুরূপ মাসের ব্যাপারেও চন্দ্রের উদয়কালের ভিন্নতাকে মেনে নিতে আমরা বাধ্য।

আর এ কথা বলা কারো জন্য যুক্তি সঙ্গত হবে না যে, যেহেতু মহান আল্লাহ বলেন,

﴿وَكُلُوا وَاشْرَبُوا حَتَّى يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ﴾

“আর তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে।”

(কুরআন কারীম ২/১৮৭)

এবং মহানবী ﷺ বলেন, “রাত যখন এদিক (পূর্ব গগণ) থেকে আগত হবে, দিন যখন এদিক (পশ্চিম গগণ) থেকে বিদায় নেবে এবং সূর্য যখন অস্ত যাবে, তখন রোযাদার ইফতার করবে।”<sup>1</sup>

আর এ কথা কেউ বলতে পারে না যে, উক্ত নির্দেশ সারা বিশ্বে সকল দেশের মুসলিমদের জন্য ব্যাপক।

কুরাইব বলেন, একদা উম্মুল ফাযল বিস্তল হারেষ আমাকে শাম দেশে মুআবিয়ার নিকট পাঠালেন। আমি শাম (সিরিয়া) পৌছে তাঁর প্রয়োজন

<sup>1</sup> (বুখারী ১৯৪), মুসলিম ১১০০, ১১০১, আবু দাউদ ২৩৫১, ২৩৫২, তিরমিযী, দারেমী, সুনান)

পূর্ণ করলাম। অতঃপর আমার শামে থাকা কালেই রমাযান শুরু হল। (বৃহস্পতিবার দিবাগত) জুমআর রাত্রে চাঁদ দেখলাম। অতঃপর মাসের শেষ দিকে মদীনায় এলাম। আব্দুল্লাহ বিন আব্বাস (رضي الله عنه) আমাকে চাঁদের ব্যাপারে জিজ্ঞাসা করলেন, 'তোমরা কবে চাঁদ দেখেছ?' আমি বললাম, 'আমরা জুমআর রাত্রে দেখেছি।' তিনি বললেন, 'তুমি নিজে দেখেছ?' আমি বললাম, 'জী হ্যাঁ। আর লোকেরাও দেখে রোযা রেখেছে এবং মুআবিয়াও রোযা রেখেছেন।' ইবনে আব্বাস (رضي الله عنه) বললেন, 'কিন্তু আমরা তো (শুক্রেবার দিবাগত) শনিবার রাত্রে চাঁদ দেখেছি। অতএব আমরা ৩০ পূর্ণ না হওয়া পর্যন্ত অথবা নতুন চাঁদ না দেখা পর্যন্ত রোযা রাখতে থাকব।' আমি বললাম, 'মুআবিয়ার দর্শন ও তাঁর রোযার খবর কি আপনার জন্য যথেষ্ট নয়?' তিনি বললেন, 'না। আব্দুল্লাহর রসূল (ﷺ) আমাদেরকে এ রকমই আদেশ দিয়েছেন।'<sup>1</sup>

শায়খুল ইসলাম ইবনে তাইমিয়াহ (রঃ) এই কথাকেই বেশী প্রাধান্য দিয়েছেন যে, যে দেশের লোক চাঁদ দেখেছে তাদের এবং তাদের সামনের (পশ্চিম) দেশের লোকদের জন্য রোযা রাখা ওয়াজেব। আর এ কথা গবেষণা করে প্রমাণ করেছেন যে, যখনই কোন দেশে চাঁদ দেখা যাবে, তখনই তার পরবর্তী (পশ্চিমী) দেশে চাঁদ অবশ্যই দেখা যাবে। কেননা, সে দেশের সূর্য দেৱীতে অস্ত যায়। এইভাবে যত দেৱীতে সূর্য ডুববে, চাঁদ সূর্য থেকে তত দূর হবে এবং তত উজ্জ্বল ও স্পষ্ট হবে। উদাহরণস্বরূপ যদি বাহরাইনে চাঁদ দেখা যায়, তাহলে তার পশ্চাতের দেশ নজ্দ (রিয়াজ), হিজাজ (মক্কা-মদীনা), মিসর ও মরক্কোতেও রোযা ওয়াজেব হবে। পক্ষান্তরে তার পূর্ব দিকের দেশ হিন্দু, সিন্দু ও মা অরাআন নাহার (ইরান, পাকিস্তান ও ভারতের) লোকদের জন্য রোযা রাখা ওয়াজেব হবে না।<sup>2</sup>

তদনুরূপই বাংলাদেশে চাঁদ হয়েছে বলে পাকা খবর পাওয়া গেলে পশ্চিমবাংলার লোকদের জন্য রোযা রাখা ওয়াজেব হবে; যদিও মেঘের কারণে সেখানে (পশ্চিম বাংলায়) চাঁদ না দেখা যায়।

<sup>1</sup> (মুসলিম ১০৭৮ নং)

<sup>2</sup> (আশশারহুল মুমত' ৬/৩২১-৩২২, ইবনে উসাইমীন, ফাসিঃ মুসনিদ ১৫পৃঃ, ইবনে জিবরীন, ফাসিঃ জিরাইসী ১০পৃঃ)

## কেউ একা চাঁদ দেখলে কি করবে?

যে ব্যক্তি কোন দূরবর্তী জায়গায় থেকে একাকী চাঁদ দেখে; দেখাতে তার কোন সাথী না থাকে অথবা সে ছাড়া অন্য কেউ না দেখে এবং এ দেখার ব্যাপারে নিশ্চিত হয়, তাহলে তার জন্য রোযা রাখা ওয়াজেব। কারণ, এ ব্যাপারে মহান আল্লাহর সাধারণ বাণী হল,

﴿فَمَنْ شَهِدَ مِنْكُمُ الشَّهْرَ فَلْيَصُمْهُ﴾

অর্থাৎ, অতএব তোমাদের মধ্যে যে কেউ এ মাস পাবে সে যেন এ মাসে রোযা রাখে। (কুরআনুল কারীম ২/১৮৫)

আর মহানবী ﷺ বলেন, “তোমরা চাঁদ দেখে রোযা রাখ।”

কিন্তু সে যদি শহর বা গ্রামে থাকে এবং শরয়ী আদালত বা হিলাল-কমিটির সামনে তার সাক্ষ্য পেশ করে এবং তার সে সাক্ষ্য রদ্দ করে দেওয়া হয়, তাহলে এ অবস্থায় সে গোপনে রোযা রাখবে। যাতে প্রকাশ্যে সমাজের বিরোধিতা প্রকাশ না হয়।<sup>1</sup>

## কাফের দেশে বসবাসকারী কি করবে?

যে মুসলিমরা কাফের দেশে বাস করে, যেখানে তাদের চাঁদ দেখার শরয়ী ব্যবস্থা নেই, সেখানে তারা নিজেরা চাঁদ দেখা শরয়ীভাবে প্রমাণ করতে পারে। তারা নিজেরাই চাঁদ দেখার দায়িত্ব বহন করবে। কিছু উলামা ও গণ্যমান্য লোক মিলে হিলাল-কমিটি গঠন করবে। অতঃপর তাঁদের কাছে চাঁদ দেখা প্রমাণ হলে প্রচার-মাধ্যমে প্রচার করবে অথবা টেলিফোনের মাধ্যমে এক এক এলাকার নেতৃস্থানীয় লোক বা ইমামদেরকে জানিয়ে দেবে।

পক্ষান্তরে এ কাজ তাদের দ্বারা সম্ভব না হলে; সে দেশে নিজে নিজে চাঁদ দেখা সম্ভব না হলে, নিকটবর্তী মুসলিম দেশের খবর অনুযায়ী রোযা-ঈদ করবে।<sup>2</sup> বিশেষ করে ঐ দেশ পূর্বে অবস্থিত হলে এবং শরয়ীভাবে

<sup>1</sup> (আশ্শারহুল মুমতে' ৬/৩২৯, সামানিয়া ওয়া আরবাউন সুআলান ফিস-সিয়াম ৩৬পৃঃ, আহকামুস সাওমি অল-ই'তিকাফ, আবু সারী মঃ আব্দুল হাদী ৪১-৪২পৃঃ)

<sup>2</sup> (সামানিয়া ওয়া আরবাউন সুআলান ফিস-সিয়াম ৩৫পৃঃ, সাওমু রামাযান ১৮পৃঃ)

চাঁদ দেখার কথা স্পষ্টভাবে ঘোষণা করা হলে তা গ্রহণযোগ্য। এ ক্ষেত্রে আগামী কাল রোযা বা ঈদ বললে, সে খবরে আত্মা রাখা বা চাঁদ দেখা প্রমাণ হওয়ার কথা ধরা যায় না। অতএব তখন মাস ৩০ পূর্ণ করেই রোযা-ঈদ করা জরুরী হবে।

## সউদিয়ার চাঁদ অনুসারে রোযা-ঈদ চলবে না

পূর্বেই আলোচিত হয়েছে যে, মুসলিম যে দেশে বাস করবে, সেই দেশেরই চাঁদ দেখা অনুযায়ী রোযা-ঈদ করবে। কেননা, মহানবী ﷺ বলেন, “যেদিন তোমরা রোযা রাখ, সেদিন রোযার দিন, যেদিন তোমরা ঈদ কর, সেদিন ঈদের দিন এবং যেদিন তোমরা কুরবানী কর সেদিন কুরবানীর দিন।”<sup>1</sup> সুতরাং সউদী আরবে চাঁদ দেখার কথা প্রমাণ ও ঘোষণা করা হলে এবং যে দেশে ঐ মুসলিম বাস করে সে দেশ পূর্বে হলে ও সেখানে চাঁদ দেখার কথা প্রমাণ ও ঘোষণা না হলে সে সউদিয়ার ঘোষণা মতে রোযা-ঈদ করতে পারে না। যেমন সউদিয়ার ইফতারীর সময় অনুসারে অন্য দেশের কেউ ইফতারী করতে পারে না।<sup>2</sup>

## ফজরের পর চাঁদ হওয়ার খবর পেলে

যে ব্যক্তি রমায়ান মাস প্রবেশ (চাঁদ) হওয়ার কথা ফজরের পর দিনের কোন অংশে জানতে পারে তার উচিত, (আগে কিছু খেয়ে থাকলেও) বাকী দিন পানাহার ইত্যাদি থেকে বিরত থাকা। কারণ, সে দিন হল রমায়ানের পহেলা তারীখ। আর রমায়ানের কোন দিনে কোন গৃহবাসী (অমুসাফির) সুস্থ মানুষের জন্য রোযা ভঙ্গকারী কোন জিনিস ব্যবহার করা বৈধ নয়।

কিন্তু তাকে কি ঐ দিনটি কাযা করতে হবে? এ ব্যাপারে উলামাদের মাঝে মতভেদ আছে। অধিকাংশ উলামা মনে করেন যে, তাকে ঐ দিনটি কাযা করতে হবে। কারণ, সে (পানাহার করেছে, তা না করলেও) (ফজরের আগে রাত্রি বা) দিনের শুরু থেকে রোযার নিয়ত করেনি। বরং

<sup>1</sup> (তিরমিযী, সিলসিলাহ সহীহাহ, আলবানী ২২৪নং)

<sup>2</sup> (ফাসিহ, মুসনিদ ২০পৃঃ)

দিনের কিছু অংশ তার বিনা নিয়তে অতিবাহিত হয়ে গেছে। আর নিয়ত ছাড়া কিছু শুদ্ধ হয় না। যেহেতু মহানবী ﷺ বলেন, “সকল আমল নিয়তের উপর নির্ভরশীল এবং প্রত্যেক মানুষের তাই প্রাপ্য হয়, যার সে নিয়ত করে থাকে।”<sup>1</sup>

তিনি আরো বলেন, “যে ব্যক্তি ফজরের পূর্বে রাত্রি থেকে নিয়ত না করে থাকে, তার রোযা হয় না।”<sup>2</sup>

বলা বাহুল্য, এখানে রোযা বলতে ফরয রোযাকে বুঝানো হয়েছে। কারণ, নফল রোযার নিয়ত দিনের বেলায় করলেও হয়ে যায়। তবে শর্ত হল, ইতিপূর্বে সে যেন রোযা নষ্টকারী কোন জিনিস ব্যবহার না করে থাকে। (এ কথা নফল রোযার অধ্যায়ে বলা হবে ইন শাআল্লাহ।)

পক্ষান্তরে কিছু উলামা মনে করেন যে, ঐ দিন কাযা করা জরুরী নয়। কারণ, (যদি সে কোন রোযা নষ্টকারী জিনিস ব্যবহার করেই ফেলেছে, তাহলে) সে তো না জেনেই করেছে। আর যে না জেনে কিছু করে, তার না জানাটা একটা গ্রহণযোগ্য ওজর।<sup>3</sup>

তবুও বলা যায় যে, কাযা করে নেওয়াটাই পূর্ব সতর্কতামূলক পদক্ষেপ এবং দায়মুক্ত হওয়ার শ্রেষ্ঠ পথ। যেহেতু মানুষের একটি দিন কাযা করে নেওয়া এবং নিঃসন্দেহে নিজের দায়িত্ব পালন করে নেওয়া সন্দেহে পড়া থেকে উত্তম। আর মহানবী ﷺ তো বলেছেনই, “যে জিনিস তোমাকে সন্দেহে ফেলে সে জিনিসকে বর্জন করে তুমি সেই জিনিস গ্রহণ কর, যা তোমাকে সন্দেহে ফেলে না।”<sup>4</sup> একটাই তো দিন; যা কাযা করা অতি সহজ এবং কোন কষ্ট নেই তাতে। বিশেষ করে তাতে রয়েছে সন্দেহের নিরসন, মনের শান্তি এবং হৃদয়ের সান্ত্বনা।<sup>5</sup>

<sup>1</sup> (বুখারী ১, মুসলিম ১৯০৭নং)

<sup>2</sup> (নাসাই, দারাকুতুনী, সুনান, বাইহাকী, ইরওয়াউল গালীল, আলবানী ৯১৪, সহীহুল জামেইস সাগীর, আলবানী ৬৫৩৪, ৬৫৩৫নং)

<sup>3</sup> (যামাঃ ২/৭৪, সিলসিলাহ সহীহাহ, আলবানী ৬/২৫১)

<sup>4</sup> (আহমাদ, মুসনাদ, তিরমিযী, নাসাই, ইবনে হিব্বান, সহীহ, ডাবারানী, মু'জাম, সহীহুল জামেইস সাগীর, আলবানী ৩৩৭৭-৩৩৭৮নং)

<sup>5</sup> (আশ্শারহুল মুমত' ৬/৩৪৩, সামানিয়া ওয়া আরবাউন সুআলান ফিস-সিয়াম ৩৭পৃঃ, ইবনে বায, ফাসিঃ মুসনিদ ১৯পৃঃ, মাজল্লাতুল বুহুসিল ইসলামিয়াহ ৩০/১১৬)

## আমরা রমাযান মাসকে কি দিয়ে স্বাগত জানাব?

রমাযান এমন একটি মাস, যার রয়েছে এত এত বৈশিষ্ট্য, এত এত মাহাত্ম্য। এই মাসকে আমরা কি দিয়ে বরণ করব? কোন্ জিনিস দিয়ে তাকে 'খোশ আমদেদ' জানাব?

এই পবিত্র মাসকে স্বাগত জানাতে দুই রকম দুই শ্রেণীর মানুষ রয়েছে;

প্রথম প্রকার মানুষ হল তারা; যারা এ মাস নিয়ে খুশী হয়, এর আগমনে আনন্দবোধ করে। তার কারণ, তারা এ মাসে রোযা রাখতে অভ্যাসী। এ মাসের সকল কষ্ট বরণ করতে প্রয়াসী। কারণ, তারা জানে যে, ইহকালের সুখ-সম্ভোগ বর্জন করলে, তা পরকালে পাওয়া যায়। কারণ, তারা উপলব্ধি করে যে, এ মাস হল আল্লাহর ইবাদত ও আনুগত্যের এবং তাঁর নৈকট্যদাতা আমলে প্রতিযোগিতা করার বিশাল মৌসম। তারা জানে যে, আল্লাহ আযযা অজাল্লু এ মাসে যে সওয়াব বান্দাকে প্রদান করবেন, তা আর অন্য কোন মাসে করবেন না। সুতরাং প্রিয় যেমন তার প্রবাসী প্রিয়তম বা তদপেক্ষা প্রিয়তর কিছুই আগমনে আনন্দ পায়, ঠিক তারই মত রমাযানের আগমনে তাদের আনন্দিত হওয়াতে আশ্চর্যের কিছু নয়। এই হল প্রথম শ্রেণীর মানুষ।

দ্বিতীয় শ্রেণীর মানুষ হল তারা, যারা এই পবিত্র মাসকে ভারী মনে করে, রোযার কষ্টকে বড় মনে করে। সুতরাং যখনই এ মাসের আগমন ঘটে, তখনই সে মনে করে তার ঘরে যেন এক অবাঞ্ছিত মেহেমান এল। ফলে শুরু থেকেই সে তার ঘন্টা, দিন ও রাত গুনতে থাকে। অধৈর্য হয়ে তার বিদায় মুহূর্তের অপেক্ষা করতে থাকে। এক একটা দিন পার হতেই তার আনন্দ হয়। পরিশেষে যখন ঈদ আসার সময় হয়, তখন এই মাস অতিবাহিত হওয়া নিকটবর্তী জেনে বড় খুশী হয়!

এই শ্রেণীর মানুষরা এই মহতিপূর্ণ মাসকে এই জন্য ভারী মনে করে এবং তাড়াতাড়ি অতিবাহিত হওয়ার জন্য অধীর আগ্রহে অপেক্ষা করে যে, তারা তাদের অবৈধ ভোগ-বিলাসে মত্ত হওয়া ছাড়াও পানাহার ও যৌনাচার ইত্যাদি সুখ-সম্ভোগে অধিকাধিক অভ্যাসী থাকে। আর সেই ভোগ-বিলাস ব্যবহার করার পথে এই মাস তাদের জন্য বাধা ও অন্তরায় হয়ে দাঁড়ায়। এ মাস তাদের সুখ-উপভোগের প্রতিবন্ধক হিসাবে আগমন করে। যার ফলে তারা এই মাসকে প্রচণ্ড ভারী বোধ করে থাকে।

আরো একটা কারণ এই যে, তারা এমন এক সম্প্রদায়, যারা আল্লাহর আনুগত্যের ব্যাপারে বড় অমনোযোগী। এমন কি তাদের মধ্যে অনেকে ফরয ও ওয়াজেব আমলেও ঔদাস্য প্রদর্শন করে থাকে; যেমন তারা নামায পড়ে না। অতঃপর এই মাস প্রবেশ করলে কোন কোন আমল তারা করতে শুরু করে দেয়। কিন্তু আসলে তারা ঐ আমলে অভ্যাসী নয়। যার ফলে রমাযান মাসটিকেই ভারী মনে করে থাকে।<sup>1</sup>

বলা বাহুল্য, আল্লাহর নেক বান্দার জন্য উচিত, এই পবিত্র মাসকে সত্য ও ঝাঁটি তওবা দিয়ে; পাপ বর্জন করে এবং পুনরায় সে পাপ না করার পাক্কা সংকল্প নিয়ে খোশ-আমদেদ জানানো।

এই মাসকে আমরা স্বাগত জানাব, সর্বপ্রকার মন্দ কাজ থেকে বিরত হয়ে; মিথ্যাবাদিতা, গীবত, অশ্লীলতা, গান-বাজনা প্রভৃতি বর্জন করে।

এই মাসকে আমরা স্বাগত জানাব, কুরআন তেলাআত, দুআ ও যিক্রের মাধ্যমে। আর কোন গাফলতির মাধ্যমে তাকে স্বাগত জানাব না।

একজন নেককার বলেছেন, 'আয়ু তো স্বল্প। সুতরাং গাফলতি দিয়ে তাকে আরো অল্প করে দিও না।'<sup>2</sup>

এই মাসকে আমরা স্বাগত জানাব, অকৃত্রিম ও সুদৃঢ় সংকল্প, সুউচ্চ হিম্মত ও মনোবল দ্বারা, তার দিনগুলিকে সুবর্ণ সুযোগরূপে নেক কাজে ব্যবহার করার মাধ্যমে এবং তার পবিত্র সময়গুলিকে অযথা ব্যয় না করার মাধ্যমে।

এই মাসকে আমরা স্বাগত জানাব, আগ্রহ, স্ফূর্তি, উৎসাহ ও উদ্দীপনার সাথে, নির্মল হৃদয়ে সুসংবাদ গ্রহণের সাথে এবং বেশী বেশী করে আমল ও ইবাদত করার প্রস্তুতি নিয়ে। সকল প্রকার আলস্য কাটিয়ে, অতিনিদ্রার অতি পরিহার করে এবং তার আগমনে বিরক্তিবোধ প্রদর্শন না করে।

আর এই মাসকে আমরা স্বাগত জানাব না, খেল-তামাশার মাধ্যমে; পার্ক, ময়দান বা রাস্তার ধারে বসে হাওয়া খেয়ে রাত্রি জাগরণ করে, অথবা তাস, কেলাম বা অন্য কোন খেলা খেলে, অথবা টিভি, সিডি, ভিডিও, রেডিও বা অন্য কোন যন্ত্রের মাধ্যমে নোংরা ছবি দেখে ও গান-বাজনা শুনে, অথবা গাড়ি নিয়ে ফূর্তিবাজি করে, নাটক-যাত্রা বা ফিল্ম দেখে।

<sup>1</sup> (দুরুসু রামাযান অকাফাত লিস-সায়েমীন, সালমান বিন ফাহদ আল-আওদাহ ৬-৮ পৃঃ)

<sup>2</sup> (ভাওজীহাতুন অফাওয়াএদ লিসসা-য়েমীনা অসসায়েমাত ৬৫ পৃঃ)



ভাই মুসলিম! এই পবিত্র মাসকে; এর দিন ও রাত্রির প্রতিটি মুহূর্তকে আপনার এক একটি সুবর্ণ সুযোগরূপে জ্ঞান করা উচিত। সুতরাং পরকালের পাথেয় সংগ্রহ করতে, কল্যাণের ভাণ্ডার পরিপূর্ণ করতে আল্লাহর নৈকট্য লাভ করতে কোন প্রকারের অবজ্ঞা প্রদর্শন করা উচিত নয়। অভিজ্ঞ ও জ্ঞানী মানুষ কল্যাণের মৌসমসমূহকে হেলায় হারাতে চায় না। বরং সুযোগের সদ্ব্যবহার করে এবং মহান প্রতিপালকের করুণা লাভের সকল কাজ করার চেষ্টায় থাকে। বিদায় দিনের জন্য পথের সম্বল সাথে করে নেয়। আর কে জানে ভাইজান! হয়তো বা এই বছরের মৃত মানুষদের রেজিস্টারে আপনার নামটিও লিখা আছে! সুতরাং জলদি করুন, শীঘ্র করুন। এখনও সময় আছে, রক্ষা পাওয়ার সম্ভাবনা আছে, আমল শুরু করে দিন।<sup>1</sup>

প্রকাশ থাকে যে, রমায়ান মাস আগত হওয়ার সময় এক অপরকে মোবারকবাদ জানানো দোষাবহ নয়। যেহেতু মহানবী ﷺ সাহাবাগণকে রমায়ান মাস আগমনের সুসংবাদ দিতেন এবং তার প্রতি যত্ন নিতে অনুপ্রাণিত করতেন।<sup>2</sup>

## শা'বানের শেষ দুই বা একদিন রোযা রেখে রমায়ান বরণ করা

পূর্বসতর্কতামূলকভাবে রমায়ানের এক দিন আগে থেকে রোযা রাখা বৈধ নয়। কারণ, রমায়ানের রোযা চাঁদ দেখার সাপেক্ষে। সুতরাং এ ব্যাপারে নিজেকে ভারগুস্ত করা উচিত নয়।

হযরত আবু হুরাইরা (رضي الله عنه) কর্তৃক বর্ণিত, নবী ﷺ বলেন, “তোমাদের কেউ যেন রমায়ানের আগে আগে একটি বা দুটি রোযা না রাখে। অবশ্য এমন ব্যক্তির কথা ভিন্ন, যে সেই দিনের রোযা রাখায় অভ্যাসী। তার উচিত, সেদিনে রোযা রাখা।”<sup>3</sup>

<sup>1</sup> (দুকসু রামায়ান অকাফাত লিস-সায়েমীন ১০৮-পৃঃ)

<sup>2</sup> (সাবউনা মাসআলাহ ফিস-সিয়াম ১১নং)

<sup>3</sup> (আহমাদ, মুসনাদ, বুখারী ১৯১৪, মুসলিম ১০৮-২, সুনানে আরবাবাহ; আবু দাউদ, তিরমিযী, নাসাই ও ইবনে মাজাহ)

## চতুর্থ অধ্যায়

### রমাযানের রোযায় মানুষের শ্রেণীভেদ

রমাযানের রোযা প্রত্যেক সাবালক, জ্ঞানসম্পন্ন, সামর্থ্যবান, গৃহবাসী (অমুসাফির), সুস্থ ও সকল বাধা থেকে মুক্ত মুসলিম নরনারীর উপর ফরয। এই কথাকে ভিত্তি করে রমাযানের রোযায় পৃথিবীর সকল মানুষ কয়েক ভাগে বিভক্ত হয়ে যায়। আর প্রত্যেক ভাগের রয়েছে পৃথক পৃথক আহকাম ও মাসায়েল। আগামী পরিচ্ছেদগুলিতে আমরা সেই সব কথাই আলোচনা করব - ইন শাআল্লাহ।

### (১) কাফের

কাফের বা অমুসলিমের জন্য রোযা এ দুনিয়ায় আদায়যোগ্য ওয়াজেব নয়। কেননা, সে রোযা রাখলেও তা শুদ্ধ হবে না এবং আল্লাহর দরবারে কবুলও হবে না। যেহেতু রোযা (অনুরূপ যে কোন ইবাদত) শুদ্ধ হওয়ার অন্যতম প্রধান শর্ত হল ইসলাম। (যেমন শর্ত হল ইখলাস ও মুহাম্মাদী তরীকা।) মহান আল্লাহ বলেন,

﴿وَمَا مَنَعَهُمْ أَنْ تُقْبَلَ مِنْهُمْ نَفَقَاتُهُمْ إِلَّا أَنَّهُمْ كَفَرُوا بِاللَّهِ وَبِرَسُولِهِ﴾

﴿وَلَا يَأْتُونَ الصَّلَاةَ إِلَّا وَهُمْ كُسَالَىٰ وَلَا يُنْفِقُونَ إِلَّا وَهُمْ كَارِهُونَ﴾

অর্থাৎ, ওদের অর্থ সাহায্য গ্রহণে বাধা কেবল এই ছিল যে, ওরা আল্লাহ ও তাঁর রসূলকে অস্বীকার করে, নামাযে শৈথিল্যের সাথে হাজির হয় এবং একান্ত অনিচ্ছাকৃতভাবেই দান করে। (কুরআনুল কারীম ৯/৫৪)

বলা বাহুল্য, দানের মত জিনিস; যার উপকার অপরের উপর বর্তে - তা যদি কবুল না হয়, তাহলে অন্যান্য ইবাদত বেশী কবুল না হওয়ার কথা।

কোন কাফের যদি রমাযানের দিনে ইসলাম গ্রহণ করে, তাহলে দিনের অবশিষ্টাংশ রোযা নষ্টকারী জিনিস হতে তাকে বিরত থাকতে হবে। কেননা, মুসলিম হওয়ার সাথে সাথে রোযা তারও উপর ওয়াজেব হয়ে যায়। অবশ্য ইসলাম কবুল করার পূর্বে যে রোযা অতিবাহিত হয়ে গেছে

তা আর কাযা করতে হবে না। কারণ, সে সময় তার উপর রোযা ওয়াজেব ছিল না। মহান আল্লাহ বলেন,

﴿قُلْ لِلَّذِينَ كَفَرُوا إِنْ أَنْتَهُمْ يُغْفَرُ لَهُمْ مَا قَدْ سَلَفَ﴾

অর্থাৎ, কাফেরদেরকে বল, যদি তারা (কুফরী থেকে) বিরত হয়, তাহলে তাদের অতীতের পাপ মাফ করে দেওয়া হবে। (কুরআনুল কারীম ৮/৩৮)

আর যেহেতু লোকেরা আল্লাহর রসূল ﷺ-এর যুগে মুসলমান হত, অথচ তিনি তাঁদেরকে তাদের (ইসলামের পূর্বে) ছুটে যাওয়া নামায, যাকাত বা রোযা কাযা করতে আদেশ করতেন না।

কিন্তু মহান আল্লাহ কাল কিয়ামতে তা ত্যাগ করার জন্য এবং অনুরূপ স্বীনের সকল ওয়াজেব কর্ম ত্যাগ করার জন্য কাফেরদেরকেও শাস্তি দেবেন। সেদিন মুমিনরা কাফেরদেরকে দোযখে যাওয়ার কারণ প্রসঙ্গে যে প্রশ্ন করবে, সেই কথা মহান আল্লাহ কুরআন মাজীদে উল্লেখ করে বলেন,

﴿مَا سَلَكَكُمْ فِي سَقَرٍ؟ قَالُوا لَمْ نَكُ مِنَ الْمَصْلِيِّنَ، وَلَمْ نَكُ نَطْعُمْ

الْمُسْكِينِ، وَكُنَّا نَحْوُضُ مَعَ الْحَائِضِيْنَ، وَكُنَّا نَكْذِبُ بِيَوْمِ الدِّينِ﴾

অর্থাৎ, কিসে তোমাদেরকে সাকার (জাহান্নামে) নিক্ষেপ করেছে? তারা বলবে, আমরা নামাযী ছিলাম না, মিসকীনকে আহাৰ্য দান করতাম না, অন্যায় আলোচনাকারীদের সাথে আলোচনায় যোগ দিতাম এবং কিয়ামতের দিনকে মিথ্যা মনে করতাম। (কুরআনুল কারীম ৭৪/৪২-৪৬)

মুসলিম রোযাদারদের সামনে অমুসলিমদের রমাযানের দিনে পানাহার করায় কোন ক্ষতি নেই। কেননা, তাতে রোযাদার মুসলিম আল্লাহ আযযা অজাল্লার প্রশংসা করবে যে, তিনি তাকে ইসলামের প্রতি পথপ্রদর্শন করেছেন; যে ইসলামে রয়েছে ইহলৌকিক ও পারলৌকিক সুখ। (তাদেরকে দেখে) আল্লাহ তাআলার প্রশংসা করবে যে, তিনি তাদের ঐ

<sup>1</sup> (আশশারহুল মুমতে' ৬/৩৩১-৩৩২, ফাইয়ুর রাহীমির রাহমান, ফী আহকামি অমাওয়াইহি রামাযান ৮৬পৃ, ইবনে উযাইমীন ফাসিঃ মুসনিদ ২৬পৃ)

(ভ্রষ্টতার) আপদ থেকে মুক্তি দিয়েছেন; যারা তাঁর হেদায়াতের আলো গ্রহণ করেনি। আর বিদিত যে, মুসলিমের জন্য যদিও এ দুনিয়াতে রমাযানের দিনে শরীয়তের আইন অনুযায়ী পানাহার করা নিষিদ্ধ, কিন্তু কিয়ামতের দিন সে তার উপযুক্ত বিনিময় প্রাপ্ত হবে। সেদিন তাকে বলা হবে,

﴿كُلُوا وَاشْرَبُوا هَنِينًا بِنَا أَسْلَفْتُمْ فِي الْأَيَّامِ الْخَالِيَةِ﴾

অর্থাৎ, তোমরা পার্থিব জীবনে ভালো কাজ করেছিলে তারই কারণে (আজ) তৃপ্তির সাথে পানাহার কর। (কুরআনুল কারীম ৬৯/২৪)

অবশ্য সাধারণ স্থানে অমুসলিমদেরকে প্রকাশ্যভাবে পানাহার করতে বারণ করতে হবে। কারণ, তা ইসলামী রাষ্ট্রের পরিবেশের প্রতিকূল।<sup>1</sup>

## (২) নামায-ত্যাগী

যে ব্যক্তি নামায ফরয হওয়ার কথা অস্বীকার করে এবং ইচ্ছাকৃত তা ত্যাগ করে সে ব্যক্তি উলামাদের সর্বসম্মতভাবে কাফের। পক্ষান্তরে যে ব্যক্তি অবহেলায় অলসতার দরুন নামায ত্যাগ করে, সে ব্যক্তিও উলামাদের শুদ্ধ মতানুসারে কাফের। মহানবী ﷺ বলেন, “মানুষ এবং কুফর ও শিরকের মাঝে (অন্তরাল) নামায ত্যাগ।”<sup>2</sup> তিনি আরো বলেন, “আমাদের মাঝে ও ওদের মাঝে চুক্তিই হল নামায। যে ব্যক্তি তা পরিত্যাগ করে সে কাফের।”<sup>3</sup>

এখানে কাফের বা কুফর বলতে সেই কুফরকে বুঝানো হয়েছে, যা মানুষকে ইসলাম থেকে খারিজ করে দেয়। যেহেতু মহানবী ﷺ নামাযকে মুমিন ও কাফেরদের মাঝে অন্তরাল বলে চিহ্নিত করেছেন। আর এ কথা বিদিত যে, কুফরীর মিল্লাত ইসলামী মিল্লাত থেকে ভিন্নতর।

<sup>1</sup> (সুআলান ফিস-সিয়াম ৫০-৫১পৃঃ)

<sup>2</sup> (মুসলিম ৮-২নং)

<sup>3</sup> (আহমাদ, মুসনাদ, তিরমিযী ২৬২১, ইবনে মাজাহ ১০৭৯নং, হাকেম, মুত্তাদরাক, ইবনে হিব্বান, সহীহ, সহীহ তারগীব, আলবানী ৫৬১নং)

সুতরাং যে ব্যক্তি ঐ চুক্তি পালন না করবে সে কাফেরদের একজন।<sup>1</sup>

আব্দুল্লাহ বিন শাকীক্ উকাইলী বলেন, ‘নবী ﷺ-এর সাহাবাবুন্দ নামায ছাড়া অন্য কোন আমল ত্যাগ করাকে কুফরী মনে করতেন না।’<sup>2</sup>

বলা বাহুল্য, যে ব্যক্তি কাফের প্রতীয়মান হবে সে ব্যক্তির রোযা ও সকল প্রকার ইবাদত পণ্ড হয়ে যাবে। কারণ, মহান আল্লাহ বলেন,

﴿وَأَوْ أَشَرَ كُتُوبًا لِحَبِطَ عَنْهُمْ مَّا كَانُوا يَعْمَلُونَ﴾

অর্থাৎ, তারা যদি শির্ক করত, তাহলে তাদের কৃতকর্ম পণ্ড হয়ে যেত।

(কুরআনুল কারীম ৬/৮৮)

তদনুরূপ সেই সকল রোযাদার যারা কেবল রমায়ান মাসে নামায পড়ে এবং বাকী ১১ মাস নামায পড়ে না, তারা আসলে আব্দুল্লাহকে ধোকা দেয়। কত নিকৃষ্ট সেই জাতি, যে জাতি নিজ পালনকর্তা আব্দুল্লাহকে কেবল রমায়ান মাসেই চিনে; অন্য মাসে চিনে না। এই শ্রেণীর লোকেদের অরমায়ানে নামায না পড়ার কারণেই রোযাও শুদ্ধ হবে না।

তবে তারা রোযা ছাড়তে আদিষ্ট বা উপদিষ্ট নয়। কেননা, রোযা রাখলে তাদের জন্য মঙ্গলেরই আশা করা যায়। এতে তারা ধীনের নৈকট্য পেতে প্রয়াস পাবে। তাদের হৃদয়ে যে আব্দুল্লাহভীতিটুকু আছে তার মাঝেই আশা করা যায় যে, তারা তওবা করে ১২ মাস নামায পড়াও ধরবে।<sup>3</sup>

### (৩) শিশু

নাবালক ছোট শিশুর জন্য রোযা ফরয নয়। মহানবী ﷺ বলেন, “তিন ব্যক্তি নিকট থেকে (পাপ লিখার) কলম তুলে নেওয়া হয়েছে; জ্ঞানশূন্য পাগলের নিকট থেকে; যতক্ষণ না সে সুস্থ হয়েছে। ঘুমন্ত ব্যক্তির নিকট থেকে; যতক্ষণ না সে জাগ্রত হয়েছে। আর শিশুর নিকট থেকে;

<sup>1</sup> (ইবনে উয়াইমীন, হকমু ভারিকিস সফলাহ, ইবনে উয়াইমীন ৯ পৃঃ)

<sup>2</sup> (তিরমিযী ২৬২২, হাকেম, মুস্তাদরাক, সহীহ ভারগীব, আলবানী ৫৬২নং)

<sup>3</sup> (ছায়ী উলামা কমিটি, ফাসিঃ মুসনিদ ২৮-২৯ পৃঃ)

যতক্ষণ না সে সাবালক হয়েছে।”<sup>1</sup>

অবশ্য জ্ঞানবান শিশু রোযা রাখলে শুদ্ধ হবে এবং সওয়াবও পাবে। আর তার পিতা-মাতার জন্যও রয়েছে তরবিযত ও ভালো কাজের নির্দেশ দেওয়ার সওয়াব।

সুতরাং অভিভাবকদের উচিত, রোযা রাখতে সক্ষম ছোট শিশুদেরকে রোযা রাখতে আদেশ করা, উৎসাহ দিয়ে তাদেরকে এই বিরাট ইবাদতে অভ্যাসী করা এবং তার জন্য উদ্বুদ্ধকারী পুরস্কার ও উপহার নির্ধারিত করা। মহানবী ﷺ-এর সাহাবাগণ নিজ নিজ ছোট বাচ্চাদেরকে রোযা রাখতে আদেশ দিতেন। রুবাইয়ে’ বিস্তে মুআওবিয ﷺ বলেন, আশুরার সকালে আল্লাহর রসূল ﷺ মদীনার উপকণ্ঠে অবস্থিত আনসারদের মহল্লায় বলে পাঠালেন যে, “যে ব্যক্তি ফজরের আগে থেকেই রোযা রেখেছে, সে যেন তার রোযা পূরণ করে। আর যে ব্যক্তির রোযা না রেখে ফজর হয়েছে, সেও যেন বাকী দিন রোযা রাখে।” সুতরাং আমরা তার পর থেকে রোযা রাখতাম। আমাদের ছোট শিশুদেরকে -আল্লাহর ইচ্ছায়- রোযা রাখাতাম এবং তাদেরকে নিয়ে মসজিদে যেতাম। তাদের জন্য তুলো দ্বারা পুতুল গড়তাম। তাদের কেউ খাবারের জন্য কাঁদতে লাগলে তাকে ঐ পুতুল দিতাম। আর এইভাবে ইফতারের সময় হয়ে যেত। অন্য এক বর্ণনায় আছে, আমরা তাদেরকে ঐ খেলনা দিতাম, যাতে তারা ভুলে থাকে এবং খেলার ঘোরে তাদের রোযা পূর্ণ করতে পারে।<sup>2</sup>

শিশু (স্বপ্নদোষ হয়ে) দিনের ভিতরে সাবালক হলে দিনের বাকী অংশ রোযা নষ্টকারী জিনিস থেকে বিরত হবে। কারণ, এক্ষণে তার জন্য রোযা ফরয। অবশ্য এর পূর্বের রোযাগুলো কাযা রাখতে হবে না। কেননা, পূর্বে তার উপর রোযা ফরয ছিল না।<sup>3</sup>

প্রসঙ্গতঃ উল্লেখ্য যে, তিনটির মধ্যে একটি লক্ষণ দেখে সাবালক চেনা যায়; স্বপ্নদোষ বা অন্য প্রকারে সকাম বীর্যপাত হওয়া, নাভির নীচে মোটা

<sup>1</sup> (আহমাদ, মুসনাদ, আবু দাউদ, তিরমিযী, ইবনে মাজাহ, হাকেম, মুত্তাদ্দরাক, সহীহুল জামেইস সাগীর, আলবানী ৩৫১২-৩৫১৪নং)

<sup>2</sup> (মুসলিম ১১৩৫নং)

<sup>3</sup> (মাসআলাহ ফিস-সিয়াম ৪ ১২নং)

লোম গজানো, অথবা ১৫ বছর বয়স হওয়া।

আর বালিকাদের ক্ষেত্রে একটি অধিক লক্ষণ হল, মাসিক শুরু হওয়া। বলা বাহুল্য, বালিকার মাসিকের খুন আসতে শুরু হলেই সে সাবালিকা; যদিও তার বয়স ১০ বছর হয়।<sup>1</sup>

## (৪) পাগল

পাগলের উপর রোযা ফরয নয়। কারণ, তার উপর থেকে কলম তুলে নেওয়া হয়েছে; যেমন পূর্বোক্ত হাদীসে উল্লেখ করা হয়েছে। অনুরূপ আধ-পাগলা, যার ভালো-মন্দের তমীয নেই এবং অনুরূপ স্থবির বৃদ্ধ, যার তমীয-জ্ঞান নষ্ট হয়ে গেছে। এ সকল জ্ঞানহীন মানুষদের তরফ থেকে খাদ্যদানও ওয়াজেব নয়।<sup>2</sup>

পাগল দিনের ভিতরে সুস্থ হলে তার জন্য দিনের বাকী অংশ রোযা নষ্টকারী জিনিস থেকে বিরত হওয়া জরুরী। কারণ, এক্ষণে তার জন্য রোযা ফরয। অবশ্য এর পূর্বের রোযাগুলো কাযা রাখতে হবে না। কেননা, পূর্বে তার উপর রোযা ফরয ছিল না।

পাগলের উপর থেকে (পাপের) কলম তুলে নেওয়া হয়েছে। কিন্তু পাগল যদি এমন হয় যে, ক্ষণে পাগল ক্ষণে ভালো, তাহলে এমন ব্যক্তির জন্য ভালো থাকা অবস্থায় রোযা নষ্টকারী জিনিস থেকে বিরত থাকা জরুরী। আর পাগল থাকা অবস্থায় তা ধর্তব্য নয়। পক্ষান্তরে ভালো থাকা অবস্থায় রোযা রেখে দিনে হঠাৎ পাগল হয়ে গেলে তার রোযা বাতিল নয়। যেমন কেউ যদি কোন রোগ বা আঘাত ইত্যাদির কারণে বেহঁশ বা অজ্ঞান হয়ে যায় তাহলে তার রোযাও নষ্ট হয় না। কেননা, সে জ্ঞান থাকা অবস্থায় রোযার নিয়ত করেছে, অতএব অজ্ঞান হলেও সে নিয়ত নষ্ট হবে না। এই বিধান মূর্ছা, হিষ্টিরিয়া বা জিন পাওয়া রোগীরও।

যদি কেউ রোযা রাখার ফলে (ক্ষুধার তাড়নায়) বেহঁশ হয়ে যায়,

<sup>1</sup> (আশশারহুল মুমতে' ৬/৩৩৩, ফাইযুর রাহীমির রাহমান, ফী আহকামি অমাওয়াইযি রামাযান ৮৭পৃঃ, ফুসুলুন ফিস-সিয়ামি অত-তারাবীহি অয-যাকাহ ৫পৃঃ)

<sup>2</sup> (ইবনে উমাইমীন, ফাসিঃ ৫৯পৃঃ)

তাহলে সে রোযা ভেঙ্গে কাযা করতে পারে। দিনের বেলায় কেউ বেহঁশ হলে এবং সূর্য অস্ত যাওয়ার আগে কিংবা পরে হঁশ ফিরে এলে তার রোযা শুদ্ধ। যেহেতু সে ভোরে ভালো অবস্থায় রোযা রেখেছে। অবশ্য যদি কেউ ফজর থেকে সূর্যাস্ত পর্যন্ত বেহঁশ থাকে, তাহলে অধিকাংশ উলামার মতে তার রোযা শুদ্ধ নয়। কিন্তু অধিকাংশ উলামার মতে সে রোযার কাযা করতে হবে; তাতে বেহঁশ থাকার সময় যতই বেশী হোক না কেন।<sup>1</sup>

কোন কোন আহলে ইল্‌মের ফতোয়া মতে যে ব্যক্তি বেহঁশ হয়ে থাকে বা (হৃদযন্ত্র বন্ধ হওয়ার ফলে) কিছুকাল নিষ্পন্দ থাকে, অথবা নিজের কোন মঙ্গলের জন্য জ্ঞানশূন্যকারী ওষুধ ব্যবহার করে অচেতন থাকে এবং তা যদি ৩ দিনের কম হয় তাহলে সে ঐ বেহঁশ বা অচেতন থাকার দিনগুলো কাযা করবে; যেমন কেউ ঘুমিয়ে থেকে নামায নষ্ট করলে তাকে কাযা করতে হয়। পক্ষান্তরে ৩ দিনের বেশী হলে কাযা করতে হবে না; যেমন পাগলকে কাযা করতে হয় না।<sup>2</sup>

ঘুমন্ত ব্যক্তি যদিও তার উপর থেকে কলম তুলে নেওয়া হয়ে থাকে, তবুও তার রোযা শুদ্ধ, তাকে আর কাযা করতে হবে না; যদিও সে সারাটি দিন ঘুমিয়ে থাকে। কারণ, ঘুম হল স্বাভাবিক কর্ম। আর তাতে সার্বিকভাবে অনুভূতি নষ্ট হয় না।<sup>3</sup>

## (৫) অক্ষম ব্যক্তি

১। বৃদ্ধ ও স্থবির বা অথর্ব ব্যক্তি, যার শারীরিক ক্ষমতা নিঃশেষ হয়ে গেছে এবং দিনের দিন আরো খারাপের দিকে যেতে যেতে মরণের দিকে অগ্রসর হতে চলেছে, সে ব্যক্তির জন্য রোযা ফরয নয়। কষ্ট হলে সে রোযা রাখবে না। মহান আল্লাহ বলেন,

﴿وَعَلَى الَّذِينَ يُطِيقُونَهُ فِدْيَةٌ طَعَامَ مَسْكِينٍ﴾

<sup>1</sup> (সাবউনা মাসআলাহ ফিস-সিয়াম ২৬নং, আশশারহুল মুমতে' ৬/৩৬৫)

<sup>2</sup> (মাসআলাহ ফিস-সিয়াম ৭০৪ ২৬নং)

<sup>3</sup> (আশশারহুল মুমতে' ৬/৩৬৬, আসাইঃ ৬৩পৃঃ)



অর্থাৎ, যারা রোযা রাখার সামর্থ্য থাকা সত্ত্বেও রোযা রাখতে চায় না, তারা এর পরিবর্তে একজন মিসকীনকে খাদ্য দান করবে। (কুরআনুল কারীম ২/১৮৪)

ইবনে আব্বাস (رضي الله عنه) বলতেন, এই আয়াত মনসূখ নয়। তারা হল অর্থবৃদ্ধ-বৃদ্ধা, যারা রোযা রাখতে সক্ষম নয়। তারা প্রত্যেক দিনের বদলে একটি করে মিসকীনকে খাদ্য দান করবে।<sup>1</sup>

অবশ্য এমন বৃদ্ধ, যার কোন জ্ঞানই নেই, তার জন্য এবং তার পরিবারের জন্য কোন কিছু ফরয নয়। তার তরফ থেকে রোযা রাখতে বা কাযা করতেও হবে না এবং মিসকীনও খাওয়াতে হবে না। কারণ, শরীয়তের সকল ভার তার পক্ষে মাফ হয়ে গেছে। কিন্তু সে যদি এমন বৃদ্ধ হয়, যে কখনো কখনো ভালো-মন্দের তমীয করতে পারে, আবার কখনো কখনো আবোল-তাবোল বকে, তাহলে যে সময় সে ভালো থাকে সেই সময় তার জন্য রোযা বা খাদ্যদান ফরয এবং যে সময় তমীয-জ্ঞান থাকে না সে সময় ফরয নয়।<sup>2</sup>

২। এমন চিররোগী, যার রোগ ভালো হওয়ার কোন আশা নেই; যেমন ক্যান্সারের রোগী (পেট খালি রাখলে পেটে যন্ত্রণা হয়) এমন রোগী ব্যক্তির জন্য রোযা ফরয নয়। কারণ, তার এমন কোন সময় নেই, যে সময়ে সে তা রাখতে পারে। অতএব তার তরফ থেকে একটি রোযার পরিবর্তে একটি করে মিসকীন খাওয়াতে হবে।<sup>3</sup>

### ❖ খাদ্যদানের নিয়ম ৪

মিসকীনকে খাদ্যদানের ২টি নিয়ম আছে ৪:-

প্রথম এই যে, এক দিন খাবার তৈরী করে রোযার সংখ্যা হিসাবে মিসকীন ডেকে খাইয়ে দেবে। (অথবা এক জন মিসকীনকেই ঐ পরিমাণ দিন খাইয়ে দেবে।) হযরত আনাস (رضي الله عنه) বৃদ্ধ হয়ে গেলে তাই করতেন। তিনি এক অথবা দুই বছর রোযা রাখতে না পারলে প্রত্যহ মিসকীনকে

<sup>1</sup> (বুখারী ৪৫০৫নং)

<sup>2</sup> (মাসআলাহ ফিস-সিয়াম, মুহাম্মাদ বিন সালাহ আল-মুনাজ্জিদ ৭০৪ ৩০নং)

<sup>3</sup> (ইবনে উবাইমীন, ফুসিথাযাঃ ৯পৃঃ)

গোশ্ত-রুটী খাইয়েছেন।<sup>1</sup>

দ্বিতীয় নিয়ম এই যে, অপক্ক খাদ্য দান করবে। অর্থাৎ, দেশের প্রধান খাদ্য থেকে প্রত্যেক দিনের পরিবর্তে প্রত্যেক মিসকীনকে মোটামুটি সওয়া এক কিলো করে খাদ্য (চাল অথবা গম) দান করবে। যেহেতু কা'ব বিন উজরার ইহরাম অবস্থায় মাথায় উকুন হলে মহানবী ﷺ তাঁকে বলেন, “তোমার মাথা মুণ্ডন করে ফেল এবং তিন দিন রোযা রাখ, কিংবা প্রত্যেক মিসকীনকে মাথাপিছু অর্ধ সা’ (মোটামুটি সওয়া এক কিলো) করে ছয়টি মিসকীনকে খাদ্য দান কর, কিংবা একটি ছাগ কুরবানী কর।”<sup>2</sup>

অবশ্য সেই সাথে কিছু গোশ্ত বা কোন তরকারীও মিসকীনকে দান করা উচিত। যাতে মহান আল্লাহর এই বাণীর পরিপূর্ণ আনুগত্য সম্ভব হয়;

﴿وَعَلَى الَّذِينَ يُطِيقُونَهُ فِدْيَةٌ طَعَامُ مَسْكِينٍ﴾

অর্থাৎ, যারা রোযা রাখার সামর্থ্য থাকা সত্ত্বেও রোযা রাখতে চায় না, তারা এর পরিবর্তে একজন মিসকীনকে খাদ্য দান করবে। (কুরআনুল কারীম ২/১৮৪)

খাদ্য দান কখন করবে -সে ব্যাপারে এখতিয়ার আছে। যদি প্রত্যেক দিন একটা করে রোযার ফিদ্যা দান করে, তাও চলবে। যদি মাসের শেষে সব দিনগুলি হিসাব করে একই দিনে তা দান করে, তাও চলবে। এ ব্যাপারে বাধ্য-বাধকতা কিছু নেই। তবে রোযার আগেই দেওয়া চলবে না। কারণ, তা আগে রোযা রাখার মত হয়ে যাবে। আর রমাযানের আগে শা'বানে কি ফরয রোযা রাখা চলবে?<sup>3</sup>

সমস্ত খাদ্যকে রোযার সংখ্যা পরিমাণ মিসকীনের মাঝে বন্টন করা যাবে। যেমন সমস্ত খাদ্য কেবল উপযুক্ত একজন মিসকীন অথবা একটি মাত্র মিসকীন পরিবারকেও দেওয়া যাবে।<sup>4</sup>

<sup>1</sup> (বুখারী ৯২৮-৯২৯নং)

<sup>2</sup> (বুখারী ১৮১৬, মুসলিম ১২০১নং)

<sup>3</sup> (আশ্শারহুল মুমতে' ৬/৩৩৫)

<sup>4</sup> (ইবনে জিবরীন, ফাসিঃ জিরাইসী ৩২পৃঃ)

৩। যে ব্যক্তির রোগ সাময়িক, যা সেরে যাওয়ার আশা আছে; যেমন জ্বর ইত্যাদি, এমন ব্যক্তির ৩ অবস্থা হতে পারে :

(ক) রোযা রাখলে তার কষ্ট হবে না বা রোযা তার কোন ক্ষতি করবে না। এমন অবস্থায় তার জন্য রোযা রাখা ওয়াজেব। কারণ, তার কোন ওজর নেই।

(খ) রোযা রাখলে তার কষ্ট হবে, কিন্তু রোযা তার কোন ক্ষতি করবে না। এমন অবস্থায় তার জন্য রোযা রাখা মকরুহ। কারণ, তাতে আল্লাহর দেওয়া অনুমতি ও তার আত্মার প্রতি দয়া প্রদর্শন করা থেকে ভিন্ন আচরণ হয়ে যায়। অথচ মহান আল্লাহ বলেন,

﴿فَمَنْ كَانَ مِنْكُمْ مَرِيضًا أَوْ عَلَىٰ سَفَرٍ فَعِدَّةٌ مِّنْ أَيَّامٍ أُخَرَ﴾

অর্থাৎ, কিন্তু তোমাদের মধ্যে কেউ অসুস্থ বা মুসাফির হলে সে অপর কোন দিন গণনা করবে। (কুরআনুল কারীম ২/১৮৪)

(গ) রোযা রাখলে রোযা তার ক্ষতি করবে। (রোগ বৃদ্ধি করবে, অথবা কোন বড় রোগ আনয়ন করবে, অথবা তার অবস্থা মরণাপন্ন হয়ে যাবে।) এমতাবস্থায় তার জন্য রোযা রাখা হারাম। কেননা, নিজের উপর ক্ষতি ডেকে আনা বৈধ নয়। মহান আল্লাহ বলেন,

﴿وَلَا تَقْتُلُوا أَنْفُسَكُمْ، إِنَّ اللَّهَ كَانَ بِكُمْ رَحِيمًا﴾

অর্থাৎ, তোমরা আত্মহত্যা করো না। নিশ্চয় আল্লাহ তোমাদের প্রতি দয়াশীল। (কুরআনুল কারীম ৪/২৯)

তিনি আরো বলেন,

﴿وَلَا تُلْقُوا بِأَيْدِيكُمْ إِلَى التَّهْلُكَةِ﴾

অর্থাৎ, তোমরা নিজেদেরকে ধুংসের মুখে ঠেলে দিও না। (কুরআনুল কারীম ২/১৯৫)

হাদীসে মহানবী ﷺ বলেন, “কেউ নিজে ক্ষতিগ্রস্ত হবে না এবং

অপরেরও ক্ষতি করবে না।”<sup>1</sup>

রোযা রোযাদারকে ক্ষতি করছে কি না তা জানা যাবে, রোযাদারের নিজে নিজে ক্ষতি অনুভব করার মাধ্যমে অথবা বিশৃঙ্খল কোন ডাক্তারের ফায়সালা অনুযায়ী।

এই শ্রেণীর রোগী যে দিনের রোযা ত্যাগ করবে, সেই দিনের রোযা পরবর্তীতে সুস্থ হলে অবশ্যই কাযা করবে। আর এমন রোগীর তরফ থেকে মিসকীনকে খাদ্যদান যথেষ্ট নয়।<sup>2</sup>

শেষোক্ত প্রকার কোন রোগী যদি কষ্ট ও ক্ষতি স্বীকার করেও রোযা রাখে, তাহলেও তার রোযা শুদ্ধ ও যথেষ্ট হবে না। বরং তাকে সুস্থ অবস্থায় কাযা করতে হবে।<sup>3</sup> কারণ, ঐ সময় তার জন্য রোযা রাখা নিষিদ্ধ। যেমন তাশরীক ও ঈদের দিনগুলিতে রোযা রাখা নিষিদ্ধ; যা রাখা বৈধ নয় এবং রাখলে শুদ্ধও নয়।

এখান থেকে কিছু মুজতাহিদ রোগীদের ভ্রান্ত ফায়সালার কথা স্পষ্ট হয়ে ওঠে, যারা রোযা তাদের জন্য কষ্টকর ও ক্ষতিগ্রহ হওয়া সত্ত্বেও তা কাযা করতে চায় না। আমরা বলি যে, তারা ভুল সিদ্ধান্ত গ্রহণ করে থাকে। তারা মহান আল্লাহর দান গ্রহণ করে না, তাঁর দেওয়া অনুমতি কবুল করে না এবং নিজেদেরকে ক্ষতিগ্রস্ত করে। অথচ তিনি বলেন, “তোমরা আত্মহত্যা করো না।”<sup>4</sup>

পক্ষান্তরে রোগ হাক্কা হলে; যেমন সর্দি-কাশি, মাথা ধরা, গা ব্যথা ইত্যাদি হলে তার ফলে রোযা ভাঙ্গা জায়েয নয়। অবশ্য যদি কোন ডাক্তারের মাধ্যমে, অথবা নিজের অভিজ্ঞতার মাধ্যমে, অথবা প্রবল ধারণা মতে জানতে পারে যে, রোযা রাখলে তার রোগ বৃদ্ধি পাবে, অথবা ভালো হতে দেবী হবে, অথবা অন্য রোগ আনয়ন করবে, তাহলে তার জন্য রোযা

<sup>1</sup> (আহমাদ, মুসনাদ, ইবনে মাজাহ, হাকেম, মুত্তাদরাক, বাইহাকী, দারাকুতুনী, সুনান, সিনাসিলাহ সহীহাহ, আলবানী ২৫০নং)

<sup>2</sup> (আশ্শারহুল মুমতে' ৬/৩৩৬-৩৩৮, ফুসুলন ফিস-সিয়ামি অত-তারাবীহি অয-যাকাহ ৯-১০পৃ)

<sup>3</sup> (মুহাল্লা ইবনে হায়ম ৬/২৫৮)

<sup>4</sup> (আশ্শারহুল মুমতে' ৬/৩৫৩)

না রাখা এবং পরে কাযা করে নেওয়া বৈধ। বরং এ ক্ষেত্রে রোয়া রাখা মকরুহ।

আর দিবারাত্র লাগাতার রোগ থাকলে রোগীর জন্য রাতে রোয়ার নিয়ত করা ওয়াজেব নয়; যদিও সকালে সুস্থ হওয়ার সম্ভাবনা থাকে। যেহেতু সে ক্ষেত্রে বর্তমান পরিস্থিতিই বিচার্য।

## (৬) গর্ভবতী ও দুগ্ধদাত্রী মহিলা

গর্ভবতী অথবা দুগ্ধদাত্রী মহিলা রোয়া রাখার দরুন যদি নিজেদের কষ্ট হয় অথবা তাদের শিশুর ক্ষতির আশঙ্কা করে, তাহলে উভয়ের জন্য রোয়া না রেখে যখন সহজ হবে অথবা ক্ষতির আশঙ্কা দূর হবে তখন রোয়া কাযা করে নেওয়া বৈধ।<sup>1</sup>

বলা বাহুল্য, (কিছু উলামার নিকট) গর্ভবতী ও দুগ্ধদাত্রী মহিলাকে রোগীর উপর কিয়াস করাই সঠিক। সুতরাং রোগীর মত তাদের জন্য রোয়া না রাখা বৈধ এবং তাদের জন্য সময় মত কাযা ছাড়া অন্য কিছু ওয়াজেব নয়। এতে তারা নিজেদের ক্ষতির আশঙ্কা করুক অথবা তাদের শিশুদের। যেহেতু মহানবী ﷺ বলেন, “আল্লাহ মুসাফিরের উপর থেকে (যথাসময়ে) রোয়া এবং অর্ধেক নামায়, আর গর্ভবতী ও দুগ্ধদাত্রী মহিলার উপর থেকে (যথাসময়ে) রোয়া লাঘব করেছেন।”<sup>2</sup>

উপরোক্ত হাদীসের উদ্দেশ্য এই যে, তারা রমায়ানে রোয়া না রেখে সময় মত কাযা করতে পারে। রোয়া একেবারেই মাফ নয়।<sup>3</sup>

পক্ষান্তরে যারা তাদের জন্য কাযা করার সাথে সাথে মিসকীনকে খাদ্যদানেরও কথা বলে থাকেন, তাঁদের কথার উপর কিতাব ও সুন্নাহর কোন দলীল নেই। আর মূল হল দায়িত্বে কিছু না থাকা, যতক্ষণ না দায়িত্ব আসার সপক্ষে কোন দলীল কায়েম হয়েছে।<sup>4</sup>

<sup>1</sup> (ইবনে উযাইমীন, ফাসিঃ ৫৯পৃঃ)

<sup>2</sup> (আহমাদ, মুসনাদ ৪/৩৪৭, আবু দাউদ ২৪০৮, তিরমিযী ৭১৫, নাসাই ২২৭৬, ইবনে মাজাহ ১৬৬৭, সহীহুল জামেইন সাগীর, আলবানী ১৮৩৫নং)

<sup>3</sup> (আশ্শারহুল মুমতে' ৬/৩৬২)

<sup>4</sup> (ইবনে উযাইমীন, ফাসিঃ মুসনাদ ৬৬পৃঃ)

কোন কোন আহলে ইল্‌ম এই মতকে প্রাধান্য দিয়েছেন যে, গর্ভবতী ও দুগ্ধদাত্রী মহিলার জন্য (চিররোগা ও অক্ষম বৃদ্ধের মত) কেবল খাদ্যদানই ওয়াজেব; কাযা ওয়াজেব নয়। এ মত পোষণ করেছেন ইবনে আব্বাস, ইবনে উমার ও সাঈদ বিন জুবাইর। ইবনে আব্বাস এ ব্যাপারে স্পষ্ট বলেন, ‘ওরা প্রত্যেক দিনের বিনিময়ে একটি করে মিসকীন খাওয়াবে; রোযা কাযা করবে না।’

অন্য এক বর্ণনায় আছে যে, একদা তিনি তাঁর ক্রীতদাসী স্ত্রীকে গর্ভ বা দুধ দান করা অবস্থায় দেখে বললেন, ‘তুমি অক্ষম ব্যক্তির মত। তোমার জন্য প্রত্যেক রোযার বিনিময়ে একটি করে মিসকীন খাওয়ানো ওয়াজেব। তোমার জন্য কাযা ওয়াজেব নয়।’<sup>1</sup>

তিনিই মহান আল্লাহর এই বাণী “যারা রোযা রাখার সামর্থ্য থাকা সত্ত্বেও রোযা রাখতে চায় না, তারা এর পরিবর্তে একজন মিসকীনকে খাদ্য দান করবে। (কুরআনুল কারীম ২/১৮৪) এর তফসীরে বলেছেন, ‘আর গর্ভবতী ও দুগ্ধবতী মহিলা রোযা রাখতে ভয় করলে রোযা না রেখে প্রত্যেক দিনের পরিবর্তে একটি করে মিসকীন খাওয়াবে।’ সুতরাং স্পষ্ট উক্তির বর্তমানে কিয়াসের কোন প্রয়োজন নেই।

অবশ্য ইবনে আব্বাসের এই মত সেই মহিলার জন্য প্রযোজ্য, যে মহিলা প্রত্যেক দুই-আড়াই বছর পর পর সন্তান ধারণ করে। কারণ, এই শ্রেণীর মহিলা কাযা করার ফুরসতই পাবে না। যে কোন সময়ে হয় সে গর্ভবতী থাকবে, নচেৎ দুগ্ধদায়িনী। আর গর্ভ বন্ধ না হওয়া পর্যন্ত তার রোযা রাখার সুযোগই হয়ে উঠবে না। অতএব সে মিসকীনকে খানা খাইয়ে দেবে এবং তার জন্য রোযা মাফ। আর আল্লাহই ভালো জানেন।

## (৭) রোযা ভাঙ্গতে বাধ্য ব্যক্তি

কোন মৃত্যু-কবলিত মানুষকে আশুন, পানি বা ধুংসস্তম্ভপ থেকে বাঁচাতে যদি কোন রোযাদারকে রোযা ভাঙ্গতে হয় এবং সে ছাড়া অন্য কোন রোযাহীন লোক না পাওয়া যায়, তাহলে প্রাণ রক্ষার জন্য তার পক্ষে রোযা

<sup>1</sup> (ইরওয়াউল গালীল, আলবানী ৪/১৭-২৫ দ্রঃ)

ভাঙ্গা ওয়াজেব। অবশ্য সে ঐ দিনটিকে পরে কাযা করতে বাধ্য।<sup>1</sup>

তবে এ ব্যাপারে প্রশস্ততা বৈধ নয়। বরং কেবল অতি প্রয়োজনীয় ও একান্ত নিরুপায়ের ক্ষেত্রে দরকার মোতাবেক এ অনুমোদন প্রয়োগ করা উচিত। বিশেষ করে যারা ফায়ার ব্রিগেডে কাজ করেন, তাঁদের জন্য একান্ত কঠিন কষ্ট ও পরিশ্রম ছাড়া রোযা ভাঙ্গা বৈধ নয়। অন্যথা কোন আশুন নিভাতে যাওয়াই তাঁদের জন্য রোযা ভাঙ্গা বৈধ করতে পারে না।<sup>2</sup>

যে ব্যক্তি রোযা অবস্থায় প্রচণ্ড ক্ষুধা অথবা পানি-পিপাসায় কাতর হয়ে প্রাণ যাওয়ার আশঙ্কা করে, অথবা ভুল ধারণায় নয়, বরং প্রবল ধারণায় বেহুশ হয়ে যাওয়ার আশঙ্কা করে, সে ব্যক্তি রোযা ভেঙ্গে প্রয়োজন মত পানাহার করতে পারে। তবে সে রোযা তাকে পরে কাযা করতে হবে। কারণ, জান বাঁচানো ফরয। আর মহান আল্লাহ বলেন,

﴿وَلَا تُلْقُوا بِأَيْدِيكُمْ إِلَى التَّهْلُكَةِ﴾

“তোমরা নিজেদেরকে ধুংসের মুখে ঠেলে দিও না।” (কুরআনুল কারীম ২/১৯৫)

﴿وَلَا تَقْتُلُوا أَنْفُسَكُمْ إِنَّ اللَّهَ كَانَ بِكُمْ رَحِيمًا﴾

“তোমরা আত্মহত্যা করো না। নিশ্চয় আল্লাহ তোমাদের প্রতি দয়াশীল।” (কুরআনুল কারীম ৪/২৯)

কোন ধারণাপ্রসূত কষ্ট, ক্লান্তি অথবা রোগের আশঙ্কায় রোযা ভাঙ্গা বৈধ নয়।

যারা কঠিন পরিশ্রমের কাজ করে তাদের জন্যও রোযা ছাড়া বৈধ নয়। এ শ্রেণীর লোকেরা রাত্রে রোযার নিয়ত করে রোযা রাখবে। অতঃপর দিনের বেলায় কাজের সময় যদি নিশ্চিত হয় যে, কাজ ছাড়লে তাদের ক্ষতি এবং কাজ করলে তাদের প্রাণ যাওয়ার আশঙ্কা আছে, তাহলে তাদের জন্য রোযা ভেঙ্গে কেবল ততটুকু পানাহার বৈধ হবে, যতটুকু

<sup>1</sup> (ফাতাওয়া শায়খ ইবনে উযাইমীন ৬০ পৃঃ)

<sup>2</sup> (ফাইয়ুর রাহীমির রাহমান, ফী আহকামি অমাওয়াইমি রামাযান ১৮৯ পৃঃ)

পানাহার করলে তাদের জান বেঁচে যাবে। অতঃপর সূর্যাস্ত পর্যন্ত আর পানাহার করবে না। অবশ্য রমাযান পরে তারা ঐ দিনটিকে কাযা করতে বাধ্য হবে। এ ব্যাপারে মহান আল্লাহর সাধারণ বিধান হল,

﴿لَا يَكْفُ اللَّهُ نَفْسًا إِلَّا وُسْعَهَا﴾

অর্থাৎ, আল্লাহ কোন আত্মাকে তার সাধের অতীত ভার অর্পণ করেন না। (কুরআনুল কারীম ২/২৮৬)

﴿مَا يُرِيدُ اللَّهُ لِيَجْعَلَ عَلَيْكُمْ مِنْ حَرَجٍ﴾ ﴿وَمَا جَعَلَ عَلَيْكُمْ فِي

الدِّينِ مِنْ حَرَجٍ﴾

অর্থাৎ, আল্লাহ দ্বীনের ব্যাপারে তোমাদের জন্য কোন সংকীর্ণতা রাখেন নি। (কুরআনুল কারীম ৫/৬, ২২/৭৮)

বলা বাহুল্য, উঁট বা ছাগল-ভেঁড়ার রাখাল রৌদ্রে বা পিপাসায় যদি ক্ষতিগ্রস্ত হয়, তাহলে যতটুকু পরিমাণ পানাহার করা দরকার ততটুকু করে বাকী দিনটুকু সূর্যাস্ত পর্যন্ত বিরত থাকবে। অতঃপর রমাযান বিদায় নিলে ঐ দিনটি কাযা করবে। আর এর জন্য কোন কাফ্ফারা নেই।<sup>1</sup>

অনুরূপ বিধান হল চাষী ও মজুরদের।<sup>2</sup>

পক্ষান্তরে যাদের প্রাত্যহিক ও চিরস্থায়ী পেশাই হল কঠিন কাজ; যেমন পাথর কাটা বা কয়লা ইত্যাদির খনিতে যারা কাজ করে এবং যারা আজীবন সশ্রম কারাদণ্ডে দণ্ডিত, তারা রোযা রাখতে অপারগ হলে তথা অস্বাভাবিক কষ্ট অনুভব করলে রোযা না রাখতে পারে। তবে তাদের জন্য (তাদের পরিবার দ্বারা) ফিদয়া আদায় (একটি রোযার বদলে একটি মিসকীনকে খাদ্য দান) করা জরুরী। অবশ্য এ কাজ সম্ভব না হলে তাও তাদের জন্য মাফ।<sup>3</sup>

পরীক্ষার সময় মেহনতী ছাত্রদের জন্য রোযা কাযা করা বৈধ নয়।

<sup>1</sup> (মাজল্লাতুল বৃহসিল ইসলামিয়াহ ২৪/৬৭, ১০০, ফাসিঃ মুসনিদ ১০১-১০২ পৃঃ)

<sup>2</sup> (ফাসিঃ মুসনিদ ৬১ পৃঃ)

<sup>3</sup> (আহকামুস সাওমি অল-ই'তিকাফ, আবু সারী মঃ আবুল হাদী ১২২ পৃঃ)



কারণ, এটা কোন এমন শরয়ী ওযর নয়, যার জন্য রোযা কাযা করা বৈধ হতে পারে।<sup>1</sup>

### ❖ দিন যেখানে অস্বাভাবিক লম্বা :

যে দেশে দিন অস্বাভাবিকভাবে ২০/২১ ঘন্টা লম্বা হয়, সে দেশের লোকেদের জন্যও রোযা ত্যাগ করা অথবা সূর্যাস্তের পূর্বে ইফতার করা বৈধ নয়। তাদের যখন দিন-রাত হয়, তখন সেই অনুসারে তাদের জন্য আমল জরুরী; তাতে দিন লম্বা হোক অথবা ছোট। কেননা, ইসলামী শরীয়ত সকল দেশের সকল মানুষের জন্য ব্যাপক। আর মহান আল্লাহ ঘোষণা হল,

﴿وَكُلُوا وَاشْرَبُوا حَتَّى يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ  
الْأَسْوَدِ مِنَ الْفَجْرِ، ثُمَّ أَتَمُوا الصِّيَامَ إِلَى اللَّيْلِ﴾

অর্থাৎ, আর তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে। অতঃপর তোমরা রাত পর্যন্ত রোযা পূর্ণ কর। (কুরআনুল কারীম ২/১৮৭)

কিন্তু যে ব্যক্তি দিন লম্বা হওয়ার কারণে, অথবা নিদর্শন দেখে, অভিজ্ঞতার ফলে, কোন বিশুদ্ধ ও অভিজ্ঞ ডাক্তারের পরামর্শ মতে, কিংবা নিজের প্রবল ধারণা মতে এই মনে করে যে, রোযা রাখতে তার প্রাণ নাশ ঘটবে, অথবা বড় রোগ দেখা দেবে, অথবা রোগ বৃদ্ধি পাবে, অথবা আরোগ্য লাভে বিলম্ব হবে, সে ব্যক্তি ততটুকু পরিমাণ পানাহার করবে যতটুকু পরিমাণ করলে তার জান বেঁচে যাবে অথবা ক্ষতি দূর হয়ে যাবে। অতঃপর রমাযান বিদায় নিলে সুবিধা মত যে কোন মাসে ঐ দিনগুলো কাযা করে নেবে। যেহেতু মহান আল্লাহ বলেন,

﴿فَمَنْ شَهِدَ مِنْكُمُ الشَّهْرَ فَلْيَصُمْهُ وَمَنْ كَانَ مَرِيضًا أَوْ عَلَى سَفَرٍ﴾

<sup>1</sup> (ইবনে বায, ফাসিঃ মুসনিদ ৮০ পৃঃ, ভাইঃ ৪৮ পৃঃ)

فَعِدَّةٌ مِّنْ أَيَّامٍ أُخَرَ، يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ ﴿

অর্থাৎ, তোমাদের মধ্যে যে কেউ এ মাস পাবে সে যেন এ মাসে রোযা রাখে। কিন্তু কেউ অসুস্থ বা মুসাফির হলে সে অপর কোন দিন গণনা করবে। আল্লাহ তোমাদের জন্য সহজ চান এবং তিনি তোমাদের জন্য কঠিন কিছু চান না। (কুরআনুল কারীম ২/১৮৫)

তিনি আরো বলেন,

﴿لَا يُكَلِّفُ اللَّهُ نَفْسًا إِلَّا وُسْعَهَا﴾

অর্থাৎ, আল্লাহ কোন আত্মাকে তার সাধ্যের অতীত ভার অর্পণ করেন না। (কুরআনুল কারীম ২/২৮৬)

﴿وَمَا جَعَلَ عَلَيْكُمْ فِي الدِّينِ مِنْ حَرَجٍ﴾

অর্থাৎ, আল্লাহ ধ্বিনের ব্যাপারে তোমাদের জন্য কোন সংকীর্ণতা রাখেন নি। (কুরআনুল কারীম ৫/৬, ২২/৭৮)

যে ব্যক্তি এমন দেশে বসবাস করে, যেখানে গ্রীষ্মকালে সূর্য অস্তই যায় না এবং শীতকালে উদয়ই হয় না, অথবা যেখানে ছয় মাস দিন ও ছয় মাস রাত্রি থাকে, সে ব্যক্তির উপরেও রমাযানের রোযা ফরয। সে ব্যক্তি নিকটবর্তী এমন কোন দেশের হিসাব অনুযায়ী রমাযান মাসের শুরু ও শেষ, প্রাত্যহিক সেহরীর শেষ তথা ফজর উদয় হওয়ার সময় ও ইফতার তথা সূর্যাস্তের সময় নির্ধারণ করবে, যে দেশে রাত দিনের পার্থক্য আছে। অতএব সেখানেও ২৪ ঘন্টায় দিবারাত্রি নির্ণয় করতে হবে। মহানবী ﷺ কর্তৃক এ কথা প্রমাণিত যে, একদা তিনি সাহাবাবর্গকে দাজ্জাল প্রসঙ্গে কিছু কথা বললেন। তাঁরা তাঁকে জিজ্ঞাসা করলেন, ‘সে কতদিন পৃথিবীতে অবস্থান করবে?’ উত্তরে তিনি বললেন, “চল্লিশ দিন; এক দিন এক বছরের সমান, একদিন এক মাসের সমান এবং একদিন এক সপ্তাহের সমান। বাকী দিনগুলো তোমাদের স্বাভাবিক দিনের মত।” তাঁরা জিজ্ঞাসা করলেন, ‘হে আল্লাহর রসূল! যে দিনটি এক বছরের মত হবে, সে দিনে কি এক দিনের (৫ অঙ্ক) নামায পড়লে যথেষ্ট হবে?’ তিনি বললেন, “না।

বরং তোমরা বছর সমান ঐ দিনকে স্বাভাবিক দিনের মত নির্ধারণ করে নিও।”<sup>1</sup>

বলা বাহুল্য, মহানবী ﷺ ঐ এক বছর সমান দিনকে একটি স্বাভাবিক দিন গণ্য করেন নি; যাতে কেবল ৫ অক্ত নামায যথেষ্ট হবে। বরং তাতে প্রত্যেক ২৪ ঘণ্টায় ৫ অক্ত নামায পড়া ফরয বলে ঘোষণা করেন। আর তাদেরকে তাদের স্বাভাবিক দিনের সময়ের দূরত্ব ও পার্থক্য হিসাব করে ঐ বছর সমান দিনকে ভাগ করতে আদেশ করেন। সুতরাং যে সকল মুসলিম সেই দেশে বাস করেন, যেখানে ৬ মাস দিন ও ৬ মাস রাত লম্বা হয়, সেখানে তাঁরা তাঁদের নামাযের সময়ও নির্ধারণ করবেন। আর এ ব্যাপারে নির্ভর করবেন তাঁদের নিকটবর্তী এমন দেশের, যেখানে রাত-দিন স্বাভাবিকরূপে চেনা যায় এবং প্রত্যেক ২৪ ঘণ্টায় শরয়ী চিহ্ন মতে ৫ অক্ত নামাযের সময় জানা যায়। আর তদনুরূপই রমাযানের রোযা নির্ধারণ করতে হবে। কারণ, এ দিক থেকে রোযা ও নামাযের মাঝে কোন পার্থক্য নেই।<sup>2</sup>

## (৮) মুসাফির

মুসলিম উম্মাহর সর্বসম্মতিক্রমে মুসাফিরের জন্য রোযা কাযা করা বৈধ; চাহে সে মুসাফির রোযা রাখতে সক্ষম হোক অথবা অক্ষম, রোযা তার জন্য কষ্টদায়ক হোক অথবা না হোক, অর্থাৎ মুসাফির যদি ছায়া ও পানির সকল সুবিধা নিয়ে সফর করে এবং তার সাথে তার খাদেমও থাকে অথবা না থাকে, (সফর এরোপ্নেনে হোক অথবা পায়ে হেঁটে); যেমনই হোক তার জন্য রোযা কাযা করা ও নামায কসর করা বৈধ।<sup>3</sup> মহান আল্লাহ বলেন,

﴿فَمَنْ كَانَ مِنْكُمْ مَّرِيضًا أَوْ عَلَى سَفَرٍ فَعِدَّةٌ مِنْ أَيَّامٍ أُخَرَ﴾

<sup>1</sup> (মুসলিম ২৯৩৭নং)

<sup>2</sup> (মাজালাতুল বুহুসিল ইসলামিয়াহ ১৪/১২৬, ১৬/১১০, ২৫/১১, ২৯, ৩৪, ইবনে উযাইমীন ফাসিঃ মুসনিদ ৯৭-৯৮-৭৪, ৪৮ঃ ৪৯-৭৪)

<sup>3</sup> (সাবউনা মাসআলাহ ফিস-সিয়াম ১৭-৭৪)

অর্থাৎ, কিন্তু তোমাদের মধ্যে কেউ অসুস্থ বা মুসাফির হলে সে অপর কোন দিন গণনা করবে। (কুরআনুল কারীম ২/১৮৪)

অবশ্য সফরে রোযা কাযা করা বৈধ হওয়ার ব্যাপারে কয়েকটি শর্ত রয়েছে :-

১। সফর পরিমাণ মত দূরত্বের হতে হবে। অর্থাৎ এমন সফর হতে হবে, যাকে পরিভাষায় সফর বলা হয়। আর সঠিক মত এই যে, সফর চিহ্নিত করার জন্য কোন নির্দিষ্ট মাপের দূরত্ব নেই। এ ব্যাপারে প্রচলিত অর্থ ও পরিভাষার সাহায্য নিতে হবে।<sup>১</sup> তদনুরূপ স্থায়ী বসবাসের উদ্দেশ্য না হলে নির্দিষ্ট দিন অবস্থান করার ব্যাপারে কোন সীমাবদ্ধতা নেই।<sup>২</sup> ইবনে উমার (رضي الله عنه) আযারবাইজানে ৬ মাস থাকা কালে কসর করে নামায পড়েছেন।<sup>৩</sup>

সুতরাং যে ব্যক্তি কোন স্থানে সফর করার পর কিছুকাল বাস করে, কিন্তু সে সেখানে স্থায়ী বসবাসের নিয়ত করে না; বরং যে উদ্দেশ্যে সফর করেছে সে উদ্দেশ্যে সফল হলেই স্বগৃহে ফিরে যাওয়ার সংকল্প পোষণ করে, সে ব্যক্তি মুসাফির। সে মুসাফিরের সকল সুযোগ-সুবিধা গ্রহণ করতে পারে।

পক্ষান্তরে যে ব্যক্তি কোন স্থানে সফর করার পর সে সেখানে স্থায়ীভাবে বসবাস শুরু করে, সে ব্যক্তিকে মুসাফির বলা যাবে না। সে হল প্রবাসী এবং তার জন্য রোযা কাযা করা জায়েয নয়। বরং তার জন্য রোযা রাখা ওয়াজেব। বলা বাহুল্য, যে ছাত্ররা বিদেশে পড়াশোনা করার উদ্দেশ্যে সফর করে নির্দিষ্ট কয়েক মাস বা বছর ধরে স্থায়ীভাবে বসবাস করে, সে ছাত্ররা মুসাফির নয়। তাদের জন্য রোযা কাযা করা বৈধ নয়।

২। মুসাফির যেন নিজের গ্রাম বা শহরের ঘর-বাড়ি ত্যাগ করে গ্রাম বা শহরের বাইরে এসে রোযা ভাঙ্গে। হযরত আনাস (رضي الله عنه) বলেন, 'আমি নবী ﷺ-এর সাথে (মক্কা যাওয়ার পথে) মদীনায় যোহরের ৪ রাকআত

<sup>১</sup> (আশ্শারহুল মুমতে' ৪/৪৯৭-৪৯৮)

<sup>২</sup> (ঐ ৪/৫৩২-৫৩৭ দ্রঃ)

<sup>৩</sup> (বাইহাকী ৩/১৫২. ইরওয়াউল গালীল, আলবানী ৫৭৭, ৩/১৬, ইবনে উবাইমীন ফাসিঃ জিরাইসী ২৫৭৪)

এবং (মদীনা থেকে ৬ মাইল দূরে) যুল-হ্লাইফায় গিয়ে আসরের ২ রাকআত পড়তাম।<sup>1</sup>

বলা বাহুল্য, সফর করতে শহর বা গ্রাম ত্যাগ করার পূর্ব থেকেই নামায কসর করা চলবে না। অনুরূপ রোযাও শহর বা গ্রাম সম্পূর্ণ ত্যাগ করার পূর্বে ভাঙ্গা চলবে না। কারণ, নিজ গ্রাম বা শহরের জনপদে থাকা অবস্থাকে সফর বলা যায় না এবং সফরকারীর জন্য মুসাফির নাম সার্থক হয় না।<sup>2</sup>

বুঝা গেল যে, মুসাফির যখন সফরের উদ্দেশ্যে নিজ গ্রাম বা শহরের আবাসিক এলাকা ত্যাগ করবে, তখনই তার জন্য রোযা ভাঙ্গা বৈধ হবে। তদনুরূপ এয়ারপোর্ট শহরের ভিতরে হলে এরোপ্লেন শহর ছেড়ে আকাশে উড়ে গেলে রোযা ভাঙ্গা বৈধ হবে। অবশ্য এয়ারপোর্ট শহরের বাইরে হলে সেখানে রোযা ভাঙ্গা বৈধ। আর শহরের ভিতরে হলে অথবা শহরের লাগালাগি হলে সেখানে রোযা ভাঙ্গা বৈধ নয়। কারণ, তখনও সফরকারী নিজ শহরের ভিতরেই থাকে।

যারা রমায়ান মাসে সফর করার ইচ্ছা করে এবং রোযা কাযা করতে চায় তাদের জন্য একটি সতর্কতার বিষয় এই যে, গ্রাম বা শহর ছেড়ে সফর করে না যাওয়া পর্যন্ত যেন তারা রোযা ভাঙ্গার নিয়ত না করে। কারণ, ভাঙ্গার নিয়ত করলে রোযা হবে না। আর নিয়তের পর যদি কোন প্রতিবন্ধকতা বা কারণবশতঃ সফর না করা হয়, তাহলে তার জন্য রোযা ভাঙ্গা বৈধ হবে না।<sup>3</sup>

৩। মুসাফিরের সফর যেন কোন অবৈধ কাজের জন্য না হয়। (অধিকাংশ উলামার মত এটাই।) কেননা পাপ-সফরে শরয়ী সুযোগ-সুবিধা নেওয়ার অধিকার পাপী মুসাফিরের নেই। যেহেতু ঐ সুযোগ-সুবিধা হল ভারপ্রাপ্ত বান্দার উপর কিছু ভার সহজ ও হালকা করার নামাস্তর। আর যে ব্যক্তি আল্লাহর নাফরমানী করে হারাম কাজের জন্য সফর করে সে ব্যক্তি আল্লাহর দেওয়া ঐ সুযোগ-সুবিধা ভোগের অধিকার পেতে পারে

<sup>1</sup> (বুখারী ১০৮৯নং, মুসলিম ৬৯০, আবু দাউদ, তিরমিযী, নাসাই)

<sup>2</sup> (আশশারহুল মুমত' ৬/৩৫৮-৩৫৯)

<sup>3</sup> (সাবউনা মাসআলাহ ফিস-সিয়াম ১৮নং)

না।<sup>1</sup>

৪। সফরের উদ্দেশ্য যেন রোযা না রাখার একটা বাহানা না হয়। কারণ, ছল-বাহানা করে আল্লাহর ফরয বাতিল হয় না।<sup>2</sup>

যে সফরে রোযা কাযা করার অনুমতি আছে সে সফর হজ্জ, উমরাহ, কোন আপনজনকে দেখা করার উদ্দেশ্যে কিংবা ব্যবসা করার উদ্দেশ্যে সাময়িক হোক, অথবা (ভাড়া গাড়ির ড্রাইভারের মত) সার্বক্ষণিক হোক, তাতে কোন পার্থক্য নেই। বলা বাহুল্য, যে সর্বক্ষণ সফরে থাকে, তার যদি ফিরে এসে আশ্রয় নেওয়ার মত বাসভূমি থাকে, অর্থাৎ, (উড়িয়া যাযাবরদের মত) তার পরিবার-পরিজন তার সাথে না থাকে, যেমন; পিওন, যে মুসলিমদের ডাক বহন করার উদ্দেশ্যে সফর করে। যেমন, ভাড়া গাড়ির ড্রাইভার, ট্রেন বা প্লেনের পাইলট ও খালাসী-হোস্টেস ইত্যাদি - যদিও তাদের সফর প্রাত্যহিক হয়, তবুও তাদের জন্য রোযা কাযা করা বৈধ। অবশ্য এ রোযা তারা সময় মত পরিশোধ করতে বাধ্য হবে। তদনুরূপ পানি-জাহাজের মাল্লা, যার স্থলে বাসস্থান আছে (অর্থাৎ, জাহাজই তার স্থায়ী বাসস্থান নয়), সেও কাযা করতে পারে।

উপরে উল্লেখিত ব্যক্তি সকলের কাজ যেহেতু নিরবচ্ছিন্ন ও বিরতিহীন, সেহেতু তারা শীতকালে কাযা করে নিতে পারে। কারণ, শীতের দিন ছোট ও ঠাণ্ডা। সে সময় কাযা তুলতে কষ্ট হবে না। কিন্তু তারা যদি রমায়ান মাসে স্বগৃহে ফিরে আসে তাহলে সেখানে থাকা কালে তাদের জন্য রোযা রাখা জরুরী।

পক্ষান্তরে শহরের ভিতরে চলমান ট্রেন, বাস, ট্যাক্সি, অটো-রিক্সা প্রভৃতির ড্রাইভার মুসাফির নয়। কারণ, তারা সফরের দূরত্ব অতিক্রম করে না। তাই তাদের জন্য যথাসময়ে রোযা রাখা ওয়াজেব।<sup>3</sup>

শত্রুর বিরুদ্ধে যুদ্ধরত সৈনিক ও মুজাহেদ সফরের সেই পরিমাণ দূরত্ব সফর করলে রোযা কাযা করতে পারে, যে পরিমাণ সফর করলে নামায

<sup>1</sup> (আশশারহুল মুমতে' ৪/৪৯২)

<sup>2</sup> (ফুসুন্ন ফিস-সিয়ামি অত-তারাবীহি অয-যাকাহ, ইবনে উযাইমীন ১০পৃঃ)

<sup>3</sup> (আশশারহুল মুমতে' ৪/৫৩৯-৫৪০, ফাতাওয়া ইসলামিয়াহ ২/১৪৪, ইবনে উযাইমীন ফাসিঃ মুসনিদ ৭৪পৃঃ)

কসর করা বৈধ। অবশ্য তারাও রমাযান পরে কাযা তুলতে বাধ্য হবে। আর যদি তারা মুসাফির না হয়, বরং শত্রু তাদেরকে তাদের অবস্থান ক্ষেত্রে আক্রমণ করে, তাহলে যে জিহাদের সাথে রোযা রাখতে সক্ষম হবে তার জন্য রোযা রাখা ওয়াজেব। কিন্তু যে রোযা রাখার সাথে সাথে জিহাদের 'ফর্যে আইন' আদায় করতে সক্ষম নয়, তার জন্য কাযা করা বৈধ। তবে রমাযান শেষ হওয়ার পর ছুটে যাওয়া রোযা অবশ্যই সে রেখে নেবে।<sup>1</sup>

## মুসাফিরের জন্য রোযা রাখা ভালো, না কাযা করা ভালো?

সফরে মুসাফিরের ৩ অবস্থা হতে পারে :- (2)

১। রোযা তার জন্য কষ্টকর নয়। এমন অবস্থায় রোযা রাখা বা কাযা করার মধ্যে যেটা তার জন্য সহজ ও সুবিধা হবে, সেটাই সে করবে। মহান আল্লাহ বলেন,

﴿يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ﴾

অর্থাৎ, আল্লাহ তোমাদের জন্য সহজ চান এবং তিনি তোমাদের জন্য কঠিন কিছু চান না। (কুরআনুল কারীম ২/১৮৫)

হামযাহ বিন আমর আসলামী মহানবী ﷺ-কে সফরে রোযা রাখা প্রসঙ্গে জিজ্ঞাসা করলে উত্তরে তিনি বললেন, "তোমার ইচ্ছা হলে তুমি রোযা রাখ, আর ইচ্ছা না হলে রেখো না।"<sup>3</sup>

আবু সাঈদ খুদরী (رضي الله عنه) বলেন, 'আমরা আল্লাহর রসূল ﷺ-এর সাথে

<sup>1</sup> (ফাতাওয়া ইসলামিয়াহ ২/১৪১, ফাসিঃ মুসনিদ ৭৫পৃঃ, ইতহাফু আহলিল ইসলাম বিআহকামিস সিয়াম ২৬পৃঃ)

<sup>2</sup> এই অবস্থাগুলির বিস্তারিত আলোচনার জন্য দেখুন, 'আশশারহুল মুমত' ৬/৩৩৯, ৩৫৫-৩৫৬, ফুস্বুলুন ফিস-সিয়ামি অত-তারাবীহি অয-যাকার, ইবনে উযাইমীন ১০-১১পৃঃ, ফাসিঃ ইবনে উযাইমীন ১৮-২০পৃঃ, ফ মুসনিদ ৭০-৭১পৃঃ)

<sup>3</sup> (বুখারী ১৯৪৩, মুসলিম ১১২১নং)

১৭ই রমাযান এক যুদ্ধ-সফরে ছিলাম। আমাদের মধ্যে কারো রোযা ছিল, কারো ছিল না। কিন্তু যার রোযা ছিল সে তার নিন্দা করেনি যার রোযা ছিল না এবং যার রোযা ছিল না সেও তার নিন্দা করেনি যার রোযা ছিল।' আর এক বর্ণনায় আছে, তাঁরা মনে করতেন যে, যার ক্ষমতা আছে, তার জন্য রোযা রাখা ভাল। আর যার দুর্বলতা আছে তার জন্য রোযা না রাখা ভাল।<sup>1</sup>

কিন্তু যদি উভয় এখতিয়ার সমান হয়; অর্থাৎ, রোযা রাখার উপর কাযা করাকে প্রাধান্য দেওয়ার মত কোন বৈশিষ্ট্য না থাকে এবং রোযা কাযা করার উপর রাখাকে প্রাধান্য দেওয়ার মত কোন বৈশিষ্ট্য না থাকে, তাহলে এমতাবস্থায় নিম্নে উল্লেখিত দলীলের ভিত্তিতে তার জন্য রোযা রাখাই উত্তম :-

(ক) এটি হল আল্লাহর রসূল ﷺ-এর আমল। আবু দারদা (رضি) বলেন, 'আমরা এক রমাযান মাসের কঠিন গরমের দিন (সফরে) ছিলাম। এমনকি আমাদের কেউ কেউ গরমের কারণে মাথায় হাত রেখেছিল। আর আমাদের মধ্যে আল্লাহর রসূল ﷺ এবং আব্দুল্লাহ বিন রাওয়াহাহ ছাড়া অন্য কারো রোযা ছিল না।'<sup>2</sup>

(খ) রোযা রাখাতে সত্বর দায়িত্ব পালন হয়। কারণ, পরে কাযা করাতে বিলম্ব হয়। আর রমাযানে রোযা রেখে নিলে আগে আগে ফরয আদায় হয়ে যায়।

(গ) মুসলিমের জন্য রমাযানে রোযা রাখাটাই সাধারণতঃ বেশী সহজ। কেননা, পরে একাকী নতুন করে রোযা রাখার চাইতে লোকেদের সাথে রোযা শু ঈদ করে নেওয়াটাই বেশী সহজ। যেমন এ কথা সকলের নিকট পরীক্ষিত ও বিদিত।

(ঘ) রোযা রাখলে মাহাত্ম্যপূর্ণ সময় পাওয়া যায়; আর তা হল রমাযান। পরন্তু রমাযান হল অন্যান্য মাসের তুলনায় শ্রেষ্ঠতর। যেহেতু সেটাই হল রোযা ওয়াজেব হওয়ার সময়।<sup>3</sup>

<sup>1</sup> (মুসলিম ১১১৬নং)

<sup>2</sup> (বুখারী ১৯৪৫, মুসলিম ১১২২নং)

<sup>3</sup> (আশ্শারহুল মুমতত' ৬/৩৫৬)



২। রোযা তার জন্য কষ্টকর, তবে বেশী নয়। বরং রোযা না রাখাটাই তার জন্য সুবিধা ও আরামদায়ক। এমন অবস্থায় মুসাফিরের রোযা রাখা মকরুহ এবং রোযা না রাখা উত্তম। কারণ, অনুমতি থাকা সত্ত্বেও কষ্ট স্বীকার করার অর্থ হল, মহান আল্লাহর অনুমতিকে উপেক্ষা করা।

আবার সফরে কখনো রোযা না রাখাটা উত্তম ও অধিক সওয়াব লাভের কারণ হতে পারে; যদি মুসাফির কোন কর্ম-দায়িত্ব পালন করে তাহলে। আনাস (رضي الله عنه) বলেন, আল্লাহর রসূল (ﷺ) (সাহাবা সহ) এক সফরে ছিলেন। তাঁদের কিছু লোক রোযা রাখল এবং কিছু রাখল না। যারা রোযা রাখেনি তারা বুদ্ধি করে রোযা ভাঙ্গল এবং কাজ করল। আর যারা রোযা রেখেছিল তারা কিছু কাজ করতে দুর্বল হয়ে পড়ল। তা দেখে তিনি বললেন, “আজ যারা রোযা রাখেনি তারাই সওয়াব কামিয়ে নিল।”<sup>1</sup>

৩। অসহ্য গরম, খারাপ বা দূরবর্তী রাস্তা অথবা অবিশ্রাম পথ চলার কারণে রোযা তার জন্য অত্যন্ত কষ্টকর হয়। এ অবস্থায় তার জন্য রোযা রাখা হারাম। কারণ, মহানবী (ﷺ) মক্কা-বিজয় অভিযানে রোযা রেখেছিলেন। কিন্তু তাঁর কাছে খবর এল যে, লোকেরাও রোযা রেখেছে, আর এর ফলে তারা কষ্ট ভুগছে এবং তিনি কি করছেন তা জানার অপেক্ষা করছে। সুতরাং আসরের পর তিনি এক পাত্র পানি আনিয়া পান করলেন। লোকেরা এ দৃশ্য তাকিয়ে দেখতে লাগল। তাঁকে বলা হল, কিছু লোক রোযা অবস্থায় আছে। তিনি বললেন, “তারা নাফরমান, তারা অবাধ্য।”<sup>2</sup>

জাবের (رضي الله عنه) বলেন, একদা আল্লাহর রসূল (ﷺ) এক সফরে ছিলেন। তিনি দেখলেন লোকেরা একটি লোককে ঘিরে জমা হয়েছে এবং লোকটির উপর ছায়া করা হয়েছে। তিনি বললেন, “কি হয়েছে ওর?” লোকেরা বলল, ‘লোকটি রোযা রেখেছে।’ তিনি বললেন, “সফরে তোমাদের রোযা রাখা ভাল কাজ নয়।”<sup>3</sup>

কখনো কোন ইমারজেসী কারণে রোযা ভাঙ্গা ওয়াজেবও হতে পারে। যেমন আবু সাঈদ খুদরী (رضي الله عنه) বলেন, আমরা রোযা রাখা অবস্থায় আল্লাহর

<sup>1</sup> (বুখারী ২৮৯০, মুসলিম ১১১৯নং, আর হাদীসের শব্দাবলী তাঁরই, নাসাঈ)

<sup>2</sup> (মুসলিম ১১১৪নং)

<sup>3</sup> (বুখারী ১৯৪৬, মুসলিম ১১১৫নং এবং শব্দাবলী তাঁরই)

রসূল ﷺ-এর সাথে মক্কা সফর করলাম। এক মঞ্জিলে নেমে তিনি বললেন, “তোমরা এখন শত্রুর সম্মুখীন হয়েছ, আর রোযা না রাখাতে তোমাদের শক্তি বেশী হবে।” এ কথা ফলে রোযা না রাখাতে অনুমতি হল। তখন আমাদের মধ্যে কেউ রোযা বাকী রাখল, কেউ ভেঙ্গে ফেলল। অতঃপর আমরা আর এক মঞ্জিলে অবতরণ করলাম। সেখানে তিনি বললেন, “সকালে তোমাদের শত্রুদের সাথে সাক্ষাৎ হবে। আর রোযা না রাখাতে তোমাদের ক্ষমতা বেশী থাকবে। অতএব তোমরা রোযা ভেঙ্গে দাও।” এক্ষণে তা বাধ্যতামূলক ছিল। ফলে আমরা সকলে রোযা ভেঙ্গে দিলাম।

আবু সাঈদ (رضي الله عنه) আরো বলেন, কিন্তু এর পরে আমরা আল্লাহর রসূল ﷺ-এর সাথে সফরে রোযা রাখতাম।<sup>1</sup>

### ❖ মাসআলা ৪

রোযা রেখে স্বামী-স্ত্রী এক সাথে সফর করে সফরে দিনের বেলায় সঙ্গমে লিপ্ত হয়ে পড়লে কোন ক্ষতি নেই। কারণ, মুসাফিরের জন্য রোযা ভাঙ্গা বৈধ। অতএব সে কিছু খেয়ে, অথবা পান করে অথবা সঙ্গম করে রোযা ভাঙতে পারে। এ সব কিছুই তার জন্য হালাল। বলা বাহুল্য, ঐ রোযা কাযা করা ছাড়া তার জন্য অন্য কিছু ওয়াজেব নয়।<sup>2</sup>

### ❖ মাসআলা ৪

দিন থাকতে মুসাফির ঘরে ফিরে এলে এবং অনুরূপ সেই সকল ওয়র-ওয়লা মানুষ যাদের যে ওয়রের কারণে রোযা ভাঙ্গা বৈধ ছিল তাদের সেই ওয়র দূর হলে দিনের বাকী অংশটা পানাহার ইত্যাদি থেকে বিরত থাকবে কি না - এ বিষয়ে উলামাদের মাঝে মতভেদ রয়েছে।

কিছু উলামা মনে করেন, ওয়াজেব হওয়ার কারণ নতুনভাবে দেখা দিলে রোযা ভাঙ্গকারী জিনিস থেকে বিরত থাকা ওয়াজেব। আর সেই

<sup>1</sup> (মুসলিম ১১২০নং)

<sup>2</sup> (আশশারহুল মুমতে' ৬/৩৫৯, ইবনে জিবরীন ফাসিঃ জিরাইসী ১২পৃঃ)

দিনের রোযা কাযা করা ওয়াজেব নয়। যেমন রোযার দিনে কোন কাফের মুসলিম হলে, নাবালক সাবালক হলে অথবা পাগল সুস্থ হলে, সে বাকী দিন পানাহার ইত্যাদি থেকে বিরত থাকবে এবং তাকে ঐ দিনটি কাযা করতে হবে না।

পক্ষান্তরে যে ব্যক্তি কোন প্রতিবন্ধকতার ফলে রোযা রাখেনি তার সে প্রতিবন্ধকতা দিনের মধ্যে দূর হলে তাকে বাকী দিন পানাহার ইত্যাদি থেকে বিরত থাকা ওয়াজেব নয়; অবশ্য ঐ দিনের রোযা কাযা ওয়াজেব। যেমন দিন থাকতে নিফাস বা ঋতুমতী মহিলা পবিত্রা হলে, মুসাফির রোযা না রেখে ঘরে ফিরলে, রোগী সুস্থ হলে এবং নিরপরাধ প্রাণ উদ্ধারের উদ্দেশ্যে যে রোযা ভেঙ্গেছিল তার সে কাজ শেষ হলে বাকী দিন পানাহার ইত্যাদি থেকে বিরত থাকা ওয়াজেব নয়। কিন্তু ঐ দিনের কাযা অবশ্যই ওয়াজেব।<sup>1</sup>

আব্দুল্লাহ বিন মাসউদ (رضي الله عنه) বলেন, 'যে ব্যক্তি দিনের প্রথম ভাগে রোযা রাখেনি, তার উচিত দিনের শেষভাগে রোযা না রাখা। (পানাহার ইত্যাদি থেকে বিরত না হওয়া)।'<sup>2</sup>

অন্য দিকে অপর কিছু উলামা মনে করেন, উপর্যুক্ত সকল প্রকার লোকের জন্য বাকী দিন পানাহার ইত্যাদি থেকে বিরত থাকা ওয়াজেব।<sup>3</sup> অবশ্য উত্তম ও পূর্বসতর্কতামূলক কাজ এই যে, ঐ শ্রেণীর সকল লোকই রমায়ান মাসের মর্যাদার কথা খেয়াল রেখে এবং উক্ত মতভেদ থেকে দূরে থেকে বাকী দিনটি পানাহার ইত্যাদি থেকে বিরত থাকবে।<sup>4</sup>

## (৯) নিফাস ও ঋতুমতী

নিফাস ও ঋতুমতী মহিলা খুন থাকা অবস্থায় রোযা রাখবে না। অবশ্য যে কয় দিন তাদের রোযা ছুটে যাবে তা পরে কাযা করে নেবে।

ঋতুমতী যখন মাসিকের খুন বন্ধ হওয়ার পর সাদা স্রাব আসতে

<sup>1</sup> (আশশারহুল মুমতে' 8/৫৪০-৫৪১, ৬/৩৪৭, ৩৬৩, ৪২০)

<sup>2</sup> (ইবনে আবী শাইবাহ, মুসন্নাফ ৯৩৪৩নং)

<sup>3</sup> (ইবনে জিবরীন ফাসিহ মুসনিদ ৭৪ পৃঃ)

<sup>4</sup> (আহকামুস সাওমি অল-ই'তিকাক, আবু সারী মঃ আব্দুল হাদী ৬৪ পৃঃ, সাবউনা মাসআলাহ ফিস-সিয়াম ২৩নং)

দেখবে, তখন রাত থাকলে রোযার নিয়ত করে রোযা রাখবে। কিন্তু সে যদি মাসিক শেষে অভ্যাসগতভাবে সে স্রাব লক্ষ্য না করে থাকে, তাহলে কিছু তুলো বা কাপড় নিয়ে শরমগাহে প্রবেশ করিয়ে পরীক্ষা করে দেখবে তাতে খুনের চিহ্ন আছে কি না? কোন চিহ্ন না দেখলে, অন্য কথায় তুলো বা কাপড় পরিষ্কার লক্ষ্য করলে রোযা রাখবে। রোযা রাখার পর দিনের বেলায় আবার খুন দেখা দিলে রোযা ভেঙ্গে দেবে। পক্ষান্তরে মাগরেব পর্যন্ত খুন বন্ধ থাকলে এবং ফজরের আগে রোযার নিয়ত করে থাকলে তার রোযা শুদ্ধ হয়ে যাবে।

যে মহিলা মাসিকের খুন সরার কথা অনুভব করে, কিন্তু সূর্য ডোবার পর ছাড়া বের হতে দেখে না, তার রোযা শুদ্ধ এবং ঐ দিন যথেষ্ট।

যে মহিলা তার হিসাব মত জানে যে, তার মাসিক শুরু হবে আগামী কাল, তবুও সে রোযার নিয়ত করে রোযা রাখবে এবং খুন না দেখা পর্যন্ত রোযা ভাঙবে না।<sup>1</sup>

যে মহিলার নিফাস বা মাসিক ঠিক ফজর হওয়ার সময় অথবা তার কিছু আগে বন্ধ হয়, তার জন্য রোযা রাখা জরুরী। তার রোযা শুদ্ধ ও ফরয পালন হয়ে যাবে, যদিও সে ফজর হওয়ার পরেই গোসল করে। পক্ষান্তরে যদি ফজর হয়ে যাওয়ার পর খুন বন্ধ দেখে তাহলে সেদিন সে পানাহার থেকে বিরত থাকবে, কিন্তু রোযার নিয়ত করবে না, রোযা হবেও না। বরং তা তাকে রমায়ান পর কাযা করতে হবে।<sup>2</sup>

ঋতুমতী মহিলার জন্য এটাই উত্তম যে, সে স্বাভাবিক অবস্থায় থেকে আল্লাহর লিখিত ভাগ্য নিয়ে সন্তুষ্ট থাকবে এবং খুন নিবারক কোন ঔষধ ব্যবহার করবে না। মাসিক অবস্থায় মহান আল্লাহ যেমন তার জন্য রোযা কাযা করাকে বৈধ করেছেন, তেমনি তা গ্রহণ করে নেওয়া উচিত। অনুরূপই ছিলেন মহানবী ﷺ-এর স্ত্রীগণ এবং সাহাবী ও সলফদের মহিলাগণ। তাঁরা কোন খুন-নিবারক ঔষধ ব্যবহার করতঃ মাসিক বন্ধ করে রোযা রাখতেন না। তাছাড়া মহিলাদের এই মাসিক খুন-ক্ষরণের মাঝে মহান আল্লাহর সৃষ্টিগত একটি বড় হিকমতও রয়েছে। সেই হিকমত

<sup>1</sup> (সাবউনা মাসআলাহ ফিস-সিয়াম ৬৪-৬৫নং)

<sup>2</sup> (ইবনে জিবরীন ফাসিঃ মুসনিদ ৬২পৃঃ)

ও যুক্তি মহিলার প্রকৃতির সাথে সামঞ্জস্য রাখে। অতএব সেই স্বাভাবিক প্রকৃতিতে বাধা দিলে নিঃসন্দেহে নারী-দেহে তার ক্ষতিকর প্রতিক্রিয়া দেখা দেবে। অথচ মহানবী ﷺ বলেন, “কেউ নিজে ক্ষতিগ্রস্ত হবে না এবং অপরেরও ক্ষতি করবে না।”<sup>1</sup>

এতদ্ব্যতীত মাসিক-নিবারক ট্যাবলেট ব্যবহারে মহিলার গর্ভাশয়েরও নানান ক্ষতির আশঙ্কা রয়েছে; যেমন সে কথা ডাক্তারগণ<sup>2</sup> উল্লেখ করে থাকেন।

কিন্তু যদি মহিলা তা ব্যবহার করে মাসিক বন্ধ করে এবং পবিত্রা থেকে রোযা রাখে, তাহলে সে রোযা শুদ্ধ ও যথেষ্ট।<sup>2</sup>

নিফাসবতী মহিলা ৪০ দিন পার হওয়ার আগেই যদি পবিত্রা হয়ে যায়, তাহলে সে রোযা রাখবে এবং নামাযের জন্য গোসল করবে। কিন্তু ৪০ দিন পার হওয়ার আগেই পুনরায় খুন আসতে শুরু হলে রোযা-নামায বন্ধ করে দেবে। আর যে রোযা-নামায সে পবিত্রা অবস্থায় করেছিল, তা শুদ্ধ ও যথেষ্ট হবে। পক্ষান্তরে ৪০ দিন পার হওয়ার পরেও যদি খুন বন্ধ না হয়, তাহলেও তাকে রোযা-গোসল করতে হবে। অতিরিক্ত এই দিনগুলির খুনকে ইস্তিহাযা ধরতে হবে। অবশ্য সেই সময় যদি তার স্বাভাবিক মাসিক আসার সময় হয়, তাহলে সে খুনকে মাসিকের খুন ধরতে হবে।<sup>3</sup>

মানুষের আকৃতি আসার পর জ্রণ কোন জরুরী কারণে গর্ভচ্যুত করতে বাধ্য হলে যে খুন আসবে তা নিফাস। অবশ্য এর পূর্বে গর্ভচ্যুত করলে যে খুন আসবে তা নিফাস নয়। বরং সে খুন একটি শিরার খুন। এ খুনের মান ইস্তিহাযার মত। অর্থাৎ, এ খুনে নামায-রোযা বন্ধ করা বৈধ নয়।

প্রকাশ থাকে যে, জ্রণে মানুষের আকৃতি আসতে সময় লাগে গর্ভ ধারণের পর থেকে কমসে কম ৮০ দিন। সাধারণভাবে ৯০ দিন ধরা

<sup>1</sup> (আহমাদ, মুসনাদ, ইবনে মাজাহ, হাকেম, মুত্তাদ্দরাক, বাইহাকী, দারাকুত্বনী, সুনান, সিলসিলাহ সহীহাহ, আলবানী ২৫০নং)

<sup>2</sup> (ইবনে উযাইমীন, ফাসিঃ মুসনিদ ৬৪পৃঃ, সাবউনা মাসআলাহ ফিস-সিয়াম ৬৬নং, ফাতাওয়া ইসলামিয়াহ ১/২৪১)

<sup>3</sup> (ইবনে বায, ফাসিঃ মুসনিদ ৬৩পৃঃ, সাবউনা মাসআলাহ ফিস-সিয়াম ৬৭নং)

যায়।<sup>1</sup>

গর্ভবতী খুন দেখলে তা যদি প্রসবের কিছুকাল (১/২ দিন) পূর্বে হয় এবং তার সাথে প্রসব-বেদনা থাকে, তাহলে সে খুন নিফাস। পক্ষান্তরে যদি সে খুন প্রসবের বহু (৩/৪ দিন বা তারও বেশী) পূর্বে হয় অথবা ক্ষণকাল পূর্বে হয়, কিন্তু তার সাথে প্রসব-যন্ত্রণা না থাকে, তাহলে সে খুন নিফাস নয়। সে খুন মহিলার মাসিক হওয়ার যথাসময়ে হলে তা মাসিকের খুন। কারণ, মহিলার গর্ভাশয় থেকে যে খুন নির্গত হয়, আসলে তা মাসিকের খুন; যদি মাসিকের খুন হওয়াতে কোন বাধা না থাকে তাহলে। আর কিতাব ও সুন্নাহতে এমন কোন দলীল নেই, যাতে বুঝা যায় যে, গর্ভিনী মহিলার মাসিক হতে পারে না।<sup>2</sup>

ইস্তিহাযার খুন নামায-রোযার শুদ্ধতায় কোন প্রভাব ফেলে না। কারণ, ফাতিমা বিন্তে আবী হুবাইশ আল্লাহর রসূল ﷺ-কে জিজ্ঞাসা করলেন, 'হে আল্লাহর রসূল! আমি এক এমন মহিলা, যার সব সময় ইস্তিহাযা (অতিরিক্ত মাসিকের) খুন থাকে এবং পবিত্রাই হয় না। তাহলে আমি কি নামায ত্যাগ করব?' উত্তরে তিনি বললেন, "না। এটা হল একটি শিরার খুন। মাসিক নয়। সুতরাং যখন তোমার (পূর্ব নিয়ম অনুসারে পূর্ব সময়ে) মাসিক আসবে তখন তুমি নামায ত্যাগ কর। অতঃপর যখন সে (নিয়মিত মাসিক আসার সময়) চলে যাবে, তখন খুন ধুয়ে (গোসল করে) নামায পড়তে শুরু কর।"<sup>3</sup>

<sup>1</sup> (রিসালাতুন ফিদ্ দিমাইত ডাব্বিইয়াহ, ইবনে উবাইমীন ৪০পৃ, ফাতাওয়া ইসলামিয়াহ ১/২৪৩, ফাতাওয়াল মারআহ ২৪পৃ)

<sup>2</sup> (রিসালাতুন ফিদ্ দিমাইত ডাব্বিইয়াহ ১২পৃ)

<sup>3</sup> (বুখারী ৩৩১, মুসলিম ৩৩৩নং)

## পঞ্চম অধ্যায় রোযার আরকান

রোযার হল দুটি রুকন; যদ্বারা তার প্রকৃতত্ব সংগঠিত :-

১। ফজর উদয় হওয়ার পর থেকে নিয়ে সূর্য অস্ত যাওয়া পর্যন্ত সময় ধরে যাবতীয় রোযা নষ্টকারী জিনিস থেকে বিরত থাকা। মহান আল্লাহ বলেন,

﴿وَكُلُوا وَاشْرَبُوا حَتَّىٰ يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ، ثُمَّ أَتَمُوا الصِّيَامَ إِلَى اللَّيْلِ﴾

অর্থাৎ, আর তোমরা পানাহার কর, যতক্ষণ পর্যন্ত না কালো সুতা থেকে ফজরের সাদা সুতা তোমাদের নিকট স্পষ্ট হয়েছে। অতঃপর তোমরা রাত পর্যন্ত রোযা পূর্ণ কর। (কুরআনুল কারীম ২/১৮৭)

উক্ত আয়াতে উল্লেখিত কালো সুতা ও সাদা সুতা বলে রাতের অন্ধকার ও দিনের শুভ্রতাকে বুঝানো হয়েছে। বুখারী ও মুসলিমে আদী বিন হাতেম কর্তৃক বর্ণিত, উক্ত আয়াত অবতীর্ণ হলে তিনি (মাথায় রুমালের উপর ব্যবহার্য) একটি সাদা ও একটি কালো মোটা রশি (বালিশের নিচে) রাখলেন। রাত্রি হলে তিনি লক্ষ্য করলেন, কিন্তু (কোনটা সাদা ও কোনটা কালো) তা স্পষ্ট হল না। সকাল হলে তিনি এ কথা আল্লাহর রসূল ﷺ-এর কাছে উল্লেখ করলেন। তিনি ﷺ তাঁকে বললেন, “তোমার বালিশ তাহলে খুবই বিশাল! কালো সুতা ও সাদা সুতা তোমার বালিশের নিচে ছিল?”<sup>1</sup> অন্য এক বর্ণনায় আছে, “তার মানে হল, রাতের অন্ধকার ও দিনের শুভ্রতা।”<sup>2</sup>

২। নিয়ত ; আর তা হল, মহান আল্লাহর আদেশ পালন করার উদ্দেশ্যে রোযা রাখার জন্য হৃদয়ের সংকল্প। আল্লাহ বলেন,

<sup>1</sup> (বুখারী ৪৫০৯নং)

<sup>2</sup> (বুখারী ১৯১৬, মুসলিম ১০৯০নং)

﴿وَمَا أُمِرُوا إِلَّا لِيَعْبُدُوا اللَّهَ مُخْلِصِينَ لَهُ الدِّينَ﴾

অর্থাৎ, তারা তো আল্লাহর আনুগত্যে বিশুদ্ধচিত্ত হয়ে একনিষ্ঠভাবে তাঁর ইবাদত করতে আদিষ্ট হয়েছিল। (কুরআনুল কারীম ৯৮/৫)

আর মহানবী ﷺ বলেন, “সমস্ত কর্ম নিয়তের উপর নির্ভরশীল এবং মানুষের তাই প্রাপ্য হয় যার সে নিয়ত করে।”<sup>1</sup>

সুতরাং যে ব্যক্তি ফরয (যেমন রমাযান, কাযা, নযর অথবা কাফ্ফারার) রোযা রাখবে, সে ব্যক্তির জন্য নিয়ত ও সংকল্প করা ওয়াজেব। আর নিয়ত হল, হৃদয়ের কাজ; তার সাথে মুখের কোন সম্পর্ক নেই। তার প্রকৃত্ত্ব হল, মহান আল্লাহর আদেশ পালন এবং তাঁর সন্তুষ্টি লাভ করার উদ্দেশ্যে কোন কাজের সংকল্প করা। বলা বাহুল্য, ‘নাওয়াইতু আন আসূমা গাদাম মিন শাহরি রামাযান’ বলে নিয়ত পড়া বিদআত।

আসলে যে ব্যক্তি মনে মনে এ কথা জানবে যে, আগামী কাল রোযা, অতঃপর রোযা রাখার উদ্দেশ্যে সে সেহরী খাবে, তার এমনিই নিয়ত হয়ে যাবে। তদনুরূপ যে ব্যক্তি আল্লাহর জন্য বিশুদ্ধচিত্তে দিনের বেলায় (ফজর উদয়কাল থেকে সূর্য অস্তকাল পর্যন্ত) সকল প্রকার রোযা নষ্টকারী জিনিস থেকে বিরত থাকার সংকল্প করবে, তার নিয়ত হয়ে যাবে, যদিও সে সেহরী খেতে সুযোগ না পেয়েছে।<sup>2</sup>

অবশ্য নিয়ত ফজরের পূর্বে হওয়া জরুরী। তবে রাত্রে যে কোন অংশে করলে যথেষ্ট ও বৈধ। যেহেতু মহানবী ﷺ বলেন, “যে ব্যক্তি রাত থেকে রোযা রাখার সংকল্প না করে, তার রোযা নেই।”<sup>3</sup> তিনি আরো বলেন, “যে ব্যক্তি ফজর উদয় হওয়ার পূর্বে রোযা রাখার সংকল্প না করে, তার রোযা নেই।”<sup>4</sup>

এই জন্যই যে ব্যক্তি ফজর উদয় হওয়ার পর ছাড়া রমাযান মাস

<sup>1</sup> (বুখারী ১, মুসলিম ১৩০২)

<sup>2</sup> (দ্রঃ ফিকহুস সুন্নাহ আরাবী ১/৩৮-৭, সাবউনা মাসআলাহ ফিস-সিয়াম ৩৩নং, তাইঃ ১৩৭৪)

<sup>3</sup> (নাসাঈ, সহীহুল জামেইস সাগীর, আলবানী ৬৫৩৫নং)

<sup>4</sup> (দারাকুতুনী, সুনান, বাইহাকী, আয়েশা কর্তৃক এবং আহমাদ, মুসনাদ, আবু দাউদ, তিরমিযী, নাসাঈ হাফসা কর্তৃক, ইরওয়াউল গালীল, আলবানী ৯১৪নং)



আগত হওয়ার কথা তার আগে না জানতে পারে, তার জন্য জরুরী হল, বাকী দিন রোযা নষ্টকারী জিনিস থেকে বিরত থাকা এবং রমায়ান পরে সেই দিনের রোযা কাযা করা।<sup>1</sup> আর এ হল অধিকাংশ উলামাদের মত - যেমন পূর্বে আলোচিত হয়েছে।

পক্ষান্তরে সাধারণ নফল রোযার ক্ষেত্রে রাত থেকে নিয়ত করা শর্ত নয়। বরং ফজর উদয় হওয়ার পর কিছু না খেয়ে থাকলে দিনের বেলায় নিয়ত করলেও তা যথেষ্ট হবে। কেননা, মা আয়েশা (রাঃ) বলেন, এক দিন আল্লাহর রসূল ﷺ আমার নিকট এলেন এবং বললেন, “তোমাদের কিছু আছে কি?” আমরা বললাম, ‘না।’ তিনি বললেন, “তাহলে আমি রোযা রাখলাম।”<sup>2</sup>

পরন্তু নির্দিষ্ট নফল (যেমন আরাফা ও আশূরার) রোযার ক্ষেত্রে পূর্বসতর্কতামূলক আমল হল, রাত থেকেই তার নিয়ত করে নেওয়া।<sup>3</sup>

রমায়ানের রোযাদারের জন্য রমায়ানের প্রত্যেক রাতে নিয়ত নবায়ন করার প্রয়োজন নেই। বরং রমায়ান আসার শুরুতে সারা মাস রোযা রাখার একবার নিয়ত করে নিলেই যথেষ্ট। সুতরাং যদি ধরে নেওয়া হয় যে, এক ব্যক্তি রমায়ানের কোন দিনে সূর্য ডোবার আগে ঘুমিয়ে গেল। অতঃপর পরের দিন ফজর উদয় হওয়ার পর তার চেতন হল। অর্থাৎ, সে রাতে এই দিনের রোযা রাখার নিয়ত করার সুযোগ পেল না। কিন্তু তবুও তার রোযা শুদ্ধ হবে। কারণ, মাসের শুরুতে সারা মাস রোযা রাখার নিয়ত তার ছিল।

হ্যাঁ, তবে যদি কেউ সফর, রোগ অথবা অন্য কোন ওয়রের ফলে মাঝে রোযা না রেখে নিয়ত ছিন্ন করে ফেলেছে তার জন্য অবশ্য ওয়র দূর হওয়ার পর নতুন করে রোযা রাখার জন্য নিয়ত নবায়ন করা জরুরী।<sup>4</sup>

যে ব্যক্তি খাওয়া অথবা পান করার সংকল্প করার পর পুনরায় স্থির করল যে, সে ধৈর্য ধরবে। অতএব সে পানাহার করল না। এমন ব্যক্তির

<sup>1</sup> (সাবউনা মাসআলাহ ফিস-সিয়াম ৩৬নং)

<sup>2</sup> (মুসলিম ১১৫৪নং)

<sup>3</sup> (সাবউনা মাসআলাহ ফিস-সিয়াম ৩৪নং)

<sup>4</sup> (আশশারহুল মুমত' ৬/৩৬৯, সামানিয়া ওয়া আরবাউন সুআলান ফিস-সিয়াম ৪৬পৃ, সাবউনা মাসআলাহ ফিস-সিয়াম ৩৩নং)

রোযা কেবলমাত্র পানাহার করার ইচ্ছা ও সংকল্প হওয়ার জন্য নষ্ট হবে না। আর এ কাজ হল সেই ব্যক্তির মত, যে নামাযে কথা বলতে ইচ্ছা করার পর কথা বলে না, অথবা (হাওয়া ছেড়ে) ওযু নষ্ট করার ইচ্ছা হওয়ার পর ওযু নষ্ট করে না। যেমন এই নামাযীর ঐ ইচ্ছার ফলে নামায বাতিল হবে না এবং তার ওযুও শুদ্ধ থাকবে, অনুরূপ ঐ রোযাদারের পানাহার করার ইচ্ছা হওয়ার পর পানাহার না করে তার রোযাও বাতিল না হয়ে শুদ্ধ থাকবে। যেহেতু নীতি হল, যে ব্যক্তি ইবাদতে কোন নিষিদ্ধ (ইবাদত নষ্টকারী) কর্ম করার সংকল্প করে, কিন্তু কার্যতঃ তা করে না, সে ব্যক্তির ইবাদত নষ্ট হয় না।<sup>1</sup>

পক্ষান্তরে যে (রোযা নেই বা রাখলাম না মনে করে) নিয়ত ছিল করে দেয়, তার রোযা বাতিল। যেহেতু মহানবী ﷺ বলেন, “সমস্ত কর্ম নিয়তের উপর নির্ভরশীল এবং মানুষের তাই প্রাপ্য হয় যার সে নিয়ত করে।”<sup>2</sup>

যদি কোন রোযাদার মুরতাদ্দ হয়ে যায় তাহলে সাথে সাথে তওবা করলেও তার রোযা নষ্ট হয়ে যায়। কারণ, মুরতাদ্দের কাজ ইবাদতের নিয়ত বাতিল ও বিচ্ছিন্ন করে ফেলে। আর এতে কারো কোন প্রকারের দ্বিমত নেই।<sup>3</sup>

নিয়ত প্রসঙ্গে আলোচনায় একটি সতর্কতা জরুরী এই যে, প্রত্যেক মুসলিমের জন্য ওযাজেব হল, আল্লাহর প্রতি ঈমান, তাঁর সওয়াবের আশা এবং কেবল তাঁরই সন্তুষ্টি বিধানের উদ্দেশ্যে রোযা রাখা। কাউকে দেখাবার বা শোনার উদ্দেশ্যে, অথবা কেবলমাত্র লোকেদের দেখাদেখি অঙ্ক অনুকরণ করে, অথবা দেশ বা পরিবারের পরিবেশের অনুকরণ করে রোযা রাখা উচিত নয়। (যেমন রোযা শরীর ও স্বাস্থ্যের পক্ষে উপকারী বলে সেই উপকার লাভের উদ্দেশ্যেই রোযা রাখা।) বরং ওযাজেব হল, তাকে যেন তার এই ঈমান রোযা রাখতে উদ্বুদ্ধ করে যে, মহান আল্লাহ

<sup>1</sup> (ইবনে উযাইমীন, আহকামুন মিনাস সিয়াম, ক্যাসেট)

<sup>2</sup> (বুখারী ১, মুসলিম ১৩নং) (দ্রঃ আশশারহুল মুমতঃ ৬/৩৭৬, ইবনে জিবরীন ফাসিহ মুসনিদ ৯৯ পৃঃ, সাওয়ু রামাযান ২৪ পৃঃ)

<sup>3</sup> (সাবউনা মাসআলাহ ফিস-সিয়াম ৩৩নং)

তার উপর এই রোযা ফরয করেছেন এবং সে তা পালন করে তাঁর কাছে প্রতিদানের আশা করে। আর এ জন্যই মহানবী ﷺ বলেন, “যে ব্যক্তি ঈমান এবং সওয়াবের আশা রেখে রমাযানের রোযা রাখে, তার পূর্বেকার সকল গোনাহ মাফ হয়ে যায়।”<sup>1</sup>

সুতরাং রোযার উদ্দেশ্য ক্ষুৎ-পিপাসা ও কষ্ট সহ্য করার উপর শরীর-চর্চা বা স্বাস্থ্য-অনুশীলন নয়, বরং তা হল প্রিয়তমের সন্তুষ্টি লাভের উদ্দেশ্যে প্রিয়তম বস্তু ত্যাগ করার উপর আত্মার অনুশীলন।

রোযায় পরিত্যাজ্য প্রিয়তম বস্তু হল, পানাহার ও স্ত্রী-সঙ্গম। আর তা হল আত্মার কামনা। প্রিয়তমের সন্তুষ্টি হল, মহান আল্লাহর সন্তুষ্টি। সুতরাং নিয়তে আমরা যেন এ কথা স্মরণে রাখি যে, আমরা মহান আল্লাহর সন্তুষ্টি লাভের আশায় উক্ত রোযা নষ্টকারী (কামনার) বস্তু ত্যাগ করব।<sup>2</sup>



<sup>1</sup> (বুখারী ৩৮, মুসলিম ৭৬০৯২) (রিসালাতানি মু'জাযাতানি ফিয যাকাতি অস্‌সিয়াম, ইবনে বায ২২পৃঃ)

<sup>2</sup> (সামানিয়া ওয়া আরবাউন সুআলান ফিস্-সিয়াম ১১পৃঃ)

## ষষ্ঠ অধ্যায় রোযার বিভিন্ন আদব

রোযায় রোযাদারের নিম্নলিখিত আদবের খেয়াল রাখা উচিত :-

### সেহরী বা সাহরী খাওয়া

মুসলিম উম্মাহর সর্বসম্মতিক্রমে রোযার জন্য সেহরী খাওয়া মুস্তাহাব এবং যে ব্যক্তি তা ইচ্ছাকৃত খায় না সে গোনাহগার নয়। আর এ কারণেই যদি কেউ ফজরের পর জাগে এবং সেহরী খাওয়ার সময় না পায়, তাহলে তার জন্য জরুরী রোযা রেখে নেওয়া। এতে তার রোযার কোন ক্ষতি হবে না। বরং ক্ষতি হবে তখন, যখন সে কিছু খেতে হয় মনে করে তখনই (ফজরের পর) কিছু খেয়ে ফেলবে। সে ক্ষেত্রে তাকে সারা দিন পানাহার ইত্যাদি থেকে বিরত থাকতে হবে এবং রমায়ান পরে সেই দিন কাযা করতে হবে।

সেহরী খাওয়া যে উত্তম তা প্রকাশ করার জন্য মহানবী ﷺ উম্মতকে বিভিন্ন কথার মাধ্যমে উদ্বুদ্ধ করেছেন। তিনি সেহরীকে বর্কতময় খাদ্য বলে অভিহিত করেছেন। তিনি বলেন, “তোমরা সেহরী খাও। কারণ, সেহরীতে বর্কত আছে।”<sup>1</sup> “তোমরা সেহরী খেতে অভ্যাসী হও। কারণ, সেহরীই হল বর্কতময় খাদ্য।”<sup>2</sup>

ইরবায় বিন সারিয়াহ বলেন, একদা রমায়ানে আল্লাহর রসূল ﷺ আমাকে সেহরী খেতে ডাকলেন; বললেন, “বর্কতময় খানার দিকে এস।”<sup>3</sup>

সেহরীতে বর্কত থাকার মানে হল, সেহরী রোযাদারকে সবল রাখে এবং রোযার কষ্ট তার জন্য হালকা করে। আর এটা হল শারীরিক বর্কত। পক্ষান্তরে শরয়ী বর্কত হল, রসূল ﷺ-এর আদেশ পালন এবং তাঁর অনুসরণ।

<sup>1</sup> (বুখারী ১৮২৩, মুসলিম ১০৯৫নং)

<sup>2</sup> (আহমাদ, মুসনাদ, নাসাঈ সহীহুল জামেইস সাগীর, আলবানী ৪০৮১নং)

<sup>3</sup> (আহমাদ, মুসনাদ, আবু দাউদ, নাসাঈ, ইবনে হিব্বান, সহীহ, ইবনে খুযাইমাহ, সহীহ, সহীহুল জামেইস সাগীর, আলবানী ৭০৪৩নং)

মহানবী ﷺ এই সেহরীর গুরুত্ব বর্ণনা করতে গিয়ে তা দিয়ে মুসলিম ও আহলে কিতাব (ইয়াহুদী ও খ্রিষ্টানদের) রোযার মাঝে পার্থক্য চিহ্নিত করেছেন। তিনি অন্যান্য ব্যাপারে তাদের বিরোধিতা করার মত তাতেও বিরোধিতা করতে আমাদেরকে আদেশ করেছেন। তিনি বলেন, “আমাদের রোযা ও আহলে কিতাবের রোযার মাঝে পার্থক্য হল সেহরী খাওয়া।”<sup>1</sup>

### ❖ কি খেলে সেহরী খাওয়া হবে?

অল্প-বিস্তর যে কোন খাবার খেলেই সেহরী খাওয়ার বিধি পালিত হয়ে যাবে। এমনকি কেউ যদি এক ঢোক দুধ, চা অথবা পানিও খায় অথবা ২/১টি বিস্কুট বা খেজুরও খায়, তাহলে তারও সেহরী খাওয়ার সুন্নত পালন হয়ে যাবে। আর এই সামান্য পরিমাণ খাবারেই রোযাদার এই বিরাট ফরয রোযা পালনের মাধ্যমে মহান আল্লাহর আনুগত্য করতে বল পাবে এবং ফিরিশ্তাবর্গ তার জন্য দুআ করবে।

আবু সাঈদ খুদরী (رضي الله عنه) কর্তৃক বর্ণিত, আল্লাহর রসূল ﷺ বলেন, “সেহরী খাওয়াতে বরকত আসে। সুতরাং তোমরা তা খেতে ছেড়ো না; যদিও তাতে তোমরা এক ঢোক পানিও খাও। কেননা, যারা সেহরী খায় তাদের জন্য আল্লাহ রহমত বর্ষণ করেন এবং ফিরিশ্তা দুআ করতে থাকেন।”<sup>2</sup>

তিনি আরো বলেন, “তোমরা সেহরী খাও; যদিও এক ঢোক পানি হয়।”<sup>3</sup>

আবু হুরাইরা (رضي الله عنه) কর্তৃক বর্ণিত, মহানবী ﷺ বলেন, “মুমিনের শ্রেষ্ঠ সেহরী হল খেজুর।”<sup>4</sup>

অবশ্য সেহরী খাওয়াতে বাড়াবাড়ি করা উচিত নয়। কারণ, বেশী

<sup>1</sup> (মুসলিম ১০৯৬, আবু দাউদ ২৩৪৩, ফাসিঃ মুসনিদ ৯৮-পৃঃ)

<sup>2</sup> (আহমাদ, মুসনাদ, সহীহুল জামেইস সাগীর, আলবানী ৩৬৮-৩৬৯)

<sup>3</sup> (আহমাদ, মুসনাদ, ইবনে হিব্বান, সহীহ প্রমুখ, সহীহুল জামেইস সাগীর, আলবানী ২৯৪৫নং)

<sup>4</sup> (আবু দাউদ ২৩৪৫ নং, ইবনে হিব্বান, সহীহ, বাইহাকী ৪/২৩৬-২৩৭, সিলসিলাহ সহীহাহ, আলবানী ৫৬২নং)

পানাহার করার ফলে ইবাদত ও আনুগত্যে আলস্য সৃষ্টি হয়।

কিছু লোক আছে, যারা গলায় গলায় ভ্যারাইটিজ পানাহার করে এমনভাবে পেট পূর্ণ করে নেয় যে, মনে হয় তার শ্বাসকষ্ট হচ্ছে। যার ফলে ফজরের নামাযে বড় আলস্য ও শৈথিল্যের সাথে উপস্থিত হয় এবং মসজিদে আল্লাহর যিকরের জন্যও সামান্য ক্ষণ বসতে সক্ষম হয় না। আর দিনের বেলায় পেটের বিভিন্ন প্রকার কমপ্লেনের শিকার হয়। অথচ মহানবী ﷺ বলেন, “উদর অপেক্ষা নিকৃষ্টতর কোন পাত্র মানুষ পূর্ণ করে না। আদম সন্তানের জন্য ততটুকুই খাদ্য যথেষ্ট, যতটুকুতে তার পিঠ সোজা করে রাখে। আর যদি এর চেয়ে বেশী খেতেই হয় তাহলে যেন সে তার পেটের এক তৃতীয়াংশ আহারের জন্য, এক তৃতীয়াংশ পানের জন্য এবং অন্য আর এক তৃতীয়াংশ শ্বাস-প্রশ্বাসের জন্য ব্যবহার করে।”<sup>1</sup>

### ❖ সেহরীর সময় :

সেহরী খাওয়ার সময় হল অর্ধরাত্রির পর থেকে ফজরের আগে পর্যন্ত। আর মুস্তাহাব হল, ফজর হয়ে যাওয়ার আশঙ্কা না হলে শেষ সময়ে সেহরী খাওয়া। আনাস (رضي الله عنه) কর্তৃক বর্ণিত, যায়দ বিন যাবেত তাঁকে জানিয়েছেন যে, তাঁরা নবী ﷺ-এর সাথে সেহরী খেয়ে (ফজরের) নামায পড়তে উঠে গেছেন। আনাস বলেন, আমি জিজ্ঞাসা করলাম, ‘সেহরী খাওয়া ও আযান হওয়ার মধ্যে কতটুকু সময় ছিল?’ উত্তরে যায়দ বললেন, ‘পঞ্চাশ অথবা ষাটটি আয়াত পড়তে যতটুকু লাগে।’<sup>2</sup>

এখানে আয়াত বলতে মধ্যম ধরনের আয়াত গণ্য হবে। আর এই শ্রেণীর ৫০/৬০টি আয়াত পড়তে মোটামুটি ১৫/২০ মিনিট সময় লাগে। অতএব সুন্নত হল, আযানের ১৫/২০ মিনিট আগে সেহরী খাওয়া।

মহানবী ﷺ-এর সাহাবাগণ খুব তাড়াতাড়ি (সময় হওয়া মাত্র)

<sup>1</sup> (আহমাদ, মুসনাদ, তিরমিযী ২৩৮০, ইবনে মাজাহ ৩৩৪৯, ইবনে হিব্বান, সহীহ, হাকেম, মুস্তাদরাক ৪/১২১, সিলসিলাহ সহীহাহ, আলবানী ২২৬৫, সহীহুল জামেইস সাগীর, আলবানী ৫৬৭৪নং)

<sup>2</sup> (বুখারী ৫৭৫, ১৯২১, মুসলিম ১০৯৭, তিরমিযী ৭০৩নং)

ইফতার করতেন এবং খুব দেরী করে সেহরী খেতেন।<sup>1</sup>

সুতরাং সেহরী আগে আগে খেয়ে ফেলা উচিত নয়। মধ্য রাতে সেহরী খেয়ে ঘুমিয়ে পড়া তো মোটেই উচিত নয়। কারণ, তাতে ফজরের নামায ছুটে যায়। ঘুমিয়ে থেকে হয় তার জামাআত ছুটে যায়। নচেৎ, নামাযের সময় চলে গিয়ে সূর্য উঠার পর চেতন হলে নামাযটাই কাযা হয়ে যায়। নাউযু বিল্লাহি মিন যালিক। আর নিঃসন্দেহে এটি একটি বড় মসীবত; যাতে বহু রোযাদার ফেঁসে থাকে। আল্লাহ তাদেরকে হেদায়াত করুন। আমীন।

### ❖ ফজর উদয় হওয়ার ব্যাপারে সন্দেহ হলে :

ফজর উদয় হওয়ার ব্যাপারে সন্দেহ হলে রোযাদার ততক্ষণ পর্যন্ত পানাহার করতে পারে, যতক্ষণ পর্যন্ত না সে ফজর উদয় হওয়ার ব্যাপারে নিশ্চিত হয়েছে। আর সন্দেহের উপর পানাহার বন্ধ করবে না। যেহেতু মহান আল্লাহ পানাহার বন্ধ করার শেষ সময় নির্ধারিত করেছেন নিশ্চিত ও স্পষ্ট ফজরকে; সন্দিগ্ধ ও অস্পষ্ট ফজরকে নয়। তিনি বলেছেন,

﴿وَكُلُّوا وَاشْرَبُوا حَتَّى يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ﴾

অর্থাৎ, আর তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে।  
(কুরআনুল কারীম ২/১৮৭)

এক ব্যক্তি ইবনে আব্বাস (رضي الله عنه) কে বলল, 'আমি সেহরী খেতে থাকি। অতঃপর যখন (ফজর হওয়ার) সন্দেহ হয়, তখন (পানাহার) বন্ধ করি।' তিনি বললেন, 'যতক্ষণ সন্দেহ থাকে ততক্ষণ খেতে থাক, সন্দেহ দূর হয়ে গেলে খাওয়া বন্ধ কর।'<sup>2</sup>

ইমাম আহমাদ (রঃ) বলেন, 'ফজর উদয় হওয়ার ব্যাপারে সন্দেহ

<sup>1</sup> (বাইহাকী ৪/২৩৮, ইবনে আবী শাইবাহ, মুসান্নাফ ৮৯৩২নং)

<sup>2</sup> (ইবনে আবী শাইবাহ, মুসান্নাফ ৯০৫৭, ৯০৬৭নং)

হলেও যতক্ষণ পর্যন্ত না নিশ্চিত হওয়া গেছে ততক্ষণ রোযাদার পানাহার করতে পারবে।<sup>1</sup>

যদি কোন ব্যক্তি ফজর উদয় হওয়ার ব্যাপারে সন্দেহ রেখে খায়, অথবা ফজর উদয় হয়নি মনে করে খায়, অতঃপর জানতে পারে যে, খাওয়ার আগেই ফজর উদয় হয়ে গেছে, অথবা ফজরের আযান হয়ে গেছে, তাহলে তার রোযা শুদ্ধ এবং তাকে ঐ রোযা কাযা করতে হবে না। যদিও সে আসলে ফজরের পর খেয়েছে। কারণ, সে না জেনে খেয়েছে। আর না জেনে খাওয়া ক্ষমাই। অর্থাৎ তা ধর্ভব্য নয়।<sup>2</sup> পক্ষান্তরে যদি কেউ ঘুম থেকে জেগে উঠে জানতে পারে যে, ফজর বা ফজরের আযান হয়ে গেছে এবং তা সত্ত্বে পানি বা অন্য কিছু খায়, তাহলে তার রোযা হবে না। তাকে ঐ দিন পানাহার ইত্যাদি রোযার মতই বন্ধ রেখে রমাযান পর কাযা রাখতে হবে।

জ্ঞাতব্য যে, সেহরীর শেষ সময় হল পূর্ব আকাশে ছড়িয়ে পড়া সাদা আলোক রেখার উদ্ভব কাল। সামুরাহ বিন জুনদুব (رضي الله عنه) কর্তৃক বর্ণিত, আল্লাহর রসূল (ﷺ) বলেন, “বিলালের আযান এবং (পূর্বাকাশে) আলম্বিত শুভ জ্যোতি যেন তোমাদেরকে সেহরী খাওয়াতে বাধা না দেয়। অবশ্য পূর্বাকাশে ছড়িয়ে পড়া জ্যোতি দেখে খাওয়া বন্ধ করো।”<sup>3</sup>

বলা বাহুল্য, ছড়িয়ে পড়া উজ্জ্বল সাদা রেখা পরিদৃষ্ট হলে সাথে সাথে রোযাদারের জন্য পানাহার ইত্যাদি থেকে বিরত হওয়া ওয়াজেব। তাতে সে ফজরের আযান শুনুক, অথবা না শুনুক। কারণ, মহান আল্লাহ বলেন, “তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে।” (কুরআনুল কারীম ২/১৮৭)

আর মহানবী (ﷺ) বলেন, “ইবনে উম্মে মাকতূমের আযান না দেওয়া পর্যন্ত তোমরা পানাহার কর। কারণ, সে ফজর উদয় না হলে আযান দেয়

<sup>1</sup> (ফিকহস সুন্নাহ ১/৪০৪)

<sup>2</sup> (আশ্শারহুল মুমত' ৬/৪০৯-৪১১)

<sup>3</sup> (আহমাদ, মুসলিম, আবু দাউদ ২৩৪৬, তিরমিযী, ইবনে আবী শাইবাহ ৪, দারাকুতুনী, বাইহাকী, ইরওয়াউল গালীল ৯১৫নং)



না।”<sup>1</sup>

লক্ষণীয় যে, ফজর উদয় হয়েছে কি না, তা-ই দেখার বিষয়; আযান হয়েছে কি না, তা নয়। অতএব মুআযযিন যদি নির্ভরযোগ্য হয় এবং জানা যায় যে, সে ফজর উদয় না হলে আযান দেয় না অথবা ফজর উদয় হওয়ার পরে দেয়ী করে আযান দেয় না, তাহলে তার আযান শোনামাত্র পানাহার থেকে বিরত হওয়া ওয়াজেব। পক্ষান্তরে মুআযযিন যদি (ফজর উদয়ের) সময় হওয়ার পূর্বেই আযান দেয়, তাহলে তার আযান শুনে পানাহার বন্ধ করা ওয়াজেব নয়। তদনরূপ মুআযযিন যদি টিলে হয় এবং যথাসময় থেকে দেয়ী করে আযান দেয়, তাহলে সময় শেষ জানা সত্ত্বেও আযান হয়নি বলে খেয়ে যাওয়া বৈধ নয়। কারণ, এতে রোযা হবে না।

কিছু মুআযযেনের অবস্থা না জানা গেলে, অথবা একই শহরে একাধিক মসজিদের একাধিক মুআযযেনের বিভিন্ন সময়ে আযান হলে এবং শহরের ভিতরে ঘর-বাড়ি তথা লাইটের ফলে ফজর উদয় হওয়ার সময় নিজে নির্ধারণ না করতে পারলে নির্ভরযোগ্য সেই ইসলামী পঞ্জিকা অনুযায়ী আমল করা জরুরী, যাতে নিখুঁতভাবে ফজর উদয়ের স্থানীয় সময় ঘন্টা-মিনিট সহ স্পষ্ট লিখা থাকে। অতঃপর নিজের ঘড়ি ঠিক রেখে সেই সময় অনুযায়ী সেহরী-ইফতার করলে মহানবী ﷺ-এর সেই হাদীসের উপর আমল হবে, যাতে তিনি বলেন, “যে বিষয়ে সন্দেহ আছে সে বিষয় বর্জন করে তাই কর যাতে সন্দেহ নেই।”<sup>2</sup> “সুতরাং যে সন্দিহান বিষয়াবলী থেকে দূরে থাকবে, সে তার দ্বীন ও ইচ্ছতকে বাঁচিয়ে নেবে।”<sup>3</sup>

জ্ঞাতব্য যে, ফজর উদয় হওয়ার ৫/১০ মিনিট আগে সতর্কতামূলকভাবে পানাহার থেকে বিরত হওয়া একটি বিদআত। কোন কোন পঞ্জিকা (বা রমায়ান-সওগাতে) যে একটি ঘর সেহরীর শেষ সময়ের এবং পৃথক আর একটি ঘর ফজরের আযানের লক্ষ্য করা যায়, তা আসলে

<sup>1</sup> (বুখারী ১৯১৮, মুসলিম ১০৯২নং)

<sup>2</sup> (আহমাদ, মুসনাদ, তিরমিযী ২৫১৮, নাসাই, ইবনে হিব্বান, সহীহ, আব্বারানী, মুজাম প্রমুখ, ইরওয়াউল গালীল, আলবানী ২০৭৪, সহীহুল জামেইস সাগীর, আলবানী ৩৩৭৭, ৩৩৭৮নং)

<sup>3</sup> (আহমাদ, মুসনাদ ৪/২৬৯, ২৭০, বুখারী ৫২, মুসলিম ১৫৯৯নং, আবু দাউদ, তিরমিযী, ইবনে মাজাহ, দাঃ)

শরীয়ত-বিরোধী কাজ।<sup>1</sup> কারণ, সেহরীর শেষ সময় যেটাই, সেটাই ফজরের আযানের সময়। আর ফজরের আযানের সময়ের আগে লোকেদের পানাহার বন্ধ করা অবশ্যই শরীয়ত-বিরোধী কাজ।

বলা বাহুল্য, (বিশেষ করে) রমাযান মাসে মুআযযিন-ইমামদের উচিত, যথাসময়ে আযান দেওয়ার ব্যাপারে সর্বাত্রিক প্রচেষ্টা রাখা। রাইট-টাইমের ঘড়ি দ্বারা ফজর উদয়ের ব্যাপারে নিশ্চিত না হওয়া পর্যন্ত আযান দেওয়া মোটেই উচিত নয়। যাতে তাঁরা লোকেদেরকে ধোকা দিয়ে এমন সময় আযান না দিয়ে বসেন, যে সময়ে তাদের জন্য আল্লাহর হালালকৃত খাদ্য তাদের জন্য হারাম করে দেন এবং সময় হওয়ার পূর্বেই ফজরের নামায হালাল করে বসেন। আর এ যে কত বড় বিপজ্জনক, তা অনুমেয়।<sup>2</sup>

হযরত আবু হুরাইরা কর্তৃক বর্ণিত, আল্লাহর রসূল ﷺ বলেন, “যখন তোমাদের কেউ আযান শোনে এবং সেই সময় তার হাতে (পানির) পাত্র থাকে, তখন সে যেন তা থেকে নিজের প্রয়োজন পূর্ণ না করা পর্যন্ত রেখে না দেয়।”<sup>3</sup>

অনেক উলামা উক্ত হাদীসটিকে এ কথার দলীল মনে করেন যে, যে ব্যক্তির হাতে খাবারের পাত্র (নিয়ে খেতে) থাকা অবস্থায় ফজর (বা তার আযান) হয়ে যায়, তার জন্য তা থেকে নিজের প্রয়োজন পূর্ণ না করা পর্যন্ত রেখে দেওয়া (খাওয়া বন্ধ করা) বৈধ নয়। সুতরাং এ ব্যাপারটি আয়াতের সাধারণ নির্দেশ থেকে স্বতন্ত্র। মহান আল্লাহ বলেন,

﴿وَكُلُوا وَاشْرَبُوا حَتَّىٰ يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ﴾

“আর তোমরা পানাহার কর, যতক্ষণ পর্যন্ত না (রাতের) কালো

<sup>1</sup> (দ্রঃ তামামুল মিন্নাহ, আল্লামা আলবানী ৪১৮পৃ, সামানিয়া ওয়া আরবাউন সুআলাান ফিস-সিয়াম ৪৮পৃ)

<sup>2</sup> (ইবনে উযাইমীন ফাসিঃ মুসনিদ ৩৬পৃ)

<sup>3</sup> (আহমাদ, মুসনাদ ২/৪৩২, ৫১০, আবু দাউদ ২৩৫০, দারাকুত্বনী, সুনান ২১৬২, হাকেম, মুত্তাদিরাক ১/২০৩, বাইহাকী, সিলসিলাহ সহীহাহ, আলবানী ১৩৯৪নং)

অন্ধকার থেকে ফজরের সাদা রেখা তোমাদের নিকট স্পষ্ট হয়েছে।”  
(কুরআনুল কারীম ২/১৮৭)

অতএব উক্ত আয়াত তথা অনুরূপ অর্থের সকল হাদীস উপর্যুক্ত হাদীসের বিরোধী নয়। তাছাড়া ইজমার প্রতিকূলও নয়। বরং সাহাবাদের একটি জামাআত এবং আরো অন্যান্যগণ উক্ত হাদীস অপেক্ষা আরো প্রশস্ত তা রেখে মনে করেন যে, ফজর উজ্জ্বল হয়ে গেলে এবং ভোরের গুত্র আলো রাস্তায় ছড়িয়ে পড়লেও সে পর্যন্ত পানাহার করা বৈধ।<sup>1</sup>

অনেকে মনে করেন, উক্ত হাদীসে ‘আযান’ বলতে বিলালের আযানকে বুঝানো হয়েছে; যা প্রথম (সেহরী বা তাহাজ্জুদের) আযান এবং যা ফজরের আগে দেওয়া হত। মহানবী ﷺ বলেন, “বিলাল রাতে আযান দেয়। সুতরাং তোমরা ততক্ষণ পর্যন্ত পানাহার করতে থাক, যতক্ষণ পর্যন্ত না ইবনে উম্মে মাকতূম আযান দেয়।”<sup>2</sup>

অথবা উক্ত হাদীসের অর্থ এই যে, আযান শুনেও যদি ফজর উদয়ে সন্দেহ হয়, যেমন আকাশ মেঘাচ্ছন্ন থাকার ফলে অন্ধকার থাকে, তাহলে সে সময় কেবল আযানে ফজর হওয়ার কথা নিশ্চিতরূপে জানা যায় না। কারণ, ফজর জানার যে মাধ্যম তা (ফজরের জ্যোতি) নেই। আর মুআযযিন তা দেখে ফজর উদয়ের কথা জানতে পারলে সেও জানতে পারত। পক্ষান্তরে ফজর উদয় হওয়ার কথা এমনিই বুঝতে পারা গেলে মুআযযিনের আযান শোনার প্রয়োজন নেই। কারণ, সে তো (রাতের) কালো অন্ধকার থেকে ফজরের সাদা রেখা স্পষ্ট হলেই পানাহার থেকে বিরত থাকতে আদিষ্ট। এ কথা বলেছেন খাত্তাবী।

বাইহাকী বলেন, ‘উক্ত হাদীস সহীহ হলে অধিকাংশ উলামার নিকট তার ব্যাখ্যা এই যে, মহানবী ﷺ জেনেছিলেন, মুআযযিন ফজর হওয়ার আগে আযান দেয়। সুতরাং তখন সে পান করলে ফজর উদয়ের আগেই পান করা হবে।’<sup>3</sup>

<sup>1</sup> (দ্রঃ ফাতহুল বারী ৪/১৬২-১৬৩, সিলসিলাহ সহীহাহ, আলবানী ৩/৩৮২-৩৮৪, তামামুল মিন্নাহ, আল্লামা আলবানী ৪১৭-৪১৮ পৃঃ)

<sup>2</sup> (বুখারী ৬১৭নং, মুসলিম)

<sup>3</sup> (বাইহাকী ৪/২১৮)

আলী আল-ক্বারী বলেন, 'উক্ত নির্দেশ তখন প্রযোজ্য, যখন ফজর উদয়ে সন্দেহ হয়।' ইবনুল মালেক বলেন, 'উক্ত নির্দেশ তখন প্রযোজ্য, যখন জানতে পারবে না যে, ফজর উদয় হয়ে গেছে। নচেৎ, যখন ফজর উদয় হওয়ার কথা জানতে পারবে এবং তাতে সন্দেহ করবে তখন নয়।'<sup>1</sup> এ ছাড়া আরো অন্য ব্যাখ্যাও করা হয়েছে। সুতরাং আল্লাহই ভালো জানেন।

বলা বাহুল্য, শেষোক্ত উলামাদের মতানুসারে যখন কোন রোযাদার মুখে কোন খাদ্য বা পানীয় থাকা অবস্থায় ফজরের আযান শুনবে, তখনই সে তা মুখ থেকে উগলে ফেলে দেবে। আর এতে তার রোযা শুদ্ধ হয়ে যাবে।<sup>2</sup>

প্রকাশ থাকে যে, সেহরী খাওয়ার পর মুআযযিনের আযানের অপেক্ষা করে তার 'আল্লা--' বলার সাথে সাথে তৈরী রাখা পানি শেষ বারের মত পান করা বৈধ নয়। কারণ, আযান হয় ফজর উদয় হওয়ার সাথে সাথে এবং এ কথা জানাবার উদ্দেশ্যে যে সেহরীর সময় শেষ। অতএব খাবার সময় নেই জানার পরেও খাওয়া শরীয়তের বিরোধিতা তথা রোযা নষ্ট করার কাজ।<sup>3</sup>

পূর্বের আলোচনায় আমরা জানতে পেরেছি যে, ফজরের আগে একটি আযান আছে, যা তাহাজ্জুদ ও সেহরীর সময় জানাবার জন্য ব্যবহার করা হত মহানবী ﷺ-এর যুগে। অতএব সেহরীর সময় লোকেদেরকে জাগানোর জন্য সেই আযানের বদলে কুরআন বা গজল পড়া, বেল বা ঘন্টা বাজানো, অথবা তোপ দাগা বিদআত।<sup>4</sup>

## ইফতার

### ❖ শীঘ্র ইফতার :

রোযার নির্দিষ্ট সময় অতিবাহিত হয়ে গেলে রোযা খোলা বা ইফতার

<sup>1</sup> (আউনুল মাবুদ ৬/৩৪১-৩৪২)

<sup>2</sup> (সাবউনা মাসআলাহ ফিস-সিয়াম ৬১নং)

<sup>3</sup> (তাওজীহাতুন অফাওয়াএদ লিসসা-য়েমীনা অসসায়েমাত ৪০পৃঃ দ্রঃ)

<sup>4</sup> (মু'জামুল বিদা' ২৬৮-পৃঃ)

করার জন্য প্রত্যেক রোযাদারের অধীর আগ্রহে অপেক্ষা করাটাই স্বাভাবিক। আর সেই সময় যে তার রোযা পূর্ণ করতে পারে প্রকৃতিগতভাবে সে খুশী হয়। অতএব ইফতার করতে তাড়াতাড়ি করাটাই স্বাভাবিক ব্যাপার। কিন্তু তা সত্ত্বেও দয়ার নবী ﷺ আমাদেরকে সত্বর ইফতার করতে নির্দেশ দিয়েছেন এবং জানিয়েছেন যে, তাতে আমাদের মঙ্গল আছে। তিনি বলেন, “লোকেরা ততক্ষণ মঙ্গলে থাকবে, যতক্ষণ তারা (সূর্য ডোবার পর নামাযের আগে) ইফতার করতে তাড়াতাড়ি করবে।”<sup>1</sup>

যেহেতু ইয়াহুদ ও খ্রিষ্টানরা রোযা রেখে দেরী করে ইফতার করে, তাই তিনি আমাদেরকে তাদের বিরুদ্ধাচরণ করতে আদেশ দিয়েছেন। তিনি বলেন, “দ্বীন ততকাল বিজয়ী থাকবে, যতকাল লোকেরা ইফতার করতে তাড়াতাড়ি করবে। কারণ, ইয়াহুদ ও খ্রিষ্টানরা দেরী করে ইফতার করে।”<sup>2</sup>

খোদ মহানবী ﷺ-এর আমল ছিল জলদি ইফতার করা। আবু আতিয়াহ বলেন, আমি ও মাসরুক আয়েশা (রাঃ)এর নিকট উপস্থিত হয়ে বললাম, ‘হে উম্মুল মুমেনীন! মুহাম্মাদ ﷺ-এর সাহাবীদের মধ্যে একজন (সময় হওয়া মাত্র) তাড়াতাড়ি ইফতার করে ও তাড়াতাড়ি নামায পড়ে এবং অপর একজন দেরী করে ইফতার করে ও দেরী করে নামায পড়ে।’ তিনি বললেন, ‘ওদের মধ্যে কে তাড়াতাড়ি ইফতার করে ও তাড়াতাড়ি নামায পড়ে?’ আমরা বললাম, ‘আবুত্বাহ (অর্থাৎ ইবনে মাসউদ)।’ তিনি বললেন, ‘আল্লাহর রসূল ﷺ এ রকমই (তাড়াতাড়ি ইফতার ও নামায আদায়) করতেন।’<sup>3</sup>

সময় হওয়ার সাথে সাথে শীঘ্র ইফতার করা নবুঅতের একটি আদর্শ। মহানবী ﷺ বলেন, “তিনটি কাজ নবুয়তের আদর্শের অন্তর্ভুক্ত; জলদি ইফতার করা, দেরী করে (শেষ সময়ে) সেহরী খাওয়া এবং নামাযে ডান

<sup>1</sup> (বুখারী ১৯৫৭, মুসলিম ১০৯৮নং)

<sup>2</sup> (আবু দাউদ, হাকেম, মুত্তাদিরাক, ইবনে হিব্বান, সহীহ, সহীহুল জামেইস সাগীর, আলবানী ৭৬৮৯নং)

<sup>3</sup> (মুসলিম ১০৯৯নং)

তাকে বাম হাতের উপর রাখা।”<sup>1</sup>

বলা বাহুল্য, স্থানীয়ভাবে সূর্যের বৃত্তির সমস্ত অংশটা অদৃশ্য হয়ে (অস্ত) গেলে রোযাদারের উচিত, সাথে সাথে সেই সময় ইফতার করা। আর এ সময় নিম্ন আকাশে অবশিষ্ট লাল আভা থাকলেও তা দেখার নয়। যেহেতু মহানবী ﷺ বলেন, “রাত যখন এদিক (পূর্ব গগণ) থেকে আগত হবে, দিন যখন এদিক (পশ্চিম গগণ) থেকে বিদায় নেবে এবং সূর্য যখন অস্ত যাবে, তখন রোযাদার ইফতার করবে।”<sup>2</sup>

অতএব দেখার বিষয় হল সূর্যাস্ত; আযান নয়। সুতরাং রোযাদার যদি স্বচক্ষে দেখে যে, সূর্য ডুবে গেছে কিন্তু মুআযযিন এখনো আযান দেয়নি, তাহলেও তার জন্য ইফতার করা বৈধ।<sup>3</sup>

পক্ষান্তরে পূর্বসতর্কতামূলকভাবে মুআযযিনদের দেরী করে আযান দেওয়া বিদআত।<sup>4</sup>

### ❖ সূর্য ডোবার পর আবার সূর্য দেখলে :

সূর্য ডোবার পর কোন মুসাফির বিমান বন্দরে ইফতার করার পর পেনে চড়ে আকাশে উঠে যদি সূর্য দেখে, তাহলে তার জন্য পানাহার থেকে বিরত থাকা এবং পুনরায় রোযায় থাকার নিয়ত করা জরুরী নয়। কারণ, সে তার রোযার পূর্ণ একটি দিন অতিবাহিত করে ফেলেছে। অতএব ইবাদত করার উদ্দেশ্যে তা শেষ হয়ে যাওয়ার পর পুনরায় শুরু করার কোন পথ নেই। আর তাকে ঐ দিন কাযাও করতে হবে না। কেননা, তার রোযা শুদ্ধ হয়ে গেছে।

পক্ষান্তরে সূর্য অস্ত যাওয়ার পূর্বে পেনে উড়ে পশ্চিম দিকে যাত্রা শুরু করলে এবং মুসাফির ঐ দিনের রোযা পূর্ণ করতে চাইলে সে নিজের দেশের সময় অনুযায়ী ইফতার করতে পারবে না। বরং শূন্যে থাকা অবস্থায় যতক্ষণ না সূর্য অস্তমিত হতে দেখবে, ততক্ষণ সে রোযায় থাকতে

<sup>1</sup> (ডাবারানী, মু'জাম, মাজমাউয যাওয়ালেদ ২/১০৫, সহীহুল জামেইস সাগীর, আলবানী ৩০৩৮নং)

<sup>2</sup> (বুখারী ১৯৪১, ১৯৫৪, মুসলিম ১১০০, ১১০১, আবু দাউদ ২৩৫১, ২৩৫২, তিরমিযী, দাঃ)

<sup>3</sup> (আশ্শারহুল মুমত' ৬/৪৩৯)

<sup>4</sup> (মু'জামুল বিদা' ২৬৮পৃঃ)

বাধ্য; যদিও তাতে দিন অনেক লম্বা হবে।

অনুরূপ ইফতার করার জন্য আকাশের যে লেভেলে এসে সূর্য দেখা যায় না সে লেভেলে পেন নামিয়ে আনা পাইলটের জন্য বৈধ নয়। কারণ, তা এক প্রকার ছল-বাহানা। অবশ্য যদি উড্ডয়নের কোন স্বার্থে বিমান নিচের লেভেলে নামাতে হয় এবং সেখানে এসে সূর্য অদৃশ্য হয়, তাহলে ইফতার করা যাবে।<sup>1</sup>

❖ সূর্য ডুবে গেছে মনে করে ইফতার করলে :

সূর্য ডুবে গেছে মনে করে রোযাদার ইফতার করে নেওয়ার পর যদি জানা যায় যে, সূর্য এখনও ডুবে নি, তাহলে সঠিক মতে তার রোযা শুদ্ধ; তাকে কাযা করতে হবে না। কারণ, সে না জেনেই ইফতার করে ফেলেছে। আর অবস্থা (সময়) না জেনে রোযা নষ্টকারী জিনিস ব্যবহার করলে তার এ (না জানার) ওযর গ্রহণযোগ্য। তা ছাড়া আসমা বিস্তে আবী বাকর (রাঃ) বলেন, 'নবী ﷺ-এর যুগে একদা আমরা মেঘলা দিনে ইফতার করলাম। তারপর সূর্য দেখা গেল।<sup>2</sup> সুতরাং তাঁরা সূর্য ডুবে গেছে মনে করেই দিনের বেলায় ইফতার করেছিলেন। অতএব অবস্থা বা সময় তাঁদের অজানা ছিল; শরয়ী নির্দেশ নয়। তাঁদের ধারণায় ছিল না যে, সে সময়টা দিনের বেলা। আর মহানবী ﷺ তাঁদেরকে সে দিনকে কাযা করতেও আদেশ দেননি। পক্ষান্তরে (উক্ত অবস্থায়) কাযা ওয়াজেব হলে তা শরীয়তরূপে পরিগণিত এবং তার বর্ণনা আজ পর্যন্ত সুরক্ষিত হত। অতএব তা যখন সুরক্ষিত নেই এবং সে ব্যাপারে কোন নির্দেশ মহানবী ﷺ কর্তৃক বর্ণিত নেই, তখন মৌলিক অবস্থা হল, দায়িত্বমুক্ত হওয়া এবং কাযা না করা।<sup>3</sup>

❖ কি দিয়ে ইফতারী হবে?

কিছু আধা-পাকা অথবা পূর্ণ পাকা (শুকনা) খেজুর দিয়ে এবং তা না পাওয়া গেলে পানি দিয়ে ইফতার করা সুন্নত।

<sup>1</sup> (মাজল্লাতুল বুহসিল ইসলামিয়াহ ১৪/১২৫, ১৬/১৩০, ৩০/১২৩, সাবউনা মাসআলাহ ফিস-সিয়াম ১৯নং)

<sup>2</sup> (বুখারী ১৯৫৯, আবু দাউদ ২৩৫৯, ইবনে মাজাহ ১৬৭৪নং)

<sup>3</sup> (আশ্শারহুল মুমতে' ৬/৪০২-৪০৩, ৪১০-৪১১)

আনাস (رضي الله عنه) বলেন, ‘আল্লাহর রসূল (ﷺ) নামাযের পূর্বে কিছু আধা-পাকা খেজুর দিয়ে ইফতার করতেন। তা না পেলে পূর্ণ পাকা (শুকনা) খেজুর দিয়ে এবং তাও না পেলে কয়েক চোক পানি খেয়ে নিতেন।’<sup>1</sup>

তিনি আরো বলেন, আল্লাহর রসূল (ﷺ) বলেছেন, “যে ব্যক্তি খেজুর পায়, সে যেন তা দিয়ে ইফতার করে। যে ব্যক্তি তা না পায়, সে যেন পানি দিয়ে ইফতার করে। কারণ, তা হল পবিত্র।”<sup>2</sup>

তিনি আরো বলেন, ‘নবী (ﷺ) ৩টি খেজুর দ্বারা অথবা এমন খাবার দ্বারা ইফতার করতে পছন্দ করতেন, যাকে আশুন স্পর্শ করে নি।’<sup>3</sup>

ইবনুল কাইয়েম (রঃ) বলেন, ‘নবী (ﷺ) খেজুর দ্বারা ইফতার করতে এবং তা না পাওয়া গেলে পানি দ্বারা ইফতার করতে উৎসাহিত করতেন। আর এ হল উম্মতের প্রতি তাঁর পরিপূর্ণ দয়া ও হিতাকাঙ্ক্ষার নিদর্শন। পেট খালি থাকা অবস্থায় প্রকৃতি (পাকস্থলী)কে মিষ্টি জিনিস দিলে তা অধিকরূপে গ্রহণ করে এবং তদ্বারা বিভিন্ন শক্তিও উপকৃত হয়; বিশেষ করে দৃষ্টিশক্তি এর দ্বারা বৃদ্ধি পায়। মদীনার মিষ্টি হল খেজুর। খেজুর মদীনাবাসীর মিষ্টান্ন। খেজুরের উপরই তাদের লালন-পালন। খেজুর তাদের প্রধান খাদ্য এবং তা-ই তাদের সহযোগী খাদ্য। আর অর্ধপক্ক খেজুর তাদের ফলস্বরূপ।

পক্ষান্তরে পানিও (এ সময়ে বড় গুরুত্বপূর্ণ জিনিস।) রোযার ফলে কলিজায় এক প্রকার শুষ্কতা আসে। সুতরাং তা প্রথমে পানি দিয়ে আর্দ্র করলে তারপর খাদ্য দ্বারা উপকার পরিপূর্ণ হয়। এ জন্য পিপাসার্ত ও ক্ষুধার্ত মানুষের জন্য উত্তম হল, প্রথমে একটু পানি পান করে তারপরে খেতে শুরু করা। এ ছাড়া খেজুর ও পানিতে এমন বৈশিষ্ট্য রয়েছে, হার্টের উপকারিতায় যার প্রভাবের কথা কেবল ডাক্তারগণই জানেন।<sup>4</sup>

<sup>1</sup> (আহমাদ, মুসনাদ ৩/১৬৪, আবু দাউদ ২৩৫৬, তিরমিযী ৬৯৬, ইবনে মাজাহ ২০৬৫, দারাকুত্বনী, সুনান ২৪০, হাকেম, মুত্তাদ্‌রাক ১/৪৩২, বাইহাকী ৪/২৩৯, ইরওয়াউল গালীল, আলবানী ৯২২নং)

<sup>2</sup> (তিরমিযী, নাসাই, হাকেম, মুত্তাদ্‌রাক, ইবনে খুযাইমাহ, সহীহ ২০৬৬, সহীহুল জামেইস সাগীর, আলবানী ৬৫৮৩নং)

<sup>3</sup> (আবু য্যা'লা, সহীহ তারগীব, আলবানী ১০৬৪নং)

<sup>4</sup> (যাদুল মা'আদ ২/৫০-৫১)



বলা বাহুল্য, কারো কাছে পানি ও মধু থাকলে, পানিকে প্রাধান্য দিয়ে পানি দ্বারা ইফতার করবে। কেননা রসূল ﷺ বলেন, “--- যে ব্যক্তি তা না পায়, সে যেন পানি দিয়ে ইফতার করে। কারণ, তা হল পবিত্র।” অবশ্য পানি পান করার পর মধু খাওয়া দোষাবহ নয়।<sup>1</sup>

এই ভিত্তিতেই খালি পেটে উপকারী বলে দাবী করে প্রথমে আদা-লবণ অথবা (খেজুর ছাড়া) অন্য কোন জিনিস মুখে নিয়ে ইফতার করা সুন্নতের প্রতিকূল। অবশ্য প্রথমে এক ঢোক পানি খেয়ে তারপর ঐ সব খেতে দোষ নেই।

ইফতার করার সময় খাওয়ার মত কোন জিনিস না পাওয়া গেলে মনে মনে ইফতারের নিয়ত করাই যথেষ্ট। এ ক্ষেত্রে আঙ্গুল চোষার প্রয়োজন নেই - যেমন কিছু সাধারণ লোক করে থাকে। যেমন রুমালকে ধুধু দিয়ে ভিজিয়ে তা চোষাও বিধেয় নয়।<sup>2</sup>

জ্ঞাতব্য যে, অনেক লোকেই এই মাসের ইফতারের সময় বড় লম্বা-চওড়া দস্তুরখান বিছিয়ে থাকে। যাতে সাজানো হয় (চর্ব্যা-চোষ্য-লেহ্য-পেয়) নানা রকম পানাহার সামগ্রী। কখনো কখনো সাধ্যের বাইরে নানান ধরনের গোশত, শাক-সজ্জি, ফল-মূল, শরবত-জুস ও স্কীর-সামাই-পিঠা-পুরি ইত্যাদির সম্ভার প্রস্তুত করা হয়। যার অনেকাংশ প্রয়োজনের অতিরিক্ত; বিধায় তা কেলে দিতে হয়। যা নিঃসন্দেহে হারাম। রমাযান আমাদের কাছে তা চায় না। তাছাড়া অপচয় শরীয়তে নিষিদ্ধ ও নিন্দিত। মহান আল্লাহ বলেন,

﴿وَكُلُوا وَاشْرَبُوا وَلَا تُسْرِفُوا، إِنَّهُ لَا يُحِبُّ الْمُسْرِفِينَ﴾

অর্থাৎ, তোমরা খাও এবং পান কর। আর অপচয় করো না। নিশ্চয় তিনি অপচয়কারীকে পছন্দ করেন না। (কুরআনুল কারীম ৭/৩১)

﴿وَلَا تُبَدِّرْ بَدْرًا، إِنَّ الْمُبَدِّرِينَ كَانُوا إِخْوَانَ الشَّيَاطِينِ﴾

<sup>1</sup> (আশ্শারহুল মুমত' ৬/৪৪২)

<sup>2</sup> (আশ্শারহুল মুমত')

অর্থাৎ, তোমরা কিছুতেই অপব্যয় করো না। কারণ, অপব্যয়কারীরা শয়তানের ভাই। (কুরআনুল কারীম ১৭/২৬-২৭)

বলা বাহুল্য, এ ব্যাপারে আমাদেরকে মধ্যবর্তী পন্থা অবলম্বন করা উচিত। উচিত নয়, নিষিদ্ধ কৃপণদের পথ অবলম্বন করা। যেমন উচিত নয়, অপচয় ও অপব্যয়ের হারাম পথ গ্রহণ করা।<sup>1</sup>

### ❖ ইফতারের সময় ঃ

যেমন পূর্বেই আলোচিত হয়েছে যে, সূর্যের পুরো বৃত্ত অদৃশ্য হওয়ার সাথে সাথে ইফতারের সময় হয়। আর সে সময় হল মাগরেবের নামাযের আগে। ইফতার করে নামায পড়ার পর প্রয়োজনীয় আহার ভক্ষণ করবে রোযাদার। অবশ্য যদি আহার প্রস্তুত থাকে, তাহলে প্রথমে আহার খেয়েই নামায পড়বে। যেহেতু আনাস (رض) বলেন, আল্লাহর রসূল (ﷺ) বলেছেন, “রাতে খাবার উপস্থিত হলে মাগরিবের নামায পড়ার আগে তোমরা তা খেয়ে নাও। আর সে খাবার খেতে তাড়াছড়া করো না।”<sup>2</sup>

কিছু সময় হওয়ার পূর্বে ইফতার করা হতে সাবধান! কারণ, মহানবী (ﷺ) একদল লোককে (স্বপ্নে) দেখলেন যে, তারা তাদের পায়ের গোড়ালির উপর মোটা শিরায় (বাঁধা অবস্থায়) লটকানো আছে, তাদের কশগুলো কেটে ও ছিঁড়ে আছে এবং কশ বেয়ে রক্তও ঝরছে। নবী (ﷺ) বলেন, আমি বললাম, ‘ওরা কারা?’ তাঁরা বললেন, ‘ওরা হল তারা; যারা সময় হওয়ার পূর্বে-পূর্বেই ইফতার করে নিত---।’<sup>3</sup>

## রোযা অবস্থায় দুআ

রোযাদারের উচিত, ইফতার করার আগে পর্যন্ত রোযা থাকা অবস্থায় বেশী বেশী করে দুআ করা। কারণ, রোযা থাকা অবস্থায় রোযাদারের দুআ আল্লাহর নিকট মঞ্জুর হয়। মহানবী (ﷺ) বলেন, “তিন ব্যক্তির দুআ

<sup>1</sup> (তাওজীহাতুন অফাওয়াএদ লিসসা-য়েমীনা অসসায়েমাত ৩৩-৩৪ পৃঃ)

<sup>2</sup> (বুখারী ৬৭২, মুসলিম ৫৫৭৭২)

<sup>3</sup> (ইবনে কুযাইমাহ, সহীহ, ইবনে হিক্কান, সহীহ, বাইহাকী ৪/২১৬, হাকেম, মুত্তাদারাক ১/৪৩০, সহীহ তারগীব, আলবানী ৯৯১৭)

অগ্রাহ্য করা হয় না (বরং কবুল করা হয়); পিতার দুআ, রোযাদারের দুআ এবং মুসাফিরের দুআ।<sup>1</sup>

পক্ষান্তরে ইফতার করার সময় দুআ কবুল হওয়ার কথা বিশুদ্ধ বর্ণনা দ্বারা প্রমাণিত নয়। এ ব্যাপারে যা কিছু বর্ণনা করা হয়, তা যয়ীফ। অনুরূপ ইফতারের সময় একাকী বা জামাআতী হাত তুলে দুআও বিধেয় নয়। কারণ, সুন্নাহ (মহানবী ﷺ বা তাঁর সাহাবাগণের তরীকায়) এ আমলের বর্ণনা মিলে না। অতএব রোযাদার সতর্ক হন।

এ স্থলে পানাহার করার সময় যে সব দুআ সাধারণভাবে পঠনীয় তা নিম্নরূপ :-

১। পানাহারের পূর্বে বিসমিল্লাহ বলা। কারণ, মহানবী ﷺ তা বলতে আদেশ করেছেন।<sup>2</sup> আর তিনি এ কথাও জানিয়েছেন যে, তা না বললে শয়তান ভোজনকারীর সাথে ভোজনে অংশ গ্রহণ করে থাকে।<sup>3</sup> একদা একটি বালিকা এবং একজন বেদুঈন ‘বিসমিল্লাহ’ না বলেই খেতে শুরু করতে চাইলে মহানবী ﷺ তাদের হাত ধরে ফেললেন এবং বললেন যে, শয়তান তাদেরকে এভাবে খেতে উদ্বুদ্ধ করেছে এবং তাদের হাতের সাথে শয়তানের হাত তাঁর হাতে ধরা আছে। আসলে শয়তান তাদের সাথে খেতে চাচ্ছিল।<sup>4</sup>

২। খাওয়ার শুরুতে ‘বিসমিল্লাহ’ বলতে ভুলে গেলে এবং খেতে খেতে মনে পড়লে বলতে হয়,

بِسْمِ اللَّهِ أَوْلَهُ وَآخِرُهُ

উচ্চারণঃ- বিসমিল্লা-হি আউওয়ালাহ্ অ আ-খিরাহ।

অর্থ- শুরুতে ও শেষে আল্লাহর নাম নিয়ে খাচ্ছি।<sup>5</sup>

<sup>1</sup> (বাইহাকী ৩/৩৪৫, প্রমুখ, সিলসিলাহ সহীহাহ, আলবানী ১৭৯৭নং)



<sup>2</sup> (বুখারী ৫৩৭৬, মুসলিম ২০২২নং)

<sup>3</sup> (মুসলিম ২০১৭, আবু দাউদ ৩৭৬৬নং)

<sup>4</sup> (মুসলিম ২০১৭, আবু দাউদ ৩৭৬৬নং)

<sup>5</sup> (আবু দাউদ ৩৭৬৭, তিরমিযী ১৮৫৮, ইবনে মাজাহ ৩২৬৪, ইরওয়াউল গাশীল, আলবানী ১৯৬৫নং)


৩। খাওয়া শেষ হলে ‘আল-হামদু লিল্লাহ’ বলতে হয়। যেহেতু কিছু খাওয়া অথবা পান করার পরে বান্দা আল্লাহর প্রশংসা করুক এটা তিনি পছন্দ করেন।<sup>1</sup>

আর ইফতার করার সময় যে দুআ প্রমাণিত, তা ইফতার করার পর পঠনীয়। ইবনে উমার  কর্তৃক বর্ণিত, নবী  ইফতার করলে এই দুআ বলতেন,

ذَهَبَ الظَّمَاُ وَابْتَلَّتِ الْعُرُوْقُ وَنَبَّتْ الْأَجْرُ إِنِ شَاءَ اللهُ

**উচ্চারণঃ-** যাহাবায় যামা-উ অবতাল্লাতিল উরুকু অযাবাতাল আজরু ইনশা-আল্লাহ।

**অর্থ-** পিপাসা দূরীভূত হল, শিরা-উপশিরা সতেজ হল এবং ইনশা-আল্লাহ সওয়াব সাব্যস্ত হল।<sup>2</sup>

ইফতারের সময় এই দুআয় সবচেয়ে সহীহরূপে নবী  কর্তৃক বর্ণিত হয়েছে। এ ছাড়া ইফতারের অন্যান্য (লাকা সুমতু, ইত্যাদি) দুআ বিসৃদ্ধরূপে প্রমাণিত নয়।

## রোযার অন্যান্য আদব

‘ভোগে কেবল দুর্ভোগ সার, বাড়ে দুখের বোঝা,

ত্যাগ শিখ্ তুই সংযম শিখ্, সেই তো আসল রোযা।

এই রোযার শেষে ঈদ আসিবে, রইবে না বিষাদ।।’ -কাজী নজরুল

❖ রোযাবিরোধী কর্ম থেকে বিরত থাকা এবং রোযা নির্মল করা ঃ

যে সকল শ্রেষ্ঠ ইবাদত দ্বারা মহান আল্লাহর নৈকট্য লাভ করা যায়, তন্মধ্যে রোযা হল অন্যতম। আল্লাহ তা বান্দার জন্য বিধিবদ্ধ করেছেন, যাতে করে বান্দা তন্দ্বারা নিজের আত্মা ও মনকে সংশুদ্ধ করতে পারে এবং

<sup>1</sup> (মুসলিম ২৭৩৪, আহমাদ, মুসনাদ ৩/১০০, ১১৭, তিরমিযী ১৮১৬নং)

<sup>2</sup> (আবু দাউদ ২৩৫৭, সহীহ আবু দাউদ ২০৬৬নং)

প্রত্যেক কল্যাণের উপর তাকে অভ্যস্ত করতে পারে। সুতরাং রোযা রাখা অবস্থায় রোযাদারকে এমন সব কর্ম থেকে দূরে থাকা বাঞ্ছনীয়, যা তার রোযাকে দূষিত করে ফেলে। যাতে সে তার রোযা দ্বারা পুরোপুরি উপকৃত হতে পারে। তদ্বারা সেই 'তাকওয়া' ও 'পরহেযগারী' লাভ হয়, যার কথা তিনি কুরআনে বলেছেন,

﴿يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَلَّكُمْ تَتَّقُونَ﴾

“হে ঈমানদারগণ! তোমাদের উপর রোযা ফরয করা হল, যেমন তোমাদের পূর্ববর্তী উম্মতের উপর ফরয করা হয়েছিল। যাতে তোমরা পরহেযগার হতে পার।” (কুরআনুল কারীম ২/১৮৩)

কেবলমাত্র পানাহার থেকে বিরত থাকার নাম রোযা নয়। বরং রোযা পানাহার থেকে এবং অনুরূপ সকল সেই বস্তু থেকে বিরত থাকার নাম, যা আল্লাহ নিষেধ করেছেন। যদিও নিষিদ্ধ কর্ম সকল মাসেই নিষিদ্ধ, তবুও বিশেষ করে রমায়ান মাসে রোযা অবস্থায় তা বেশী করে নিষিদ্ধ।

রোযা রোযাদারকে যদি পানাহার থেকে বিরত রাখে; যা তার জীবন ধারণের জন্য জরুরী এবং তাকে সকল যৌনাচার থেকে বিরত রাখে; যা তার দৈহিক ক্ষুধার প্রকৃতিগত বাসনা, তাহলে তার জন্য ওয়াজেব ও জরুরী এই যে, সে কোন প্রকারের পাপাচরণে লিপ্ত হবে না; তাতে সে পাপ যেমনই হোক। সে কোন প্রকারের অসার ক্রিয়া-কলাপে লিপ্ত হবে না; তাতে তার ধরন যেমনই হোক। সে তার রোযা অবস্থায় থাকার সময়টুকুতে ইবাদতের অনুকূল আচরণে চরিত্রবাণ থাকবে। কারণ, ইবাদতে সে আল্লাহর সামনে হাযির থাকে। অতএব প্রত্যেক কথা বলার পূর্বে সে চিন্তা করবে, প্রত্যেক কর্ম করার পূর্বে সে ভেবে দেখবে যে, তার সে কথা ও কর্ম তার ইবাদত রোযার অনুকূল কি না? সে কথা বা কর্ম তাঁকে সন্তুষ্ট করবে কি, যাঁর সামনে ইবাদতের উদ্দেশ্যে সে উপস্থিত?¹

আর যদি রোযাদার তা না করতে পারে, তাহলে সে এমন

¹ (দ্রঃ ফিকহুস সুন্নাহ ১/৪০৫, সাওমু রামায়ান ২১-২২ পৃঃ)

রোযাদারদের দলে शामिल হয়ে যাবে, যাদের ব্যাপারে আল্লাহর রসূল ﷺ বলেছেন, “কিছু রোযাদার আছে, যাদের রোযায় ক্ষুধা ছাড়া অন্য কিছু লাভ হয় না এবং কিছু তাহাজ্জুদগুয়ার আছে, যাদের তাহাজ্জুদে রাত্রি জাগরণ ছাড়া অন্য কিছু লাভ হয় না।”<sup>1</sup>

বলা বাহুল্য, যে রোযাদারের রোযা তার জন্য ঢালস্বরূপ হবে, যে রোযার মাধ্যমে সে ‘রাইয়ান’ নামক দরজা দিয়ে বেহেশতে প্রবেশ করবে, তা হল সেই রোযা, যে রোযা রেখে থাকে রোযাদারের হৃদয় এবং তার সকল অঙ্গ-প্রত্যঙ্গ।

### ❖ জিভের রোযা :

রোযাদারের উচিত, যেন তার জিভও রোযা রাখে। অর্থাৎ, সে যেন প্রত্যেক নোংরা কথা থেকে; পরচর্চা বা গীবত থেকে, চুগলখোরী বা লাগান-ভাজান থেকে, অশ্লীল ও মিথ্যা কথা থেকে বিরত থাকে। দূরে থাকে মূর্খামি ও বেওকুফি করা থেকে। যেহেতু মহানবী ﷺ বলেন, “যে ব্যক্তি রোযা রেখে নোংরা কথা ও তার উপর আমল ত্যাগ করতে পারল না, সে ব্যক্তির পানাহার ত্যাগ করার মাঝে আল্লাহর কোন প্রয়োজন নেই।”<sup>2</sup> অর্থাৎ, তার রোযা কবুল করার ব্যাপারে তাঁর কোন ইচ্ছা নেই। আর তার মানে তার রোযা আল্লাহ কবুল করেন না।<sup>3</sup>

রোযাদারের উচিত, অশ্লীলতা, হৈ-হট্টগোল ও গালাগালি করা থেকে দূরে থাকা এবং ভদ্রতা, আদব ও গান্ধিৰ্য অবলম্বন করা। মহানবী ﷺ বলেন, “তোমাদের কারো রোযার দিন হলে সে যেন অশ্লীল না বকে ও ঝগড়া-হৈচৈ না করে; পরন্তু যদি তাকে কেউ গালাগালি করে অথবা তার সাথে লড়তে চায়, তাহলে সে যেন বলে, ‘আমি রোযা রেখেছি, আমার রোযা আছে।’”<sup>4</sup>

<sup>1</sup> (ইবনে মাজাহ, আহমাদ, মুসনাদ, হাকেম, মুত্তাদারাক, বাইহাকী, তাবারানী, মু'জাম, সহীহুল জামেইস সাগীর, আলবানী ৩৪৮৮, ৩৪৯০নং)

<sup>2</sup> (বুখারী ৬০৫৭, ইবনে মাজাহ ১৬৮৯, আহমাদ, মুসনাদ ২/৪৫২, ৫০৫, সুনানে আরবআহ; আবু দাউদ, তিরমিযী, নাসাঈ ও ইবনে মাজাহ)

<sup>3</sup> (দ্রঃ ফাতহুল বারী ৪/১৪০)

<sup>4</sup> (বুখারী ১৯০৪, মুসলিম ১১৫১নং)

তিনি আরো বলেন, “পানাহার থেকে বিরত থাকার নাম রোযা নয়। আসলে রোযা হল, অসার ও অশ্লীল কথা ও কর্ম থেকে বিরত থাকার নাম। অতএব যদি তোমাকে কেউ গালাগালি করে অথবা তোমার সাথে কেউ মুখামি করে, তাহলে তুমি তাকে বল, ‘আমি রোযা রেখেছি, আমার রোযা আছে।’<sup>1</sup>”

সুতরাং রোযাদারকে কেউ গালি দিলে তার বিনিময়ে গালিদাতাকে ‘আমি রোযা রেখেছি’ বলা সুন্নত। আর এই জবাবে রয়েছে দুটি উপকার; একটিতে রয়েছে নিজের জন্য সতর্কতা এবং অপরটিতে রয়েছে তার বিরোধী পক্ষের জন্য সতর্কতা।

প্রথম উপকার এই যে, রোযাদার এই জন্যই গালিদাতার গালির বদলা নিয়ে মুকাবালা করতে চায় না, কারণ সে রোযা রেখেছে। এ জন্য নয় যে, সে মুকাবালা করতে অক্ষম। যেহেতু সে যদি অক্ষমতা প্রকাশ করে মুকাবালা ত্যাগ করে, তাহলে বিরোধী পক্ষের কাছে সে তুচ্ছ হয়ে যায় এবং তাতে রোযাদার লাঞ্চিত হয়। পক্ষান্তরে ঐ জবাবে বিরোধী পক্ষ লজ্জিত হয় এবং গালাগালি বা লড়াই করা অব্যাহত রাখতে আর সাহস পায় না।

আর দ্বিতীয় উপকার এই যে, উক্ত জবাবের মাধ্যমে রোযাদার বিরোধী পক্ষকে এই সতর্কতা দান করে যে, রোযা অবস্থায় কাউকে গালাগালি করতে হয় না। সে ক্ষেত্রে গালিদাতাও রোযাদার হতে পারে; বিশেষ করে এই গালাগালি যদি রমায়ান মাসে হয়। আর তা হলে উভয়েই নিষিদ্ধ বিষয়ে লিপ্ত হয়ে যাবে। সুতরাং রোযাদারের ঐ উত্তর তাকে গালি দেওয়া থেকে নিষেধ করার পর্যায়ভুক্ত হবে। পরন্তু গালি দেওয়া হল একটি মন্দ কাজ; যাতে বাধা দেওয়া জরুরী<sup>2</sup>

কোন কোন বর্ণনাতে আছে যে, “রোযা রেখে তুমি কাউকে গালাগালি করো না। কিন্তু যদি তোমাকে কেউ গালাগালি করে, তাহলে তুমি তাকে বল, ‘আমি রোযা রেখেছি। আর সে সময় যদি তুমি দাঁড়িয়ে থাক, তাহলে

<sup>1</sup> (ইবনে খুযাইমাহ, সহীহ, ইবনে হিব্বান, সহীহ, হাকেম, মুত্তাদিরাক, সহীহ তারগীব, আলবানী ১০৬৮, সহীহুল জামেইস সাগীর, আলবানী ৫৩৭৬নং)

<sup>2</sup> (দ্রঃ আশশারহুল মুমতে' ৬/৪৩৭, সামানিয়া ওয়া আরবাউন সুআলান ফিস-সিয়াম ১২৭৪)

বসে যাও।”<sup>1</sup> কারণ, ক্রোধান্বিত অবস্থায় বসে গেলে ক্রোধ প্রশমিত হয়। মহানবী ﷺ বলেন, “তোমাদের কেউ যখন দাঁড়িয়ে থাকা অবস্থায় ক্রোধান্বিত হয়, তখন সে যেন বসে যায়। তাতে তার ক্রোধ প্রশমিত হলে ভাল, না হলে সে যেন শুয়ে যায়।”<sup>2</sup>

রোযাদারের জন্য ওয়াজেব, তার জিভও যেন রোযা রাখে; অর্থাৎ, তাতে যেন সে (গীবত ও চুগলখোরী করে) লোকেদের গোশ্বত না খায়, তাদের ইচ্ছত বিক্ষত না করে এবং তাদের আপোসে বিবাদ সৃষ্টি না করে।

তার জিভ যেন মুসলিমদেরকে কষ্ট দেওয়া থেকে, তাদের সন্ত্রম নষ্ট করা থেকে এবং তাদের মাঝে অনীলতা ছড়ানো থেকে রোযা রাখে।

তার জিভ যেন বাজে কথা থেকে, গুজব রটানো থেকে, নিরপরাধকে অপবাদ ও কলঙ্ক আরোপ করা থেকে এবং দীনদার মানুষদের সুনাম নষ্ট করে বদনাম করা থেকে রোযা রাখে।

তার জিভ যেন ধুংসকারী অন্ধ পক্ষপাতিত্ব করা থেকে এবং রাগ ও ক্রোধের সময় নোংরা ও অনীল বলা থেকে রোযা রাখে।

তার জিভ যেন গালাগালি করা থেকে, অপরকে হিট মারা থেকে এবং সমাজ-বিরোধী অপরাধীদেরকে গোপন রাখা এবং তাদের তরফদারী করা থেকে রোযা রাখে।

তার জিভ যেন কানে-কানে অথবা ফোনে-ফোনে অবৈধ মহিলার সাথে প্রেমালোপ করা থেকে রোযা রাখে।

আল্লাহর রসূল ﷺ বলেন, “মানুষকে তাদের নিজ জিহ্বা-জাত পাপ হাড়া অন্য কিছু কি তাদের মুখ অথবা নাক ছেঁচড়ে দোজখে নিক্ষেপ করবে?”<sup>3</sup>


<sup>1</sup> (ইবনে খুযাইমাহ, সহীহ ১৯৯৪, ইবনে হিব্বান, সহীহ, মাওয়াররিদ ৮৯৭, সহীহ তারগীব, আলবানী ১০৬৮নং)

<sup>2</sup> (আহমাদ, মুসনাদ ৫/১৫২, আবু দাউদ, ইবনে হিব্বান, সহীহ, সহীহুল জামেইস সাগীর, আলবানী ৬৯৪নং)


<sup>3</sup> (তিরমিধী ২৬১৫, ইবনে মাজাহ ৩৯৭৩, আহমাদ, মুসনাদ ৫/২৩১, ইরওয়াউল গাশীল, আলবানী ৪১৩নং)



### ❖ হৃদয়ের রোযা ৪

দেহের অঙ্গ-প্রত্যঙ্গের রাজা হল হৃদয়। বলা বাহুল্য, এই হৃদয় যখনই শরয়ী রোযা রাখবে, তখনই সারা অঙ্গে তা কার্যকর হবে। প্রিয়তম মুস্তাফা  বলেন, “জেনে রাখ, দেহের মধ্যে এমন এক মাংস-পিণ্ড আছে যা ভালো হলে সারা দেহ ভালো হবে এবং তা খারাপ হলে সারা দেহ খারাপ হবে। শোন! তা হল হৃৎপিণ্ড (অন্তর)।”<sup>1</sup>

সুতরাং মুমিনের হৃদয় রমাযান মাসে এবং অন্য মাসেও রোযা রাখে। আর তার রোযা হবে তাকে বিধুংসী শির্ক, বাতিল বিশ্বাস, নোংরা চিন্তা-ভাবনা, হীন পরিকল্পনা এবং খারাপ কল্পনার মত নিকৃষ্ট উপাদান থেকে খালি করে।

মুমিনের হৃদয় রোযা রাখে অহংকার থেকে। কারণ, বিনয়ই মুমিনকে শ্রদ্ধার পাত্র করে এবং তার সচ্চরিত্রই তাকে পূর্ণ মানবতার রূপদান করে। পক্ষান্তরে অহংকার হল, ন্যায়, হক ও সত্য প্রত্যাখ্যান করা এবং মানুষকে ঘৃণা ও অবজ্ঞা করার নাম। আর মহানবী  বলেন, “প্রত্যেক দাষ্টিক অহংকারী জাহান্নামবাসী হবে।”<sup>2</sup>

মুমিনের হৃদয় রোযা রাখে গর্ব করা থেকে। কারণ, “যে ব্যক্তি মনে মনে গর্বিত হয় এবং চলনে অহংকার প্রদর্শন করে, সে ব্যক্তি যখন আল্লাহর সঙ্গে সাক্ষাৎ করবে তখন তিনি তার প্রতি ক্রোধান্বিত থাকবেন।”<sup>3</sup>

মুমিনের হৃদয় রোযা রাখে অপরের প্রতি হিংসা করা থেকে। কারণ, “কোন বান্দার হৃদয়ে ঈমান ও হিংসা একত্রে জমা হতে পারে না।”<sup>4</sup>

মুমিনের হৃদয় রোযা রাখে কারো প্রতি বিদেষ পোষণ করা থেকে। কারণ, “বিদেষ হল মুণ্ডনকারী। তা দ্বীন মুণ্ডন (ধুংস) করে ফেলে।”<sup>5</sup>

<sup>1</sup> (বুখারী ৫২, মুসলিম ১৫৯৯নং)

<sup>2</sup> (বুখারী ৪৯১৮, মুসলিম ২৮৫৩নং)

<sup>3</sup> (আহমাদ, মুসনাদ, বুখারী আল-আদাবুল মুফরাদ, হাকেম, মুত্তাদ্রাক ১/৬০, সহীহুল জামেইস-সাগীর, আলবানী ৬১৫৭নং)

<sup>4</sup> (আহমাদ, মুসনাদ ২/৩৪০, নাসাঈ, ইবনে হিব্বান, সহীহ, বাইহাকী ওআবুল ঈমান, হাকেম, মুত্তাদ্রাক, সহীহুল জামেইস সাগীর, আলবানী ৭৬২০নং)

<sup>5</sup> (তিরমিযী, বাযযার, বাইহাকী, সহীহ তিরমিযী, আলবানী ২০৩৮নং)

মুমিনের হৃদয় রোযা রাখে কৃপণতা থেকে। কারণ, “কোন বান্দার হৃদয়ে ঈমান ও কৃপণতা কখনই একত্রে জমা হতে পারে না।”<sup>1</sup>

মুমিনের হৃদয় রোযা রাখে পাপ চিন্তা করা থেকে এবং প্রত্যেক সেই পরিকল্পনা থেকে, যা ঈমানের প্রতিকূল।<sup>2</sup>

### ❖ চোখের রোযা :

মহান আল্লাহর হারামকৃত জিনিস দেখা হতে বিরত থেকে রোযাদারের চোখ রোযা রাখে। হারাম কিছু চোখে পড়লে সে তার চক্ষুকে অবনত করে নেয়, অশ্লীল কিছু দেখা হতে দৃষ্টিকে ঝুকিয়ে রাখে। যেমন, সে নোংরা ফিল্ম এবং শ্লীলতাহীন টিভি সিরিজ ইত্যাদি দেখা হতে বিরত থাকে। যেহেতু মহান আল্লাহ মুমিন পুরুষদেরকে সম্বোধন করে বলেন,

﴿قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ، ذَلِكَ

أَزْكَى لَهُمْ﴾

অর্থাৎ, মুমিন পুরুষদেরকে বল, তারা যেন তাদের দৃষ্টি সংযত করে এবং নিজ নিজ যৌনাসঙ্গের হিফায়ত করে; এটিই তাদের জন্য উত্তম। (কুরআনুল কারীম ২৪/৩০)

আর মুমিন নারীদেরকে সম্বোধন করে তিনি বলেন,

﴿وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ وَيَحْفَظْنَ فُرُوجَهُنَّ﴾

অর্থাৎ, আর মুমিন নারীদেরকে বল, তারা যেন তাদের দৃষ্টি সংযত করে এবং নিজ নিজ যৌনাসঙ্গের হিফায়ত করে। (কুরআনুল কারীম ২৪/৩১)

### ❖ কানের রোযা :

রোযাদারের কানও রোযা রাখে; রোযা রাখে নোংরা ও অশ্লীল কথা

<sup>1</sup> (আহমাদ, মুসনাদ ২/৩৪২, নাসাঈ, হাকেম, মুত্তাদরাক ২/৭২, সহীহুল জামেইস সাগীর, আলবানী ৭৬১৬নং)

<sup>2</sup> (দ্রঃ ফাইয়ুর রাহীমির রাহমান, ফী আহকামি অমাওয়াইযি রামাযান ১৭৬পৃঃ, তাওজীহাত লিস-সায়েমীন অস-সায়েমাত ২০-২১পৃঃ, আহকামুস সাওম ১৯পৃঃ)

শোনা থেকে ।

রোযা রাখে অবৈধ প্রেম ও ব্যভিচারের দিকে আহ্বানকারী গান-বাজনা শোনা থেকে ।

রোযা রাখে আল্লাহর হারামকৃত এবং যে কথা তাঁকে ক্রোধান্বিত ও অসন্তুষ্ট করে সে কথা শোনা থেকে ।

মুমিনের কান রোযা রাখে শয়তানের সুর শোনা থেকে এবং ইফতার করে রহমানের বাণী শ্রবণ করে ।

আর তিনি তার কান সম্পর্কে সেদিন কৈফিয়ত নেবেন, যেদিন মানব-দানবকে একত্রিত করবেন । মহান আল্লাহ বলেন,

﴿إِنَّ السَّمْعَ وَالْبَصَرَ وَالْفُؤَادَ كُلُّ أُولَئِكَ كَانَ عَنْهُ مَسْئُولًا﴾

অর্থাৎ, কর্ণ, চক্ষু, হৃদয় -ওদের প্রত্যেকের বিষয়ে কৈফিয়ত তলব করা হবে ।” (সূরা বানী ইসরাঈল ৩৬ আয়াত)

### ❖ পেটের রোযা :

রোযাদারের পেটও রোযা রাখে; রোযা রাখে হারাম খাদ্য দ্বারা তা পরিপূর্ণ করা থেকে । সুতরাং সে হারাম খাবার সেহরীতে খায় না এবং ইফতারীতেও না । সে (ব্যাংকের বা অন্য কোন প্রকার) সুদ খায় না । খায় না ঘুস, এতীমের মাল এবং হারাম উপায়ে উপার্জিত কোন অর্থ ।

কেননা, যে ব্যক্তি নিজ উদরে হারাম মাল প্রবেশ করায়; অর্থাৎ, তার খাদ্য ও পানীয় হারাম হয়, তার দুআ কবুল হয় না । আর মহান আল্লাহ আমাদেরকে আদেশ করে বলেন,

﴿يَا أَيُّهَا الَّذِينَ آمَنُوا كُلُوا مِن طَيِّبَاتِ مَا رَزَقْنَاكُمْ وَاشْكُرُوا لِلَّهِ

﴿إِنَّ كُتْمَ إِيَّاهُ تَعْبُدُونَ﴾

অর্থাৎ, হে মুমিনগণ! আমি তোমাদেরকে যে সব রুজী দান করেছি তা থেকে হালাল বস্তু আহার কর এবং আল্লাহর কৃতজ্ঞতা কর; যদি তোমরা

কেবল তাঁরই দাসত্ব করে থাক তাহলে । (সূরা বাক্বারাহ ১৭২ আয়াত)

### ❖ উভয় হাত ও পায়েের রোযা :

রোযাদারের উচিত, তার হাতও যেন হারাম নেওয়া, ধরা ও স্পর্শ করা থেকে রোযা রাখে । সূতরাং যে মহিলাকে স্পর্শ করা তার জন্য হালাল নয়, তাকে যেন স্পর্শ না করে ।<sup>1</sup>

তার হাত যেন রোযা রাখে মানুষের উপর অত্যাচার করা থেকে, কাউকে ধোকা দেওয়া থেকে, কাউকে অন্যায়াভাবে মারা থেকে, সূদ, ঘুস, চুরি, ভেজাল বা অন্য হারাম কারবারের মাধ্যমে অর্থ গ্রহণ করা থেকে ।

যেমন তার পাও যেন রোযা রাখে । আর তার রোযা হবে যে পথে গেলে আল্লাহ অসন্তুষ্ট হন সে পথে তথা সকল প্রকার পাপাচরণের পথে চলা হতে বিরত থেকে ।<sup>2</sup>

আর প্রিয় নবী ﷺ বলেন, “যে ব্যক্তি রোযা রেখে হারাম কথা ও তার উপর আমল ত্যাগ করতে পারল না, সে ব্যক্তির পানাহার ত্যাগ করার মাঝে আল্লাহর কোন প্রয়োজন নেই ।”<sup>3</sup> হারাম কথার উপর আমল করার মানে হল, প্রত্যেক হারাম কাজ করা ।

মোট কথা হল, রোযাদারের উচিত, যাবতীয় পাপাচার, সমস্ত রকম হারাম কথা ও কাজ থেকে দূরে থাকা । তবেই তার রোযা তার জন্য উপকারী হবে; নচেৎ না ।

<sup>1</sup> (ফাতাওয়া ইসলামিয়াহ ২/১২০)

<sup>2</sup> (অন্ধ-প্রত্যক্ষের রোযা প্রসঙ্গে দ্রঃ ফাইয়ুর রাহীমির রাহমান, কী আহকামি অমাওয়াইবি রামাযান ১৮৪-১৮৬পৃ, তাওজীহাত লিস-সারেমীন অস-সারেমাত ২১-২৯পৃঃ)

<sup>3</sup> (বুখারী ৬০৫৭, ইবনে মাজাহ ১৬৮৯, আহমাদ, মুসনাদ ২/৪৫২, ৫০৫)

## সপ্তম অধ্যায়

# রোযা অবস্থায় যা বৈধ

কিছু কাজ আছে, যা রোযা অবস্থায় করা বৈধ নয় বলে অনেকের মনে হতে পারে, অথচ তা রোযাদারের জন্য করা বৈধ। সেই ধরনের কিছু কাজের কথা নিম্নে আলোচনা করা হচ্ছে :-

### ১। পানিতে নামা, ডুব দেয়া ও সাঁতার কাটাঃ

রোযাদারের জন্য পানিতে নামা, ডুব দেওয়া ও সাঁতার কাটা, একাধিক বার গোসল করা, এসির হাওয়াতে বসা এবং কাপড় ভিজিয়ে গায়ে-মাথায় জড়ানো বৈধ। যেমন পিপাসা ও গরমের তাড়নায় মাথায় পানি ঢালা, বরফ বা আইসক্রিম চাপানো দোষাবহ নয়।<sup>1</sup>

মা আয়েশা (রাঃ) বলেন, রোযা রেখে নবী ﷺ-এর অপবিত্র অবস্থায় ফজর হত। অতঃপর তিনি গোসল করতেন।<sup>2</sup>

আবু বাক্‌র বিন আব্দুর রহমান নবী ﷺ-এর কিছু সাহাবী থেকে বর্ণনা করেন যে, তিনি (সাহাবী) বলেন, আমি আব্দাহর রসূল ﷺ-কে দেখেছি, তিনি রোযা রেখে পিপাসা অথবা গরমের কারণে নিজ মাথায় পানি ঢেলেছেন।<sup>3</sup>

রোযা রাখা অবস্থায় ইবনে উমার একটি কাপড় ভিজিয়ে নিজের দেহের উপর রেখেছেন।<sup>4</sup>

অবশ্য সাঁতার কেটে খেলা করা মকরুহ। কারণ, তাতে রোযা নষ্ট হয়ে যাওয়ার সম্ভাবনা আছে তাই। কিন্তু যার কাজই হল ডুবরীর অথবা প্রয়োজনের তাকীদে পানিতে বারবার ডুব দিতে হয়, সে ব্যক্তি পেটে পানি পৌঁছনো থেকে সাবধান থাকতে পারলে তার রোযার কোন ক্ষতি হবে না।<sup>5</sup>

<sup>1</sup> (ফুহুলুন ফিস-সিয়ামি অত-তারাবীহি অয়-যাকাহ ১৬পৃঃ, তায়কীর ইবাদির রাহমান, ফীমা অরাদা বিসিয়ামি শাহরি রামাযান ৪৬পৃঃ, ফাতাওয়া ইসলামিয়াহ ২/১৩০, ফাসিঃ ৪৭পৃঃ, সাবউনা মাসআলাহ ফিস-সিয়াম ৫৮নং)

<sup>2</sup> (বুখারী ১৯২৫, মুসলিম ১১০৯নং)

<sup>3</sup> (আহমাদ ৩/৪৭৫, আবু দাউদ ২৩৬৫নং, মালেক, মুঅজা)

<sup>4</sup> (ইবনে আবী শাইবাহ ৪ ৯২১২নং)

<sup>5</sup> (৭০ মাসআলাহ ফিস-সিয়াম ৪ ৫৮নং)

## ২। মিসওয়াক বা দাঁতন করা।

দাঁতন করা রোযাদার-অরোযাদার সকলের জন্য এবং দিনের শুরু ও শেষ ভাগে সব সময়কার জন্য সুন্নত। এ ব্যাপারে মহানবী ﷺ-এর নির্দেশ ব্যাপক; তিনি বলেন, “দাঁতন করায় রয়েছে মুখের পবিত্রতা এবং প্রতিপালক আল্লাহর সন্তুষ্টি।”<sup>1</sup>

প্রিয় নবী ﷺ বলেন, “আমি উম্মতের জন্য কষ্টকর না জানলে তাদেরকে প্রত্যেক নামাযের সময় দাঁতন করতে আদেশ দিতাম।”<sup>2</sup> অন্য এক বর্ণনায় আছে, “---তাদেরকে প্রত্যেক ওয়ূর সময় দাঁতন করতে আদেশ দিতাম।”<sup>3</sup>

ইমাম ত্বাবারানী উত্তম সনদ দ্বারা বর্ণনা করেছেন যে, আব্দুর রহমান বিন গুন্ম বলেন, আমি মুআয বিন জাবাল: (رضي الله عنه) কে জিজ্ঞাসা করলাম, ‘আমি কি রোযা অবস্থায় দাঁতন করব?’ উত্তরে তিনি বললেন, ‘হ্যাঁ।’ আমি বললাম, ‘দিনের কোন্ ভাগে?’ তিনি বললেন, ‘সকাল অথবা বিকালে।’ আমি বললাম, ‘লোকে তো রোযার বিকালে দাঁতন করাকে অপছন্দনীয় মনে করে। তারা বলে, আল্লাহর রসূল ﷺ বলেছেন, “নিশ্চয়ই রোযাদারের মুখের দুর্গন্ধ আল্লাহর নিকট কষ্টরীর সুবাস অপেক্ষা অধিকতর সুগন্ধময়।” মুআয (رضي الله عنه) বললেন, ‘সুবহানাল্লাহ! তিনি তাদেরকে দাঁতন করতে আদেশ দিয়েছেন। আর যে জিনিস তিনি পরিষ্কার করতে আদেশ দিয়েছেন, সে জিনিসকে ইচ্ছাকৃতভাবে দুর্গন্ধময় করা উত্তম হতে পারে না। তাতে কোন প্রকারের মঙ্গল নেই; বরং তাতে অমঙ্গলই আছে।’<sup>4</sup>

কিন্তু যদি কোন দাঁতনে বিশেষ স্বাদ থাকে এবং তা তার ধুখুকে প্রভাবান্বিত করে, তাহলে তার স্বাদ বা ধুখু গিলে নেওয়া উচিত নয়।<sup>5</sup>

<sup>1</sup> (আহমাদ, মুসনাদ ৬/৪৭, দারেমী, নাসাঈ ৫নং, ইবনে খুযাইমাহ, সহীহ, বাইহাকী ১/৩৪, ইবনে হিব্বান, সহীহ, বুখারী (বিনা সনদে), মিশকাতুল মাসাবীহ ৩৮১, ইরওয়াউল গালীল, আলবানী ৬৬নং)

<sup>2</sup> (বুখারী ৮৮৭, মুসলিম ২৫২, সুনানে আরবাতাহ; আবু দাউদ, তিরমিযী, নাসাঈ ও ইবনে মাজাহ)

<sup>3</sup> (আহমাদ, মুসনাদ ২/৪৬০, ৫১৭, প্রমুখ)

<sup>4</sup> (দ্রঃ ইরওয়াউল গালীল, আলবানী ১/১০৬)

<sup>5</sup> (ইবনে উযাইমীন, ফাসিঃ মুসনিদ ৩৯পৃঃ)

পরন্তু সেই দাঁতন করা থেকে দূরে থাকা উচিত, যার দ্রবণশীল উপাদান (ও রস) আছে। যেমন কাঁচা (গাছের ডালের বা শিকড়ের) দাঁতন। তদনুরূপ সেই দাঁতন, যাতে তার নিজস্ব স্বাদ ছাড়া ভিন্ন স্বাদ; যেমন লেবু বা পুদীনা (পেপারমেন্ট, মেনথল) ইত্যাদির স্বাদ অতিরিক্ত করা হয়েছে এবং যা মুখের ভিতরে গিয়ে দ্রবীভূত হয়ে মুখগহ্বরে ছড়িয়ে পড়ে। আর ইচ্ছা করে তা গিলে ফেলা বৈধ নয়। তবে যদি অনিচ্ছাকৃত কারো গিলা যায়, তাহলে তাতে কোন ক্ষতি হয় না।<sup>1</sup>

পক্ষান্তরে রোযার দিনে দাঁতের মাজন (টুথ পেষ্ট বা পাওডার) ব্যবহার না করাই উত্তম। বরং তা রাত্রে এবং ফজরের আগে ব্যবহার করা উচিত। কারণ, মাজনের এমন প্রতিক্রিয়া ও সঞ্চর ক্ষমতা আছে, যার ফলে তা গলা ও পাকস্থলীতে নেমে যাওয়ার আশঙ্কা থাকে। অনুরূপ আশঙ্কার ফলেই মহানবী ﷺ লাকীত্ব বিন সাবরাহকে বলেছিলেন, “(ওযু করার সময়) তুমি নাকে খুব অতিরঞ্জিতভাবে পানি টেনে নিও। কিন্তু তোমার রোযা থাকলে নয়।”<sup>2</sup>

বলা বাহুল্য, রোযাদারের জন্য মাজন ব্যবহার না করাই উত্তম। আর এ ব্যাপারে সংকীর্ণতা নেই। কারণ, সে ইফতার করে নেওয়া পর্যন্ত সময় অপেক্ষা করে যদি তা ব্যবহার করে, তাহলে সে এমন এক জিনিস থেকে দূরে থাকতে পারবে, যার দ্বারা তার রোযা নষ্ট হয়ে যাওয়ার আশঙ্কা রয়েছে।<sup>3</sup>

পক্ষান্তরে নেশাদার ও দেহে অবসন্ন আনয়নকারী মাজন; যেমন, গুল-গুরাকু প্রভৃতি; যা ব্যবহারের ফলে মাথা ঘোরে অথবা ব্যবহারকারী জ্ঞানশূন্য হয়ে যায়, তা ব্যবহার করা বৈধ নয়; না রোযা অবস্থায় এবং না অন্য সময়। কারণ, তা মহানবী ﷺ-এর এই বাণীর আওতাভুক্ত হতে পারে, যাতে তিনি বলেন, “প্রত্যেক মাদকতা আনয়নকারী দ্রব্য হারাম।”<sup>4</sup>

<sup>1</sup> (সাবউনা মাসআলাহ ফিস-সিয়াম ৫৪নং)

<sup>2</sup> (আহমাদ, মুসনাদ ৪/৩৩, আবু দাউদ ১৪২, তিরমিযী, নাসাই, সহীহ ইবনে মাজাহ, আলবানী ৩২৮নং)

<sup>3</sup> (আশুশারহুল মুমতে' ৬/৪০৭, ৪৩২, সামানিয়া ওয়া আরবাউন সুআলান ফিস-সিয়াম, ইবনে উযাইমীন ৬৩পৃঃ)

<sup>4</sup> (বুখারী, মুসলিম, সুনানে আরবাআহ; আবু দাউদ, তিরমিযী, নাসাই ও ইবনে মাজাহ, সজাহ ৪৫৫০নং)

জ্ঞাতব্য যে, দাঁতের মাড়িতে ক্ষত থাকার ফলে অথবা দাঁতন করতে গিয়ে রক্ত বের হলে তা গিলে ফেলা বৈধ নয়; বরং তা বের করে ফেলা জরুরী। অবশ্য যদি তা নিজের ইচ্ছা ও এখতিয়ার ছাড়াই গলায় নেমে যায়, তাহলে তাতে কোন ক্ষতি হবে না।<sup>1</sup>

৩। সুরমা লাগানো এবং চোখে ও কানে ওষুধ ব্যবহার :

রোযা অবস্থায় সুরমা লাগানো এবং চোখে ও কানে ওষুধ ব্যবহার বৈধ। কিন্তু ব্যবহার করার পর যদি গলায় সুরমা বা ওষুধের স্বাদ অনুভূত হয়, তাহলে (কিছু উলামার নিকট রোযা ভেঙ্গে যাবে এবং সে রোযা) কাযা রেখে নেওয়াই হল পূর্বসতর্কতামূলক কর্ম।<sup>2</sup> কারণ, চোখ ও কান খাদ্য ও পানীয় পেটে যাওয়ার পথ নয় এবং সুরমা বা ওষুধ লাগানোকে খাওয়া বা পান করাও বলা যায় না; না সাধারণ প্রচলিত কথায় এবং না-ই শরয়ী পরিভাষায়। অবশ্য রোযাদার যদি চোখে বা কানে ওষুধ দিনে ব্যবহার না করে রাতে করে, তাহলে সেটাই হবে পূর্বসাবধানতামূলক কর্ম।<sup>3</sup>

হযরত আনাস (رض) রোযা থাকা অবস্থায় সুরমা ব্যবহার করতেন।<sup>4</sup>

পক্ষান্তরে রোযা থাকা অবস্থায় নাকে ওষুধ ব্যবহার বৈধ নয়। কারণ, নাকের মাধ্যমে পানাহার পেটে পৌঁছে থাকে। আর এ জন্যই মহানবী (ﷺ) বলেছেন, “(ওষু করার সময়) তুমি নাকে খুব অতিরঞ্জিতভাবে পানি টেনে নিও। কিন্তু তোমার রোযা থাকলে নয়।”<sup>5</sup>

বলা বাহুল্য উক্ত হাদীস এবং অনুরূপ অর্থের অন্যান্য হাদীসের ভিত্তিতেই নাকে ওষুধ ব্যবহার করার পর যদি গলাতে তার স্বাদ অনুভূত হয়, তাহলে রোযা নষ্ট হয়ে যাবে এবং সে রোযা কাযা করতে হবে।<sup>6</sup>

<sup>1</sup> (ইবনে উযাইমীন, ফাসিহ ৩৯ পৃঃ, ৭০৪ ৫৩নং)

<sup>2</sup> (ইবনে বায, ফাতাওয়া মুহিম্বাহ, তাতাআল্লাকু বিসসিয়াম, ইবনে বায ২৮ পৃঃ)

<sup>3</sup> (আশ্শারহুল মুমতে' ৬/৩৮-২, সউদী স্বারী উলামা কমিটি, ফাসিহ মুসনিদ ৪৪ পৃঃ, ফাতাওয়া ইসলামিয়াহ ২/১২৯)

<sup>4</sup> (সহীহ আবু দাউদ ২০৮২নং)

<sup>5</sup> (আহমাদ, মুসনাদ ৪/৩৩, আবু দাউদ ১৪২, তিরমিযী, নাসাই, সহীহ ইবনে মাজাহ, আলবানী ৩২৮নং)

<sup>6</sup> (ইবনে বায, ফাতাওয়া মুহিম্বাহ, তাতাআল্লাকু বিসসিয়াম ২৮ পৃঃ)



### ৪। পায়খানা-দ্বারে ওষুধ ব্যবহার :

রোযাদারের জ্বর হলে তার জন্য পায়খানা-দ্বারে ওষুধ (সাপোজিটরি) রাখা যায়। তদনুরূপ জ্বর মাপা বা অন্য কোন পরীক্ষার জন্য মল-দ্বারে কোন যন্ত্র ব্যবহার করা দোষাবহ বা রোযার পক্ষে ক্ষতিকর নয়। কারণ, এ কাজকে খাওয়া বা পান করা কিছুই বলা হয় না। (এবং পায়খানা-দ্বার পানাহারের পথও নয়।)<sup>1</sup>

### ৫। পেটে (এণ্ডোসকপি মেশিন) নল সঞ্চালনঃ

পেটের ভিতর কোন পরীক্ষার জন্য (এণ্ডোসকপি মেশিন) নল বা স্টমাক টিউব সঞ্চালন করার ফলে রোযার কোন ক্ষতি হয় না। তবে হ্যাঁ, যদি পাইপের সাথে কোন (তৈলাক্ত) পদার্থ থাকে এবং তা তার সাথে পেটে গিয়ে পৌঁছে, তাহলে তাতে রোযা নষ্ট হয়ে যাবে। অতএব একান্ত প্রয়োজন ছাড়া এ কাজ ফরয বা ওয়াজেব রোযায় কল্প্য বৈধ নয়।<sup>2</sup>

### ৬। বাহ্যিক শরীরে তেল, মলম, পাওডার বা ক্রিম ব্যবহার :

বাহ্যিক শরীরের চামড়ায় পাওডার বা মলম ব্যবহার করা রোযাদারের জন্য বৈধ। কারণ, তা পেটে পৌঁছে না।

তদনুরূপ প্রয়োজনে ত্বককে নরম রাখার জন্য কোন তেল, ভ্যাসলিন বা ক্রিম ব্যবহার করাও রোযা অবস্থায় অবৈধ নয়। কারণ, এ সব কিছু কেবল চামড়ার বাহিরের অংশ নরম করে থাকে এবং শরীরের ভিতরে প্রবেশ করে না। পরন্তু যদিও লোমকূপে তা প্রবেশ হওয়ার কথা ধরেই নেওয়া যায়, তবুও তাতে রোযা নষ্ট হবে না।<sup>3</sup>

তদনুরূপ রোযা অবস্থায় মহিলাদের জন্য হাতে মেহেন্দী, পায়ে আলতা অথবা চুলে (কালো ছাড়া অন্য রঙের) কলফ ব্যবহার বৈধ। এ সবে রোযা বা রোযাদারের উপর কোন (মন্দ) প্রভাব ফেলে না।<sup>4</sup>

<sup>1</sup> (আশ্শারহুল মুমতে' ৬/৩৮-১)

<sup>2</sup> (আশ্শারহুল মুমতে' ৬/৩৮৩-৩৮৪)

<sup>3</sup> (ইবনে জিবরীন, ফাতাওয়া ইসলামিয়াহ ২/১২৭, ফাসিঃ মুসনিদ ৪১পৃঃ)

<sup>4</sup> (ফাসিঃ মুসনিদ ৪৫পৃঃ, ফাতাওয়া ইসলামিয়াহ ২/১২৭)

## ৭। স্বামী-স্ত্রীর আপোষের চুম্বন ও প্রেমকেলিঃ

যে রোযাদার স্বামী-স্ত্রী মিলনে ঐর্ষ্য রাখতে পারে; অর্থাৎ সঙ্গম বা বীর্যপাত ঘটে যাওয়ার আশঙ্কা না করে, তাদের জন্য আপোসে চুম্বন ও প্রেমকেলি বা কোলাকুলি করা বৈধ এবং তা তাদের জন্য মকরুহ নয়। কারণ, মহানবী ﷺ রোযা রাখা অবস্থায় স্ত্রী-চুম্বন করতেন এবং রোযা অবস্থায় প্রেমকেলিও করতেন। আর তিনি ছিলেন যৌন ব্যাপারে বড় সংযমী।<sup>1</sup> অন্য এক বর্ণনায় আছে যে, আল্লাহর রসূল ﷺ স্ত্রী-চুম্বন করতেন রমাযানে রোযা রাখা অবস্থায়;<sup>2</sup> রোযার মাযে।<sup>3</sup>

আর এক বর্ণনায় আছে, হযরত আয়েশা (রাঃ) বলেন, ‘আল্লাহর রসূল ﷺ আমাকে চুম্বন দিতেন। আর সে সময় আমরা উভয়ে রোযা অবস্থায় থাকতাম।’<sup>4</sup>

হযরত উম্মে সালামাহ (রাঃ) বলেন, তিনি তাঁর সাথেও অনুরূপ করতেন।<sup>5</sup> আর তদ্রূপ বলেন হযরত হাফসা (রাঃ)ও।<sup>6</sup>

হযরত উম্মার (রাঃ) বলেন, একদা স্ত্রীকে খুশী করতে গিয়ে রোযা অবস্থায় আমি তাকে চুম্বন দিয়ে ফেললাম। অতঃপর নবী ﷺ-এর নিকট উপস্থিত হয়ে বললাম, ‘আজ আমি একটি বিরাট ভুল করে ফেলেছি; রোযা অবস্থায় স্ত্রী-চুম্বন করে ফেলেছি।’ আল্লাহর রসূল ﷺ বললেন, “যদি রোযা রেখে পানি দ্বারা কুণ্ঠি করতে, তাহলে তাতে তোমার অভিমত কি?” আমি বললাম, ‘তাতে কোন ক্ষতি নেই।’ মহানবী ﷺ বললেন, “তাহলে ভুল কিসের?”<sup>7</sup>

পক্ষান্তরে রোযাদার যদি আশঙ্কা করে যে, প্রেমকেলি বা চুম্বনের ফলে

<sup>1</sup> (বুখারী ১৯২৭, মুসলিম ১১০৬, আবু দাউদ ২৩৮২, তিরমিযী ৭২৯, ইবনে আবী শাইবাহ, মুসান্নাফ ৯৩৯২নং)

<sup>2</sup> (মুসলিম ১১০৬নং)

<sup>3</sup> (আবু দাউদ ২৩৮৩, ইবনে আবী শাইবাহ, মুসান্নাফ ৯৩৯০নং)

<sup>4</sup> (আবু দাউদ ২৩৮৪, ইবনে আবী শাইবাহ, মুসান্নাফ ৯৩৯৭নং)

<sup>5</sup> (মুসলিম ১১০৮নং)

<sup>6</sup> (মুসলিম ১১০৭নং)

<sup>7</sup> (আহমাদ, মুসনাদ ১/২১, ৫২, সহীহ আবু দাউদ ২৩৮৯, দারেমী, সুনান ১৬৭৫, ইবনে আবী শাইবাহ, মুসান্নাফ ৯৪০৬নং)

তার বীর্যপাত ঘটে যেতে পারে অথবা (স্বামী-স্ত্রী) উভয়ের উত্তেজনার ফলে সহসায় মিলন ঘটে যেতে পারে, কারণ সে সময় সে হয়তো তাদের উদগ্র কাম-লালসাকে সংযত করতে পারবে না, তাহলে সে কাজ তাদের জন্য হারাম। আর তা হারাম এই জন্য যে, যাতে পাপের ছিদ্রপথ বন্ধ থাকে এবং তাদের রোযা নষ্ট হওয়া থেকে রক্ষা পায়।

এ ক্ষেত্রে বৃদ্ধ ও যুবকের মাঝে কোন পার্থক্য নেই; যদি উভয়ের কামশক্তি এক পর্যায়ে হয়। সুতরাং দেখার বিষয় হল, কাম উত্তেজনা সৃষ্টি এবং বীর্যস্খলনের আশঙ্কা। অতএব সে কাজ যদি যুবক বা কামশক্তিসম্পন্ন বৃদ্ধের উত্তেজনা সৃষ্টি করে, তাহলে তা উভয়ের জন্য মকরুহ। আর যদি তা না করে তাহলে তা বৃদ্ধ, যৌন-দুর্বল এবং সংযমী যুবকের জন্য মকরুহ নয়। পক্ষান্তরে উভয়ের মাঝে পার্থক্য করার ব্যাপারে যে হাদীস বর্ণিত হয়েছে<sup>1</sup> তা আসলে কামশক্তি বেশী থাকা ও না থাকার কারণে। যেহেতু সাধারণতঃ বৃদ্ধ যৌন ব্যাপারে শান্ত হয়ে থাকে। পক্ষান্তরে যুবক তার বিপরীত।

ফলকথা, সকল শ্রেণীর দম্পতির জন্য উত্তম হল রোযা রেখে প্রেমকেলি, কোলাকুলি ও চুম্বন বিনিময় প্রভৃতি যৌনাচারের ভূমিকা পরিহার করা। কারণ, যে গরু সবুজ ফসল-জমির আশেপাশে চরে, আশঙ্কা থাকে যে, সে কিছু পরে ফসল খেতে শুরু করে দেবে। সুতরাং স্বামী যদি ইফতার করা অবধি ধৈর্য ধারণ করে, তাহলে সেটাই হল সর্বোত্তম। আর রাত্রি তো অতি নিকটে এবং তাতো যথেষ্ট লম্বা। অল্-হামদু লিল্লাহ। মহান আল্লাহ বলেন, “রোযার রাতে তোমাদের জন্য স্ত্রী-সম্বোগ হালাল করা হয়েছে।” (কুরআনুল কারীম ২/১৮৭)

চুম্বনের ক্ষেত্রে চুম্বন গালে হোক অথবা ঠোঁটে উভয় অবস্থাই সমান। তদনুরূপ সঙ্গমের সকল প্রকার ভূমিকা ও শৃঙ্গারাতার; সকাম স্পর্শ, ঘর্ষণ, দংশন, মর্দন, প্রচাপন, আলিঙ্গন প্রভৃতির মানও চুম্বনের মতই। এ সবার মাঝে কোন পার্থক্য নেই। আর এ সব করতে গিয়ে যদি কারো মথী (বা উত্তেজনার সময় আঁঠালো তরল পানি) নিঃসৃত হয়, তাহলে তাতে রোযার কোন ক্ষতি হয় না।<sup>2</sup>

<sup>1</sup> (সহীহ আবু দাউদ ২০৯০নং)

<sup>2</sup> (আশ্শারহুল মুমতঃ ৬/৩৯০, ৪৩২-৪৩৩, ফাসিঃ ৪৮-৭৫, তাসিঃ ৪৩-৪৪-৭৫)

জ্ঞাতব্য যে, জিঙ্গ চোষার ফলে একে অন্যের জিহ্বারাস গিলে ফেললে রোযা ভেঙ্গে যাবে। যেমন স্তনবৃত্ত চোষণের ফলে মুখে দুধ এসে গলায় নেমে গেলেও রোযা ভেঙ্গে যাবে।

স্ত্রীর দেহাঙ্গের যে কোন অংশ দেখা রোযাদার স্বামীর জন্যও বৈধ। অবশ্য একবার দেখার ফলেই চরম উত্তেজিত হয়ে কারো মযী বা বীর্যপাত ঘটলে কোন ক্ষতি হবে না।<sup>1</sup> কারণ, অবৈধ নজরবাজীর ব্যাপারে মহানবী ﷺ বলেন, “প্রথম দৃষ্টি তোমার জন্য বৈধ। কিন্তু দ্বিতীয় দৃষ্টি বৈধ নয়।”<sup>2</sup> তাছাড়া দ্রুতপতনগ্রস্ত এমন দুর্বল স্বামীর এমন ওযর গ্রহণযোগ্য।

পক্ষান্তরে কেউ বারবার দেখার ফলে মযী নির্গত করলে রোযার কোন ক্ষতি হয় না। কিন্তু বারবার দেখার ফলে বীর্যপাত করে ফেললে রোযা নষ্ট হয়ে যাবে।

অবশ্য স্ত্রী-দেহ নিয়ে কল্পনা করার ফলে কারো মযী বা বীর্যপাত হলে রোযা নষ্ট হয় না। যেহেতু মহানবী ﷺ-এর ব্যাপক নির্দেশ এ কথা প্রতি ইঙ্গিত করে। তিনি বলেন, “নিশ্চয় আল্লাহ আমার উম্মতের মনের কল্পনা উপেক্ষা করেন, যতক্ষণ কেউ তা কাজে পরিণত অথবা কথায় প্রকাশ না করে।”<sup>3</sup>

## ৮। দেহের দূষিত রক্ত বহিষ্করণ ৪

রোযা অবস্থায় কোন যন্ত্র দ্বারা অথবা যন্ত্র ছাড়াই, পা থেকে অথবা মাখার কোন শিরা থেকে, মুখে করে চুষে অথবা যে কোন প্রকারে দেহ থেকে দূষিত রক্ত বের করলে রোযা নষ্ট হবে কি না, সে নিয়ে উলামাদের মাঝে মতভেদ রয়েছে। যেহেতু মহানবী ﷺ কর্তৃক উভয় শ্রেণীর বর্ণনা মজুদ রয়েছে। তিনি বলেন, “দেহ থেকে দূষিত রক্ত যে বের করে তার এবং যার বের করা হয় তারও রোযা নষ্ট হয়ে যায়।”<sup>4</sup> এ কথাও বর্ণিত আছে যে, তিনি রোযা অবস্থায় নিজ দেহ থেকে দূষিত রক্ত বের

<sup>1</sup> (বুখারী ১৯২৭নং দ্রঃ)

<sup>2</sup> (আবু দাউদ ২১৪৯, তিরমিযী ২৭৭৮, সহীহ আবু দাউদ ১৮৮১নং)

<sup>3</sup> (বুখারী ২৫২৮, মুসলিম ১২৭, দ্রঃ আশশারহুল মুমতে' ৬/৩৯০-৩৯১)

<sup>4</sup> (আহমাদ, মুসনাদ, আবু দাউদ ২৩৬৭, ইবনে মাজাহ ১৬৮০, দারেয়ী, সুনান ১৬৮১-১৬৮২, ইবনে বুযাইমাহ, সহীহ ১৯৬২-১৯৬৩নং, ইবনে হিব্বান, সহীহ, হাকেম, মুত্তাদরাক ১/৪২৭, বাইহাকী ৪/২৬৫, প্রমুখ)

করেছেন।<sup>1</sup> আর তিনি বলেছেন, “যে (অনিচ্ছাকৃত) বমি করে, যার স্বপ্নদোষ হয় এবং যে দেহ থেকে দূষিত রক্ত বের করে, তার রোযা নষ্ট হয় না।”<sup>2</sup>

পরস্পর বিরোধী উক্ত সকল বর্ণনা দেখে কিছু উলামা মনে করেন যে, দেহ থেকে দূষিত রক্ত বের করলে রোযা নষ্ট হয়ে যাওয়ার হাদীস আজও নাসেখ (কার্যকর) এবং এর বিরোধী সকল হাদীস মনসূখ (রহিত)। পক্ষান্তরে অন্যান্য কিছু সত্য-সন্ধানী গবেষক উলামা মনে করেন যে, বরং প্রথম হাদীসটাই মনসূখ।

দেহ থেকে দূষিত রক্ত বের করলে রোযা নষ্ট হয়ে যাওয়ার হাদীস যে মনসূখ (রহিত) সে ব্যাপারে সাক্ষ্য বহন করে হযরত আনাস (رضي الله عنه)-এর হাদীস। তিনি বলেন, ‘শুরু শুরু রোযাদারের জন্য দেহ থেকে দূষিত রক্ত বের করা মকরুহ ছিল। একদা জা’ফর বিন আবী তালেব রোযা অবস্থায় দেহ থেকে দূষিত রক্ত বের করলেন। তা দেখে তিনি বললেন, “এদের উভয়ের রোযা নষ্ট।” অতঃপর পরবর্তীকালে তিনি রোযাদারের জন্য দেহ থেকে দূষিত রক্ত বের করার অনুমতি দিলেন।’ আর স্বয়ং হযরত আনাস রোযা অবস্থায় দেহ থেকে দূষিত রক্ত বের করতেন।<sup>3</sup>

একদা তাঁকে প্রশ্ন করা হল, ‘আপনারা আল্লাহর রসূল (ﷺ)-এর যুগে কি রোযা অবস্থায় দেহ থেকে দূষিত রক্ত বের করাকে মকরুহ মনে করতেন?’ উত্তরে তিনি বললেন, ‘না। অবশ্য দুর্বল হয়ে পড়ার আশঙ্কা করলে মকরুহ মনে করা হত।’<sup>4</sup>

তদনুরূপ আবু সাঈদ খুদরী (رضي الله عنه) বলেন, ‘আল্লাহর রসূল (ﷺ) রোযাদারকে স্ত্রী-চুম্বন ও দেহ থেকে দূষিত রক্ত বের করার ব্যাপারে অনুমতি দিয়েছেন।’<sup>5</sup>

<sup>1</sup> (বুখারী ১৯৩৮-১৯৩৯, আবু দাউদ ২৩৭২, তিরমিযী, ইবনে আবী শাইবাহ, মুসান্নাফ, বাইহাকী ৪/২৬৩)

<sup>2</sup> (আবু দাউদ, সহীহুল জামেইস সাগীর, আলবানী ৭৭৪২নং)

<sup>3</sup> (দারাকুত্বনী, সুনান ২৩৯নং, বাইহাকী ৪/২৬৮)

<sup>4</sup> (বুখারী : ১৯৪০নং)

<sup>5</sup> (ভুবরানী, দারাকুত্বনী, ইরওয়াউল গালীল ৪/৭৪)

ইবনে আক্বাস (ؓ) বলেন, '(পেটের ভিতরে) কিছু প্রবেশ করলে রোযা ভাঙ্গে, কিছু বাহির হলে নয়।'<sup>1</sup>

উপরোক্ত কিছু বর্ণনায় 'অনুমতি' দেওয়ার অর্থই হল যে, প্রথমে সে কাজ অবৈধ ছিল এবং পরে তা বৈধ ঘোষণা করা হয়েছে। অতএব সঠিক মত এই যে, দেহ থেকে দূষিত রক্ত বের করলে কারো রোযা নষ্ট হবে না; যে বের করাবে তার এবং যে বের করে দেবে তারও নয়।<sup>2</sup>

বলা বাহুল্য, যদিও সঠিক মত এই যে, রোযা অবস্থায় দেহ থেকে দূষিত রক্ত বের করলে রোযা নষ্ট হবে না, তবুও উত্তম ও পূর্বসতর্কতামূলক আমল এই যে, রোযাদার তা বর্জন করবে। এর ফলে সে মতভেদের বেড়াজাল থেকে নিষ্কৃতি পাবে, খুন বের করার পর সে দৈহিক দুর্বলতার শিকার হবে না এবং যে ব্যক্তি মুখে টেনে খুন বের করে সে ব্যক্তির গলায় কিছু রক্ত চলে গিয়ে তারও রোযা নষ্ট না হয়ে যায়। অবশ্য একান্ত তা করার দরকার হলে দিনে না করে রাত্রে করবে। আর সেটাই হবে উভয়ের জন্য উত্তম।<sup>3</sup>

৯। নাক অথবা কোন কাটা-ফাটা থেকে রক্ত বের হওয়া :

দেহের কোন কাটা-ফাটা অঙ্গ থেকে রক্ত পড়লে রোযা নষ্ট হয় না। বরং তা দেহ থেকে দূষিত রক্ত বের করার মতই। অনুরূপ নাক থেকে রক্ত পড়লেও রোযা নষ্ট নয়। কারণ, তাতে মানুষের কোন এখতিয়ার থাকে না। আর ইচ্ছা করে বের করলে তাও দেহ থেকে দূষিত রক্ত বের করার মত।<sup>4</sup> তদনুরূপ মাথায় বা দেহের অন্য কোন জায়গায় পাথর বা অন্য কিছুর আঘাত লেগে রক্ত ঝরলে রোযা নষ্ট হয় না।<sup>5</sup>

<sup>1</sup> (ইবনু আবী শাইবাহ ৯৩১৯নং, ইরওয়াউল গালীল ৪/৭৫)

<sup>2</sup> (দ্রঃ মুহাল্লা ৬/২০৪-২০৫, ইরওয়াউল গালীল ৪/৭৪)

<sup>3</sup> (দ্রঃ আহকামুস সাওমি আল-ইতিফাফ, আবু সারী মঃ আব্দুল হাদী ১৩৬পৃঃ, সাবউনা মাসআলাহ ফিস-সিয়াম, মুহাম্মাদ বিন সালেহ আল-মুনাজ্জিদ ৫৬নং)

<sup>4</sup> (দ্রঃ আহকামুস সাওমি ১৩৬-১৩৮পৃঃ)

<sup>5</sup> (মাজাল্লাতুল বুহুসিল ইসলামিয়াহ ৩০/১২৬)

### ১০। রক্তদান করা :

পরীক্ষার জন্য কিছু রক্ত দেওয়া রোযাদারের জন্য বৈধ। এতে তার রোযার কোন ক্ষতি হয় না।<sup>1</sup>

তদনুরূপ কোন রোগীর প্রাণ বাঁচানোর উদ্দেশ্যে রক্তদান করাও বৈধ এবং তা দেহ থেকে দূষিত রক্ত বের করার মতই। এতেও রোযার কোন ক্ষতি হয় না।<sup>2</sup>

### ১১। দাঁত তোলা :

রোযাদারের জন্য দাঁত (স্টেটান ইত্যাদি থেকে) পরিষ্কার করা, ডাক্তারী ভরণ (ইনলেই) ব্যবহার করা এবং যন্ত্রণায় দাঁত তুলে ফেলা বৈধ। তবে এ সব ক্ষেত্রে তাকে একান্ত সাবধানতা অবলম্বন করা উচিত, যাতে কোন প্রকার ওষুধ বা রক্ত গিলা না যায়।<sup>3</sup>

১২। কিডনী (বৃক্ক বা মূত্রগ্রন্থি). অচল অবস্থায় দেহের রক্ত শোধন :

রোযাদারের কিডনী অচল হলে রোযা অবস্থায় প্রয়োজনে দেহের রক্ত পরিষ্কার ও শোধন (Dialysis) করা বৈধ। পরিশুদ্ধ করার পর পুনরায় দেহে ফিরিয়ে দিতে যদিও রক্ত দেহ থেকে বের হয়, তবুও তাতে রোযার কোন ক্ষতি হবে না।<sup>4</sup>

১৩। আহারের কাজ দেয় না এমন (ওষুধ) ইঞ্জেকশন ব্যবহার করা :

রোযাদারের জন্য চিকিৎসার ক্ষেত্রে সেই ইঞ্জেকশন ব্যবহার করা বৈধ, যা পানাহারের কাজ করে না। যেমন, পেনিসিলিন বা ইনসুলিন ইঞ্জেকশন অথবা অ্যান্টিবায়োটিক বা টনিক কিংবা ভিটামিন ইঞ্জেকশন অথবা ভ্যাক্সিন ইঞ্জেকশন প্রভৃতি হাতে, কোমরে বা অন্য জায়গায়, দেহের পেশী অথবা শিরায় ব্যবহার করলে রোযার ক্ষতি হয় না। তবুও নিতান্ত জরুরী না হলে

<sup>1</sup> (রিসালাতানি মু'জাযাতানি ফিয় যাকাতি অসসিয়াম ২৪ পৃঃ, ফাসিঃ মুসনিদ ৫৩ পৃঃ, ফাতাওয়া মুহিম্বাহ, তাভাতায়াত্বা কু বিসসিয়াম ৩৪ পৃঃ)

<sup>2</sup> (দ্রঃ আহকামুস সাওবি অল-ই'তিকাক, আবু সারী মঃ আবুল হাদী ১৩৮ পৃঃ)

<sup>3</sup> (ইবনে বায, ফাতাওয়া মুহিম্বাহ, তাভাতায়াত্বা কু বিসসিয়াম ২৯ পৃঃ)

<sup>4</sup> (ইবনে উযাইমীন, সাবউনা মাসআলাহ ফিস-সিয়াম ৪২নং)

তা দিনে ব্যবহার না করে রাত্রে ব্যবহার করাই উত্তম ও পূর্বসাবধানতামূলক কর্ম। যেহেতু মহানবী ﷺ বলেন, “যে বিষয়ে সন্দেহ আছে সে বিষয় বর্জন করে তাই কর যাতে সন্দেহ নেই।”<sup>1</sup> “সুতরাং যে সন্দিহান বিষয়াবলী থেকে দূরে থাকবে, সে তার দীন ও ইজ্জতকে বাঁচিয়ে নেবে।”<sup>2</sup>

### ১৪। ক্ষতস্থানে ওষুধ ব্যবহার :

রোযাদারের জন্য নিজ দেহের ক্ষতস্থানে ওষুধ দিয়ে ব্যাণ্ডেজ ইত্যাদি করা দৃশ্যীয় নয়। তাতে সে ক্ষত গভীর হোক অথবা অগভীর। কারণ, এ কাজকে না কিছু খাওয়া বলা যাবে, আর না পান করা। তা ছাড়া ক্ষতস্থান স্বাভাবিক পানাহারের পথ নয়।<sup>3</sup>

### ১৫। মাথা ইত্যাদি নেড়া করা :

রোযাদারের জন্য নিজ মাথার চুল বা নাভির নিচের লোম ইত্যাদি চাঁছা বৈধ। তাতে যদি কোন স্থান কেটে রক্ত পড়লেও রোযার কোন ক্ষতি হয় না। পক্ষান্তরে দাড়ি চাঁছা সব সময়কার জন্য হারাম; রোযা অবস্থায় অথবা অন্য কোন অবস্থায়।<sup>4</sup>

### ১৬। কুল্লি করা ও নাকে পানি নেওয়া :

রোযাদারের চোঁট শুকিয়ে গেলে পানি দ্বারা ভিজিয়ে নেওয়া এবং মুখ বা জিভ শুকিয়ে গেলে কুল্লি করা বৈধ। অবশ্য গড়গড়া করা বৈধ নয়। আর এ ক্ষেত্রে মুখ থেকে পানি বের করে দেওয়ার পর ভিতরে পানির যে আর্দ্রতা বা স্বাদ থেকে যাবে, তাতে রোযার কোন ক্ষতি হবে না। কেননা, তা থেকে বাঁচা সম্ভব নয়।<sup>5</sup>

<sup>1</sup> (আহমাদ, মুসনাদ, তিরমিযী ২৫১৮, নাসাঈ, ইবনে হিব্বান, সহীহ, ত্বাবারানী, মু'জাম প্রমুখ, ইরওয়াউল গালীল, আলবানী ২০৭৪, সহীহুল জামেইস সাগীর, আলবানী ৩৩৭৭, ৩৩৭৮নং)

<sup>2</sup> (আহমাদ, মুসনাদ ৪/২৬৯, ২৭০, বুখারী ৫২, মুসলিম ১৫৯৯নং, আবু দাউদ, তিরমিযী, ইবনে মাজাহ, দারেমী) (দ্রঃ রিসালাতানি মু'জাযাতানি ফিয় যাকাতি অস্‌সিয়াম ২৪পৃ, সাবউনা মাসআলাহ ফিস্-সিয়াম ৪২নং)

<sup>3</sup> (আহকামুস সাওমি অল-ই'তিকাফ, আবু সারী মঃ আক্বুল হাদী ১৪০পৃঃ)

<sup>4</sup> (মাজায়াতুল বুহূসিল ইসলামিয়াহ ১৯/১৬৫)

<sup>5</sup> (ইতহাকু আহলিল ইসলাম বিআহকামিস সিয়াম, জারুয়াহ আলি জারুয়াহ ৪ ২৪পৃ, . মাসআলাহ ফিস্-সিয়াম, মুহাম্মাদ বিন সালাহ আল-মুনাজ্জিদ ৫৩নং)



অতি প্রয়োজনে গড়গড়ার ওষুধ ব্যবহার করা বৈধ। তবে শর্ত হল, যেন কোন প্রকারে পানি বা ওষুধ গলার নিচে নেমে না যায়। (নচেৎ, তাতে রোযা নষ্ট হয়ে যাবে।) তাই পূর্বসতর্কতামূলক আমল হল, তা দিনে ব্যবহার না করে রাতে করা।<sup>1</sup>

নাকে পানি টেনে নিয়ে নাক ঝাড়াও রোযাদারের জন্য বৈধ। অবশ্য তাতে অতিরঞ্জন করা যাবে না। কারণ, তাতে গলার নিচে পানি নেমে যাওয়ার আশঙ্কা থাকে। মহানবী ﷺ বলেন, “(ওযু করার সময়) তুমি নাকে খুব অতিরঞ্জিতভাবে পানি টেনে নিও। কিন্তু তোমার রোযা থাকলে নয়।”<sup>2</sup>

অবশ্য ওযু ইত্যাদি করার সময় কুল্লি করতে গিয়ে বা নাকি পানি নিতে গিয়ে সাবধানতা সত্ত্বেও যদি অনিচ্ছাকৃতভাবে গলার নিচে চলে যায়, তাহলে তাতে রোযা ভঙ্গবে না। কেননা, তা ইচ্ছা করে গিলা হয় না। আর মহান আব্বাহ বলেন,

﴿وَلَكِنْ مَا تَعَمَّدَتْ قُلُوبُكُمْ﴾

অর্থাৎ, (কোন ব্যাপারে তোমরা ভুল করলে, তোমাদের কোন অপরাধ নেই;) কিন্তু ইচ্ছাকৃত করলে অপরাধ আছে। (কুরআনুল কারীম ৩৩/৫)<sup>3</sup>

### ১৭। সুগন্ধির সুঘ্রাণ নেওয়া :

রোযা রাখা অবস্থায় আতর বা অন্য প্রকার সুগন্ধি ব্যবহার করা এবং সর্বপ্রকার সুঘ্রাণ নাকে নেওয়া রোযাদারের জন্য বৈধ। তবে ধূঁয়া জাতীয় সুগন্ধি (যেমন আগরবাতি, চন্দন-ধূঁয়া প্রভৃতি) ইচ্ছাকৃত নাকে নেওয়া বৈধ নয়। কারণ, এই শ্রেণীর সুগন্ধির ঘনত্ব আছে; যা পাকস্থলিতে গিয়ে পৌঁছে।<sup>4</sup>

<sup>1</sup> (ফাসিঃ জিরাইসী ২১৭ঃ)

<sup>2</sup> (আহমাদ, মুসনাদ ৪/৩৩, আবু দাউদ ১৪২, সহীহ তিরমিযী, আলবানী ৬৩১, সহীহ নাসাই, আলবানী ৮৫, ইবনে মাজাহ ৪০৭নং)

<sup>3</sup> (ইবনে উযাইমীন, ফাসিঃ মুসনিদ ৩৮-৭ঃ)

<sup>4</sup> (দ্রঃ ফাজওয়া ইসলামিয়াহ ২/১২৮, ফাসিঃ মুসনিদ ৪৩৭ঃ, তায়কীর ইবাদির রাহমান, ফীমা অরাদা বিসিয়ামি শাহরি রামায়ান ৪৭৭ঃ)

বলা বাহুল্য, রান্নাঘরের যে ধোঁয়া অনিচ্ছা সত্ত্বেও নাকে এসে প্রবেশ করে, তাতে রোয়ার কোন ক্ষতি হবে না। কারণ, তা থেকে বাঁচার উপায় নেই।<sup>1</sup>

প্রকাশ থাকে যে নসিয ব্যবহার করলে রোয়া নষ্ট হয়ে যাবে। কারণ, তারও ঘনত্ব আছে এবং তার গুঁড়া পেটের ভিতরে পৌঁছে থাকে। তা ছাড়া তা মাদকদ্রব্যের শ্রেণীভুক্ত হলে ব্যবহার করা যে কোন সময়ে এমনিতেই হারাম।

### ১৮। নাকে বা মুখে স্প্রে ব্যবহার :

স্প্রে দুই প্রকার; প্রথম প্রকার হল ক্যাপসুল স্প্রে পাওডার জাতীয়। যা পিস্তলের মত কোন পাত্রে রেখে পুশ করে স্প্রে করা হয় এবং ধূলোর মত উড়ে গিয়ে গলায় পৌঁছলে রোগী তা গিলতে থাকে। এই প্রকার স্প্রেতে রোয়া নষ্ট হয়ে যাবে। রোয়াদারকে যদি এমন স্প্রে বছরের সব মাসে এবং দিনেও ব্যবহার করতেই হয়, তাহলে তাকে এমন রোগী গণ্য করা হবে, যার রোগ সারার কোন আশা নেই। সুতরাং সে রোয়া না রেখে প্রত্যেক দিনের বিনিময়ে একটি করে মিসকীন খাইয়ে দেবে।

দ্বিতীয় প্রকার স্প্রে হল বাষ্প জাতীয়। এই প্রকার স্প্রেতে রোয়া ভাঙ্গবে না। কেননা, তা পাকস্থলীতে পৌঁছে না।<sup>2</sup> কারণ, তা হল এক প্রকার কমপ্রেসড গ্যাস; যার ডিক্বায় প্রেসার পড়লে উড়ে গিয়ে (নিঃশ্বাসের বাতাসের সাথে) ফুসফুসে পৌঁছে এবং শ্বাসকষ্ট দূর করে। এমন গ্যাস কোন প্রকার খাদ্য নয়। আর রমায়ান অরমায়ান এবং দিনে রাতে সব সময়ে (বিশেষ করে শ্বাসরোধ বা শ্বাসকষ্ট জাতীয় যেমন হাঁফানির রোগী) এর মুখাপেক্ষী থাকে।<sup>3</sup>

অনুরূপভাবে মুখের দুর্গন্ধ দূরীকরণের উদ্দেশ্যে ব্যবহার্য স্প্রে রোয়াদারের জন্য ব্যবহার করা দোষাবহ নয়। তবে শর্ত হল, সে স্প্রে পবিত্র ও হালাল হতে হবে।<sup>4</sup>

<sup>1</sup> (ইবনে উয়ইমীন, মাজহু' ফাতাওয়া, ইবনে তাইমিয়াহ ১/৫০৮)

<sup>2</sup> (ইবনে উয়ইমীন, ক্যাসেটঃ আহকামুন মিনাস সিয়াম)

<sup>3</sup> (ইবনে বায, ফাতাওয়া সুহইম্মাহ, তাতাআল্লাকু বিস্‌সিয়াম ৩৬পৃঃ, সামানিয়া ওয়া আরবাউন সুআলান ফিস-সিয়াম ৬২পৃঃ, সাবউনা মাসআলাহ ফিস-সিয়াম ৪২নং)

<sup>4</sup> (মাজহায়াতুল বৃহুসিল ইসলামিয়াহ ৩০/১১২)

## যা থেকে বাঁচা দুঃসাধ্য তাতে রোযা নষ্ট নয়

### ১। খুখু ও গয়ের ঃ

খুখু ও গয়ের থেকে বাঁচা দুঃসাধ্য। কারণ, তা মুখে বা গলার গোড়ায় জমা হয়ে নিচে এমনিতেই চলে যায়। অতএব এতে রোযা নষ্ট হবে না এবং বারবার খুখু ফেলারও দরকার হবে না।

অবশ্য যে কফ, গয়ের, খাঁকার বা শ্লেষ্মা বেশী মোটা এবং যা কখনো মানুষের বুক (শ্বাসযন্ত্র) থেকে, আবার কখনো মাথা (Sinuses) থেকে বের হয়ে আসে, তা গলা ঝেড়ে বের করে বাইরে ফেলা ওয়াজেব এবং তা গিলে ফেলা বৈধ নয়। যেহেতু তা ঘৃণিত; সম্ভবতঃ তাতে শরীর থেকে বেরিয়ে আসা কোন রোগজীবাণুও থাকতে পারে। সুতরাং তা গিলে ফেলাতে স্বাস্থ্যের ক্ষতিও হতে পারে। তবে যদি কেউ ফেলতে না পেরে গিলেই ফেলে, তাহলে তাতে রোযা নষ্ট হবে না। . .

পক্ষান্তরে মুখের ভিতরকার স্বাভাবিক লালা গিলাতে কোন ক্ষতি নেই। রোযাতেও কোন প্রভাব পড়ে না।<sup>১</sup> এই লালা বের করে ফেলা জরুরী নয়; এমনকি ফজরের আযানের সামান্য পূর্বে পানি পান করার পরেও নয়। কারণ, আমাদের জানা মতে সাহাবাবর্গ কর্তৃক এমন কোন নির্দেশ বর্ণিত হয় নি, যাতে বুঝা যায় যে, রোযাদার ফজর উদয় (সেহরীর সময় শেষ) হওয়ার একটু পূর্বে পানি পান করলে ততক্ষণ পর্যন্ত খুখু ফেলতে হবে, যতক্ষণ পর্যন্ত জিব থেকে পানির স্বাদ দূরীভূত না হয়েছে। বরং এতটুকু অবশ্যই ক্ষমার্হ। তবে হ্যাঁ, যদি কোন খাবারের স্বাদ; যেমন খেজুর, চা বা অনুরূপ কোন মিষ্টি জাতীয় খাবারের মিষ্টতা জিবে অবশিষ্ট থেকে যায়, তাহলে তা অবশ্যই খুখু ফেলার সাথে (বা পানি দ্বারা কুণ্ঠি করে) দূর করা জরুরী এবং সেহরীর সময় শেষ হয়ে গেছে জানার পর তা গিলা বৈধ নয়।

দাঁতে লেগে থাকা গোশত বা অন্য কোন খাবার ফজর উদয় হওয়ার পরে অনিচ্ছাকৃতভাবে গিলে ফেললে, অথবা তা অতি সামান্য হওয়ার ফলে মুখে বুঝতে পারা এবং বের করে ফেলা সম্ভব না হলে তা মুখের স্বাভাবিক লালার মতই। তাতে রোযার কোন ক্ষতি হবে না। কিন্তু বেশী হলে এবং

<sup>১</sup> (আশশারহুল মুমত' ৬/৪২৮-৪২৯, ফাতাওয়া ইসলামিয়াহ ২/১২৫, ফাসিঃ ৩৮পৃঃ)

তা বের করে ফেলা সম্ভব হলে, বের করে দিলে আর কোন ক্ষতি হবে না। পরন্তু তা ইচ্ছাকৃতভাবে গিলে ফেললে রোযা নষ্ট হয়ে যাবে।<sup>1</sup>

## ২। রাস্তার ধূলা :

রাস্তার ধূলা রোযাদারের নিঃশ্বাসের সাথে পেটে গেলে রোযার কোন ক্ষতি হয় না। তদনুরূপ যে ব্যক্তি আটাচাকিতে কাজ করে অথবা তার কাছে যায় সে ব্যক্তির পেটে আটার গুঁড়ো গেলেও রোযার কোন ক্ষতি হবে না।<sup>2</sup> কারণ, এ সব থেকে বাঁচার উপায় নেই। অবশ্য মুখে মুখোশ ব্যবহার করে বা কাপড় বেঁধে কাজ করাই উত্তম।

## রোযা অবস্থায় যা করা চলে

এমন কিছু কাজ আছে যা আপাতদৃষ্টিতে রোযাদারের জন্য করা অবৈধ মনে হলেও আসলে তা বৈধ। সেরূপ কিছু কাজ নিম্নরূপ :-

### ১। লবণ বা মিষ্টি চাখা :

রান্না করতে করতে প্রয়োজনে খাবারের লবণ বা মিষ্টি সঠিক হয়েছে কি না তা চেখে দেখা রোযাদারের জন্য বৈধ। তদনুরূপ কোন কিছু কেনার সময় চেখে পরীক্ষা করার দরকার হলে তা করতে পারে। ইবনে আব্বাস (رضি) বলেন, 'কোন খাদ্য, সিকী এবং কোন কিছু কিনতে হলে তা চেখে দেখাতে কোন দোষ নেই।'<sup>3</sup>

অনুরূপভাবে অতি প্রয়োজনে মা তার শিশুর জন্য কোন শক্ত খাবার চিবিয়ে নরম করে দিতে পারে, ধান শুকিয়েছে কি না এবং মুড়ির চাল হয়েছে কি না তা চিবিয়ে দেখতে পারে। অবশ্য এ সকল ক্ষেত্রে শর্ত হল, যেন চর্বিত কোন অংশ রোযাদারের পেটে না চলে যায়। বরং অতি সাবধানতার সাথে কেবল দাঁতে চিবিয়ে এবং জিভে তার স্বাদ চেখে সঙ্গে সঙ্গে বাইরে ফেলা জরুরী।<sup>4</sup>

<sup>1</sup> (সাবউনা মাসআলাহ ফিস্-সিয়াম ৫৩নং)

<sup>2</sup> (আহকামুস সাওমি অল-ই'তিকাহ, আবু সারী মঃ আব্দুল হাদী ১৪৫-১৪৬পৃঃ)

<sup>3</sup> (দ্রঃ বুখারী ৩৮০পৃঃ, ইবনে আবী শাইবাহ, মুসান্নাফ ২/৩০৫, বাইহাকী ৪/২৬১, ইরওয়াউল গালীল, আলবানী ৯৩৭নং)

<sup>4</sup> (ফাতাওয়া ইসলামিয়াহ ২/১২৮, সাবউনা মাসআলাহ ফিস্-সিয়াম ৫৩নং, সাওমু রামাযান, আব্দুর রায়যাক নাওফাল ২৬পৃঃ, ফিকহুস সুন্নাহ ১/৪০৯)

## ২। সেহরীর শেষ সময় পর্যন্ত পানাহার করা :

সেহরীর শেষ সময় পর্যন্ত পানাহার ও স্ত্রী-সহবাস করা রোযাদারের জন্য বৈধ। কিন্তু ফজর উদয় (সময় বা আযান) হওয়ার সাথে সাথে মুখের খাবার উগলে ফেলা ওয়াজেব। (এ ব্যাপারে মতভেদ পূর্বে আলোচিত হয়েছে।) অনুরূপ সহবাস করতে থাকলে সঙ্গে সঙ্গে স্বামী-স্ত্রী পৃথক হয়ে যাওয়া জরুরী। একরূপ করলে রোযা শুদ্ধ হয়ে যাবে। পক্ষান্তরে সেহরীর সময় শেষ হয়ে গেছে বা ফজরের আযান শুরু হয়ে গেছে জেনে বা শুনেও যদি কেউ পানাহার বা স্ত্রী-সঙ্গমে মত্ত থাকে, তাহলে তার রোযা হবে না। মহানবী ﷺ বলেন, “বিলাল রাতে আযান দেয়। সুতরাং তোমরা ততক্ষণ পর্যন্ত পানাহার করতে থাক, যতক্ষণ পর্যন্ত না ইবনে উম্মে মাকতুম আযান দেয়।”<sup>1</sup>

## ৩। ফজর উদয় হওয়ার পরেও নাপাক থাকা:

স্ত্রী-সঙ্গম অথবা স্বপ্নদোষ হওয়ার পরেও সময় অভাবে গোসল না করে নাপাক অবস্থাতেই রোযাদার রোযার নিয়ত করতে এবং সেহরী খেতে পারে। এমন কি সেহরীর সময় শেষ হয়ে গেলেও স্ফায়ানের পর গোসল করতে পারে। এ ক্ষেত্রে রোযার শুরুর কিছু অংশ নাপাকে অতিবাহিত হলেও রোযার কোন ক্ষতি হবে না। অবশ্য নামাযের জন্য গোসল জরুরী।

মা আয়েশা ও উম্মে সালামাহ (রাঃ) বলেন, ‘আল্লাহর রসূল ﷺ-এর (কখনো কখনো) স্ত্রী-মিলন করে অপবিত্র অবস্থায় ফজর হয়ে যেত। তারপর তিনি গোসল করতেন এবং রোযা রাখতেন।’<sup>2</sup>

তাছাড়া মহান আল্লাহ ফজর উদয় হওয়ার সময় পর্যন্ত স্ত্রী-মিলনের অনুমতি দিয়েছেন এবং তার পর থেকে রোযা রাখার আদেশ দিয়েছেন। আর তার মানেই হল যে, রোযাদারের জন্য (ফজর উদয়ের পূর্বে) মিলনের পর (ফজর উদয়ের পরে) নাপাকীর গোসল করা বৈধ।<sup>3</sup>

তদনুরূপ নিফাস ও ঋতুমতী মহিলার রাত্রে খুন বন্ধ হলে (রোযার নিয়ত করে এবং সেহরী খেয়ে) ফজরের পর রোযায় থেকে পরে গোসল করে নামায পড়তে পারে। উপর্যুক্ত নাপাক পুরুষ ও মহিলার জন্য

<sup>1</sup> (বুখারী ৬১৭নং, মুসলিম)

<sup>2</sup> (বুখারী ১৯২৫, মুসলিম ১১০৯, সুনানে আরবাতাহ; আবু দাউদ, তিরমিযী, নাসাই ও ইবনে মাজাহ)

<sup>3</sup> (দ্রঃ মুহাম্মাদ ৬/২২০, ফাইয়ুর রাহীমির রাহমান, ফী আহকামি অমাওয়ারাইবি রামায়ান ৬১ পৃঃ)

নাপাকীর গোসলকে সকাল বা দুপুরের সময় পর্যন্ত বিলম্বিত করা বৈধ নয়। বরং সূর্য উদয়ের পূর্বেই গোসল করে যথাসময়ে নামায আদায় করা তাদের জন্য ওয়াজেব। যেমন পুরুষের জন্য ওয়াজেব এমন সময়ের ভিতরে সত্বর গোসল করা, যাতে ফজরের নামায জামাআত সহকারে মসজিদে আদায় করতে সক্ষম হয়।<sup>1</sup>

জ্ঞাতব্য যে, রমাযানের দিনের বেলায় রোযাদারের স্বপ্নদোষ হয়ে গেলে তার রোযা বাতিল নয়। কেননা, তা তার এখতিয়ারকৃত নয়। অতএব তার জন্য জরুরী হল, নাপাকীর গোসল করা। অবশ্য ফজরের নামায পড়ার পর ঘুমাতে গিয়ে স্বপ্নদোষ হলে, সঙ্গে সঙ্গে গোসল না করে যদি যোহরের আগে পর্যন্ত বিলম্ব করে গোসল করে, তাহলে তাতে দোষ হবে না।<sup>2</sup> অবশ্য উত্তম হল, নাপাকে না থেকে সম্ভব হলে সঙ্গে সঙ্গে গোসল করে বিভিন্নভাবে আল্লাহর যিক্র করা।

#### ৪। দিনে ঘুমানো ঃ

রোযাদারের জন্য দিনে ঘুমানো বৈধ। কিন্তু সকল নামায তার যথাসময়ে জামাআত সহকারে আদায় করতে অবহেলা প্রদর্শন করা বৈধ নয়। যেমন, বিভিন্ন ইবাদতের কল্যাণ থেকে নিজেকে বঞ্চিত করা উচিত নয়। বরং উচিত হল, ঘুমিয়ে সময় নষ্ট না করে রমাযানের সেই মাহাত্ম্যপূর্ণ সময়কে নফল নামায, যিক্র-আযকার ও কুরআন কারীম তেলাআত দ্বারা আবাদ করা। যাতে তার রোযার ভিতরে নানা প্রকার ইবাদতের সমাবেশ ঘটে।<sup>3</sup>

#### ৫। সফর করা ঃ

রোযাদারের জন্য এমন দেশে সফর করে রোযা রাখা বৈধ, যেখানের দিন ঠাণ্ডা ও ছোট।<sup>4</sup>



<sup>1</sup> (ফিকহস সুন্নাহ ১/৪১১, ইবনে বায, ফাসিঃ মুসনিদ ৫১ পৃঃ, রিসালাতানি মু'জাযাতানি ফিয যাকাতি অসসিয়াম ২৩ পৃঃ)

<sup>2</sup> (ইবনে বায, ফাসিঃ মুসনিদ ৫১ পৃঃ)

<sup>3</sup> (ইবনে উবাইদীন, ফাসিঃ মুসনিদ ৩১-৩২ পৃঃ)

<sup>4</sup> (ইবনে উবাইদীন, মাজমু' ফাতাওয়া ১/৫০৬)

## অষ্টম অধ্যায়

### রোযাদারের জন্য যা করা অপছন্দনীয়

উলামাগণ কিছু এমন বৈধ কর্ম করাকে রোযাদারের জন্য অপছন্দনীয় মনে করেন, যা করার ফলে তার রোযা নষ্ট হওয়ার আশঙ্কা থাকে। আর তা নিম্নরূপ :-

১. মুখে থুথু জমা করে গিলে নেওয়া।
২. গয়ের বা শ্লেষ্মা গিলা।
৩. চুইংগাম জাতীয় কিছু চিবানো।
৪. দাঁতের ফাঁকে লেগে থাকা খাবার পরিষ্কার না করা।
৫. অপয়োজনে খাবার চেখে দেখা। কারণ, তা গলার নিচে নেমে যাওয়ার আশঙ্কা আছে।
৬. এমন জিনিস নাকে নিয়ে ঘ্রাণ নেওয়া (শৌঁকা); যা রোযাদারের নিঃশ্বাসের সাথে গলার ভিতরে যেতে পারে।
৭. স্ত্রীর সাথে এমন আচরণ করা, যা রোযাদারের যৌনক্ষুধা জাগ্রত করে। যেমন চুম্বন, কোলাকুলি, গলাগলি প্রভৃতি।
৮. এমন কিছু করা, যাতে তার শরীর দুর্বল হয়ে যাবে এবং রোযা চালিয়ে যেতে কষ্ট হবে। যেমন দূষিত রক্ত বহিস্করণ ও অধিক রক্তদান।
৯. কুল্লি করা ও নাকে পানি নেওয়াতে অতিরঞ্জন করা।<sup>১</sup>
১০. মাজন বা টুথ্ পেষ্ট্ দিয়ে দাঁত মাজা।

এ ছাড়া এমন কিছু কর্ম রয়েছে, যা করলে রোযাদারের রোযা অসম্পূর্ণ থেকে যায় এবং তার সওয়াবও কম হয়ে যায়। যেমন মিথ্যা কথা বলা, মিথ্যা সাক্ষ্য দেওয়া, গীবত করা, চুগলী করা, অনুরূপ প্রত্যেক সেই কথা বলা, যা শরীয়তঃ বলা নিষিদ্ধ। কারণ, প্রিয় নবী ﷺ বলেন, “যে ব্যক্তি রোযা রেখে মিথ্যা কথা ও তার উপর আমল ত্যাগ করতে পারল না, সে ব্যক্তির পানাহার ত্যাগ করার মাঝে আল্লাহর কোন প্রয়োজন নেই।”<sup>২</sup>

<sup>১</sup> (দ্রঃ আহকামুস সাওমি অল-ই'তিকাহ, আবু সারী মঃ আব্দুল হাদী ১৬২-১৬৩পৃঃ, তাযকীর ইবাদির রাহমান, ফীমা অরাদা বিসিয়ামি শাহরি রামাযান ১৬-১৭পৃঃ)

<sup>২</sup> (বুখারী ৬০৫৭, ইবনে মাজাহ ১৬৮৯, আহমাদ, মুসনাদ ২/৪৫২, ৫০৫)

## নবম অধ্যায়

### যাতে রোযা নষ্ট ও বাতিল হয়

যে সব কারণে রোযা নষ্ট হয় তা দুই শ্রেণীর; প্রথম শ্রেণীর কারণ রোযা নষ্ট করে এবং তাতে কাযা ওয়াজেব হয়। আর দ্বিতীয় শ্রেণীর কারণ রোযা নষ্ট করে এবং কাযার সাথে কাফ্ফারাও ওয়াজেব করে।

যে কারণে রোযা নষ্ট হয় এবং কাযার সাথে কাফ্ফারাও ওয়াজেব হয়; তা হল :-

#### ১। স্ত্রী-সঙ্গম :

সঙ্গম বলতে স্ত্রী-যোনীতে স্বামীর লিঙ্গগ্র প্রবেশ হলেই রোযা নষ্ট হয়ে যায়; তাতে বীর্যপাত হোক, আর নাই হোক। তদনুরূপ অবৈধভাবে পায়খানা-দ্বারে লিঙ্গগ্র প্রবেশ করলেও রোযা বাতিল গণ্য হয়।

জ্ঞাতব্য যে, স্ত্রীর পায়খানাদ্বারে সঙ্গম করা মহাপাপ এবং এক প্রকার কুফরী।

বলা বাহুল্য রোযা অবস্থায় যখনই রোযাদার স্ত্রী-মিলন করবে, তখনই তার রোযা নষ্ট হয়ে যাবে। সুতরাং এ মিলন যদি রমায়ানের দিনে সংঘটিত হয় এবং রোযা রোযাদারের জন্য ফরয হয়, (অর্থাৎ রোযা কাযা করা তার জন্য বৈধ না হয়) তাহলে ঐ মিলনের ফলে যথাক্রমে ৫টি জিনিস সংঘটিত হবে :-

(ক) কাবীরা গোনাহ; আর তার ফলে তাকে তওবা করতে হবে।

(খ) তার রোযা বাতিল হয়ে যাবে।

(গ) তাকে ঐ দিনের অবশিষ্ট অংশ পানাহার ইত্যাদি থেকে বিরত থাকতে হবে।

(ঘ) ঐ দিনের রোযা (রমায়ান পর) কাযা করতে হবে।

(ঙ) বৃহৎ কাফ্ফারা আদায় করতে হবে। আর তা হল, একটি ক্রীতদাসকে দাসত্ব থেকে মুক্তি দিতে হবে। তাতে সক্ষম না হলে, লাগাতার (একটানা) দুই মাস রোযা রাখতে হবে। আর তাতে সক্ষম না হলে, ৬০ জন মিসকীনকে খাদ্যদান করতে হবে।



এ ব্যাপারে মূল ভিত্তি হল, মহান আল্লাহর এই বাণী,

﴿أَحِلَّ لَكُمْ لَيْلَةَ الصِّيَامِ الرَّفَثُ إِلَى نِسَائِكُمْ...﴾ الآية

অর্থাৎ, রোযার রাতে তোমাদের জন্য স্ত্রী-সম্বোগ হালাল করা হয়েছে।  
(কুরআনুল কারীম ২/১৮৭)

আর আবু হুরাইরা কর্তৃক বর্ণিত, তিনি বলেন, একদা আমরা নবী ﷺ-এর কাছে বসে ছিলাম। এমন সময় তাঁর নিকট এক ব্যক্তি উপস্থিত হয়ে বলল, 'হে আল্লাহর রসূল! আমি ধুংসগ্রস্ত হয়ে পড়েছি।' তিনি বললেন, "কোন জিনিস তোমাকে ধুংসগ্রস্ত করে ফেলল?" লোকটি বলল, 'আমি রোযা অবস্থায় আমার স্ত্রীর সাথে সঙ্গম করে ফেলেছি।' এ কথা শুনে আল্লাহর রসূল ﷺ তাকে বললেন, "তুমি কি একটি ক্রীতদাস মুক্ত করতে পারবে?" লোকটি বলল, 'জী না।' তিনি বললেন, "তাহলে কি তুমি একটানা দুই মাস রোযা রাখতে পারবে?" সে বলল, 'জী না।' তিনি বললেন, "তাহলে কি তুমি ৬০ জন মিসকীনকে খাদ্যদান করতে পারবে?" লোকটি বলল, 'জী না।' ---<sup>1</sup>

যে মহিলার উপর রোযা ফরয, সেই মহিলা সম্মত হয়ে রমাযানের দিনে স্বামী-সঙ্গম করলে তারও উপর কাফফারা ওয়াজেব। অবশ্য তার ইচ্ছা না থাকা সত্ত্বেও স্বামী যদি তার সাথে জোরপূর্বক সহবাস করতে চায়, তাহলে তার জন্য যথাসাধ্য তা প্রতিহত করা জরুরী। রুখতে না পারলে তার উপর কাফফারা ওয়াজেব নয়।

এই জন্যই যে মহিলা জানে যে, তার স্বামীর কামশক্তি বেশী; সে তার কাছে প্রেম-হৃদয়ে কাছাকাছি হলে নিজের যৌন-পিপাসা দমন রাখতে পারে না, সেই মহিলার জন্য উচিত, রমাযানের দিনে তার কাছ থেকে দূরে থাকা এবং প্রসাধন ও সাজ-সজ্জা না করা। তদনুরূপ স্বামীর জন্যও উচিত, পদস্খলনের জায়গা থেকে দূরে থাকা এবং রোযা থাকা অবস্থায় স্ত্রীর কাছ না ঘেঁষা; যদি আশঙ্কা হয় যে, উগ্র যৌন-কামনায় সে তার মনকে কাবু রাখতে পারবে না। কারণ, এ কথা বিদিত যে, প্রত্যেক নিষিদ্ধ জিনিসই ঈঙ্গিসত।<sup>2</sup>

<sup>1</sup> (বুখারী ১৯৩৭, মুসলিম ১১১১নং)

<sup>2</sup> (দ্রঃ আশশারহুল মুমত' ৬/৪১৫, সাবউনা মাসআলাহ ফিস-সিয়াম ৭০নং, কাইয়ূর রাহীমির রাহমান, ফী আহকামি অমাওয়াইবি রামাযান ৬১পৃঃ)

পক্ষান্তরে যদি রমাযানের রোযা কাযা রাখতে গিয়ে স্ত্রী-সঙ্গম করে ফেলে, তাহলে তার ফলে কাফ্ফারা নেই। আর তার জন্য ঐ দিনের বাকী অংশ পানাহার ইত্যাদি থেকে বিরত থাকাও জরুরী নয়। অবশ্য তার গোনাহ হবে। কারণ, সে ইচ্ছাকৃত একটি ওয়াজেব রোযা নষ্ট করে তাই।<sup>1</sup>

মুসাফির যদি সফরে থাকা অবস্থায় রোযা রেখে স্ত্রী-সহবাস করে ফেলে, তাহলে তার জন্য কেবল কাযা ওয়াজেব, কাফ্ফারা ওয়াজেব নয়। যেমন, ঐ দিনের বাকী অংশ পানাহার ইত্যাদি থেকে বিরত থাকাও তার জন্য জরুরী নয়। কেননা, সে মুসাফির। আর মুসাফিরের জন্য সফরে রোযা ভাঙ্গা (এবং পরে কাযা করা) বৈধ।

অনুরূপভাবে এমন রোগী, যার রোগের জন্য রোযা ভাঙ্গা বৈধ ছিল; কিন্তু কষ্ট করে সে রোযা রেখেছিল। সে যদি তার স্ত্রীর সাথে সঙ্গম করে, যে সেই দিনেই মাসিক থেকে পবিত্রা হয়েছে, তাহলে তারও গোনাহ হবে না; অবশ্য কাযা ওয়াজেব।<sup>2</sup>

যে ব্যক্তি যে বৈধ ওযরের ফলে রোযা বন্ধ রেখেছিল, দিনের মধ্যে তার সেই ওযর দূর হয়ে যাওয়ার পর যদি স্ত্রী-সহবাস করে, তাহলে তার জন্য কাফ্ফারা ওয়াজেব নয়। যেমন, কোন মুসাফির যদি দিন থাকতে রোযা না রেখে ঘরে ফিরে দেখে যে, তার স্ত্রী সেই দিনেই (ফজরের পর) মাসিক থেকে পবিত্রা হয়েছে, তাহলে সঠিক মতে তাদের জন্য সঙ্গম বৈধ। এতে স্বামী-স্ত্রীর কোন প্রকার পাপ হবে না। যেহেতু ঐ দিন শরীয়তের অনুমতিক্রমে তাদের জন্য মান্য নয় এবং ঐ দিনে রোযা না রাখাও তাদের পক্ষে অনুমোদিত।<sup>3</sup>

যদি কোন ব্যক্তি সুস্থ অবস্থায় রোযা রেখে স্ত্রী-সহবাস করার পর দিন থাকতেই এমন অসুস্থ হয়ে পড়ে, যাতে তার জন্য রোযা ভাঙ্গা বৈধ, তাহলেও তার জন্য কাফ্ফারা ওয়াজেব; যদিও তার জন্য দিনের শেষভাগে (অসুস্থ হওয়ার পর) রোযা ভাঙ্গা বৈধ। কারণ, সহবাসের সময় সে তাতে অনুমতিপ্রাপ্ত ছিল না।

<sup>1</sup> (আশ্শারহুল মুমতে' ৬/৪১৩, আহকামুন মিনাস সিয়াম, ক্যাসেট, ইবনে উযাইমীন)

<sup>2</sup> (আশ্শারহুল মুমতে' ৬/৪১৩)

<sup>3</sup> (আশ্শারহুল মুমতে' ৬/৪২১)

তদনুরূপ যে ব্যক্তি দিনের প্রথমার্শে সহবাস করার পর সফর করে তাহলে তার জন্যও কাফ্যারা ওয়াজেব; যদিও সফর করার পরে ঐ দিনেই তার জন্য রোযা ভাঙ্গা বৈধ। কেননা, রোযা ভাঙ্গা বৈধ হওয়ার পূর্বেই সে (রমাযান) মাসের মর্যাদা ক্ষুন্ন করেছে।<sup>1</sup>

যদি কোন ব্যক্তি (কাফ্যারা থেকে রেহাই পাওয়ার বাহানায়) প্রথমে কিছু খেয়ে অথবা পান করে তারপর স্ত্রী-সঙ্গম করে, তাহলে তার পাপ অধিক। যেহেতু সে রমাযানের মর্যাদাকে পানাহার ও সঙ্গমের মাধ্যমে ডবল করে নষ্ট করেছে। বৃহৎ কাফ্যারা তার হক্কে অধিক কার্যকর। আর তার ঐ বাহানা ও ছলনা নিজের ঘাড়ে বোঝা স্বরূপ। তার জন্য খাঁটি তওবা ওয়াজেব।<sup>2</sup>

জ্ঞাতব্য যে, রমাযান মাসে দিনে রোযা অবস্থায় সঙ্গম ছাড়া অন্য কোন কারণে সেই ব্যক্তির জন্য কাফ্যারা ওয়াজেব হয় না, যার জন্য রোযা রাখা ফরয। বলা বাহুল্য, নফল রোযা রেখে, কসমের কাফ্যারার রোযা রেখে, কোন অসুবিধার ফলে ইহরাম অবস্থায় কোন নিষিদ্ধ কাজ করে ফেললে তার জরিমানার রোযা রেখে, তামাত্তু হজ্জ করতে গিয়ে কুরবানী দিতে না পেরে তার বিনিময়ে রোযা রেখে অথবা নযরের রোযা রেখে স্ত্রী-সহবাস করে ফেললে কাফ্যারা ওয়াজেব নয়। যেমন সঙ্গম না করে (স্ত্রী-যোনীর বাইরে) বীর্যপাত করে ফেললেও কাফ্যারা ওয়াজেব নয়।<sup>3</sup> অবশ্য কাযা তো ওয়াজেবই।

জ্ঞাতব্য যে, ব্যভিচার করে ফেললেও সহবাসের মতই কাফ্যারা ওয়াজেব।<sup>4</sup> তাছাড়া ব্যভিচারের সাজা ও তওবা তো আছেই।

## ২। বীর্যপাত :

রোযা নষ্টকারী কর্মাবলীর মধ্যে জাগ্রত অবস্থায় সকাম যৌন-স্বাদ অনুভূতির সাথে বীর্যপাত অন্যতম; চাহে সে বীর্যপাত (নিজ অথবা স্ত্রীর) হস্তমৈথুন দ্বারা হোক অথবা কোলাকুলি দ্বারা, নচেৎ চুষন অথবা প্রচাপন

<sup>1</sup> (আশশারহুল মুমতে' ৬/৪২২)

<sup>2</sup> (সাবউনা মাসআলাহ ফিস-সিয়াম ৪৭নং)

<sup>3</sup> (আশশারহুল মুমতে' ৬/৪২২-৪২৩)

<sup>4</sup> (আল-ফাওয়াইদুল জালিয়াহ, ইবনে বায ১১৯পৃঃ)

দ্বারা। কারণ, উক্ত প্রকার সকল কর্মই হল এক এক শ্রেণীর যৌনাচার। অথচ মহান আল্লাহ (হাদীসে কুদসীতে) বলেন, “সে আমার (সন্তুষ্টি লাভের) আশায় নিজের প্রয়োজনীয় পানাহার ও যৌনাচার পরিহার করে।”<sup>1</sup> আর যে ব্যক্তি যে কোন প্রকারে নিজ যৌন অনুভূতিকে উত্তেজিত করে তৃপ্তির সাথে বীর্যপাত করে, সে আসলেই নিজের যৌন-কামনা চরিতার্থ করে থাকে এবং তার রোযাতে সেই কর্ম বর্জন করে না, যা আল্লাহর উক্ত বাণীতে পানাহারের অনুরূপ।<sup>2</sup>

পরন্তু রোযাদারের জেনে রাখা উচিত যে, হস্ত অথবা অন্য কিছু দ্বারা বীর্যপাত ঘটানো যেমন রোযার মাসে হারাম, তেমনি অন্য মাসেও। কিন্তু রমাযানে তা অধিকরূপে হারাম। যেহেতু এ মাসের রয়েছে পৃথক মর্যাদা এবং তাতে হয়েছে রোযা ফরয।<sup>3</sup>

### ৩। পানাহার :

পানাহার বলতে পেটের মধ্যে যে কোন প্রকারে কোন খাদ্য অথবা পানীয় পৌছানোকে বুঝানো হয়েছে; চাহে তা মুখ দিয়ে হোক অথবা নাক দিয়ে, পানাহারের বস্তু যেমনই হোক; উপকারী বা উপাদেয় হোক অথবা অপকারী বা অনুপাদেয়, হালাল হোক অথবা হারাম, অল্প হোক অথবা বেশী।

বলা বাহুল্য, (বিড়ি, সিগারেট, গাঁজা প্রভৃতির) ধূমপান রোযা নষ্ট করে দেয়; যদিও তা অপকারী, অনুপাদেয় ও হারাম পানীয়।

প্লাস্টিক বা কোন ধাতুর মালা গিলে ফেললে রোযা নষ্ট হয়ে যাবে; যদিও তা পেটে গেলে দেহের কোন উপকার সাধন হবে না। তদনুরূপ যদি কেউ কোন অপবিত্র বা হারাম বস্তু ভক্ষণ করে, তাহলে তারও রোযা নষ্ট হয়ে যাবে।<sup>4</sup>

পানাহারে রোযা নষ্ট হওয়ার মূল ভিত্তি হল মহান আল্লাহর এই বাণী,

<sup>1</sup> (বুখারী ১৮৯৪, মুসলিম ১১৫১নং)

<sup>2</sup> (আশশারহুল মুমতে' ৬/৩৮-৭)

<sup>3</sup> (ফাইয়ুর রাহীমির রাহমান, ফী আহকামি অমাওয়াইবি রামাযান ৬১ পৃঃ)

<sup>4</sup> (দ্রঃ আশশারহুল মুমতে' ৬/৩৭৯, সামানিয়া ওয়া আরবাউন সুআলাল ফিস-সিয়াম ১৪ পৃঃ)

﴿وَكُلُوا وَاشْرَبُوا حَتَّىٰ يَتَبَيَّنَ لَكُمُ الْخَيْطُ الْأَبْيَضُ مِنَ الْخَيْطِ

الْأَسْوَدِ مِنَ الْفَجْرِ﴾

অর্থাৎ, আর তোমরা পানাহার কর, যতক্ষণ পর্যন্ত না (রাতের) কালো অন্ধকার থেকে ফজরের সাদা রেখা তোমাদের নিকট স্পষ্ট হয়েছে। (কুরআনুল কারীম ২/১৮৭)

সুতরাং ফজর উদয় হওয়ার আগে পর্যন্ত মহান আল্লাহ রোযাদারের জন্য পানাহার বৈধ করেছেন। অতঃপর তিনি রাত পর্যন্ত রোযা রাখার আদেশ দিয়েছেন। আর তা হল রোযা নষ্টকারী জিনিস থেকে বিরত থাকার নাম। তিনি বলেন,

﴿ثُمَّ أَتُوا الصِّيَامَ إِلَى اللَّيْلِ﴾

অর্থাৎ, অতঃপর তোমরা রাত পর্যন্ত রোযা পূর্ণ কর। (কুরআনুল কারীম ২/১৮৭) অর্থাৎ, মাগরেব পর্যন্ত।

আর মহান আল্লাহ (হাদীসে কুদসীতে) বলেন, “সে আমার (সন্তুষ্টি লাভের) আশায় নিজের প্রয়োজনীয় পানাহার ও যৌনাচার পরিহার করে।”<sup>1</sup>

সুতরাং যে স্বেচ্ছায় পানাহার করবে তার রোযা নষ্ট হয়ে যাবে। সে গোনাহগার হবে, বিধায় তার জন্য তওবা ওয়াজেব এবং কাযাও। অবশ্য এর জন্য কোন কাফ্ফারা নেই। তবে ইচ্ছা করে কেউ রোযা নষ্ট করার পর তা কাযা করলেও তা কবুল হবে কি না - তা নিয়ে মতভেদ আছে।

৪। যা এক অর্থে পানাহারঃ


স্বাভাবিক পানাহারের পথ ছাড়া অন্য ভাবে পানাহারের কাজ নিলে তাতেও রোযা নষ্ট হয়ে যাবে। যেমন খাবারের কাজ দেয় এমন (স্যলাইন ইঞ্জেকশন) নিলে রোযা হবে না। কেননা, তাতে পানাহারের অর্থ বিদ্যমান। আর শরীয়তের নির্দেশ-বাণীতে যে ব্যাপক অর্থ পাওয়া যায়, যে কোন অবস্থায় সেই অর্থ পাওয়া গেলে সেই নির্দেশ ঐ অবস্থার উপর আরোপ করা হবে।<sup>2</sup>

<sup>1</sup> (বুখারী ১৮৯৪, মুসলিম ১১৫১নং)

<sup>2</sup> (ভায়কীক ইব্বাদির রাহমান, ফীমা অরাদা বিসিয়ামি শাহরি রামাযান ৪৪ পৃঃ)

তদনুরূপ রোযা অবস্থায় দেহের রক্ত পরিবর্তন করলেও রোযা নষ্ট হয়ে যাবে। কারণ, তাতে দেহের মধ্যে নতুন ও নির্মল রক্ত প্রদান করা হয়। আর রক্তের সাথে অন্য কোন বস্তু বা ঔষধ থাকলে তো তা রোযা নষ্ট হওয়ার অন্য একটি কারণ।<sup>1</sup>

#### ৫। ইচ্ছাকৃত বমি করা :

ইচ্ছাকৃত বমি করলে, অর্থাৎ পেটে থেকে খাওয়া খাদ্য (বমন ও উদগিরণ করে) বের করে দিলে, মুখে আঙ্গুল ভরে, পেট নিড়রে, কোন বিকট দুর্গন্ধ জাতীয় কিছুর ঘ্রাণ নাকে নিয়ে, অথবা অরুচিকর ঘৃণ্য কিছু দেখে উলটি করলে রোযা নষ্ট হয়ে যাবে। সে ক্ষেত্রে ঐ রোযার কাযা জরুরী।<sup>2</sup> পক্ষান্তরে সামলাতে না পেরে অনিচ্ছাকৃতভাবে বমি হয়ে গেলে রোযা নষ্ট হয় না। যেহেতু মহানবী  বলেন, “রোযা অবস্থায় যে ব্যক্তি বমনকে দমন করতে সক্ষম হয় না, তার জন্য কাযা নেই। পক্ষান্তরে যে ইচ্ছাকৃতভাবে বমি করে, সে যেন ঐ রোযা কাযা করে।”<sup>3</sup>

ঢেকুর তুলতে গিয়ে যদি রোযাদারের গলাতে কিছু খাবার উঠে আসে অথবা খাবারের স্বাদ গলাতে অনুভব করে এবং তারপরেই ঢোক গিলে নেয়, তাহলে তাতে রোযার কোন ক্ষতি হয় না। কারণ, তা আসলে মুখ পর্যন্ত বের হয়ে আসে না। বরং গলা পর্যন্ত এসেই পুনরায় তা পেটে নেমে যায় এবং রোযাদার কেবল নিজ গলাতে তার স্বাদ অনুভব করে থাকে।<sup>4</sup>

#### ৬। মহিলার মাসিক অথবা নিফাস শুরু হওয়াঃ

মহিলার মাসিক অথবা নিফাসের খুন বের হতে শুরু হলে তার রোযা নষ্ট হয়ে যায়। যদি সূর্য অস্ত যাওয়ার সামান্য ক্ষণ পূর্বে খুন দেখা দেয়, তাহলে তার ঐ দিনের রোযা বাতিল এবং সূর্য অস্ত যাওয়ার সামান্য ক্ষণ পরে দেখা দিলে তার ঐ দিনের রোযা শুদ্ধ।<sup>5</sup>

<sup>1</sup> (ইবনে বায, ফাতাওয়া মুহিম্বাহ, তাতাআল্লাহু বিস্‌সিয়াম ৩৮-পৃঃ)

<sup>2</sup> (দ্রঃ আশ্শারহুল মুমতে' ৬/৩৮৫, সাবউনা মাসআলাহ ফিস্-সিয়াম ৫৩নং)

<sup>3</sup> (আহমাদ, মুসনাদ ২/৪৯৮, আবু দাউদ ২৩৮০, তিরমিযী ৭১৬, ইবনে মাজাহ ১৬৭৬, দারেমী, সুনান ১৬৮০, ইবনে খুযাইমাহ, সহীহ ১৯৬০, ইবনে হিব্বান, সহীহ মাওয়ারিদ ৯০৭নং, হাকেম, মুত্তাদরাক ১/৪২৭, দারাকুত্বনী, সুনান, বাইহাকী ৪/২১৯ প্রমুখ, ইরওয়াউল গালীল, আলবানী ৯৩০, সহীহুল জামেইস সাগীর, আলবানী ৬২৪৩নং)

<sup>4</sup> (আশ্শারহুল মুমতে' ৬/৪৩১)

<sup>5</sup> (সামানিয়া ওয়া আরবাউন সুআলান ফিস্-সিয়াম ১৫-পৃঃ)

### ৭। দূষিত রক্ত বের করা :

দেহ থেকে দূষিত রক্ত বের করলে রোযা নষ্ট হবে কি না - সে নিয়ে মতভেদের কথা পূর্বে আলোচিত হয়েছে এবং সঠিক মত এই যে, তাতে রোযা নষ্ট হবে না। অবশ্য পূর্বসতর্কতামূলক আমল এই যে, রোযাদার রোযা অবস্থায় দিনের বেলায় ঐ কাজ করবে না।<sup>1</sup>

### ৮। নিয়ত বাতিল করা :

নিয়ত প্রত্যেক ইবাদত তথা রোযার অন্যতম রুকুন। আর সারা দিন সে নিয়ত নিরবচ্ছিন্নভাবে মনে জাগ্রত রাখতে হবে; যাতে রোযাদার রোযা না রাখার বা রোযা বাতিল করার কোন প্রকার দৃঢ় সংকল্প না করে বসে। বলা বাহুল্য, রোযা না রাখার নিয়ত করলে এবং তার নিয়ত বাতিল করে দিলে সারাদিন পানাহার আদি না করে উপবাস করলেও রোযা বাতিল গণ্য হবে।<sup>2</sup>

পক্ষান্তরে যে ব্যক্তি কিছু খাওয়া অথবা পান করার প্রাথমিক ইচ্ছা পোষণ করার পর ধৈর্য ধরে পানাহার করার ঐ ইচ্ছা বাতিল করে পানাহার করে না, সে ব্যক্তির কেবল রোযা ভঙ্গার ইচ্ছা পোষণ করার ফলে রোযা নষ্ট হবে না; যতক্ষণ না সে সত্য সত্যই পানাহার করে নেবে। আর এর উদাহরণ সেই ব্যক্তির মত, যে নামাযে কথা বলার ইচ্ছা পোষণ করার পর কথা না বলে অথবা নামায পড়তে পড়তে হাওয়া ছাড়ার ইচ্ছা করার পর তা সামলে নিতে পারে। এমন ব্যক্তির যেমন নামায ও ওয়ূ বাতিল নয়, ঠিক তেমনি ঐ রোযাদারের রোযা।<sup>3</sup>

### ৯। মুরতাদ্দ হওয়া :

কোন সন্দেহ, কথা বা কাজের ফলে যদি কোন রোযাদার মুরতাদ্দ (কাফের) হয়ে যায় (নাউযু বিল্লাহি মিন যালিক), তাহলে সকলের মতে তার রোযা বাতিল হয়ে যাবে। অতঃপর সে যদি তওবা করে পুনরায় মুসলিম হয়, তাহলে ঐ রোযা তাকে কাযা করতে হবে; যদিও সে ঐ দিনে

<sup>1</sup> (সাবউনা মাসআলাহ ফিস-সিয়াম ৫৬নং)

<sup>2</sup> (দ্রঃ ফিকহুস সুন্নাহ ১/৪১২, আশশারহুল মুমতে' ৬/৩৭৬, সাওমু রামাযান ২৪পৃ, ফাসিঃ জিরাইসী ৮পৃ)

<sup>3</sup> (ইবনে উযাইমীন, ক্যাসেট, আহকামুন মিনাস সিয়াম)

রোযা নষ্টকারী কোন জিনিস ব্যবহার না করে। যেহেতু খোদ মুরতাদ্দ হওয়াটাই একটি রোযা নষ্টকারী কর্ম। তাতে সে কুফরী কোন বিশ্বাসের ফলে মুরতাদ্দ হোক অথবা কুফরী কোন সন্দেহ করার ফলে, আল্লাহ ও তদীয় রসূল কিংবা দ্বীনের কোন অংশ নিয়ে ব্যঙ্গ-বিদ্বেষ করে কুফরী কথা বলে মুরতাদ্দ হোক অথবা তা না করে যে কোন প্রকার কুফরী মন্তব্য করে। আর যদিও তার ও তার বাপের নামখানি মুসলিমের তবুও তার সকল ইবাদত প্রত্যাখ্যাত।<sup>1</sup>

১০। বেহুশ হওয়া :

রোযাদার যদি ফজর থেকে নিয়ে মাগরেব পর্যন্ত বেহুশ থাকে, তাহলে তার রোযা শুদ্ধ হবে না এবং তাকে ঐ দিনের রোযা কাযা রাখতে হবে। আর এ কথা পূর্বে আলোচিত হয়েছে।

## রোযা নষ্ট হওয়ার শর্তাবলী

উপর্যুক্ত রোযা নষ্টকারী (মাসিক ও নিফাসের খুন ব্যতীত) সকল জিনিস কেবল তখনই রোযা নষ্ট করবে, যখন তার সাথে ৩টি শর্ত অবশ্যই পাওয়া যাবে। আর সে শর্ত ৩টি নিম্নরূপঃ-

১. রোযাদার জানবে যে, এই জিনিস এই সময়ে ব্যবহার করলে তার রোযা নষ্ট হয়ে যাবে। অর্থাৎ, তা ব্যবহার করার সময় তার এ কথা অজানা থাকলে চলবে না যে, এই জিনিস রোযা নষ্ট করে অথবা এখন রোযার সময়।

২. তা যেন মনে স্মরণ রাখার সাথে ব্যবহার করে; ভুলে গিয়ে নয়।

৩. তা যেন নিজস্ব ইচ্ছা ও এখতিয়ারে ব্যবহার করে; অপরের তরফ থেকে বাধ্য হয়ে নয়।

কেননা, মহান আল্লাহ বলেন,

﴿وَلَيْسَ عَلَيْكُمْ جُنَاحٌ فِيمَا أَخْطَأْتُمْ بِهِ، وَلَكِنْ مَّا تَعَمَّدَتْ قُلُوبُكُمْ﴾

<sup>1</sup> (দ্রঃ আহকামুস সাওমি অল-ই'তিকাফ, আবু সারী মঃ আব্দুল হাদী ৮৩পৃঃ)



অর্থাৎ, কোন ব্যাপারে তোমরা ভুল করলে তোমাদের কোন অপরাধ নেই; কিন্তু ইচ্ছাকৃত করলে অপরাধ আছে। (কুরআনুল কারীম ৩৩/৫)

তিনি আরো বলেন,

﴿رَبَّنَا لَا تُؤَاخِذْنَا إِن نَّسِينَا أَوْ أَخْطَأْنَا﴾

অর্থাৎ, হে আমাদের প্রতিপালক! আমরা যদি ভুল ও ত্রুটি করে ফেলি, তাহলে তুমি আমাদেরকে অপরাধী করো না। (কুরআনুল কারীম ২/২৮৬)  
তিনি অন্যত্র বলেন,

﴿إِلَّا مَنْ أَكْرَهَ وَقَلْبُهُ مُطْمَئِنٌّ بِالْإِيمَانِ﴾

অর্থাৎ, (কেউ ঈমান আনার পর আল্লাহকে অস্বীকার করলে এবং কুফরীর জন্য হৃদয় মুক্ত রাখলে তার উপর আল্লাহর ক্রোধ পতিত হবে। আর তার জন্য আছে মহাশাস্তি। তবে তার জন্য নয়; যাকে (কুফরী করতে) বাধ্য করা হয়; কিন্তু তার চিত্ত ঈমানে অটল থাকে। (কুরআনুল কারীম ১৬/১০৬)

মহানবী ﷺ বলেন, “অবশ্যই আল্লাহ আমার জন্য আমার উম্মতের ভুল-ত্রুটি এবং বাধ্য হয়ে কৃত পাপকে মার্জনা করে দিয়েছেন।”<sup>1</sup>

আর এই ভিত্তিতে একাধিক মাসায়েল প্রমাণিত হয় :

❖ যদি কোন (নও-মুসলিম) স্বামী-স্ত্রী রোযা রেখে সঙ্গম করলে রোযা নষ্ট হয় -এ কথা না জেনে সঙ্গম করে ফেলে, অথবা ফজর উদয় হয়ে যাওয়ার সময় না জানতে পেরে (সময় বাকী আছে মনে করে) ভুল করে সঙ্গম করে ফেলে, তাহলে তাদের উপর কাযা-কাফফারা কিছুই ওয়াজেব নয়।

❖ স্বামী যদি মিলনের জন্য স্ত্রীকে জোর করে এবং স্ত্রী বাধা দেওয়ার চেষ্টা করা সত্ত্বেও বাধা দিতে পারঙ্গম না হয়ে সঙ্গম হয়েই যায়, তাহলে স্ত্রীর রোযা শুদ্ধ। কারণ, ঐ মিলনে তার ইচ্ছা ছিল না।

❖ রোযা রেখে ঘুমিয়ে থাকা অবস্থায় স্বপ্নে কেউ সঙ্গম করলে এবং

<sup>1</sup> (আহমাদ, মুসনাদ, ইবনে মাজাহ, ত্বাবারানী, মু'জাম, হাকেম, মুত্তাদিরাক, সহীহুল জামেইস সাগীর, আলবানী ১৭৩১নং)

তার ফলে সত্যসত্যই (স্বপ্নদোষ ও) বীর্যপাত হয়ে গেলে তার রোযা নষ্ট হবে না। কেননা, ঘুমন্ত ব্যক্তির স্বপ্নে কোন ইচ্ছা থাকে না। বরং তার উপর থেকে ফিরিশতার নেকী-বদী লেখার কলমও তুলে নেওয়া হয়।

❖ রোযাদার ভুলে কিছু খেয়ে অথবা পান করে নিলে রোযা নষ্ট হবে না। কারণ, রোযার কথা সে ভুলে গিয়েছিল। আর মহানবী ﷺ বলেন, “যে রোযাদার ভুলে গিয়ে পানাহার করে ফেলে, সে যেন তার রোযা পূর্ণ করে নেয়। এ পানাহার তাকে আল্লাহই করিয়েছেন।”<sup>1</sup> অন্য এক বর্ণনায় আছে, “যে ব্যক্তি রমায়ান মাসে ভুলবশতঃ রোযা নষ্টকারী কোন কাজ করে ফেলে, তার উপর কাযা ও কাফ্ফারা কিছুই নেই।”<sup>2</sup>

❖ যদি কেউ এই মনে করে খায় অথবা পান করে যে, সূর্য ডুবে গেছে অথবা এখনো ফজর উদয় হয় নি, তাহলে তার রোযা নষ্ট হবে না। যেহেতু সে না জেনে খেয়েছে।

❖ যদি ওযূ বা গোসল করতে গিয়ে অথবা সাঁতার কাটতে গিয়ে পেটে পানি চলে যায়, কিংবা নলে পানি, পেট্রোল অথবা অন্য কোন তরল পদার্থ মুখে করে টানতে গিয়ে গলার নিচে নেমে যায়, তাহলে তাতেও রোযা নষ্ট হবে না। কারণ, এ সবে রোযাদারের ইচ্ছা থাকে না।

❖ ঘুমিয়ে থাকা অবস্থায় যদি কারো মুখে খাবার (যেমন পান ইত্যাদি) থেকে যায়, অতঃপর সেই অবস্থায় ফজর হয়ে যায়, তাহলে জাগার সাথে সাথে তা উগলে ফেলে দিয়ে কুল্লি করে নিলে তার রোযা হয়ে যাবে। কেননা, সে ঘুমিয়ে ছিল এবং ফজর হওয়ার পর সে ইচ্ছাকৃত সে খাবার গিলে খায়নি।

❖ কেউ জ্ঞানশূন্য হয়ে গেলে তার মুখে পানি দিয়ে যদি তার জ্ঞান ফিরে যায়, তাহলে তার রোযা শুদ্ধ। কারণ, ঐ পানি সে নিজের ইচ্ছায় খায় নি।<sup>3</sup>

<sup>1</sup> (বুখারী ১৯৩৩, মুসলিম ১১৫৫, আবু দাউদ ২৩৯৮, তিরমিযী, দারেমী, ইবনে মাজাহ ১৬৭৩, দারাকুত্নী, সুনান, বাইহাকী ৪/২২৯, আহমাদ, মুসনাদ ২/৩৯৫, ৪২৫, ৪৯১, ৫১৩)

<sup>2</sup> (ইবনে হিব্বান, সহীহ মাওয়ারিদ ৯০৬নং, হাকেম, মুত্তাদরাক ১/৪৩০, ইরওয়াউল গালীল, আলবানী ৪/৮৭)

<sup>3</sup> (আশ্শারহুল মুমতে' ৬/৪০১)

এখানে একটি সতর্কতার বিষয় এই যে, যদি কেউ কোন রোযাদারকে না জেনে বা ভুলে খেতে অথবা পান করতে প্রত্যক্ষ করে, তাহলে তাকে রোযার কথা স্মরণ করিয়ে দেওয়া জরুরী। যেহেতু মহান আল্লাহর ব্যাপক নির্দেশ হল,

﴿وَتَعَاوَنُوا عَلَى الْبِرِّ وَالتَّقْوَى﴾

অর্থাৎ, তোমরা সংকার্য ও আল্লাহভীতির ব্যাপারে একে অপরকে সাহায্য কর। (কুরআনুল কারীম ৫/২)

আর মহানবী ﷺ-এর ব্যাপক নির্দেশ হল, “আমি ভুলে গেলে তোমরা আমাকে স্মরণ করিয়ে দিও।”<sup>1</sup>

তাছাড়া আসলে এটি একটি আপত্তিকর কর্ম। অতএব তা প্রতিহত করা ওয়াজেব।<sup>2</sup>

❖ বমি সামলাতে না পারলে রোযার কোন ক্ষতি হয় না। কারণ, তা রোযাদারের এখতিয়ারের বাইরে। আর তার দলীল হল উল্লেখিত স্পষ্ট হাদীস। এ ক্ষেত্রে মুখ ভর্তি হওয়া বা না হওয়ার কোন শর্ত কার্যকর নয়।

<sup>1</sup> (বুখারী ৪০১, মুসলিম ৫৭২, আবু দাউদ, নাসাই, ইবনে মাজাহ)

<sup>2</sup> (ইবনে উযাইমীন ফাসিঃ মুসনিদ ৪৬পৃঃ, সাবউনা মাসআলাহ ফিস-সিয়াম ৪৪নং)

## দশম অধ্যায়

# রমাযানে যে যে কাজ করা রোযাদারের কর্তব্য

মাহাত্ম্যপূর্ণ রমাযান মাসে কি কি নেক কাজ করা কর্তব্য তা উল্লেখ করার পূর্বে কয়েকটি বিষয় লক্ষ্যণীয় :-

(এই মৌসমের মূল্য ও মাহাত্ম্য প্রকৃতভাবে উপলব্ধি করা। আপনি এ কথা স্মরণে রাখবেন যে, যদি এই সওয়াবের মৌসম আপনার হাত ছাড়া হয়ে যায়, তাহলে তা পুনরায় ফিরে পাওয়ার কোন নিশ্চয়তা নেই। তাছাড়া এটি হল সংকীর্ণ সময়ের একটি সুবর্ণ সুযোগ। আল্লাহ সত্যই বলেছেন,

﴿أَيَّامًا مَّعْدُودَاتٍ﴾

“তা গোনা-গাঁথা কয়েকটি দিন।” (কুরআনুল কারীম ২/১৮৪)

‘রমাযান এসে গেল’ এবং ‘রমাযান শেষ হয়ে গেল’ লোকেদের এই উভয় উজির মাঝে ব্যবধান কত সংকীর্ণ! এ ক্ষেত্রে সাধারণভাবে অস্পষ্ট উপলব্ধি থাকা যথেষ্ট নয় যে, রমাযান মাস হল একটি মাহাত্ম্যপূর্ণ মৌসম।

১. মর্যাদা ও সওয়াবের দিক থেকে আমলসমূহের মাঝে তারতম্য আছে। সুতরাং তাতে কোন আমল বড়। আবার কোন আমল ছোট। কোন আমল আল্লাহর নিকট পছন্দনীয়; কিন্তু অন্য কোন আমল তাঁর নিকট অধিক পছন্দনীয়। অতএব মুসলিমের উচিত, সেই আমল করতে অধিক চেষ্টা ও যত্নবান হওয়া, যা সবার চাইতে শ্রেষ্ঠ আমল, মহান আল্লাহর নিকট অধিক পছন্দনীয় এবং সওয়াবের দিক থেকে অধিক মর্যাদাসমৃদ্ধ।<sup>১</sup>

সলফে সালেহীন প্রত্যেক আমলকে পূর্ণাঙ্গ ও সুনিপুণ করার জন্য যথাসাধ্য প্রয়াস চালাতেন। তারপরেও তা আল্লাহর দরবারে কবুল হবে কি না তা নিয়ে চিন্তাগ্রস্ত থাকতেন। ভয় করতেন যে, তাঁর সে আমল হয়তো প্রত্যাখ্যাত হবে। আর তাঁরা তো তাঁরা, যাঁরা

﴿وَالَّذِينَ يُؤْتُونَ مَا آتَوْا وَقُلُوبُهُمْ وَجِلَةٌ﴾

<sup>১</sup> (কাই নাস্তাফীদা মিন রামাযান, ফাহদ বিন সুলাইমান ৪৬পৃঃ)

“সশঙ্ক ও ভীত-কম্পিত হৃদয়ে দান করে।” (কুরআনুল কারীম ২৩/৬০)

হযরত আলী (رضي الله عنه) বলেন, ‘আমল করার চাইতে তার কবুল হওয়ার ব্যাপারে অধিক যত্নবান হও। তোমরা কি শুননি, মহান আল্লাহ বলেন,

﴿إِنَّمَا يَتَقَبَّلُ اللَّهُ مِنَ الْمُتَّقِينَ﴾

অর্থাৎ, আল্লাহ কেবল মুত্তাকী (পরহেযগার) লোকদের কাছ থেকেই (আমল) গ্রহণ করে থাকেন।’ (কুরআনুল কারীম ৫/২৭)

হাসান বাসরী (রঃ) বলেন, ‘মহান আল্লাহ রমাযান মাসকে তাঁর বান্দাদের জন্য প্রতিযোগিতার ময়দান স্বরূপ নির্ধারিত করেছেন; যার মধ্যে তারা তাঁর সন্তুষ্টি লাভের জন্য আপোসে প্রতিযোগিতা করতে পারে। বলা বাহুল্য, কিছু লোক অগ্রবর্তী হয়ে সফলকাম হয়েছে এবং অন্য কিছু লোক পশ্চাদ্বর্তী হয়ে ক্ষতিগ্রস্ত হয়েছে। অতএব অবাক লাগে সেই খেল-তামাশায় মত্ত ব্যক্তিকে দেখে; যে সেই দিনেও নিজ খেলায় মত্ত থাকে, যেদিনে সংকর্মশীলরা সাফল্য লাভ করেন এবং অকর্মণ্যরা হয় ক্ষতিগ্রস্ত।’<sup>1</sup>

রমাযান মাসে যে যে আমল করা রোযাদারের জন্য কর্তব্য তা নিম্নরূপঃ-

## ১। তারাবীহর নামায বা কিয়ামে রামাযান

কিয়ামে রামাযান বা রমাযানের কিয়ামকে সুলাতুত তারাবীহ বা তারাবীহর নামায বলা হয়। ‘তারাবীহ’ মানে হল আরাম করা। যেহেতু সলফে সালাহীনগণ ৪ রাকআত নামায পড়ে বিরতির সাথে বসে একটু আরাম নিতেন, তাই তার নামও হয়েছে তারাবীহর নামায। আর ঐ আরাম নেওয়ার দলীল হল মা আয়েশার হাদীস; যাতে তিনি বলেন, ‘নবী (ﷺ) ৪ রাকআত নামায পড়তেন। সুতরাং তুমি সেই নামাযের সৌন্দর্য ও দৈর্ঘ্যের ব্যাপারে জিজ্ঞাসা করো না। (অর্থাৎ অত্যন্ত সুন্দর ও দীর্ঘ হত।) অতঃপর তিনি ৪ রাকআত নামায পড়তেন। সুতরাং তুমি সেই নামাযের সৌন্দর্য ও দৈর্ঘ্যের ব্যাপারে জিজ্ঞাসা করো না। অতঃপর তিনি ৩ রাকআত (বিতর) নামায পড়তেন।’<sup>2</sup>

<sup>1</sup> (আল-আশরফুল আওয়ালিক মিন রামাযান থেকে উদ্ধৃত)

<sup>2</sup> (বুখারী ১১৪৭, মুসলিম ৭৩৮নং)

উক্ত হাদীসের মানে হল, তিনি প্রথম ৪ রাকআত নামাযকে এক সময়ে একটানা পড়েছেন। অর্থাৎ, তিনি ২ রাকআত নামায পড়ার পর সাথে সাথেই আবার ২ রাকআত নামায পড়তেন। অতঃপর বসে বিরতি নিতেন। অতঃপর তিনি উঠে পুনরায় ২ রাকআত নামায পড়ার পর সাথে সাথে আবার ২ রাকআত পড়তেন। অতঃপর আবার বসে একটু জিড়িয়ে নিতেন এবং সবশেষে ৩ রাকআত বিতর পড়তেন। এখান থেকেই সলফগণ ১১ রাকআত নামাযের ক্ষেত্রে এই পদ্ধতি গ্রহণ করেছেন এবং তাই তাঁরা প্রথমে ২ সালামে ৪ রাকআত নামায পড়ে একটু আরাম নেন। অতঃপর আবার ২ সালামে ৪ রাকআত নামায পড়ে পরিশেষে ৩ রাকআত বিতর পড়েন।<sup>1</sup>

### ❖ তারাবীহর নামাযের মান ও তার মাহাত্ম্য :

তারাবীহর নামায নারী-পুরুষ সকলের জন্য সুন্নাতে মুআক্কাদাহ। বহু হাদীসগ্রন্থে হযরত আবু হুরাইরা (رضي الله عنه) কর্তৃক বর্ণিত, তিনি বলেন, ‘আল্লাহর রসূল ﷺ কিয়ামে রামাযানের ব্যাপারে (সকলকে) উৎসাহিত করতেন; কিন্তু তিনি বাধ্যতামূলকরূপে আদেশ দিতেন না। তিনি বলতেন, “যে ব্যক্তি ঈমান রেখে সওয়াবের আশায় রমাযানের কিয়াম করবে, সে ব্যক্তির পূর্বকৃত পাপসমূহ মাফ হয়ে যাবে।”<sup>2</sup>

হযরত আয়েশা (রাঃ) বলেন, ‘একদা নবী ﷺ মসজিদে নামায পড়লেন। তাঁর অনুসরণ (ইজ্জিদা) করে অনেক লোক নামায পড়ল। অতঃপর পরের রাতে নামায পড়লে লোক আরো বেশী হল। তৃতীয় রাতে লোকেরা জমায়েত হলে তিনি বাসা থেকে বের হলেন না। ফজরের সময় তিনি তাদের উদ্দেশ্যে বললেন, “আমি তোমাদের আগ্রহ লক্ষ্য করেছি। তোমাদের নিকট (নামাযের জন্য) বের হতে আমার কোন বাধা ছিল না। কিন্তু আমি আশঙ্কা করলাম যে, ঐ নামায তোমাদের জন্য ফরয করে দেওয়া হবে।” আর এ ঘটনা হল রমাযানের।<sup>3</sup>

<sup>1</sup> (আশ্শারহুল মুমতে' ৪/১৩, ৬৫, ৬৭)

<sup>2</sup> (আহমাদ, মুসনাদ ২/২৮১, ৫২৯, বুখারী ১৯০১, মুসলিম ৭৫৯, সহীহ আবু দাউদ ১২২২, সহীহ তিরমিযী, আলবানী ৬৪৮নং)

<sup>3</sup> (বুখারী ২০১২, মুসলিম ৭৬১নং)

### ❖ তারাবীহর সময় :

তারাবীহর নামায আদায় করার সময় হল, রমাযানের (চাঁদ দেখার রাত সহ) প্রত্যেক রাত্রে এশার ফরয ও সুন্নত নামাযের পর বিতর পড়ার আগে। অবশ্য শেষ রাত্রে ফজর উদয় হওয়ার আগে পর্যন্ত এর সময় বিস্তীর্ণ। যেহেতু মহানবী ﷺ প্রথম রাত্রে তার প্রথম ভাগে শুরু করে রাত্রে এর এক-তৃতীয়াংশ অতিবাহিত হওয়া পর্যন্ত নামায পড়েছিলেন। দ্বিতীয় রাত্রেও তার প্রথম ভাগে শুরু করে রাত্রে অর্ধেকাংশ অতিবাহিত হওয়া পর্যন্ত নামায পড়েছিলেন এবং তৃতীয় রাত্রে তার প্রথম ভাগে শুরু করে শেষ রাত অবধি নামায পড়েছিলেন।<sup>1</sup>

আর হযরত উমার (رضي الله عنه) বলেন, 'রাতের প্রথম ভাগে নামায অপেক্ষা তার শেষ ভাগের নামাযই অধিক উত্তম।' অবশ্য লোকেরা তাঁর খেলাফতকালে রাত্রে প্রথম ভাগেই তারাবীহ পড়ত।<sup>2</sup>

### ❖ তারাবীহর নিয়ত :

নিয়ত মানে মনের সংকল্প। আর তার স্থান হল অন্তর; মুখ নয়। মহানবী ﷺ ও তাঁর সাহাবাদের কেউই কোন নির্দিষ্ট শব্দ মুখে উচ্চারণ করতেন না। তাই তা মুখে উচ্চারণ করা বিদআত। তাছাড়া নিয়তের জন্য কোন বাঁধা-ধরা শব্দাবলীও নেই।

জ্ঞাতব্য যে, তারাবীহর শুরুতেই কেউ যদি সমস্ত নামাযের একবার নিয়ত করে নেয়, তাহলে তাই যথেষ্ট। প্রত্যেক ২ রাকআতে নিয়ত করা জরুরী নয়। অবশ্য নামায পড়তে পড়তে কেউ কোন প্রয়োজনে তা ছেড়ে দিয়ে পুনরায় পড়তে লাগলে নতুন নিয়তের দরকার।

সতর্কতার বিষয় যে, নিয়ত করা জরুরী; কিন্তু পড়া বিদআত।

### ❖ তারাবীহর রাকআত-সংখ্যা :

সুন্নত ও আফযল হল এই নামায বিতর সহ ১১ রাকআত পড়া।

<sup>1</sup> (সহীহ আবু দাউদ ১২২৭, সহীহ তিরমিযী, আলবানী ৬৪৬, সহীহ নাসাঈ, আলবানী ১৫১৪, সহীহ ইবনে মাজাহ, আলবানী ১৩২৭নং)

<sup>2</sup> (বুখারী ২০১০নং)

মহানবী ﷺ-এর রাতের নামায সম্বন্ধে সর্বাধিক বেশী খবর রাখতেন যিনি, সেই আয়েশা (রাঃ)কে জিজ্ঞাসা করা হল যে, রমাযানে আল্লাহর রসূল ﷺ-এর নামায কত রাকআত ছিল? উত্তরে তিনি বললেন, 'তিনি রমাযানে এবং অন্যান্য মাসেও ১১ রাকআত অপেক্ষা বেশী নামায পড়তেন না।'<sup>1</sup>

সায়েব বিন ইয়াযীদ বলেন, '(খলীফা) উমার উবাই বিন কা'ব ও তামীম আদ-দারীকে আদেশ করেছিলেন, যেন তাঁরা রমাযানে লোকদের নিয়ে ১১ রাকআত তারাযীহ পড়েন।'<sup>2</sup>

কিছু উলামা বলেন, কিন্তু যদি কেউ তার চাইতে বেশী নামায পড়তে চায়, তাহলে তাতে কোন বাধা ও ক্ষতি নেই। কারণ, রাতের নামায প্রসঙ্গে নবী ﷺ-কে জিজ্ঞাসা করা হলে উত্তরে তিনি বললেন, "রাতের নামায ২ রাকআত ২ রাকআত করে। অতঃপর তোমাদের কেউ যখন ফজর হয়ে যাওয়ার ভয় করে, তখন সে যেন ১ রাকআত বিতর পড়ে নেয়। এতে তার পড়া নামাযগুলো বেজোড় হয়ে যাবে।"<sup>3</sup> বলা বাহুল্য, উক্ত নির্দেশ দেওয়ার সময় তিনি রাতের নামাযের কোন নির্দিষ্ট রাকআত নির্ধারিত করেননি; না রমাযানের এবং না অরমাযানের।

তাছাড়া খোদ মহানবী ﷺ কখনো কখনো ১৩ রাকআত নামাযও পড়েছেন। আর তা এ কথারই দলীল যে, রাতের নামাযের ব্যাপারে কোন সংকীর্ণতা নেই; অর্থাৎ তার এমন কোন নির্দিষ্ট রাকআত-সংখ্যা নেই যার অন্যথা করা যাবে না। তবে অবশ্য সেই সংখ্যার নামায পড়তে অভ্যাসী হওয়া অধিক উত্তম ও পূর্ণাঙ্গ আমল, যে সংখ্যার কথা মহানবী ﷺ-এর সুন্নাহতে (খোদ আমলে) এসেছে। পরন্তু সেই সাথে নামায এমন ধীরে-সুস্থে ও লম্বা করে পড়া উচিত, যাতে নামাযীদের কষ্টবোধ না হয়। আর এতে কোন সন্দেহের অবকাশ নেই যে, উক্ত (১১ রাকআত) সংখ্যাই সাধারণ মানুষের জন্য অধিকতর সহজ এবং ইমামের জন্যও অধিক উপযোগী। এতে সকলের রুকু, সিজদা ও কিরাআতে বিনয় রাখা, ধীরে ধীরে স্পষ্টভাবে কুরআন পড়া ও তার অর্থ হৃদয়ঙ্গম করা এবং প্রত্যেক

<sup>1</sup> (বুখারী ১১৪৭, মুসলিম ৭৩৮-নং)

<sup>2</sup> (মালেক, মুওয়াত্তা ২৪৯নং, বাইহাকী ২/৪৯৬)

<sup>3</sup> (বুখারী ৯৯০, মুসলিম ৭৪৯নং)



বিষয়ে তাড়াহুড়া না করার ব্যাপারে বড় সহযোগিতা পাওয়া যাবে।<sup>1</sup>

পক্ষান্তরে ২০ রাকআত তারাবীহ নির্দিষ্ট হওয়ার ব্যাপারে কোন হাদীস নেই। সাহাবাদের তরফ থেকে যে আসার বর্ণিত করা হয়, তার সবগুলিই যয়ীফ।<sup>2</sup>

### ❖ তারাবীহর জামাআত :

রমায়ানের কিয়াম জামাআতে পড়া বিধেয়; যেমন একাকী পড়াও বৈধ। তবে মসজিদে জামাআত সহকারে এই নামায আদায় করাই (অধিকাংশ উলামার মতে) উত্তম। পূর্বে উল্লেখিত হয়েছে যে, রসূল ﷺ সাহাবাদেরকে নিয়ে উক্ত নামায জামাআত সহকারে আদায় করেছেন। অবশ্য তা ফরয হয়ে যাওয়ার আশঙ্কায় তিনি জামাআত করে পড়া বর্জন করেছিলেন। অতঃপর আল্লাহর রসূল ﷺ-এর ইন্তেকাল হল। তখনও ঐ নামাযের অবস্থা অনুরূপ জামাআতহীন ছিল। অনুরূপ ছিল আবু বাকরের খিলাফতকালে এবং উমারের খিলাফতের প্রথম দিকেও একই অবস্থা ছিল। অতঃপর উমার (رضي الله عنه) সকলকে একটি ইমামের পশ্চাতে জামাআতবদ্ধ করলেন।

আব্দুর রহমান বিন আব্দ আলক্বারী বলেন, একদা রমায়ানের রাতে উমার বিন খাত্তাবের সাথে মসজিদে গেলাম; দেখলাম, লোকেরা ছিন্ন ছিন্ন বিভিন্ন জামাআতে বিভক্ত। কেউ তো একাকী নামায পড়ছে। কারো নামাযের ইজ্জিদা করে কিছু লোক জামাআত করে নামায পড়ছে। তা দেখে উমার বললেন, ‘আমি মনে করি, যদি ওদেরকে একটি ক্বারী (ইমামের) পশ্চাতে জামাআতবদ্ধ করে দিই, তাহলে তা উত্তম হবে।’ অতঃপর তিনি তাতে সংকল্পবদ্ধ হয়ে উবাই বিন কা’বের ইমামতিতে সকলকে এক জামাআতবদ্ধ করলেন। তারপর আর এক রাত্রিতে আমি তাঁর সাথে বের হয়ে গেলাম। তখন লোকেরা তাদের ইমামের পশ্চাতে জামাআত সহকারে

<sup>1</sup> (দ্রঃ আশশারহুল মুমতে’ ৪/৭০, ৭৩, ইবনে বায সালাতুল লাইল, আলবানী ৫পৃঃ, রিসালাতানি মু’জাযাতানি ফিয যাকাতি অসসিয়াম ২৬পৃঃ, ফুসুলুন ফিস-সিয়ামি অত-তারাবীহি অয-যাকাহ ১৭পৃঃ)

<sup>2</sup> (মুহাদ্দিস আল্লামা আলবানীর পুস্তিকা ‘সালাতুত তারাবীহ’ দ্রষ্টব্য)

নামায পড়ছে। তা দেখে উমার বললেন, ‘এটা একটি উত্তম আবিষ্কার।’<sup>1</sup>

মহানবী ﷺ বলেন, “যে ব্যক্তি ইমামের সাথে নামায পড়ে এবং তার নামায শেষ করা পর্যন্ত তার সঙ্গে থাকে (ইজ্জিদা করে), সেই ব্যক্তির জন্য সারা রাত্রি কিয়াম করার সওয়াব লিপিবদ্ধ করা হয়।”<sup>2</sup> এই হাদীসও প্রমাণ করে যে, তারাভীহর নামাযের জামাআত ও ইমাম আছে।

### ❖ তারাভীহর জামাআতে মহিলাদের অংশগ্রহণ

যদি কোন ফিতনা সৃষ্টির আশঙ্কা না থাকে, তাহলে তারাভীহর জামাআতে মহিলাদের উপস্থিত হওয়া দোষাবহ নয়। অবশ্য শর্ত হল, তারা যেন সম্মতপূর্ণ লেবাস পরিধান করে, বেপর্দা হয়ে নিজেদের সৌন্দর্য প্রকাশ না করে এবং কোন প্রকারের সুবাস ও সুগন্ধি ব্যবহার না করে মসজিদে যায়।<sup>3</sup> মহানবী ﷺ বলেন, “যে মহিলা সুগন্ধি ব্যবহার করেছে, সে যেন আমাদের সাথে এশার নামাযে উপস্থিত না হয়।”<sup>4</sup>

এতদসত্ত্বেও স্বগৃহে নামায পড়াই তাদের জন্য উত্তম। প্রিয় নবী ﷺ বলেন, “তোমরা তোমাদের মহিলাদেরকে মসজিদে যেতে বাধা দিও না। অবশ্য তাদের ঘরই তাদের জন্য উত্তম।”<sup>5</sup>

মহানবী ﷺ শেষ রাত্রে নামায পড়তে দাঁড়িয়ে তাঁর সাথে তাঁর পরিবার ও স্ত্রীগণকে এবং সেই সাথে সাহাবাবর্গকে নিয়ে জামাআত করে নামায পড়েছিলেন।<sup>6</sup>

বলা বাহুল্য, জ্ঞানী মহিলার উচিত, মসজিদে উপস্থিত হয়ে নামায পড়া তার জন্য উত্তম মনে করে, তাহলে সে যেন সেই আকার ও লেবাসে বের

<sup>1</sup> (বুখারী ২০১০নং)

<sup>2</sup> (আহমাদ, মুসনাদ, সহীহ আবু দাউদ ১২২৭, সহীহ তিরমিযী, আলবানী ৬৪৬, সহীহ নাসাঈ, আলবানী ১৫১৪, সহীহ ইবনে মাজাহ, আলবানী ১৩২৭নং)

<sup>3</sup> (ফুসূলুন ফিস-সিয়ামি অত-তারাভীহি অয-যাকাহ ১৯পৃঃ)

<sup>4</sup> (আহমাদ, মুসনাদ ২/৩০৪, মুসলিম ৪৪৪, আবু দাউদ ৪১৭৫নং, নাসাঈ)

<sup>5</sup> (আহমাদ, মুসনাদ ২/৭৬, ৭৭, সহীহ আবু দাউদ ৫৩০নং) (এ বিষয়ে বিস্তারিত দৃষ্টব্য ‘সুলাতি মুবাশশির’ ২/১৯৪-১৯৬)

<sup>6</sup> (আহমাদ, মুসনাদ, সহীহ আবু দাউদ ১২২৭, সহীহ তিরমিযী, আলবানী ৬৪৬, সহীহ নাসাঈ, আলবানী ১৫১৪, সহীহ ইবনে মাজাহ, আলবানী ১৩২৭নং)

হয়, যে আকার ও লেবাস সলফদের মহিলারা মসজিদে যাওয়ার জন্য ব্যবহার করতেন।

মহিলার জন্য জরুরী, মসজিদে যাওয়ার পথে সং-নিয়ত মনে উপস্থিত রাখা। তাকে মনে রাখতে হবে যে, সে মসজিদে নামায আদায় করতে এবং মহান আল্লাহর আয়াত শ্রবণ করতে যাচ্ছে। মনের মধ্যে এই খেয়াল থাকলে তার আকারে-চলনে শান্তভাব, শিষ্টতা ও গান্ধীর্ষ প্রকাশ পাবে এবং তার প্রতি পুরুষের দৃষ্টি আকৃষ্ট হবে না।

দুঃখের বিষয় যে, কতক মহিলা প্রাইভেট ড্রাইভারের সাথে একাকিনী মসজিদে যায়। আর এতে সে নফল আদায় করে সওয়াব কামাতে গিয়ে হারাম কাজ করে গোনাহ কামিয়ে আসে। অথচ তার এ কাজ যে বিরাট মুর্খামি এবং নিরেট বোকামি তা বলাই বাহুল্য।

মহিলাদের জন্য উচিত নয়, সে রকম কোন শিশু সঙ্গে নিয়ে মসজিদে আসা, যারা মায়ের নামায-ব্যস্ততায় ধৈর্য রাখতে পারবে না এবং কান্না, চিৎকার, চোঁচামেচি বা ছুটাছুটি করে, মসজিদের কুরআন, আসবাব-পত্র ইত্যাদি নিয়ে খেলা করে সকল নামাযীর ডিষ্টার্ব করবে।<sup>1</sup>

### ❖ মহিলাদের আপোসে তারাবীহর জামাআত :

কোন কিশোর, পুরুষ বা মহিলার ইমামতিতে কোন বাড়িতে তারাবীহর নামাযের জন্য মহিলাদের পৃথক জামাআত করা দোষাবহ নয়।

হযরত আয়েশার ক্রীতদাস যাকওয়ান রমাযানে কুরআন দেখে তাঁর ইমামতি করতেন।<sup>2</sup>

জাবের বিন আব্দুল্লাহ বলেন, একদা ক্বারী সাহাবী হযরত উবাই বিন কা'ব (رضي الله عنه) আল্লাহর রসূল (ﷺ)-এর কাছে এসে আরজ করলেন, 'হে আল্লাহর রসূল! (রমাযানের) গতরাত্রে আমি একটি (অস্বাভাবিক) কাজ করেছি।' তিনি বললেন, "সেটা কি?" উবাই বললেন, "কিছু মহিলা আমার ঘরে জমা হয়ে বলল, আপনি (ভালো ও বেশী) কুরআন পড়তে পারেন,

<sup>1</sup> (আশরু অক্বাফাতিল লিন্নিসা ফী রামাযান ৭-৮-পৃঃ)

<sup>2</sup> (বুখারী তা'লীকান ১৩৯পৃঃ, ইবনে আবী শাইবাহ, মুসান্নাফ ৭২১৬নং, আব্দুর রাযযাক, মুসান্নাফ)

আমরা পারি না। অতএব আপনি আজ আমাদের ইমামতি করেন। তাদের এই অনুরোধে আমি তাদেরকে নিয়ে ৮ রাকআত এবং বিতর পড়েছি।' এ কথা শুনে মহানবী ﷺ চুপ থাকলেন। অর্থাৎ তাঁর এই নীরব থাকা এ ব্যাপারে তাঁর মৌনসম্মতির সূত্র হয়ে গেল।<sup>1</sup>

অবশ্য এ ক্ষেত্রে শর্ত হল, মহিলা একাকিনী হলে সে ইমাম যেন তার কোন এগানা হয় এবং বেগানা না হয়। নতুবা মহিলা যেন একাধিক থাকে এবং তারা পর্দার সাথে থাকে। আর সর্বক্ষেত্রে যেন কোন প্রকার ফিতনার ভয় না থাকে।<sup>2</sup>

উম্মে অরাকাহ বিন নাওফাল (রাঃ)কে মহানবী ﷺ তাঁর পরিবারের মহিলাদের ইমামতি করতে আদেশ করেছিলেন।<sup>3</sup>

অবশ্য এ ক্ষেত্রে মহিলা ইমাম মহিলাদের কাতার ছেড়ে পুরুষের মত সামনে একাকিনী দাঁড়াবে না। বরং কাতারের মধ্যখানে দাঁড়িয়ে ইমামতি করবে। হযরত উম্মে সালামাহ মহিলাদের ইমামতি করার সময় কাতারের মাঝখানেই দাঁড়াতে।<sup>4</sup> অনুরূপ বর্ণিত আছে হযরত আয়েশা থেকেও।<sup>5</sup>

#### ❖ তারাবীহর জন্য অর্থের বিনিময়ে ইমাম নিয়োগ :

তারাবীহর নামাযের জন্য সুমধুর কণ্ঠবিশিষ্ট হাফেয-ক্বারী ইমাম অর্থের বিনিময়ে নিয়োগ দেয়া দোষাবহ নয়। তবে (ক্বারী সাহেবের তরফ থেকে) পারিশ্রমিক নির্দিষ্ট করা উচিত নয়। যেহেতু এক জামাআত সলফ এ কাজকে অপছন্দ করেছেন। অবশ্য মসজিদের জামাআত যদি অনির্দিষ্ট-ভাবে তাঁকে অনেক কিছু দিয়ে পুরস্কৃত বা সাহায্য করেন, তাহলে তাতে কোন ক্ষতি নেই।

পক্ষান্তরে এমন ইমামের পিছনে নামায শুদ্ধ। বেতন নির্দিষ্ট করলেও নামাযের কোন ক্ষতি হবে না - ইন শাআল্লাহ। কারণ, এমন ইমামের

<sup>1</sup> (ত্বাবারানী, মু'জাম, আবু য়্যা'লা, মাজমাউয যাওয়ালেদ ২/৭৪, সালাতুত তারাবীহ আলবানী ৬৮-পৃঃ)

<sup>2</sup> (আশশারহুল মুমতে' ৪/৩৫২)

<sup>3</sup> (আবু দাউদ ৫৯১-৫৯২নং, দারাকুত্বনী, সুনান ১০৭১, ১৪৯১নং)

<sup>4</sup> (দারাকুত্বনী, সুনান ১৪৯৩নং, বাইহাকী ৩/১৩১, ইবনে আবী শাইবাহ, মুসান্নাফ, আবু রাযযাক, মুসান্নাফ)

<sup>5</sup> (দারাকুত্বনী, সুনান ১৪৯২নং, আবু রাযযাক, মুসান্নাফ, মুহাল্লা ইবনে হাযম ৩/১৭১-১৭৩)

প্রয়োজন পড়েই থাকে। তবে চুক্তিগতভাবে বেতন নির্ধারিত করার কাজ না করাই উচিত। জামাআতের সুস্থ বিবেক অনুযায়ী ইমাম বিনিময়-সাহায্য পাবেন; তবে তা শর্ত-সাপেক্ষ হওয়া উচিত নয়। এটাই হল উত্তম ও পূর্বসতর্কতামূলক কর্ম। এ রকমই বলেছেন সলফের একটি জামাআত। রাহিমাছমুল্লাহ।

আর এ কথার ইঙ্গিত রয়েছে হাদীসে। মহানবী ﷺ উসমান বিন আবুল আস (رضي الله عنه) কে বলেছিলেন, “এমন মুআযযিন রাখ, যে আযান দেওয়ার বিনিময়ে কোন পারিশ্রমিক গ্রহণ করে না।”<sup>1</sup> এ নির্দেশ সম্পৃক্ততঃ যদিও মুআযযিনের জন্য, তবুও ইমামের ক্ষেত্রে এ নির্দেশ অধিকতর প্রযোজ্য।

বলা বাহুল্য, হাফেয ও ক্বুরী সাহেবদের উচিত, তাঁরাও যেন কুরআন-তেলাঅতকে অর্থাপার্জনের মাধ্যমরূপে ব্যবহার না করেন। যেহেতু মহানবী ﷺ বলেন, “তোমরা কুরআন পাঠ কর, তার উপর আমল কর, (তার নির্দেশ অনুযায়ী কাজ কর,) তার প্রতি বৈমুখ হয়ে যেও না, তাতে অতিরঞ্জন করো না, তার মাধ্যমে উদরপূর্তি করো না এবং তার অসীলায় ধনবৃদ্ধিও করো না।”<sup>2</sup>

### ❖ তারাবীহর নামাযের পদ্ধতি :

মহানবী ﷺ-এর রাতের নামায সাধারণভাবে একই নিয়ম-পদ্ধতির অনুসারী ছিল না। বরং তাঁর এই নামায ছিল একাধিক ধরনের একাধিক নিয়মের। নিম্নে সংক্ষেপে সেই সব নিয়মাবলী মুসলিমের অবগতির জন্য উল্লেখ করা হল :-

১। তিনি ১৩ রাকআত নামায পড়তেন। প্রথমে হাক্বা করে ২ রাকআত দিয়ে শুরু করতেন। প্রত্যেক ২ রাকআতে সালাম ফিরতেন। প্রত্যেক ২ রাকআতকে পূর্বের অপেক্ষা হাক্বা করতেন। এইভাবে ১০ রাকআত পড়ার পর পরিশেষে ৩ রাকআত বিত্ব পড়তেন।<sup>3</sup>

<sup>1</sup> (সহীহ আবু দাউদ ৪৯৭নং)

<sup>2</sup> (আহমাদ, মুসনাদ, ত্বাবারানী, মু'জাম, আবু য্যা'লা, প্রমুখ, সিলসিলাহ সহীহাহ, আলবানী ২৬০নং)

<sup>3</sup> (মুসলিম প্রমুখ সালাতুত তারাবীহ আলবানী ৮৬পৃঃ দ্রঃ)

২। তিনি কোন রাতে ১৩ রাকআত নামায পড়তেন। তার মধ্যে প্রত্যেক ২ রাকআতে সালাম ফিরে ৮ রাকআত নামায পড়তেন এবং সবশেষে এক সালামে ৫ রাকআত বিত্ৰ পড়তেন। আর এই ৫ রাকআত বিত্ৰের মাঝে কোথাও বসতেন না এবং সালামও ফিরতেন না।<sup>1</sup>

৩। তিনি কোন রাতে ১১ রাকআত নামায পড়তেন। প্রত্যেক ২ রাকআতে সালাম ফিরে ১০ রাকআত পড়তেন এবং পরিশেষে ১ রাকআত বিত্ৰ পড়তেন।<sup>2</sup>

৪। কোন রাতে তিনি ১১ রাকআত নামায পড়তেন। এক সালামে ৪ রাকআত, অতঃপর আর এক সালামে ৪ রাকআত। তারপর ৩ রাকআত বিত্ৰ পড়তেন। হযরত আয়েশা (রাঃ) বলেন, ‘তিনি রমাযানে এবং অন্যান্য মাসেও ১১ রাকআত অপেক্ষা বেশী নামায পড়তেন না। নবী ﷺ ৪ রাকআত নামায পড়তেন। সুতরাং তুমি সেই নামাযের সৌন্দর্য ও দীর্ঘতার ব্যাপারে জিজ্ঞাসা করো না। (অর্থাৎ অত্যন্ত সুন্দর ও দীর্ঘ হত।) অতঃপর তিনি ৪ রাকআত নামায পড়তেন। সুতরাং তুমি সেই নামাযের সৌন্দর্য ও দীর্ঘতার ব্যাপারে জিজ্ঞাসা করো না। ‘অতঃপর তিনি ৩ রাকআত (বিত্ৰ) নামায পড়তেন।’<sup>3</sup>

কিন্তু কোন কোন আহলে ইল্ম বলেন যে, ‘নবী ﷺ ৪ রাকআত নামায পড়তেন।’ হযরত আয়েশার এই কথার অর্থ এই নয় যে, তিনি ৪ রাকআত নামায একটানা একই সালামে পড়তেন। বরং তাঁর উদ্দেশ্য হল, তিনি ৪ রাকআত ২ সালামে পড়ে একটু আরাম করে নেওয়া তথা ক্লাস্তি দূর করে নেওয়ার উদ্দেশ্যে বসতেন। অতঃপর উঠে আবার ৪ রাকআত নামায পড়তেন। যেমন হযরত আয়েশার অন্য বর্ণনায় এ কথার বিশদ ব্যাখ্যা রয়েছে; তিনি বলেন, ‘নবী ﷺ রাতে ১১ রাকআত নামায পড়তেন; এর প্রত্যেক ২ রাকআতে সালাম ফিরতেন।’<sup>4</sup>

পক্ষান্তরে যদি ধরে নেওয়া যায় যে, হযরত আয়েশা (রাঃ) বিস্তারিত বর্ণনা দেননি, তবুও মহানবী ﷺ-এর উক্তি, “রাতের নামায ২ রাকআত

<sup>1</sup> (আহমাদ, মুসনাদ, মুসলিম প্রমুখ ঐ ৮৯পৃঃ)

<sup>2</sup> (আহমাদ, মুসনাদ, মুসলিম, আবু দাউদ, প্রমুখ, ঐ ৯০পৃঃ)

<sup>3</sup> (বুখারী ১১৪৭, মুসলিম ৭৩৮নং)

<sup>4</sup> (মুসলিম ৭৩৬নং)

২ রাকআত” উক্ত কর্মের ব্যাখ্যা দেয়। আর বিদিত যে, রসূল ﷺ-এর বিস্তারিত উক্তি তাঁর অস্পষ্ট কর্মের ব্যাখ্যা প্রদান করে।

বলা বাহুল্য, এই ভিত্তির উপর বুনিয়াদ করে অধিকাংশ উলামায়ে কিরাম বলেন, এক সালামে একটানা ৪ রাকআত নামায পড়া মকরুহ অথবা হারাম।<sup>1</sup>

৫। কোন রাতে তিনি ১১ রাকআত নামায পড়তেন। তার মধ্যে ৮ রাকআত একটানা পড়তেন। কোথাও না বসে অষ্টম রাকআত শেষ করে বসতেন। তাতে তিনি তাশাহহুদ ও দরুদ পড়ে সালাম না ফিরে উঠে যেতেন এবং এক রাকআত পড়ে নিয়মিত সালাম ফিরতেন। সবশেষে বসে বসে ২ রাকআত নামায পড়তেন।<sup>2</sup>

৬। কোন রাত্রে তিনি ৯ রাকআত নামায পড়তেন। তার মধ্যে ৬ রাকআত একটানা পড়তেন। অতঃপর বসে তাশাহহুদ ও দরুদ পাঠ করে সালাম না ফিরে উঠে যেতেন। তারপর এক রাকআত পড়ে নিয়মিত সালাম ফিরতেন। পরিশেষে বসে বসে ২ রাকআত নামায পড়তেন। (৬)

৩ রাকআত বিত্ব পড়লে ২ নিয়মে পড়া যায়; (ক) ২ রাকআত পড়ে সালাম ফিরে পুনরায় উঠে আর এক রাকআত পড়তে হয়। অথবা (খ) ৩ রাকআত একটানা পড়ে শেষ রাকআতে বসে তাশাহহুদ-দরুদ পড়ে সালাম ফিরতে হয়। এ ক্ষেত্রে মাগরেবের নামাযের মত ২টি তাশাহহুদ পড়া বৈধ নয়। কারণ, বিত্ব নামাযকে মাগরেবের নামাযের মত করে পড়তে নিষেধাজ্ঞা এসেছে। সুতরাং তেমন করে পড়া কমপক্ষে মকরুহ।<sup>3</sup>

প্রকাশ থাকে যে, ইমামের জন্য উত্তম হল, ২ রাকআত করে তারাবীহর নামায আদায় করা। কারণ, এই নিয়ম নামাযীদের পক্ষে সহজ। তাছাড়া জামাআতের কোন লোক হয়তো বা নিজের প্রয়োজনে ২,

<sup>1</sup> (সালাতুল লাইলি অত-তারাবীহ, ৪-৬পৃ, আশশারহুল মুমতে' ৪/১৩, ৬৬-৬৭, ইবনে বায ফাসিঃ মুসনিদ ৮-৭পৃ)

<sup>2</sup> (আহমাদ, মুসনাদ ৬/৫৩-৫৪, ১৬৮, মুসলিম, আবু দাউদ, নাসাই, বাইহাকী ৩০/৩০, সালাতুল তারাবীহ আলবানী ৯২পৃ)

<sup>3</sup> (সালাতুল লাইলি অত-তারাবীহ, ইবনে বায ৭পৃ, সাতাঃ আলবানী ৯৮পৃ, বিস্তারিত দ্রঃ সালাতে মুবাশ্শির ২/২৯০)

৪, অথবা ৬ রাকআত পর বের হয়ে যাবে। কিন্তু ইমাম ৪, ৫, ৭ বা ৯ রাকআত একটানা পড়লে সে ফেঁসে যাবে। দেহ থাকবে মসজিদে, অথচ তার মন থাকবে বাথরুমে অথবা জরুরী কাজে। পক্ষান্তরে ২ রাকআত করে পড়লে এমনটি হয় না। অবশ্য সুন্নাহ বয়ান করার উদ্দেশ্যে যদি কোন কোন সময় ঐরূপ একটানা নামায পড়ে, তাহলে তা দোষাবহ নয়।<sup>1</sup>

উক্ত সংখ্যা চাইতে কম সংখ্যক রাকআত তারাযীহ পড়াও বৈধ। যেহেতু এ ব্যাপারে মহানবী ﷺ-এর কর্ম ও নির্দেশ প্রমাণিত। তাঁর কর্মের ব্যাপারে আব্দুল্লাহ বিন আবু কাইস বলেন, আমি আয়েশা (রাঃ) কে জিজ্ঞাসা করলাম যে, ‘আল্লাহর রসূল কত রাকআত বিত্ৰ পড়তেন?’ উত্তরে তিনি বললেন, ‘তিনি কখনো ৪ রাকআত পড়ে ৩ রাকআত বিত্ৰ পড়তেন, কখনো ৬ রাকআত পড়ে ৩ রাকআত বিত্ৰ পড়তেন, কখনো ১০ রাকআত পড়ে ৩ রাকআত বিত্ৰ পড়তেন। অবশ্য তিনি ৭ রাকআত অপেক্ষা কম এবং ১৩ রাকআত অপেক্ষা বেশী বিত্ৰ পড়তেন না।’<sup>2</sup>

আর এ ব্যাপারে তিনি নির্দেশ দিয়ে বলেন, “বিত্ৰ হল প্রত্যেক মুসলিমের জন্য হক বা সত্য। সুতরাং যে ৫ রাকআত বিত্ৰ পড়তে পছন্দ করে সে তাই পড়ুক, যে ৩ রাকআত পড়তে পছন্দ করে সে তাই পড়ুক এবং যে এক রাকআত পড়তে পছন্দ করে সে তাই পড়ুক।”<sup>3</sup>

### ❖ প্রত্যেক দুই রাকআতের মাঝে যিক্র ৪

প্রত্যেক দুই রাকআতে সালাম ফিরে তসবীহ, ইস্তিগফার বা দুআ পড়া দোষাবহ নয়। তবে এ সময় উচ্চস্বরে সে সব পড়া উচিত নয়। কারণ, তার কোন দলীল নেই।<sup>4</sup>

প্রকাশ থাকে যে, ঐ সকল যিক্র বা দুআ যা ফরয নামাযের পর পড়া হয়ে থাকে। পক্ষান্তরে এই নামাযের প্রত্যেক ২ রাকআত পরপর সালাম ফিরে নির্দিষ্ট যিক্র; যেমন “সুবহানা যিল মুলকি অল-মালাকূত, সুবহানা

<sup>1</sup> (সালাতুল লাইলি অত-তারাবীহ, ইবনে বায ৭৭৪)

<sup>2</sup> (আহমাদ, মুসনাদ ৬/১৪৯, আবু দাউদ, প্রমুখ, বৃহৎ সালাতুল তারাবীহ আলবানী ৮৩-৮৪৭৪)

<sup>3</sup> (আবু দাউদ ১৪২২, নাসাঈ, ইবনে মাজাহ, দারাকুতনী, সুনান, হাকেম, মুত্তাদ্‌রাক ১/৩০২, বাইহাকী ৩/২৭, মিশকাতুল মাসাবীহ ১২৬৫নং)

<sup>4</sup> (মাজালাতুল বুহুসিল ইসলামিয়াহ ২৬/৯৮)



যিল ইয্যাতি অল-আযামাহ---" পড়া বিদআত।<sup>1</sup> এ স্থলে মহানবী ﷺ অথবা তাঁর কোন সাহাবী (رضي الله عنه) কর্তৃক কোন নির্দিষ্ট দুআ বা যিক্র বর্ণিত হয়নি।

যেমন তারবীহর নামায শেষে অথবা প্রত্যেক ২ রাকআত পর পর নিয়মিত কোন নির্দিষ্ট জামাআতী যিক্র; যেমন সমস্বরে জামাআতী দরুদ আদি পড়া অবিধেয়; বরং তা বিদআত। মসজিদে এই শ্রেণীর চিৎকার ঘৃণ্য আচরণ এবং তা মসজিদে অন্যান্য নিষিদ্ধ কথা বলারই শ্রেণীভুক্ত।<sup>2</sup>

### ❖ এই নামাযের কিরাআত :

মহানবী ﷺ রাতের কিয়ামকে খুব লম্বা করতেন। মা আয়েশা (রাঃ) বলেন, নবী ﷺ ৪ রাকআত নামায পড়তেন। সুতরাং তুমি সেই নামাযের সৌন্দর্য ও দৈর্ঘ্যের ব্যাপারে জিজ্ঞাসা করো না। (অর্থাৎ অত্যন্ত সুন্দর ও দীর্ঘ হত।) অতঃপর তিনি ৪ রাকআত নামায পড়তেন। সুতরাং তুমি সেই নামাযের সৌন্দর্য ও দৈর্ঘ্যের ব্যাপারে জিজ্ঞাসা করো না। অতঃপর তিনি ৩ রাকআত (বিত্র) নামায পড়তেন।<sup>3</sup>

হুযাইফা (رضي الله عنه) বলেন, 'একদা তিনি এক রাকআতে সূরা বাক্বারাহ, আলি ইমরান ও নিসা ধীরে ধীরে পাঠ করেন।'<sup>4</sup>

হযরত উমার (رضي الله عنه)-এর যামানায় সলফগণ তারাবীহর নামাযের কিরাআত লম্বা করে পড়তেন। পূর্ণ নামাযে প্রায় ৩০০টি আয়াত পাঠ করতেন। এমন কি এই দীর্ঘ কিয়ামের কারণে অনেকে লাঠির উপর ভর করে দাঁড়াতেন এবং ফজরের সামান্য পূর্বে তাঁরা নামায শেষ করে বাসায় ফিরতেন। সেই সময় খাদেমরা সেহরী খাওয়া সম্ভব হবে না -এই আশঙ্কায় খাবার নিয়ে তাড়াতাড়ি করত।<sup>5</sup>

তাঁরা ৮ রাকআতে সূরা বাক্বারাহ পড়ে শেষ করতেন এবং তা ১২

<sup>1</sup> (মু'জামুল বিদা' ৩২৯পৃঃ)

<sup>2</sup> (ফাতাওয়া শায়খ মুহাম্মাদ বিন ইবরাহীম ২/২৪৭)

<sup>3</sup> (বুখারী ১১৪৭, মুসলিম ৭৩৮নং)

<sup>4</sup> (মুসলিম ৭৭২, নাসাঈ ১০০৮, ১১৩২নং)

<sup>5</sup> (মালেক, মুওয়াত্তা ২৪৯, ২৫১, ২৫২, মিশকাতুল মাসাবীহ ১/৪০৮ আলবানীর টীকা দ্রঃ)

রাকআতে পড়া হলে মনে করা হত যে, নামায হাক্ক হয়ে গেল।<sup>1</sup>

ইবনে কুদামাহ বলেন, ইমাম আহমাদ বলেছেন, রমাযান মাসে (তারাবীহর নামাযে) এমন কিরাআত করা উচিত, যাতে লোকেদের জন্য তা হাক্ক হয় এবং কাউকে কষ্ট না লাগে। বিশেষ করে (গ্রীষ্মের) ছোট রাতগুলিতে লম্বা কিরাআত করা উচিত নয়। আসলে লোকেরা যতটা বহন করতে পারবে ততটা পরিমাণে নামায লম্বা হওয়া উচিত।<sup>2</sup>

### ❖ তারাবীহর নামাযে কুরআন খতম :

তারাবীহর নামাযে কুরআন খতম করার ব্যাপারে শায়খ ইবনে বায (রঃ) বলেন, এ ব্যাপারে প্রশস্ততা আছে। তবে আমার এমন কোন দলীল জানা নেই, যাকে কেন্দ্র করে বলা যায় যে, তারাবীহর নামাযে কুরআন খতম উত্তম। অবশ্য কিছু উলামা বলেন যে, ইমামের জন্য পূর্ণ কুরআন শুনানো উত্তম; যাতে করে জামাআতের জন্য (অন্ততপক্ষে বছরে একবার) পূর্ণ কুরআন শোনার সৌভাগ্য লাভ হয়। কিন্তু এ যুক্তি স্পষ্ট দলীল নয়।

সুতরাং যা গুরুত্বপূর্ণ তা হল, ইমাম তাঁর কিরাআতে বিনয়-নম্রতা অবলম্বন করবেন, ধীর ও শান্তভাবে কুরআন তেলাআত করবেন খতম করতে না পারলেও; বরং অর্ধেক বা দুই-তৃতীয়াংশ পড়তে না পারলেও মুজাদীরা যাতে উপকৃত হয় সেই চেষ্টাই করবেন। যেহেতু কুরআন খতম করা কোন জরুরী কাজ নয়; জরুরী হল লোকদেরকে তাদের নামাযের ভিতরে কিরাআতের মাধ্যমে বিনয়-নম্রতা সৃষ্টি করে উপকৃত করা। যাতে তারা সেই নামায ও কিরাআতে লাভবান ও তৃপ্ত হতে পারে। অবশ্য এর সাথে যদি কুরআন খতম করা সম্ভব হয়, তাহলে আল-হামদু লিল্লাহ। সম্ভব না হলে তিনি যা পড়েছেন তাই যথেষ্ট; যদিও কুরআনের কিছু অংশ বাকী থেকে যায়। কারণ, কুরআন খতম করা অপেক্ষা ইমামের মুজাদীগণের প্রতি সবিশেষ যত্ন নেওয়া, তাদেরকে নামাযের ভিতরে বিনয়াবনত হতে সর্বতঃ প্রয়াস রাখা এবং তাদেরকে নামাযে পরিতৃপ্ত করে উপকৃত করা বেশী গুরুত্ব রাখে। এতদসত্ত্বেও যদি কোন প্রকার কষ্ট-অসুবিধা ছাড়াই কুরআন খতম করেন এবং পূর্ণ কুরআন তাদেরকে শোনাতে সক্ষম হন, তাহলে তা অবশ্যই উত্তম।<sup>3</sup>

<sup>1</sup> (এ)

<sup>2</sup> (আল-মুগনী, ইবনে কুদামাহ ২/১৬৯)

<sup>3</sup> (সালাতুল-লাইলি অত-তারাবীহ, ইবনে বায ১১-১২ পৃঃ)

বলা বাহুল্য, ইমামের জন্য জরুরী হল, মুক্তাদীদের অবস্থার খেয়াল রাখা। কেননা, মহানবী ﷺ বলেন, “যখন তোমাদের কেউ লোকেদের নামায পড়ায়, তখন সে যেন হাঙ্কা করে পড়ে। কেননা, তাদের মধ্যে রোগী, দুর্বল ও বৃদ্ধ লোক থাকে। অবশ্য যখন তোমাদের কেউ একা নামায পড়ে, তখন সে যত ইচ্ছা লম্বা করতে পারে।”<sup>1</sup>

### ❖ তাড়াছড়া না করে সুন্দরভাবে তারাবীহ পড়া :

ইমামের জন্য উচিত নয়, নামাযে জলদিবাজি করা এবং কাকের দানা খাওয়ার মত ঠকাঠক নামায শেষ করা। যেহেতু মহানবী ﷺ ও সাহাবায়ে কেরাম এ নামাযকে খুবই লম্বা করে পড়তেন; যেমন পূর্বে এ কথা আলোচিত হয়েছে। মহানবী ﷺ-এর রুকু ও সিজদাহ প্রায় তাঁর কিয়ামের মতই দীর্ঘ হত। আর এত লম্বা সময় ধরে তিনি সিজদায় থাকতেন যে, সেই সময়ে প্রায় ৫০টি আয়াত পাঠ করা যেতে পারে।<sup>2</sup>

সুতরাং এ কথা আমাদেরকে অনুপ্রাণিত করে যে, আমরা আমাদের তারাবীহর নামাযকে তাঁদের নামাযের কাছাকাছি করার যথাসাধ্য চেষ্টা করব। আমরাও কিরাআত লম্বা করব, রুকু, সিজদাহ ও তার মাঝে কওমা ও বৈঠকে তসবীহ ও দুআ অধিকাধিক পাঠ করব। যাতে আমাদের মনে কিঞ্চিৎ পরিমাণ হলেও যেন বিনয়-নম্রতা অনুভূত হয়; যে বিনয়-নম্রতা হল নামাযের প্রাণ ও মস্তিষ্ক। আমাদের উচিত, এই নামাযের সুন্নতকে তার পদ্ধতি, বৈশিষ্ট্য ও পরিমাণ (কোয়ালিটি ও কোয়ানটিটি) উভয় দিক থেকেই গ্রহণ করা। অতএব আমরা আমাদের সাধ্য অনুযায়ী নামাযের সৌন্দর্য ও দৈর্ঘ্য অবলম্বন করব; যেমন গ্রহণ করে থাকি রাকআত সংখ্যা। বলা বাহুল্য, বিনয়-নম্রতা, মনের উপস্থিতি ও ধীরতা-স্থিরতা ছাড়া কেবল রাকআত আদায়ের কর্তব্য পালন করাই মুখ্য উদ্দেশ্য নয়।

পক্ষান্তরে নামাযে অতিরিক্ত তাড়াছড়া বৈধ নয়। তাছাড়া তাড়াছড়া করতে গিয়ে যদি নামাযের কোন ওয়াজেব বা রুকুন সঠিকরূপে আদায় না হয়, তাহলে তো নামাযই বাতিল হয়ে যাবে। পরন্তু ইমাম কেবল নিজের

<sup>1</sup> (আহমাদ, মুসনাদ, বুখারী ৭০৩নং, মুসলিম ৪৬৭নং, তিরমিযী)

<sup>2</sup> (বুখারী ১১২৩নং দ্রঃ)

জন্য নামায পড়েন না। তিনি তো নিজের তথা মুজাদীদের জন্য নামায পড়ে (ইমামতি করে) থাকেন। সুতরাং তিনি হলেন একজন অলী (অভিভাবকের) মত। তাঁকে তাই করা ওয়াজেব, যা নামাযে ধীরতা-স্থিরতা বজায় রাখার সাথে সাথে মুজাদীদের অবস্থা অনুপাতে অবলম্বন করা উত্তম।<sup>1</sup>

নামাযে ধীরতা ও স্থিরতা অবলম্বন করা ফরয ও অপরিহার্য। যে তা বর্জন করবে, তার নামায বাতিল গণ্য হবে। যেহেতু একদা মহানবী ﷺ এক ব্যক্তিকে অধীর ও অস্থির হয়ে নামায পড়তে দেখে তাঁকে নামায ফিরিয়ে পড়তে আদেশ করলেন এবং শিক্ষা দিলেন যে, নামাযের রুকু, সিজদাহ, কওমাহ ও দুই সিজদার মাঝখানে ধীরতা ও স্থিরতা অবলম্বন করা ওয়াজেব।<sup>2</sup>

মহানবী ﷺ বলেন, “সে নামাযীর নামায যথেষ্ট নয়, যে রুকু ও সিজদায় তার পিঠ সোজা করে না।”<sup>3</sup>

তিনি বলেন, “সবচেয়ে নিকৃষ্ট চোর হল সেই ব্যক্তি, যে তার নামায চুরি করে।” লোকেরা বলল, ‘হে আল্লাহর রসূল! নামায কিভাবে চুরি করবে?’ বললেন, “পূর্ণরূপে রুকু ও সিজদাহ না করে।”<sup>4</sup>

তিনি আরো বলেন, “আল্লাহ সেই বান্দার নামাযের প্রতি তাকিয়েই দেখেন না, যে রুকু ও সিজদায় তার মেরুদণ্ড সোজা করে না।”<sup>5</sup>

### ❖ কুরআন দেখে কিরাআত পড়া :

এতে কোন সন্দেহ নেই যে, একজন প্রকৃত হাফেযই ইমামতির অধিক যোগ্যতা রাখেন, যিনি নামাযে কুরআন মুখস্থ পড়বেন। কিন্তু ইমামতির জন্য যদি হাফেয না থাকেন, ইমাম সাহেব হাফেয না হন, অথবা তাঁর

<sup>1</sup> (দ্রঃ সালাতুত তারাবীহ ৯৯-১০৩, ফুসুলুন ফিস-সিয়ামি অত-তারাবীহি অয-যাক্বাহ ১৮ পৃঃ, ফাসিঃ ৮৮, ৯৩ পৃঃ)

<sup>2</sup> (বুখারী ৭৫৭, মুসলিম ৩৯৭নং, প্রমুখ)

<sup>3</sup> (সুনানে আরবাআহ; আবু দাউদ, তিরমিযী, নাসাই ও ইবনে মাজাহ, আবু দাউদ ৮৫৫নং, আসইলাতুন অআজবিবাতুন ফী শ্বলাতিল ঈদাঈন, সহীহুল জামেইস সাগীর, আলবানী ৭২২৪নং)

<sup>4</sup> (ইবনে আবী শাইবাহ, মুসান্নাফ ২৯৬০ নং, ড়াবা, হাকেম, মুত্তাদরাক ১/২২৯, মালেক, মুওয়াত্তা, আহমাদ, মুসনাদ, সহীহুল জামেইস সাগীর, আলবানী ৯৮৬নং)

<sup>5</sup> (ইবনে আবী শাইবাহ, মুসান্নাফ ২৯৫৭, ইবনে মাজাহ, আহমাদ, মুসনাদ, সিলসিলাহ সহীহাহ, আলবানী ২৫৩৬ নং)

হিফয অত্যন্ত দুর্বল হয় এবং কুরআন দেখে পড়া তাঁর নিজের তথা মুক্তাদীদের জন্য বেশী উপকারী হয়, তাহলে কুরআন দেখে কিরাআত করায় কোন দোষ নেই। বিশেষ করে প্রত্যেক রাতে তারাবীহর নামাযে প্রথম রাকআতে কোন ছোট সূরা এবং দ্বিতীয় রাকআতে 'কুল হুওয়াল্লাহ' পড়া অথবা ৮ রাকআতেই সূরা নাবা পড়া অপেক্ষা উক্ত আমল উত্তম।

যদিও উক্ত কাজে নামাযের ভিতর কিছু অতিরিক্ত কর্ম করতে হয়; যেমন কুরআন তোলা-রাখা, পৃষ্ঠা খোঁজা ইত্যাদি, তদনুরূপ যদিও তাতে কিছু সুনুত; যেমন বুকে হাত রাখা, সিজদার স্থানে দৃষ্টি রাখা ইত্যাদি বাদ পড়ে, তবুও প্রয়োজনে তা বৈধ। যেহেতু কর্ম বেশী হলেও যদি তা কোন প্রয়োজন মোতাবেক হয় এবং একটানা একাধিকবার না হয়, তাহলে তাতে নামাযের কোন ক্ষতি হয় না। যেমন মহানবী ﷺ নামায-রত অবস্থায় উমামাহ বিস্তে যায়নাবকে বহন করেছেন। সূর্যগ্রহণের নামাযে তিনি অগ্রসর ও পশ্চাদ্গত হয়েছেন।

এতদ্ব্যতীত কিতাব ও সুন্নাহর যে ব্যাপক দলীল নামাযে কিরাআত পড়তে নির্দেশ দেয় তা দেখে পড়া ও মুখস্থ পড়ার ব্যাপারে সাধারণ। অতএব মূলতঃ তা বৈধ। পরন্তু হযরত আয়েশা (রাঃ)-এর আমল এ কথার সমর্থন করে। তাঁর মুক্ত করা দাস যাকওয়ান রাতে মুসহাফ দেখে তাঁর ইমামতি করতেন।<sup>1</sup>

পক্ষান্তরে হাফেয ইমাম পাওয়া গেলে সেটাই উত্তম। কারণ, মুখস্থ পড়াতে হৃদয় হাযির থাকে এবং অতিরিক্ত কাজও করতে হয় না। মোট কথা, প্রয়োজনে কুরআন দেখে তারাবীহর কিরাআত বৈধ। তবে (হাফেয ইমাম রেখে) বিকল্প ব্যবস্থা গ্রহণই সর্বোত্তম।<sup>2</sup>

### ❖ মুক্তাদীর কুরআন দেখা ৪

নামায অবস্থায় মুক্তাদীর কর্তব্য হল, বিনয়-নম্রতা ও ধীরতা-স্থিরতা অবলম্বন করা, ইমামের কিরাআত মনোযোগ সহকারে শ্রবণ করা, ডান

<sup>1</sup> (বুখারী তা'লীকান ১৩৯ পৃঃ, ইবনে আবী শাইবাহ, মুসান্নাফ ৭২১৬নং, আবদুর রায়যাক মুসান্নাফ)

<sup>2</sup> (দ্রঃ সালাতুল-লাইলি অত-তারাবীহ, ইবনে বায ১৭-১৮ পৃঃ, ফাতহুল বারী ২/২১৭ টীকা, ফাসিঃ মুসনিদ ৮৬ পৃঃ)

হাতকে বাম হাতের উপর রেখে বুকে বাঁধা, সিজদার জায়গায় দৃষ্টি নিবদ্ধ রাখা ইত্যাদি। কিন্তু হাতে কুরআন নিলে উক্ত সকল সুন্নাহ পরিত্যক্ত হয়ে যায়। পৃষ্ঠা ও আয়াত নম্বর খুঁজতে গিয়ে অনেক সময় তার মন ও দৃষ্টি কুরআন শোনা থেকে মশগুল হয়ে পড়ে। সুতরাং হাতে কুরআন না নেওয়াটাই মুক্তাদীর জন্য সুন্নত। অবশ্য ইমামের হিফয কাঁচা হলে তাঁর ভুল ধরিয়ে দেওয়ার জন্য তাঁর পিছনে কুরআন দেখে গেলে প্রয়োজনে তা বৈধ; দৃশ্যীয় নয়। পক্ষান্তরে অপ্রয়োজনে প্রত্যেকে কুরআন হাতে ইমামের কিরাআত দেখে যাওয়া সুন্নাহর বিপরীত কাজ।<sup>1</sup>

### ❖ কিরাআত পড়তে পড়তে কান্না করা :

কিরাআত চলা অবস্থায় ইমাম বা মুক্তাদীর আবেগে কান্না চলে আসা নামাযের জন্য ক্ষতিকর নয়। তবে কারো জন্য উচ্চস্বরে কাঁদা উচিত নয়। কারণ, এতে অন্যান্য নামাযীদের নামাযে ক্ষতি হয় এবং তাতে তাদের - আর বিশেষ করে মুক্তাদী কাঁদলে ইমামের - ডিষ্টার্ব হয়। অতএব মুমিনের চেষ্টা করা উচিত, যাতে তার কান্নার শব্দ অন্য কেউ শুনতে না পায় এবং 'রিয়া' (লোক-দেখানি কাজ) না হয়ে বসে। কারণ, শয়তান এই ছিদ্রপথে তাকে 'রিয়া'র দিকে টেনে নিয়ে যেতে পারে।

অবশ্য কান্না যার এখতিয়ারে নয়; বরং যে চাপা কান্না রুখতে সমর্থ নয় এবং অনিচ্ছা সত্ত্বেও সশব্দে কান্না এসে পড়ে তার সে কাজ ধর্তব্য নয়; বরং তা ক্ষমার্হ। প্রমাণিত যে, মহানবী ﷺ যখন কিরাআত পড়তেন তখন তাঁর বক্ষস্থলে হাঁড়িতে পানি ফোটান মত (অথবা যাঁতা ঘোরান মত) কান্নার শব্দ পাওয়া যেত।<sup>2</sup>

হযরত আবু বাক্র (رضي الله عنه)-এর ব্যাপারে বর্ণিত যে, তিনি কিরাআত করলে কান্নার ফলে লোকদেরকে তা শুনতে পারতেন না।<sup>3</sup>

হযরত উমার (رضي الله عنه)-এর ব্যাপারে বর্ণিত যে কাতারসমূহের পিছন থেকে তাঁর কান্নার শব্দ শুনতে পাওয়া যেত।<sup>4</sup>

<sup>1</sup> (সালাতুত তারাবীহ ১৮-১৯ পৃঃ)

<sup>2</sup> (আবু দাউদ, নাসাই, বাইহাকী ২/২৫১, আহমাদ, মুসনাদ ৪/২৫, ২৬, ইবনে খুযাইমাহ, সহীহ, ইবনে হিব্বান, সহীহ, সহীহ আবু দাউদ ৭৯৯নং)

<sup>3</sup> (বুখারী ৬৭৯নং ৮ঃ)

<sup>4</sup> (বুখারী ১৪৪ পৃঃ তা'লীক)

কিছ্র তার মানে এই নয় যে, ইচ্ছা করেই উচ্চস্বরে কান্না করা যাবে। বরং মহান আল্লাহর ভয়ে যে চাপা কান্না সংবরণ করতে পারা যায় না তা দৃশ্যীয় নয়। বলা বাহুল্য অনিচ্ছা সত্ত্বেও যে কান্না রুখতে পারা যায় না সে কান্নায় নামাযের কোন ক্ষতি হয় না।<sup>1</sup>

পক্ষান্তরে কান্নার ভান করতে গিয়ে কষ্ট-চেষ্টা করা উচিত নয়। বরং কান্না এসে পড়লে এই চেষ্টা হওয়া উচিত, যাতে লোকেদের ডিষ্টার্ব না হয়। আর সে কান্না হবে সাধ্য ও সম্ভব অনুসারে হাল্কা; যাতে কারো নামাযে কোন প্রকার ব্যাঘাত না ঘটে।<sup>2</sup> উল্লেখ্য যে, “তোমাদের কান্না না এলে কান্নার ভান কর” -এ হাদীস দুর্বল।<sup>3</sup>

### ❖ আয়াতের পুনরাবৃত্তি :

কোন আয়াতকে কেন্দ্র করে ভাবতে ও ভাবাতে উদ্বুদ্ধ করার উদ্দেশ্যে তা একাধিক বার ঘুরিয়ে-ফিরিয়ে পাঠ করা দোষাবহ নয়; যদি তার ফলে হৃদয়ে প্রভাব পড়ে এবং কান্না আকর্ষণ করে।<sup>4</sup> আর এ কথা প্রমাণিত যে, এক রাত্রে মহানবী ﷺ একটি মাত্র আয়াতকে বারবার পাঠ করে ফজর পর্যন্ত কিয়াম করেছেন।<sup>5</sup> সে আয়াতটি হল,

﴿إِنْ تُعَذِّبُهُمْ فَإِنَّهُمْ عِبَادُكَ، وَإِنْ تَغْفِرْ لَهُمْ فَإِنَّكَ أَنْتَ الْعَزِيزُ الْحَكِيمُ﴾

অর্থাৎ, (হে প্রতিপালক!) যদি তুমি ওদেরকে শাস্তি দাও, তাহলে তারা তো তোমারই বান্দা। আর যদি তুমি ওদেরকে মাফ করে দাও, তাহলে নিশ্চয় তুমি পরাক্রমশালী বিজ্ঞানময়। (কুরআনুল কারীম ৫/১১৮)

মহানবী ﷺ কুরআন তেলাঅতের সময় তসবীহর আয়াত পাঠ করলে তসবীহ পড়তেন, মঙ্গল প্রার্থনার আয়াত পাঠ করলে মঙ্গল প্রার্থনা করতেন এবং আশ্রয় প্রার্থনার আয়াত পাঠ করলে আশ্রয় প্রার্থনা করতেন।<sup>6</sup> অতএব

<sup>1</sup> (সালাতুল-লাইলি অত-তারাবীহ, ইবনে বায ১৯-২০পৃঃ)

<sup>2</sup> (সালাতুল-লাইলি অত-তারাবীহ, ইবনে বায ২৪পৃঃ)

<sup>3</sup> (দ্রঃ যরীফ ইবনে মাজাহ, আলবানী ২৮১, যরীফুল জামেইস সাগীর, আলবানী ২০২৫নং)

<sup>4</sup> (সালাতুল-লাইলি অত-তারাবীহ, ইবনে বায ২০-২১পৃঃ)

<sup>5</sup> (আহমাদ, মুসনাদ, নাসাঈ, ইবনে মাজাহ, ইবনে খুযাইমাহ, সহীহ, হাকেম, মুত্তাদ্‌রাক, মিশকাতুল মাসাবীহ ১২০৫নং)

<sup>6</sup> (মুসলিম ৭৭২, নাসাঈ ১১৩২নং)

বাঞ্ছনীয় হল, আয়াত হৃদয়ঙ্গম করার সাথে সাথে তা নিয়ে চিন্তা-ভাবনা করা। মহান আল্লাহ বলেন,

﴿كِتَابٌ أَنْزَلْنَاهُ إِلَيْكَ مُبَارَكٌ لِيَدَّبَّرُوا آيَاتِهِ وَلِيَتَذَكَّرَ أُولُو

الْأَلْبَابِ﴾

অর্থাৎ, আমি এই বর্কতময় কিতাব তোমার প্রতি অবতীর্ণ করেছি, যাতে ওরা এর আয়াতসমূহ অনুধাবন করে এবং বোধশক্তিসম্পন্ন লোকেরা (এ থেকে) উপদেশ গ্রহণ করে। (কুরআনুল কারীম ৩৮/১৯)

❖ নামাযে কুরআন-খতমের দুআ :

শায়খ ইবনে উষাইমীন (রঃ) বলেন, নামাযের ভিতরে কুরআন-খতমের পর দুআ করার সপক্ষে রসূল ﷺ-এর সুন্নাহ থেকে অথবা সাহাবাদের আমল থেকে নির্ভরযোগ্য কোন সহীহ ভিত্তি শেই। এই দুআর সপক্ষে একমাত্র দলীল হল হযরত আনাসের আমল; তিনি কুরআন খতম করার সময় নিজের পরিবারের লোকদেরকে সমবেত করে দুআ করতেন।<sup>1</sup> কিন্তু তিনি নামাযে এমন করতেন না।

আর বিদিত যে, নামাযের যে স্থানে দুআ করার ব্যাপারে কোন সুন্নাহ বর্ণিত হয়নি, সে স্থানে দুআ (আবিষ্কার) করা বৈধ নয়। যেহেতু মহানবী ﷺ বলেন, “তোমরা সেই মত নামায পড়, যে মত আমাকে পড়তে দেখেছ।”<sup>2</sup>

কিন্তু নামাযে কুরআন খতমের দুআকে বিদআত আখ্যায়ন দেওয়া আমার কাছে পছন্দনীয় নয়। কেননা উলামাদের তাতে মতভেদ রয়েছে। অতএব এ ব্যাপারে এত বড় কটুক্তি করা আমাদের উচিত নয়, যেখানে কিছু উলামা সে কাজকে মুস্তাহাব মনে করেছেন।<sup>(3)</sup> অবশ্য মুসলিমের উচিত, সুন্নাহর অনুসরণে শত যত্নবান হওয়া।<sup>4</sup>

<sup>1</sup> (ইবনে আবী শাইবাহ, মুসান্নাফ, দারেমী, ত্বাবারানী, মু'জাম, মাজমাউয যাওয়ায়েদ ৭/১৭২)

<sup>2</sup> (আহমাদ, মুসনাদ ৫/৫২, বুখারী ৬৩০নং, দারেমী)

<sup>3</sup> এ ব্যাপারে ইবনে বাযের অভিমত সালাতুল-লাইল ওয়াত তারাবীহ ২৮-৩১ পৃষ্ঠা দ্রষ্টব্য।

<sup>4</sup> (আশশারহুল মুমত' ৪/৫৭, সামানিয়া ওয়া আরবাউন সুআলান ফিস-সিয়াম ৫৮ পৃঃ)



বলা বাহুল্য, এ কাজকে অনেক উলামা পরিষ্কারভাবে বিদআত বলেই অভিহিত করেছেন।<sup>1</sup>

যেমন কুরআন খতমের কোন নির্দিষ্ট দুআও সুন্নাহতে বর্ণিত হয়নি।<sup>2</sup> আর কুরআন মাজীদের শেষের দিকে ‘দুআ-এ খাতমুল কুরআন’ নামক শীর্ষে যে লম্বা দুআ লিখা থাকে, তা মনগড়া।

### ❖ খতমের দুআয় শরীক হওয়া :

ইমাম নামাযে কুরআন খতমের দুআ করলে মুক্তাদীও সে দুআতে শরীক হয়ে ‘আমীন-আমীন’ বলতে পারে। যদিও নামাযের মধ্যে কুরআন-খতমের মুনাজাত করার ব্যাপারে সুন্নাহ থেকে কোন দলীল নেই, তবুও যেহেতু মুসলিমদের কিছু আয়েম্মায়ে কেরাম তা করা মুস্তাহাব বলেছেন এবং তা হল একটি বৈধ ইজতিহাদী অভিমত, আর তা ভুল হলেও হতে পারে; কিন্তু তা হারাম কিছু নয়, সেহেতু সে কাজে ইমামের অনুসরণ করায় কোন বাধা নেই। যেমন ইমাম দুআ করলে সে দুআ বিদআত মনে করে অথবা সুন্নাহতে নেই বলে ঐ নামায ত্যাগ করে বেরিয়ে যাওয়া কারো জন্য উচিত নয়। কারণ, তাতে জামাআতের মাঝে অনৈক্য ও পারস্পরিক বিদ্বেষ পরিদৃষ্ট হবে। আর এ কাজ হবে আয়েম্মায়ে কেরামদের আমলের প্রতিকূল। যেমন ইমাম আহমাদ (রঃ) ফজরের নামাযে কুনূত পড়াকে মুস্তাহাব মনে করতেন না; বরং তা বিদআত মনে করতেন। কিন্তু তা সত্ত্বেও তিনি বলতেন, ‘যদি তুমি এমন ইমামের পশ্চাতে ফজরের নামায পড় যে কুনূত পড়ে, তাহলে তুমি তার কুনূতেও তার অনুসরণ কর এবং তার দুআয় আমীন বল।’ আর তা হল জামাআতের মাঝে সংহতি ও ঐক্য বজায় রাখার জন্য; যাতে একে অপরের প্রতি ঘৃণা ও বিদ্বেষ পোষণ না করে।<sup>3</sup>

### ❖ কুনূতের কতিপয় আনুষঙ্গিক মাসায়াজেল :

উত্তম ও দলীলের অধিক নিকটবর্তী কাজ হল ‘আল্লাহুম্মাহদিনা ফীমান হাদাইতা’ বলে কুনূতের দুআ শুরু করা। অবশ্য যদি কেউ দুআ করার

<sup>1</sup> (দ্রঃ মু‘জামুল বিদা’ ৩২০ পৃঃ)

<sup>2</sup> (সালাতুল-লাইলি অত্-তারাবীহ, ইবনে বায ৩২ পৃঃ)

<sup>3</sup> (আশশারহুল মুমতে’ ৪/৮৬-৮৭, সামানিয়া ওয়া আরবাউন সুআলান ফিস-সিয়াম ৫৯-৬০ পৃঃ)

মৌলিক নীতির উপর আমল করে মহান আল্লাহর প্রশংসা ও নবী ﷺ-এর উপর দরুদ পড়ার মাধ্যমে কুনূত শুরু করে, তাহলে তাতে কোন দোষ নেই।

নবী ﷺ কর্তৃক বর্ণিত দুআ-এ মাষূরা ছাড়াও যদি কেউ নিজের তরফ থেকে অন্য দুআ কুনূতে পড়তে চায়, তাহলে তা দোষাবহ নয়। কারণ, এ স্থল হল দুআ করার স্থল। তা ছাড়া এ কুনূত হল এক প্রকার ‘কুনূতে নাযেলাহ’। আর এই কুনূতে মহানবী ﷺ কাফেরদের জন্য বদুআ এবং মুসলিমদের জন্য দুআ করেছেন।<sup>1</sup> অনুরূপ আবু হুরাইরা রা কুনূতে মুমিনদের জন্য দুআ করতেন এবং কাফেরদের উপর অভিশাপ দিতেন।<sup>2</sup> আ’রাজ বলেন, ‘আমাদের দেখা সকল লোকেই রমাযানে কাফেরদের প্রতি অভিশাপ করত।’<sup>3</sup> বলা বাহুল্য, এ ক্ষেত্রে কোন নির্দিষ্ট দুআ নেই। অতএব বুঝা গেল যে, এ ব্যাপারে কোন সংকীর্ণতা নেই। এতদ্ব্যতীত যদি ধরে নেওয়া যায় যে, কোন মানুষ দুআ-এ মাষূর জানে না, তাহলে সে ক্ষেত্রে সেই ব্যক্তির যা জানা আছে এবং যা উপযুক্ত মনে করে নিজের প্রয়োজন অনুপাতে তাই দিয়ে দুআ করতে পারে; যদি আসলে দুআ সহীহ দুআ হয় তাহলে। অবশ্য দুআ-এ মাষূর ব্যবহারে যত্নবান হওয়াই উত্তম আমল।<sup>4</sup>

### ❖ দুআয় ছন্দ ব্যবহার :

দুআ করার সময় অনিচ্ছাকৃতভাবে যদি দুআর শব্দাবলীতে ছন্দ এসে যায়, তাহলে তাতে কোন দোষ নেই। দূষণীয় হল কষ্টকল্পনার সাথে ছন্দ বানিয়ে দুআ করা। কারণ, মহানবী ﷺ কথায় ছন্দ ব্যবহারের নিন্দা করেছেন। এক ব্যক্তির বাঁধা-ছাঁদা কথা শুনে তিনি বলেছিলেন, “এ ছন্দ তো গণকের ছন্দের মত!” অথবা “এ লোক তো গণকদের এক ভাই।”<sup>5</sup>

পক্ষান্তরে অনিচ্ছাকৃত ছন্দে দোষ নেই। এমন শব্দ-ছন্দ মহানবী রা-এর কথায়ও কখনো কখনো এমনিই এসে যেত।<sup>6</sup>

<sup>1</sup> (বুখারী ১০০৬নং দ্রঃ)

<sup>2</sup> (বুখারী ৭৯৭, মুসলিম ৬৭৬নং)

<sup>3</sup> (মালেক ২৫১নং)

<sup>4</sup> (আশশারহুল মুমতে’, ইবনে উমাইমীন ৪/৫২, সালাতুল-লাইলি অত-তারাবীহ, ইবনে বায ৩৯-৪০পৃঃ)

<sup>5</sup> (মুসলিম ১৬৮১নং)

<sup>6</sup> (সালাতুল-লাইলি অত-তারাবীহ, ইবনে বায ৪০ পৃষ্ঠা)

ইবনে আব্বাস (رضي الله عنه) বলেন, 'খেয়াল করে ছন্দযুক্ত দুআ থেকে দূরে থাক। যেহেতু আমি রসূলুল্লাহ (ﷺ) ও তাঁর সাহাবাবর্গের নিকট উপলব্ধি করেছি যে, তাঁরা ছন্দ করে দুআ উপেক্ষা করতেন।'<sup>1</sup>

### ❖ লম্বা দুআ কি বৈধ ?

কোন কোন ইমাম দুআকে এত লম্বা করেন যে, তাতে মুক্তাদীদের অনেকের অথবা সকলের কষ্ট হয়। পক্ষান্তরে আর এক শ্রেণীর ইমাম আছেন, যারা কুনূতের দুআকে কবিতা আবৃত্তির মত গড়গড় করে পড়ে ফেলেন। কিন্তু যখন মুনাজাত শুরু করেন, তখন একই দুআকে বারবার বলে বেশ দীর্ঘ সময় ব্যয় করেন। ফলে কেউ কেউ প্রায় আধ ঘণ্টা ধরে কুনূত পড়েন। আর কেউ তো আবার লিখিত দুআর কাগজ হাতে রেখে দেখে দেখে পড়তে থাকেন!

বলা বাহুল্য, দুআ করতে মধ্যবর্তী পছা অবলম্বন করা এবং দুআ শেষ করার পরেও মুক্তাদীদের মনে আরো দুআ করার আকাঙ্ক্ষা থেকে যাওয়াটা, তাদের মনে বিরক্তি ও বিতৃষ্ণা সৃষ্টি করা অপেক্ষা উত্তম।

আমাদের প্রিয় নবী (ﷺ) আমাদেরকে দুআ-এ কুনূত শিখিয়ে গেছেন। অবশ্য তার পরে অন্য মুনাজাতের প্রমাণিত ও শুদ্ধ দুআ বেশী করে পড়া যদিও দৃষ্ণীয় নয়, তবুও খেয়াল রাখতে হবে, যাতে নামাযীদের যেন কষ্ট না হয় এবং তা দুআয় সীমালংঘন করার পর্যায়ভুক্ত না হয়ে পড়ে।

আসলে বিরাট লম্বা সময় ধরে দুআ করা দুআতে সীমালংঘন করারই পর্যায়ভুক্ত। আর মহান আল্লাহ বলেন,

﴿ادْعُوا رَبَّكُمْ تَضَرُّعًا وَخُفْيَةً، إِنَّهُ لَا يُحِبُّ الْمُعْتَدِينَ﴾

অর্থাৎ, তোমরা বিনীতভাবে ও গোপনে তোমাদের প্রতিপালককে ডাক, তিনি সীমালংঘনকারীদের পছন্দ করেন না। (সূরা আ'রাফ ৫৫ আয়াত)

একদা আব্দুল্লাহ বিন মুগাফফাল (رضي الله عنه) তাঁর ছেলেকে দুআ করতে শুনলেন; ছেলে বলছে, 'হে আল্লাহ! আমি তোমার কাছে প্রার্থনা করছি যে, আমি যখন জান্নাতে প্রবেশ করব, তখন তার ডান দিকে সাদা মহল চাই।'

<sup>1</sup> (আহমাদ, মুসনাদ ৬/২১৭, বুখারী ৬৩৩৭নং)

তিনি বললেন, 'বেটা! আল্লাহর কাছে জান্নাত চাও এবং জাহান্নাম থেকে পানাহ চাও। কারণ, আমি আল্লাহর রসূল ﷺ-কে বলতে শুনেছি, তিনি বলেছেন, "এই উম্মতের একটি সম্প্রদায় হবে, যারা পবিত্রতায় এবং দুআতে সীমালংঘন করবে।"<sup>1</sup>

পক্ষান্তরে মহানবী ﷺ-এর আদর্শ ছিল, তিনি অল্প শব্দে বেশী অর্থবোধক দুআ ব্যবহার করতেন এবং এ ছাড়া অন্যান্য (লম্বা) দুআ পরিহার করতেন। অতএব ইমাম সাহেবের উচিত, অনুরূপ অল্প শব্দে বেশী অর্থবোধক উপকারী দুআ নির্বাচন করে তার দ্বারা দুআ করা এবং তা অতিরিক্ত লম্বা করে লোকদেরকে বিরক্ত না করা।<sup>2</sup>

❖ একবচন শব্দের দুআকে বহুবচন করে পড়া :

দুআ-এ মাযুর একবচন শব্দে হলে ইমাম সাহেব সেটিকে বহুবচন শব্দে ব্যবহার করবেন। কারণ, তিনি নিজের সাথে সাথে মুক্তাদীদের জন্যও দুআ করে থাকেন।<sup>3</sup>

❖ কুনূতের জবাব :

কুনূতের দুআয় ইমামের 'ইন্নাহু লা য়্যাযিল্লু ---' বলার সময় যেহেতু 'আমীন' বলা হয় না সেহেতু কোন কোন লোক এ ক্ষেত্রে 'স্বাদাক্বতা', 'হাক্ব-হাক্ব', 'আশহাদ', অথবা 'ইয়াল্লাহ' বলে থাকে। আসলে এ সব বলা বিদআত।<sup>4</sup>

❖ কুনূতের দুআর শেষে মুখে হাত বুলানো :

দুই হাত তুলে কুনূতের (অনুরূপ যে কোন) দুআর শেষে মুখে হাত বুলানো সুন্নত নয়। কেননা, এ ব্যাপারে বর্ণিত সমস্ত হাদীস যয়ীফ।<sup>5</sup> আর যয়ীফ হাদীস দ্বারা কোন সুন্নত প্রমাণ করা আমাদের জন্য সম্ভব নয়। তাই

<sup>1</sup> (সহীহ আবু দাউদ ৮৭, সহীহ ইবনে মাজাহ, আলবানী ৩১১৬নং)

<sup>2</sup> (সালাতুল-লাইলি অত-তারাবীহ, ইবনে বায ২৯পৃ, তাওজীহাতুন অফাওয়াএদ লিসসা-য়েমীনা অসসায়েমাত ৮৩পৃ, কাই নাত্তাফীদা মিন রামাযান ১৪-১৫পৃ)

<sup>3</sup> (সালাতুল-লাইলি অত-তারাবীহ, ইবনে বায ৪১পৃ, এ ব্যাপারে অধিক দ্রঃ সালাতি মুবাশশির ২/২৯৩)

<sup>4</sup> (মু'জামুল বিদা' ৩২২-৩২৩পৃ)

<sup>5</sup> (দ্রঃ ইরওয়াউল গালীল, আলবানী ২/১৮১, আশশারহুল মুমতে' ৪/৫৫)

অনেক উলামা পরিষ্কারভাবে এ কাজকে বিদআত বলেছেন।<sup>1</sup>

মাজমু' নামক কিতাবে ইমাম নওবী ইযযু বিন আব্দুস সালামের সাথে একমত হয়ে বলেন, (দুআর শেষে মুখে হাত বুলানো) মুস্তাহাব নয়। ইযযু বিন আব্দুস সালাম বলেছেন, 'জাহেল ছাড়া এ কাজ কেউ করে না।'

এতদ্ব্যতীত এ কাজ বিধেয় না হওয়ার সমর্থনকারী আরো দলীল এই যে, হাত তুলে দুআ করার কথা বহু হাদীসেই এসেছে; কিন্তু কোন হাদীসে দুআর শেষে মুখে হাত বুলানোর কথা উল্লেখ হয়নি। আর তার মানেই হল, ইন শাআল্লাহ- হাত বুলানোর সপক্ষে হাদীসগুলি মুনকার (সহীহ-বিরোধী), বিধায় তা বিধেয় নয়।<sup>2</sup>

### ❖ কুনূতের মান :

বিত্র নামাযে কুনূত পড়া সন্নত, ওয়াজেব নয়। কারণ, যে সকল সাহাবাবন্দ বিত্র নামাযের হাদীস বর্ণনা করেছেন, তাঁরা তাতে কুনূতের কথা উল্লেখ করেননি। বলা বাহুল্য, যদি মহানবী ﷺ তা প্রত্যহ করতেন, তাহলে তাঁরা সকলেই সে কথা বর্ণনা করতেন। তবে হ্যাঁ, একা উবাই বিন কা'ব বর্ণনা করেছেন যে, রসূল ﷺ বিত্রে কুনূত পড়তেন। এ থেকে বুঝা যায় যে, তিনি কখনো কখনো তা পড়তেন। আর এ থেকেই প্রমাণ হয় যে, তা ওয়াজেব নয়।<sup>3</sup> যেহেতু মহানবী ﷺ-এর কেবলমাত্র সে কাজ করা, তা ওয়াজেব হওয়ার দলীল হতে পারে না। যেমন হাসান رضي الله عنه কে তাঁর সে দুআ শিক্ষা দেওয়াও, তা ওয়াজেব হওয়ার দলীল নয়।

সুতরাং উত্তম হল প্রত্যহ (প্রত্যেক রাতে) বিত্রে কুনূত না পড়া।<sup>4</sup> আর ইমাম সাহেবেরও উচিত, কখনো কখনো তা বর্জন করা। যাতে সাধারণ লোক বিত্রে কুনূত পড়াকে ওয়াজেব মনে করে না বসে।

### ❖ ইমামের সাথে নামায শেষ করার মাহাত্ম্য :

যে ব্যক্তি জামাআতের ইমামের পিছনে রাতের কিছু অংশ তারাবীহ পড়বে এবং ইমাম শেষ করলে সেও শেষ করবে (অর্থাৎ, তাঁর আগে বা

<sup>1</sup> (দ্রঃ ইরওয়াউল গালীল, আলবানী ২/১৮২, মু'জামুল বিদা' ৩২২পৃঃ)

<sup>2</sup> (ইরওয়াউল গালীল, আলবানী ২/১৮২)

<sup>3</sup> (সিফাতু স্বলাতিন নাবী, আলবানী ১৭৯পৃঃ টীকা নং ৭)

<sup>4</sup> (আশশারহুল মুমতে' ৪/২৭)

পরে শেষ করবে না), তার নেকীর খাতায় পূর্ণ রাত নামায পড়ার সওয়াব লিপিবদ্ধ হবে।

মহানবী ﷺ বলেন, “যে ব্যক্তি ইমামের সাথে নামায পড়ে এবং তার নামায শেষ করা পর্যন্ত তার সঙ্গে থাকে (ইজ্জিদা করে), সেই ব্যক্তির জন্য সারা রাত্রি কিয়াম করার সওয়াব লিপিবদ্ধ করা হয়।”<sup>1</sup>

এই হাদীসের উপর ভিত্তি করে বলা যায় যে, যদি কোন লোক ইমামের সাথে ৮ রাকআত নামায পড়ে এবং বিত্ৰ না পড়ে ইমামের সাথে নামায শেষ করে না, সে লোক উক্ত ফযীলত পাওয়ার অধিকারী নয়।

তদনুরূপ যদি কোন ইমাম ২১ রাকআত তারাবীহ পড়েন এবং তাঁর পশ্চাতে কেউ ১০ বা ১২ রাকআত পড়ে পৃথক হয়ে একাকী বিত্ৰ পড়ে নেয়, (কারণ তার মতে তার থেকে বেশী রাকআত পড়া বৈধ নয় তাই) তাহলে সে ব্যক্তিও উক্ত মাহাত্ম্য পাওয়ার হকদার নয়।

পক্ষান্তরে কোন মুসলিমের জন্য সাগ্রহে সুন্নত পালন করতে গিয়ে জামাআতের মাঝে বিচ্ছিন্নতা সৃষ্টি করা এবং জামাআত ত্যাগ করে চলে যাওয়া উচিত নয়। উচিত হল, তাঁর সাথে যখন ১০ বা ১২ রাকআত পড়ল, তখন বাকী নামাযটাও তাঁর সাথেই শেষ করা। আর এই বেশী নামায পড়াটা (সুন্নত না হলেও) কোন অবৈধ বা আপত্তিকর কাজ নয়। (নফল নামায বেশী পড়া বিদআত তো নয়; কারণ তা বৈধ হওয়ার কিছু দলীল তো রয়েছে। আর এ কথা পূর্বে আলোচিত হয়েছে।) অতএব বড়জোর তা ভালোর পরিপন্থী অথবা সুন্নাহর খিলাপ; যাতে ইজ্জতিহাদী মতভেদ হওয়া অস্বাভাবিক নয়। তাহলে তা নিয়ে আমাদের আপোসের মাঝে অনৈক্য ও বিদ্বেষ সৃষ্টি করা এবং এমন ইজ্জতিহাদী মাসআলাকে কেন্দ্র করে নিজ মতের বিরোধী পক্ষকে ব্যঙ্গ-বিদ্রূপ করা আদৌ বৈধ নয়। আমাদের উচিত, যথাসম্ভব আমাদের মাঝে ঐক্য ও সংহতি বজায় রাখা।<sup>2</sup>

❖ জামাআতে নামায পড়ার পর শেষ রাতে নামায :

যদি কোন ব্যক্তি ইমামের সাথে বিত্ৰ পড়ার পর শেষ রাতে অতিরিক্ত নামায পড়ে সবশেষে বিত্ৰ পড়ার জন্য ইমামের সালাম ফিরার পর সে

<sup>1</sup> (আহমাদ, মুসনাদ, সহীহ আবু দাউদ ১২২৭, সহীহ তিরমিযী, আলবানী ৬৪৬, সহীহ নাসাঈ, আলবানী ১৫১৪, সহীহ ইবনে মাজাহ, আলবানী ১৩২৭নং)

<sup>2</sup> (আশ্শারহুল মুমতে' ৪/৮৩-৮৭ দ্রঃ)

সালাম না ফিরে উঠে আর এক রাকআত পড়ে জোড় বানিয়ে নেয়, তাহলে তাতে কোন দোষ নেই। আর এ ব্যক্তির জন্য বলা যাবে যে, সে ইমামের সাথেই নামায শেষ করেছে। আর যে এক রাকআত নামায সে বেশী পড়েছে, তা শরয়ী স্বার্থেই; যাতে তার বিত্ৰ রাতের নামাযের শেষ নামায হয়। অতএব তা দোষাবহ নয়।

অবশ্য উত্তম হল, ইমামের সঙ্গেই বিত্ৰ পড়া, তাঁর সঙ্গেই নামায শেষ করা এবং তারপর আর তাহাজ্জুদ না পড়া। যেহেতু সাহাবাগণ যখন মহানবী ﷺ-এর নিকট বাকী রাতটুকু নামায পড়িয়ে দেওয়ার জন্য আবেদন জানালেন, তখন তিনি বললেন, “যে ব্যক্তি ইমামের সাথে নামায পড়ে এবং তার নামায শেষ করা পর্যন্ত তার সঙ্গে থাকে (ইজ্জিদা করে), সেই ব্যক্তির জন্য সারা রাত্রি কিয়াম করার সওয়াব লিপিবদ্ধ করা হয়।”<sup>1</sup>

বলা বাহুল্য এতে ইঙ্গিত রয়েছে যে, ইমামের সাথেই নামায পড়ে শেষ করাটাই উত্তম। কারণ, তিনি তাঁদেরকে বিত্ৰ ছেড়ে দিয়ে শেষ রাতে কিয়াম করার নির্দেশ দেননি। আর তার কারণ হল, ইমামের সাথে এইটুকু কিয়ামেই তো সত্যপক্ষে সারা রাত্রি জাগরণ করে নামায পড়ার সওয়াব অর্জন হয়ে যাবে। বিশ্রাম করা সত্ত্বেও পরিশ্রম করার সওয়াব লিখা হবে। বাস্তবে এটি একটি বড় নেয়ামত!<sup>2</sup>

মোট কথা, ইমাম রাতে কিছু অংশ নামায পড়লে জামাআতের জন্য কিছু অংশই নামায পড়া উত্তম এবং তিনি সারা রাত্রি নামায পড়লে সকলের জন্য সেটাই উত্তম। এ ছাড়া ইমাম না পড়লে একাকী কারো জন্য সারারাত্রি নামায পড়া উত্তম নয়।




### ❖ তারাবীহর জামাআতে এশার নামায :


তারাবীহর নামাযের জামাআত চলাকালে কেউ এশার নামায না পড়া অবস্থায় মসজিদে এলে তার জন্য একাকী বা পৃথক জামাআত করে এশার নামায পড়া বৈধ নয়। বরং তার উচিত হল, এশার নিয়তে জামাআতে शामिल হওয়া। অতঃপর ইমাম সালাম ফিরে দিলে এশার বাকী নামায

<sup>1</sup> (আহমাদ, মুসনাদ, সহীহ আবু দাউদ ১২২৭, সহীহ তিরমিযী, আলবানী ৬৪৬, সহীহ নাসাই, আলবানী ১৫১৪, সহীহ ইবনে মাজাহ, আলবানী ১৩২৭নং)

<sup>2</sup> (আশ্শারহুল মুমতে' ৪/৮৮)

একাকী পড়ে নেওয়া। তারপর এশার পর ২ রাকআত সুন্নাতে মুআক্কাদার নিয়তে ইমামের সাথে ২ রাকআত পড়া। তারপর তারাবীহর নিয়তে বাকী নামায পড়া।

এ ক্ষেত্রে ইমাম-মুজাদীর নিয়ত ভিন্ন হলেও কোন ক্ষতি নেই। যেহেতু নফল নামাযীর পশ্চাতে ফরয নামায পড়া বৈধ।<sup>1</sup> সাহাবী মুআয বিন জাবাল  মহানবী -এর সাথে এশার নামায পড়তেন। অতঃপর তিনি ফিরে গিয়ে নিজের জামাআতের (ঐ নামাযেরই) ইমামতি করতেন।<sup>2</sup> ফরয পড়ে নেওয়ার পর মুআযের সে নামায ছিল নফল। পরন্তু আল্লাহর নবী  তাঁর এ কাজে কোন আপত্তি প্রকাশ করেননি। অতএব বুঝা গেল যে, নফল নামাযীর পশ্চাতে ফরয নামায পড়া বৈধ।

এ ছাড়া সালাতে খাওফে মহানবী  একদলকে নিয়ে ২ রাকআত নামায পড়ে সালাম ফিরেছেন। অতঃপর আর একদলকে নিয়ে তিনি ২ রাকআত নামায পড়ে সালাম ফিরেছেন।<sup>3</sup> উভয় নামাযের মধ্যে তাঁর প্রথম নামাযটি ছিল ফরয এবং দ্বিতীয়টি নফল; আর তাঁর পশ্চাতের লোকদের সে নামায ছিল ফরয।

#### ❖ কাছের মসজিদ ছেড়ে দূরের মসজিদে নামায :

কাছের মসজিদের ইমামের যদি কিরাআত ভালো না হয়, তাহলে সুন্দর কিরাআত বা সুমধুর আওয়াজের জন্য দূরের মসজিদে গিয়ে নামায পড়ায় কোন দোষ নেই। অবশ্য এতে উদ্দেশ্য হবে, সুমধুর কিরাআতে তার নামাযে বিনয়-নম্রতা বৃদ্ধি পাবে এবং সে নামাযে পরিতৃপ্ত হয়ে তার হৃদয় প্রশান্ত হবে। আর খবরদার! তাতে যেন মনে কোন প্রকার খেয়াল-খুশী বা কারো প্রতি খামাখা বিদ্বেষ অথবা অন্যায় দোষারোপ না থাকে।

তদনুরূপ যদি কারো দূরের মসজিদে যাওয়ার উদ্দেশ্য বেশী পদক্ষেপের ফলে বেশী বেশী সওয়াব নেওয়া হয়, তাহলে তাও একটি মহৎ উদ্দেশ্য।<sup>4</sup>

<sup>1</sup> (সালাতুল-লাইলি অত্-তারাবীহ, ইবনে বায ৪৪-৪৫পৃ, আশ্শারহুল মুমতে' ৪/৯১)

<sup>2</sup> (রুবারী ৭০০, মুসলিম ৪৬৫, বাইহাকী ৩/৮৬, দারাকুত্বনী, সুন্নান ১০৬২নং)

<sup>3</sup> (সহীহ আবু দাউদ ১১১২নং)

<sup>4</sup> (সালাতুল-লাইলি অত্-তারাবীহ, ইবনে বায ৯-১০পৃ)



অনুরূপভাবে যদি কাছের মসজিদের ইমাম সঠিকভাবে (যথানিয়মে রুকু-সিজদাহ করার সাথে) নামায না পড়ে, অথবা কোন বিদআতী আমল অথবা কোন প্রকাশ্য ফাসেকী কর্মদোষে অভিযুক্ত হন, তাহলেও তাঁর পশ্চাতে নামায না পড়ে দূরের মসজিদে ভালো ইমামের পিছনে নামায পড়তে যাওয়া দৃষণীয় নয়।

তবে সতর্কতার বিষয় যে, যদি একাজে পার্শ্ববর্তী মসজিদ পরিত্যক্ত হওয়ার ছিদ্রপথরূপে গণ্য হয় অথবা সে মসজিদের ইমামের মনে ব্যথা পাওয়ার আশঙ্কা হয়, তাহলে দূরবর্তী মসজিদে যাওয়া বৈধ নয়। কারণ, আব্দুল্লাহ বিন উমার رضي الله عنه কর্তৃক বর্ণিত যে, মহানবী صلى الله عليه وسلم বলেছেন, “লোকে যেন তার পার্শ্ববর্তী মসজিদে নামায পড়ে এবং এ মসজিদ সে মসজিদ করে না বেড়ায়।”<sup>1</sup>

বলা বাহুল্য, নিষেধ অমান্য করে কোন ফযীলত বা মাহাত্ম্য অর্জন সম্ভব নয়। তাছাড়া উক্ত কাজে ঐ ভালো ইমামও ফিতনায় (গর্ব বা অহমিকায়) পড়তে পারেন। সুতরাং সাবধান!<sup>2</sup>

#### ❖ তারাবীহ ও শেষ দশকের কিয়ামের মাঝে পার্থক্যঃ

তারাবীহ ও শেষ দশকের কিয়ামুল লাইলের মাঝে রাকআত সংখ্যা ও নিয়ম-পদ্ধতির দিক থেকে কোন পার্থক্য নেই। উভয় নামায এক ও অভিন্ন। (তবে সাধারণতঃ এশার পর পড়লে তারাবীহ এবং মধ্য রাত্রির পর পড়লে কিয়ামুল লাইল বলা হয়।) শেষ দশকেও ঐ ১১ রাকআতই নামায সন্নত। কারণ, মা আয়েশা (রাঃ) বলেন, ‘তিনি রমাযানে এবং অন্যান্য মাসেও ১১ রাকআত অপেক্ষা বেশী নামায পড়তেন না।’<sup>3</sup> এখানে তিনি শেষ দশকে পৃথক রাকআত সংখ্যার কথা উল্লেখ করেন নি। সুতরাং রমাযানের সকল রাত্রেই ১১ রাকআত কিয়াম পড়াই উত্তম। তবে শেষ দশকে ঐ নামায বেশী দীর্ঘ হবে। যেহেতু রসূল صلى الله عليه وسلم ঐ শেষ দশকে সারা সারা রাত নামায পড়তেন।

<sup>1</sup> (ত্বাবারানী, সিলসিলাহ সহীহাহ, আলবানী ২২০০নং)

<sup>2</sup> (কাই নাস্তাফীদা মিন রামাযান ২২-২৩পৃঃ টীকা, মারবিয়াতু দুআ-ই খাতমিল কুরআন, ডঃ বাকর আবু য়ায়দ ৮০-৮১পৃঃ)

<sup>3</sup> (বুখারী ১১৪৭, মুসলিম ৭৩৮নং)

হযরত আয়েশা (রাঃ) বলেন, ‘শেষ দশক এসে প্রবেশ করলে নবী ﷺ নিজের লুঙ্গি বেঁধে নিতেন, তার রাত্রি জাগরণ করতেন এবং নিজ পরিবারকে জাগাতেন।’<sup>1</sup> কারণ, শেষ দশকে রয়েছে বর্কতময় রাত্রি শবেকদর। যে রাত্রি হাজার মাস অপেক্ষাও উত্তম। অতএব এ রাতগুলিতে নামায লম্বা হওয়াই বাঞ্ছনীয়। অর্থাৎ, ঐ ১১ রাকআত নামাযকে এশার পর থেকে শুরু করে ফজরের প্রায় ১ ঘন্টা আগে পর্যন্ত লম্বা করে পড়াই উত্তম।

কিন্তু যদি মসজিদের জামাআত এত দীর্ঘ রাকআত পড়তে কষ্টবোধ করে, কিরাআত, রুকু ও সিজদাহ তথা রাকআত ছোট করতে ও সেই হিসাবে তার সংখ্যা বেশী করতে পছন্দ করে এবং বলে, এটাই আমাদের জন্য সহজ, তাহলে তাদের মতে তাই করা ইমামের জন্য দোষাবহ নয়। এ ব্যাপারে মহানবী ﷺ-এর ব্যাপক নির্দেশ হল, “তোমরা সহজ কর এবং কঠিন করো না।”<sup>2</sup> তিনি আরো বলেন, “তোমাদের কেউ লোকেদের ইমামতি করলে, সে যেন নামায হাল্কা করে পড়ে।---”<sup>3</sup>

সুতরাং বিষয়টি যখন ধরাবাঁধা নিষিদ্ধ কোন বিষয় নয়, তখন আল্লাহ আমাদেরকে যাদের দায়িত্ব প্রদান করেছেন, তাদের জন্য সহজ করাটাই উত্তম ও শ্রেষ্ঠতর।<sup>4</sup>

### ❖ কিয়ামুল লাইল-এর কাযা :

যে ব্যক্তি কোন ওয়রবশতঃ রাতের নামায (তারাবীহ, তাহাজ্জুদ বা কিয়াম) পড়তে সুযোগ না পায়, সে যদি দিনে তা কাযা করে নেয়, তাহলে তা তার জন্য বৈধ এবং তাতে সওয়াব ও ফযীলতও আছে। তবে বিতর সহ সে কাযা তাকে জোড় বানিয়ে পড়তে হবে। বলা বাহুল্য, তার অভ্যাস মত ১১ রাকআত কিয়াম ছুটে গেলে, দিনের বেলায় ফজর ও যোহরের মধ্যবর্তী সময়ে ১২ রাকআত নামায কাযা পড়বে।

মা আয়েশা (রাঃ) বলেন, নবী ﷺ-এর তাহাজ্জুদ ঘুম বা ব্যথা-

<sup>1</sup> (বুখারী ২০২৪, মুসলিম ১১৭৪নং)

<sup>2</sup> (বুখারী ৬৯, মুসলিম ১৭৩৪নং)

<sup>3</sup> (আহমাদ, মুসনাদ, বুখারী ৭০৩নং, মুসলিম ৪৬৭নং, তিরমিযী)

<sup>4</sup> (দ্রঃ ৪/৭১-৭২, সালাতুল-লাইলি অত-তারাবীহ, ইবনে বায ১৬৭৪)

বেদনা ইত্যাদি কারণে ছুটে গেলে দিনে ১২ রাকআত কাযা পড়তেন।<sup>1</sup> হযরত উমার বিন খাতাব (رضي الله عنه) প্রমুখাৎ বর্ণিত, তিনি বলেন, আল্লাহর রসূল ﷺ বলেছেন, “যে ব্যক্তি তার (পূর্ণ) অযীফা (তাহাজ্জুদের নামায, কুরআন ইত্যাদি) অথবা তার কিছু অংশ রেখে ঘুমিয়ে যায়, কিন্তু তা যদি ফজর ও যোহরের নামাযের মধ্যবর্তী সময়ে আদায় করে নেয় তবে তার জন্য পূর্ণ সওয়াবই লিপিবদ্ধ করা হয়, যেন সে ঐ অযীফা রাত্রেই সম্পন্ন করেছে।”<sup>2</sup>

## ২। সদকাহ বা দান করা

রমায়ান মাসে যে সকল কর্ম করা মুসলিমের জন্য অধিকতর কর্তব্য, তার মধ্যে সদকাহ বা দান করা অন্যতম। সময়ের মর্যাদা গুণে রমায়ান মাসে দানের পৃথক মাহাত্ম্য ও বৈশিষ্ট্য রয়েছে। এ কারণেই আল্লাহর রসূল ﷺ অন্যান্য মাসে সবার চাইতে বেশী দান করতেন; কিন্তু সবচেয়ে বেশী দান করতেন এই রমায়ান মাসে। আর এমনিতে তিনি কল্যাণ স্বরূপ প্রেরিত বায়ু থেকেও অধিক দানশীল ছিলেন।<sup>3</sup>

আল্লাহর রসূল ﷺ বলেছেন, “যে ব্যক্তি (তার) বৈধ উপায়ে উপার্জিত অর্থ থেকে একটি খেজুর পরিমাণও কিছু দান করে - আর আল্লাহ তো বৈধ অর্থ ছাড়া অন্য কিছু গ্রহণই করেন না - সে ব্যক্তির ঐ দানকে আল্লাহ ডান হাতে গ্রহণ করেন। অতঃপর তা ঐ ব্যক্তির জন্য লালন-পালন করেন যেমন তোমাদের কেউ তার অশু-শাবককে লালন-পালন করে থাকে। পরিশেষে তা পাহাড়ের মত হয়ে যায়।”<sup>4</sup>

## ৩। ইফতার করানো

রমায়ান মাসে আর একটি মহৎ কাজ হল রোযাদার মানুষকে ইফতার করানো। রোযাদার গরীব হোক অথবা ধনী, বন্ধু হোক অথবা আত্মীয় অথবা দূরের কেউ, অথবা না হোক কিছু খাইয়ে তাকে ইফতার করালে

<sup>1</sup> (মুসলিম ৭৪৬নং)

<sup>2</sup> (মুসলিম ৭৪৭নং, সুনান আবু দাউদ, ইবনে খুযাইমাহ, সহীহ)

<sup>3</sup> (দ্রঃ বুখারী ৬, মুসলিম ২৩০৭নং)

<sup>4</sup> (বুখারী ১৪১০নং, মুসলিম ১০১৪নং)

তাতে বড় উপকার রয়েছে সকলের জন্য। যেহেতু ইফতারীর এই খুশীর সময় সকলে সমবেত হয়ে একে অন্যকে ফলপ্রসূ নসীহত করতে পারে। আর তার ফলে তাদের মাঝে সৃষ্টি হয় পারস্পরিক সম্প্রীতি, সহানুভূতি, সংহতি ও দয়র্দ্ভতা।

তাছাড়া এতে রয়েছে প্রচুর সওয়াব। যায়দ বিন খালেদ জুহানী (رضي الله عنه) হতে বর্ণিত, নবী (ﷺ) বলেন, “যে ব্যক্তি কোন রোযাদারকে ইফতার করায় সেই ব্যক্তিও ঐ রোযাদারের সমপরিমাণই সওয়াব অর্জন করে। আর এতে ঐ রোযাদারের সওয়াব কিঞ্চিৎ পরিমাণও কম হয়ে যায় না।”<sup>1</sup>

সলফদের অনেকেই রোযা থাকতে নিজের ইফতারী অপরকে দান করতেন। তাঁদের মধ্যে একজন হলেন, আব্দুল্লাহ বিন উমার (رضي الله عنه), দাউদ ত্বাঈ, মালেক বিন দীনার, আহমাদ বিন হাম্বল, প্রমুখ। আব্দুল্লাহ বিন উমার কিছু এতীম ও মিসকীন ছাড়া একাকী ইফতার করতেন না। আর যদি কোন দিন তিনি জানতে পারতেন যে, তাঁর পরিবার তাদেরকে তাঁর কাছে আসতে বাধা দিয়েছে বা তাদেরকে ফিরিয়ে দিয়েছে, তাহলে সে দিন আর ইফতারই করতেন না!

আবুস সাওয়ার আদাবী বলেন, আদী বংশের কিছু লোক ছিলেন, যাঁরা এই মসজিদে নামায পড়তেন; তাঁদের মধ্যে কেউই কোন খাবার দ্বারা একাকী ইফতার করতেন না। যদি সঙ্গে খাওয়ার লোক পেতেন, তাহলে খেতেন। নচেৎ, তাঁদের ইফতারী নিয়ে মসজিদে এসে লোকেদের সাথে খেতেন এবং লোকেরা তাঁদের সাথে ইফতারী করত।<sup>2</sup>

## ৪। কুরআন তেলাঅত

রমাযান মাস কুরআনের মাস।

﴿شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ

الهُدَى وَالْفُرْقَانِ﴾

<sup>1</sup> (তিরমিযী ৮০৬, নাসাঈ, ইবনে মাজাহ ১৭৪৬, ইবনে খুযাইমাহ, সহীহ, ইবনে হিব্বান, সহীহ, সহীহ তারগীব, আলবানী ১০৬৫ নং)

<sup>2</sup> (কাইফা নাসিও রামাযান, আব্দুল্লাহ আস-সালেহ ১৫ পৃঃ ৫৪)

“রমায়ান মাস; যে মাসে মানুষের দিশারী এবং সৎপথের স্পষ্ট নিদর্শন ও সত্যাসত্যের পার্থক্যকারীরূপে কুরআন অবতীর্ণ হয়েছে।”

(কুরআনুল কারীম ২/১৮৫)

জিবরীল عليه السلام রমায়ানের প্রত্যেক রাতে মহানবী صلى الله عليه وسلم-এর সাথে সাক্ষাৎ করে তাঁকে কুরআন পাঠ করাতেন।<sup>1</sup>

হযরত ফাতিমা (রাঃ) বলেন, আব্বা বলেছেন যে, জিবরীল عليه السلام প্রত্যেক বছর একবার করে তাঁর উপর কুরআন পেশ করতেন (পড়ে শুনাতেন)। কিন্তু তাঁর ইস্তিকালের বছরে দুইবার কুরআন পেশ করেন।<sup>2</sup>

উপরোক্ত হাদীসদ্বয় থেকে এই নির্দেশ পাওয়া যায় যে, রমায়ান মাসে কুরআন পঠন-পাঠন করা, এ উদ্দেশ্যে জমায়েত হওয়া এবং অপেক্ষাকৃত বড় হাফেয বা কারীর কাছে কুরআন পেশ করা (হিফয পুনরাবৃত্তি করা) মুস্তাহাব। আর তাতে এ কথারও দলীল রয়েছে যে, রমায়ান মাসে বেশী বেশী করে কুরআন তেলাঅত করা উত্তম।

প্রথমোক্ত হাদীস থেকে জানা যায় যে, জিবরীল عليه السلام মহানবী صلى الله عليه وسلم-এর সাথে রাত্রিতে কুরআন পুনরাবৃত্তি করতেন। আর তাতে বুঝা যায় যে, রমায়ানের রাতে অধিকাধিক কুরআন তেলাঅত করা মুস্তাহাব। যেহেতু রাতে কোন রকম ব্যস্ততা থাকে না, রাতে ইবাদত করতে মনের উদ্দীপনা সুসংবদ্ধ থাকে এবং হৃদয়-মন ও রসনা কুরআন উপলব্ধি করতে সমপ্রয়াসী হয়। মহান আল্লাহ বলেন,

﴿إِنَّ نَاشِئَةَ اللَّيْلِ هِيَ أَشَدُّ وَطْأً وَأَقْوَمُ قِيْلًا﴾

অর্থাৎ, নিশ্চয় রাত্রি জাগরণ মনের একাগ্রতা ও হৃদয়ঙ্গমের জন্য অতিশয় অনুকূল। (কুরআনুল কারীম ৭৩/৬)

সলফে সালাহীন রমায়ান মাসে বেশী বেশী কুরআন পাঠ করতেন। তাঁদের কেউ কেউ প্রত্যেক ৩ রাতে কিয়ামে পূর্ণ কুরআন খতম করতেন। কেউ কেউ খতম করতেন ৭ রাতে; এঁদের মধ্যে কাতাদাহ অন্যতম। কিছু সলফ ১০ রাতে খতম করতেন; এঁদের মধ্যে আবু রাজা উতারিদী

<sup>1</sup> (বুখারী ৬, মুসলিম ২৩০৮নং)

<sup>2</sup> (বুখারী ১০৮৮ পৃঃ)

অন্যতম। আসওয়াদ রমায়ানের প্রত্যেক ২ রাতে কুরআন খতম করতেন। নাখয়ী রমায়ানের শেষ দশকে ২ রাতে এবং তার পূর্বে ৩ রাতে কুরআন খতম করতেন। রমায়ান মাস প্রবেশ করলে যুহরী বলতেন, 'এ মাস তো কুরআন তেলাঅত এবং মিসকীনদেরকে খাদ্য দান করার মাস।' ইমাম মালেক রমায়ান এলে হাদীস পড়া এবং আহলে ইল্মদের বৈঠকে বসা বাদ দিয়ে মুসহাফ দেখে কুরআন পড়তে যত্নবান হতেন। সুফিয়ান সওরী রমায়ান মাস প্রবেশ করলে সকল ইবাদত ত্যাগ করে কুরআন তেলাঅত করতে প্রয়াসী হতেন।<sup>1</sup>

এ কথা বিদিত যে, ২ রাতে কুরআন খতম করা বিধেয় নয়। কারণ মহানবী ﷺ বলেন, "যে ব্যক্তি ৩ রাতের কমে কুরআন পড়ে, সে তা বুঝে না।"<sup>2</sup> কিন্তু ইবনে রজব (রঃ) বলেন, ৩ রাতের কম সময়ে কুরআন পড়তে যে নিষেধ এসেছে, তা আসলে নিয়মিতভাবে সারা বছরে করলে নিষিদ্ধ। নচেৎ, মর্যাদা ও মাহাত্ম্যপূর্ণ সময়; যেমন রমায়ান মাসে এবং বিশেষ করে যে সকল রাতে শবেকদর অনুসন্ধান করা হয় সে সকল রাতে অথবা মর্যাদা ও মাহাত্ম্যপূর্ণ স্থান; যেমন মক্কায় বহিরাগত ব্যক্তির জন্য বেশী বেশী করে কুরআন তেলাঅত করা মুস্তাহাব। যাতে মর্যাদা ও মাহাত্ম্যপূর্ণ ঐ সময় ও স্থানের যথার্থ কদর করা হয়। এ কথা বলেছেন আহমাদ, ইসহাক প্রমুখ ইমামগণ। আর এরই উপর আমল হল অন্যান্যদের; যেমন উপর্যুক্ত উদ্ধৃতি দ্বারা সে কথা স্পষ্ট হয়।<sup>3</sup>

এ কথা অবিদিত নয় যে, যে কুরআন তেলাঅত তেলাঅতকারীর জন্য সম্যক উপকারী, তা হল তার আয়াতের অর্থ, আদেশ ও নিষেধ অনুধাবন করে ও বুঝে তেলাঅত। সুতরাং তেলাঅতকারী যদি এমন কোন আয়াত পড়ে, যাতে আল্লাহ তাকে কিছু আদেশ করেছেন, তাহলে তা পালন করে। অনুরূপ এমন কোন আয়াত পড়ে, যাতে আল্লাহ তাকে কিছু নিষেধ করেছেন, তাহলে তা বর্জন করে ও তা থেকে বিরত হয়। কোন রহমতের আয়াত তেলাঅত করলে আল্লাহর কাছে রহমত ভিক্ষা করে এবং তাঁর

<sup>1</sup> (লামাঃ ইবনে রজব ১৭২, ১৭৯, ১৮১-১৮২ পৃঃ, কাই নাস্তাফীদা মিন রামায়ান ৪৮-৪৯পৃঃ, কাইফা নাস্তাফীদা রামায়ান ১৭পৃঃ, হাদিয়্যাতু লিস-সায়েমীন ১১পৃঃ দ্রঃ)

<sup>2</sup> (আবু দাউদ, তিরমিযী, ইবনে মাজাহ, দারেমী, সহীহুল জামেইস সাগীর, আলবানী ৭৭৪৩নং)

<sup>3</sup> (কাই নাস্তাফীদা মিন রামায়ান ৪৮-৪৯পৃঃ, কাইফা নাস্তাফীদা রামায়ান ১৭পৃঃ, হাদিয়্যাতু লিস-সায়েমীন ১১পৃঃ দ্রঃ)

নিকট দয়ার আশা করে। আযাবের আয়াত পাঠ করলে আল্লাহর নিকট তা থেকে পানাহ চায় এবং তাঁর শাস্তিকে ভয় করে। যে তেলাঅতকারী এমন করে, আসলে সেই কুরআন অনুধাবন করে এবং তার উপর আমল করে। আর তারই জন্য কুরআন হবে স্বপক্ষের দলীল। পক্ষান্তরে যে তেলাঅতকারী কুরআন অনুযায়ী আমল করে না, সে তাতে উপকৃতও হয় না। আর কুরআন তার বিরুদ্ধে দলীল হয়ে যাবে। মহান আল্লাহ বলেন,

﴿كِتَابٌ أَنْزَلْنَاهُ إِلَيْكَ مُبَارَكٌ لِيَدَّبَّرُوا آيَاتِهِ وَلِيَتَذَكَّرَ أُولُو الْأَلْبَابِ﴾

অর্থাৎ, আমি এই বর্কতময় কিতাব তোমার প্রতি অবতীর্ণ করেছি, যাতে মানুষ এর আয়াতসমূহ অনুধাবন করে এবং বোধশক্তি-সম্পন্ন ব্যক্তিগণ উপদেশ গ্রহণ করে। (কুরআনুল কারীম ৩৮/২৯)<sup>১</sup>

মসজিদে কুরআন তেলাঅত করলে এমন উচ্চস্বরে করা উচিত নয়, যাতে নামাযীদের ডিষ্টার্ব হয়। যেহেতু মহানবী ﷺ এ ব্যাপারে নিষেধ করে বলেন, “অবশ্যই নামাযী তাঁর প্রভুর কাছে মুনায্জাত করে। অতএব তার লক্ষ্য করা উচিত, সে কি দিয়ে তাঁর কাছে মুনায্জাত করছে। আর তোমাদের কেউ যেন অপরের কাছে উচ্চস্বরে কুরআন না পড়ে।”<sup>২</sup>

অনেকের মনে প্রশ্ন জাগতে পারে যে, কুরআন পড়া ভাল, নাকি শোনা ভাল। আসলে উত্তম হল তাই করা, যা মনোযোগের জন্য এবং প্রভাবান্বিত হওয়ার দিক থেকে বেশী উত্তম। কারণ, তেলাঅতের উদ্দেশ্য হল, আয়াতের অর্থ অনুধাবন, হৃদয়ঙ্গম ও মহান আল্লাহর কিতাব অনুযায়ী আমল।<sup>৩</sup>

সাধারণভাবে কুরআন তেলাঅতের রয়েছে বিশাল মর্যাদা এবং বিরাট সওয়াব। মহানবী ﷺ বলেন, “তোমরা কুরআন পাঠ কর। কেন না তা কিয়ামতের দিন তার পাঠকারীদের জন্য সুপারিশকারীরূপে উপস্থিত হবে।

---<sup>৪</sup>

<sup>১</sup> (ইতহাফঃ ৫১-৫২ পৃঃ দ্রঃ)

<sup>২</sup> (আহমাদ, মুসনাদ, ড়াবারানী, মু'জাম, সহীহ আবু দাউদ ১২০৩নং, সহীহুল জামেইস সাগীর, আলবানী ১৯৫১নং) (যাদুস সায়েম অফাযলুল ক্বায়েম ১৯ পৃঃ)

<sup>৩</sup> (সালাতুল-লাইলি অত-তারাবীহ, ইবনে বায ৪৬ পৃঃ)

<sup>৪</sup> (মুসলিম, আহমাদ, মুসনাদ, সহীহুল জামেইস সাগীর, আলবানী ১১৬৫নং)

তিনি আরো বলেন, “যে ব্যক্তি আল্লাহর কিতাব হতে একটি মাত্র অক্ষর পাঠ করে সে ব্যক্তি একটি নেকী লাভ করে। আর একটি নেকী দশগুণ বর্ধিত করা হয়। আমি বলছি না যে, ‘আলিফ-লাম-মীম’ একটি অক্ষর। বরং ‘আলিফ’ একটি অক্ষর, ‘লাম’ একটি অক্ষর এবং ‘মীম’ একটি অক্ষর।”<sup>1</sup>

### ❖ কুরআন তেলাঅতের সময় কান্না :

ইমাম নওবী বলেন, কুরআন তেলাঅতের সময় কান্না করা ‘আরেফীন’ (আল্লাহ সম্বন্ধে সম্যক্ জ্ঞানের অধিকারী) মানুষদের গুণ এবং নেক লোকদের প্রতীক। মহান আল্লাহ বলেন,

﴿إِنَّ الَّذِينَ أَوْتُوا الْعِلْمَ مِنْ قَبْلِهِ إِذَا تُتْلَىٰ عَلَيْهِمْ يَخِرُّونَ لِلأَذْقَانِ سُجَّدًا، وَيَقُولُونَ سُبْحَانَ رَبَّنَا إِن كَان وَعْدُ رَبَّنَا لَمَفْعُولًا، وَيَخِرُّونَ لِلأَذْقَانِ يَبْكُونَ وَيَزِيدُهُمْ خُشُوعًا﴾

অর্থাৎ, এর পূর্বে যাদেরকে জ্ঞান দেওয়া হয়েছে তাদের নিকট যখন তা পাঠ করা হয়, তখনই তারা সিজদায় লুটিয়ে পড়ে। তারা বলে, আমাদের প্রতিপালকই পবিত্রতম, আমাদের প্রতিপালকের প্রতিশ্রুতি অবশ্যই কার্যকরী হবে। তারা কাঁদতে কাঁদতে ভূমিতে লুটিয়ে (সিজদায়) পড়ে এবং তাদের তা তাদের বিনয় বৃদ্ধি করে।

(কুরআনুল কারীম ১৭/১০৮-১০৯)

তিনি আরো বলেন,

﴿أُولَئِكَ الَّذِينَ أَنْعَمَ اللَّهُ عَلَيْهِمْ مِنَ النَّبِيِّينَ مِنْ ذُرِّيَةِ آدَمَ وَمِمَّنْ حَمَلْنَا مَعَ نُوحٍ وَمِنْ ذُرِّيَةِ إِبْرَاهِيمَ وَإِسْرَائِيلَ وَمِمَّنْ هَدَيْنَا وَاجْتَبَيْنَا إِذَا تُتْلَىٰ عَلَيْهِمْ آيَاتُ الرَّحْمَنِ خَرُّوا سُجَّدًا وَبُكِيًّا﴾

<sup>1</sup> (বুখারী তারীখ, তিরমিযী, হাকেম, মুস্তাদরাক, সহীহুল জামেইস সাগীর, আলবানী ৬৪৬৯ নং)



অর্থাৎ, এরাই আদম-বংশের অন্তর্গত নবীগণ; যাদেরকে আল্লাহ অনুগৃহীত করেছেন এবং যাদেরকে আমি নূহের সাথে কিশ্তীতে আরোহণ করিয়েছিলাম এবং ইবরাহীম ও ইসরাঈল-বংশের অন্তর্গত এবং যাদেরকে আমি সুপথগামী ও মনোনীত করেছিলাম; যখন তাদের নিকট পরম দয়াময়ের আয়াত পাঠ করা হত, তখন তারা কাঁদতে কাঁদতে সিজদায় পতিত হত। (কুরআনুল কারীম ১৯/৫৮)

আব্দুল্লাহ বিন মাসউদ (رضي الله عنه) বলেন, একদা আল্লাহর রসূল (ﷺ) আমাকে বললেন, “আমাকে কুরআন পড়ে শুনাও।” আমি বললাম, ‘আমি আপনাকে কুরআন শুনাব অথচ তা আপনার উপরেই অবতীর্ণ হয়েছে?’ তিনি বললেন, “আমি অপরের নিকট তা শুনে পছন্দ করি।” ইবনে মাসউদ বলেন, অতএব আমি সূরা নিসা পড়তে শুরু করলাম। অতঃপর যখন এই আয়াতে পৌঁছলাম,

﴿فَكَيْفَ إِذَا جِئْنَا مِنْ كُلِّ أُمَّةٍ بِشَهِيدٍ وَجِئْنَا بِكَ عَلَىٰ هَٰؤُلَاءِ شَهِيدًا﴾

অর্থাৎ, অনন্তর তখন কি দশা হবে যখন আমি প্রত্যেক উম্মত থেকে একজন সাক্ষী উপস্থিত করব এবং তোমাকে তাদের উপর সাক্ষীরূপে আনয়ন করব। (কুরআনুল কারীম ৪/৪১)

তখন তিনি বললেন, “যথেষ্ট।” আমি তাঁর প্রতি তাকিয়ে দেখলাম, তাঁর চক্ষু দুটি থেকে অশ্রু ঝরছে।<sup>১</sup>

আবু হুরাইরা (رضي الله عنه) বলেন, যখন এই আয়াত অবতীর্ণ হল,

﴿أَفَمِنْ هَٰذَا الْحَدِيثِ تَعْجَبُونَ، وَتَضْحَكُونَ وَلَا تَبْكُونَ﴾

অর্থাৎ, তবে কি তোমরা এ কথায় বিস্ময় বোধ করছ? হাসছ এবং কান্না করছ না? (কুরআনুল কারীম ৫৩/৫৯-৬০)

তখন আহলুস সুফ্ফার (২) সকলে ‘ইন্না লিল্লাহি অইন্না ইলাইহি

<sup>১</sup> (বুখারী ৪৭৬৮, মুসলিম ৮০০নং)

<sup>২</sup> তাঁরা ছিলেন কিছু নিঃস্ব (মুহাজেরীন) সাহাবী, যাদের থাকার মত কোন ঘড়-বাড়ি ছিল না। তাঁরা মসজিদে নববীর সামনের সুফ্ফায় (দোচালায়) খেয়ে-না খেয়ে বাস করতেন এবং মহানবীর কাছে ইলম শিক্ষা করতেন।

রাজেউন' বলে কাঁদতে লাগলেন এবং তাঁদের চোখের পানি গাল বেয়ে বইতে লাগল। তাঁদের কান্নার শব্দ শুনে মহানবী ﷺ-ও কাঁদতে লাগলেন। তাঁর কান্না দেখে আমরাও লাগলাম কাঁদতে। অতঃপর আল্লাহর রসূল ﷺ বললেন, “যে ব্যক্তি আল্লাহর ভয়ে কাঁদে, সে ব্যক্তি জাহান্নামে প্রবেশ করবে না।”<sup>1</sup>

একদা ইবনে উমার (رضي الله عنه) সূরা মুত্বাফফিফীন পাঠ করলেন। তিনি যখন এই আয়াতে পৌঁছলেন :

﴿يَوْمَ يَقُومُ النَّاسُ لِرَبِّ الْعَالَمِينَ﴾

(অর্থাৎ, যেদিন সমস্ত মানুষ বিশু-জাহানের প্রতিপালকের সম্মুখে দণ্ডায়মান হবে।) তখন কাঁদতে লাগলেন এবং কাঁদতে কাঁদতে মাটিতে লুটিয়ে পড়লেন। অতঃপর অবশিষ্ট সূরা পড়া হতে বিরত থাকলেন।<sup>2</sup>

## ৫। উমরাহ

রমায়ান মাসে উমরাহ করা বড় ফযীলতপূর্ণ সওয়াবের কাজ। মহানবী ﷺ বলেন, “অবশ্যই রমায়ানের উমরাহ একটি হজ্জ অথবা আমার সাথে একটি হজ্জ করার সমতুল্য।”<sup>3</sup>

## ৬। শেষ দশকের আমল ও ইবাদত

মহানবী ﷺ রমায়ানের শেষ দশকে ইবাদত করতে যে মেহনত ও চেষ্টা করতেন, মাসের অন্যান্য দিনগুলিতে তা করতেন না।<sup>4</sup> মা আয়েশা (রাঃ) বলেন, রমায়ানের শেষ দশক এসে উপস্থিত হলে আল্লাহর রসূল ﷺ (ইবাদতের জন্য) নিজের কোমর (লুঙ্গি) বেঁধে নিতেন, সারারাত্রি জাগরণ করতেন এবং আপন পরিজনকেও জাগাতেন।<sup>5</sup> অন্য এক

<sup>1</sup> (ভফসীর কুরতুবী ৯/৮০)

<sup>2</sup> (কাইফা নাদ্বিতু রামায়ান ১৯ পৃঃ দ্রঃ)

<sup>3</sup> (খুখারী ১৮৬৩, মুসলিম ১২৫৬নং)

<sup>4</sup> (মুসলিম ১১৭৫নং)

<sup>5</sup> (খুখারী ২০২৪নং, আহমাদ, মুসনাদ ৬/৪১, আবু দাউদ ১৩৭৬, নাসাঈ ১৬৩৯, ইবনে মাজাহ ১৭৬৮, ইবনে খুযাইমাহ, সহীহ ২২১৪নং)

বর্ণনায় আছে, তিনি নিজে সারারাত্রি জাগরণ করতেন এবং আপন পরিজনকেও জাগাতেন। ইবাদতে মেহনত করতেন এবং কোমর (বা লুঙ্গি) বেঁধে নিতেন।<sup>1</sup>

(ক) মহানবী ﷺ রমাযানের শেষ দশকে অতিরিক্ত কিছু এমন আমল করতেন, যা মাসের অন্যান্য দিনগুলিতে করতেন না। যেমন, তিনি রাত্রি জাগরণ করতেন। সম্ভবতঃ তিনি সারারাত্রি জাগতেন; অর্থাৎ পুরো রাতটাই নামায ইত্যাদিতে মশগুল থাকতেন।

অথবা তিনি পুরো রাতটাই কিয়াম করতেন। অবশ্য এরই মধ্যে তিনি রাতের খাবার ও সেহরী খেতেন। এ ক্ষেত্রে রাত্রি জাগরণের মানে হবে অধিকাংশ বা প্রায় সম্পূর্ণ রাতটাই জাগতেন। আর মা আয়েশার একটি কথা এই ব্যাখ্যার সমর্থন করে। তিনি বলেন, আমি জানি না যে, তিনি কোন রাত্রি ফজর পর্যন্ত কিয়াম করেছেন।<sup>2</sup>

(খ) মহানবী ﷺ এই রাতগুলিতে নামায পড়ার জন্য নিজের পরিবারের সকলকে জাগাতেন। আর এ কথা বিদিত যে, তিনি বছরের অন্যান্য মাসেও পরিবারকে নামাযের জন্য জাগাতেন। তাহাজ্জুদ পড়ার শেষে বিত্র পড়ার আগে আয়েশা (রাঃ)কে জাগাতেন।<sup>3</sup> কোন কোন রাতে আলী ও ফাতেমার নিকট উপস্থিত হয়ে বলতেন, “তোমরা কি উঠে নামায পড়বে না?”<sup>4</sup> কিন্তু তিনি তাদেরকে রাত্রের কিছু অংশ নামায পড়ার জন্য জাগাতেন। বলা বাহুল্য, বছরের অন্যান্য রাতের তুলনায় শেষ দশকের রাতগুলিতে জাগানো ছিল ভিন্নতর।<sup>5</sup>

(গ) মহানবী ﷺ শেষ দশকের রাতগুলিতে নিজের লুঙ্গি বেঁধে নিতেন। এ কথায় ইঙ্গিতে তাঁর ইবাদতের জন্য পূর্ণ প্রস্তুতি এবং চিরাচরিত অভ্যাসের তুলনায় অতিরিক্ত প্রচেষ্টাকে বুঝানো হয়েছে। অর্থাৎ, তিনি কোমরে কাপড় বেঁধে ইবাদতে লেগে যেতেন।

<sup>1</sup> (মুসলিম ১১৭৪নং)

<sup>2</sup> (মুসলিম ৭৪৬, নাসাই ১৬৪১নং)

<sup>3</sup> (বুখারী ৯৫২নং)

<sup>4</sup> (আহমাদ, মুসনাদ ১/১১২, বুখারী ১১২৭, মুসলিম ৭৭৫নং)

<sup>5</sup> (দ্রঃ দুরুসু রামাযান অকাফাত লিস-সায়েমীন ৮৬পৃঃ)

অথবা তাতে ইস্তিতে স্ত্রী-সংস্পর্শ ও সহবাস ত্যাগ করার কথা বুঝানো হয়েছে। আর এই বুঝটাই সঠিকতর বলে মনে হয়। কারণ, যিনি ইবাদতের জন্য রাত জাগবেন এবং স্ত্রীকে জাগাবেন, তাঁর আবার ঐ দিকে মন যাবে কেন? তাছাড়া মুসনাদে আহমাদের এক বর্ণনায় আলী (رضي الله عنه)-এর হাদীসে আরো একটু স্পষ্ট করে বলা হয়েছে, “তিনি লুঙ্গি তুলে নিতেন।” এই হাদীসের এক বর্ণনাকারী আবু বাকরকে জিজ্ঞাসা করা হল, “তিনি লুঙ্গি তুলে নিতেন।” এ কথার অর্থ কি? উত্তরে তিনি বললেন, অর্থাৎ তিনি স্ত্রীগণ থেকে পৃথক হয়ে যেতেন।<sup>1</sup> পক্ষান্তরে মা আয়েশা (রাঃ)এর এক বর্ণনায় অতি স্পষ্ট ভাষায় বলা হয়েছে যে, “তিনি লুঙ্গি বেঁধে নিতেন এবং স্ত্রীগণ থেকে পৃথক হয়ে যেতেন।”<sup>2</sup>

মহান আল্লাহ বলেন, ﴿فَالآنَ بَاشِرُوهُنَّ وَاتَّبِعُوا مَا كَتَبَ اللَّهُ لَكُمْ﴾

অর্থাৎ, এক্ষণে (রমাযানের রাতে) তোমরা স্ত্রী-গমন কর এবং আল্লাহ তোমাদের জন্য যা বিধিবদ্ধ করেছেন তা অনুসন্ধান কর।

(কুরআনুল কারীম ২/১৮৭)

সলফদের একটি জামাআত উক্ত আয়াতের তফসীরে বলেন যে, এখানে উদ্দেশ্য হল শবেকদর অনুসন্ধান করা। সুতরাং তার মানে হল, মহান আল্লাহ যখন রমাযানের রাতে ফজরের আগে পর্যন্ত স্ত্রী-গমন হালাল করলেন, তখনই সেই সাথে শবেকদর অনুসন্ধান করতে আদেশ করেছেন। যাতে মুসলিমরা এ মাসের পুরো রাতটাই হালাল স্ত্রী-কেলিতে কাটিয়ে না দেয় এবং তার ফলে শবেকদর থেকে তারা বঞ্চিত না হয়ে যায়। তাই বৈধ যৌনাচারের সাথে সাথে তাহাজ্জুদ পড়ে শবেকদর অনুসন্ধান করতেও আদেশ করলেন রোযাদারকে; বিশেষ করে সেই সকল রাতে, যেগুলিতে শবেকদর হওয়ার আশা থাকে। এই জন্যই মহানবী (ﷺ) রমাযানের ২০ তারীখের রাত পর্যন্ত স্ত্রী-সংসর্গে থাকতেন। কিন্তু তারপর ২১শের রাত থেকেই তিনি তাঁদের কাছ থেকে পৃথক হয়ে যেতেন এবং শবেকদর পাওয়ার কামনায় শেষ রাতগুলিতে পুরো রাতটাই একমন হয়ে ইবাদত করতেন।

অতএব আমাদের উচিত হল, সকল প্রকার কল্যাণে তাঁরই অনুসরণ করা।

<sup>1</sup> (আহমাদ, মুসনাদ ১/১৩২, ১১০৩নং, ইবনে আবী শাইবাহ, মুসান্নাফ ৯৫৪৪নং)

<sup>2</sup> (আহমাদ, মুসনাদ ৬/৬৭, ২৪২৫৮নং)

মহান আল্লাহ বলেন,

﴿لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ﴾

অর্থাৎ, নিশ্চয় রসূলুল্লাহর মধ্যে রয়েছে তোমাদের জন্য উত্তম আদর্শ।  
(কুরআনুল কারীম ৩৩/২১)

## ৭। ই'তিকাফ

### ❖ ই'তিকাফের অর্থ :

ই'তিকাফের আভিধানিক অর্থ হল, কোন জিনিসকে আঁকড়ে ধরা এবং তাতে নিজেকে আবদ্ধ রাখা (রত থাকা, মগ্ন থাকা, লিপ্ত থাকা); তাতে সে জিনিস ভাল হোক অথবা মন্দ। মহান আল্লাহ বলেন,

﴿مَا هَذِهِ التَّمَائِيلِ الَّتِي أَنْتُمْ لَهَا عَاكِفُونَ﴾

অর্থাৎ, (ইবরাহীম তার পিতা ও সম্প্রদায়কে বলল,) যে মূর্তিগুলোর পূজায় তোমরা রত আছ, (বা যাদের পূজারী হয়ে বসে আছ) সে গুলো কি? (কুরআনুল কারীম ২১/৫২) অর্থাৎ, তোমরা তাদের সম্মুখে দণ্ডায়মান হয়ে পূজায় রত আছ।

শরীয়তের পরিভাষায় আল্লাহর নৈকট্য লাভের আশায় বিশেষ ব্যক্তির মসজিদের মধ্যে নিজেকে আবদ্ধ রেখে সেখানে অবস্থান করা; তথা সকল মানুষ ও সংসারের সকল কাজকর্ম থেকে দূরে থাকা এবং সওয়াবের কাজ; নামায, যিক্র ও কুরআন তেলাঅত ইত্যাদি ইবাদতের জন্য একমন হওয়াকে ই'তিকাফ বলা হয়।<sup>1</sup>

### ❖ ই'তিকাফের মান :

রমাযান মাসে করণীয় যে সব সওয়াবের কর্ম বিশেষভাবে তাকীদপ্রাপ্ত,

<sup>1</sup> (দ্রঃ ফিকহুস সুন্নাহ, সাইয়েদ সাবেক ১/৪১৯, আহকামুস সাওমি অল-ই'তিকাফ, আবু সারী মঃ আব্দুল হাদী ১৯১পৃ, তায়কীরু ইবাদির রাহমান, ফীমা অরাদা বিসিয়ামি শাহরি রামাযান, ইয়াকুব বিন ইউসুফ ২৬পৃঃ)

তার মধ্যে ই'তিকাফ অন্যতম। ই'তিকাফ সেই সকল সন্নাহর একটি, যা প্রত্যেক বছরের এই রমাযান মাসে - বিশেষ করে এর শেষ দশকে - মহানবী ﷺ বরাবর করে গেছেন। এ সব কথার দলীল নিম্নরূপঃ-

১। মহান আল্লাহ বলেন,

﴿أَنْ طَهَّرَ ابْنِي لِلطَّائِفِينَ وَالْعَاكِفِينَ وَالرُّكَّعِ السُّجُودِ﴾

অর্থাৎ, (আর আমি ইবরাহীম ও ইসমাইলকে অঙ্গীকারবদ্ধ করলাম যে,) তোমরা উভয়ে আমার (কা'বা) গৃহকে তাওয়াফকারী, ই'তিকাফকারী, রুকু ও সিজদাকারীদের জন্য পবিত্র রাখ।

(কুরআনুল কারীম ২/১২৫)

তিনি অন্যত্র বলেন, ﴿وَلَا تَبَاشِرُوهُمْ وَأَنْتُمْ عَاكِفُونَ فِي الْمَسَاجِدِ﴾

অর্থাৎ, আর মসজিদে ই'তিকাফরত অবস্থায় তোমরা স্ত্রী-গমন করো না। (কুরআনুল কারীম ২/১৮৭)

২। আবু হুরাইরা (রাঃ) বলেন, নবী ﷺ প্রত্যেক রমাযানে ১০ দিন ই'তিকাফ করতেন। কিন্তু তাঁর ইস্তিকালের বছরে তিনি ২০ দিন ই'তিকাফ করেন।<sup>1</sup>

৩। আয়েশা (রাঃ) বলেন, আল্লাহর রসূল ﷺ প্রত্যেক রমাযানে ই'তিকাফ করতেন। ফজরের নামায পড়ে তিনি তাঁর ই'তিকাফগাছে প্রবেশ করতেন।<sup>2</sup>

৪। তিনি বলেন, নবী ﷺ তাঁর ইস্তিকাল অবধি রমাযানের শেষ দশকে ই'তিকাফ করে গেছেন। তাঁর পরে তাঁর স্ত্রীগণও ই'তিকাফ করেছেন।<sup>3</sup>

৫। মহানবী ﷺ ই'তিকাফ করেছেন এবং তাঁর সাহাবাগণও তাঁর সাথে ই'তিকাফ করেছেন।<sup>4</sup>

<sup>1</sup> (বুখারী ২০৪৪নং)

<sup>2</sup> (বুখারী ২০৪১, মুসলিম ১১৭৩নং)

<sup>3</sup> (বুখারী ২০২৬, মুসলিম ১১৭২নং)

<sup>4</sup> (বুখারী ২০১৬, মুসলিম ১১৬৭নং)

### ❖ ই'তিকাক্ষের রহস্য :

প্রত্যেক ইবাদতের পশ্চাতে রহস্য, হিকমত ও যৌক্তিকতা আছে একাধিক। এ কথা বিদিত যে, প্রত্যেক আমল হৃদয়ের উপর নির্ভরশীল। যেমন মহানবী ﷺ বলেন, “শোন! দেহের মধ্যে এমন এক মাংস-পিণ্ড আছে যা ভালো হলে সারা দেহ ভালো হবে এবং তা খারাপ হলে সারা দেহ খারাপ হবে। শোন! তা হল হৃৎপিণ্ড (অন্তর)।”<sup>1</sup>

হৃদয়কে যে জিনিস বেশী নষ্ট করে তা হল নানান হৃদয়গ্রাহী মনকে উদাসকারী জিনিস এবং সেই সকল মগ্নতা ও নিরতি; যা মহান আল্লাহর দিকে ফিরে যাওয়ার পথে বাধাস্বরূপ। যেমন উদরপরায়ণতা, যৌনাচার, অতিকথা, অতিনিদ্রা, অতিবন্ধুত্ব, ইত্যাদি প্রতিবন্ধক কর্ম; যা অন্তরের ভূমিকাকে বিক্ষিপ্ত করে এবং তার একাগ্রতাকে আল্লাহর আনুগত্যে বিনষ্ট করে ফেলে। এই জন্য মহান আল্লাহ তাঁর নৈকট্য প্রদানকারী কিছু ইবাদত বিধিবদ্ধ করলেন; যা বান্দার হৃদয়কে ঐ উদাসকারী প্রতিবন্ধক বিভিন্ন অপকর্ম থেকে হিফায়ত করে। যেমন রোযা; যে রোযা দিনের বেলায় মানুষকে পানাহার ও যৌনাচার থেকে বিরত রাখে এবং সেই সকল স্বাদ উপভোগ থেকে বিরত থাকার প্রতিচ্ছবি হৃদয়-মুকুরে প্রতিফলিত হয়। আর তাই আল্লাহর সন্তুষ্টির দিকে অগ্রসর হতে শক্তি যোগায় এবং বান্দা সেই কুপ্রবৃত্তির বেড়ি থেকে মুক্তি লাভ করতে সক্ষম হয়; যা তাকে আখেরাত থেকে দুনিয়ার দিকে ফিরিয়ে দেয়।

বলা বাহুল্য, রোযা যেমন পানাহার ও যৌনাচার-জনিত কুপ্রবৃত্তির নানা প্রতিবন্ধক থেকে বাঁচার জন্য হৃদয়ের পক্ষে ঢালস্বরূপ। ঠিক তেমনি ই'তিকাক্ষও বিরাট রহস্য-বিজড়িত একটি ইবাদত। ই'তিকাক্ষ মানুষের সঙ্গে অতিরিক্ত মিলামিশার ফলে হৃদয়ে যে কুপ্রভাব পড়ে এবং অতিকথা ও অতিনিদ্রার ফলে মহান প্রতিপালকের সাথে সম্পর্কে যে ক্ষতি হয় তার হাত হতে রক্ষা করে। আর এতে কোন সন্দেহ নেই যে, অতিবন্ধুত্ব, অতিকথা এবং অতিনিদ্রার কবল থেকে মুক্তি পাওয়াতেই রয়েছে বান্দার বড় সাফল্য; যে সাফল্য তার হৃদয়কে আল্লাহর পথে অগ্রসর হতে শক্তি যোগায় এবং এর প্রতিকূল সকল অবস্থা থেকে তাকে নিরাপত্তা প্রদান করে।<sup>2</sup>

<sup>1</sup> (বুখারী ৫২, মুসলিম ১৫৯৯নং)

<sup>2</sup> (দুরুসু রামায়ান অকাফাত লিস-সায়েমীন ৭৬-৭৭পৃঃ)

### ❖ ই'তিকাহের প্রকারভেদ ৪

ই'তিকাহ দুই প্রকার; ওয়াজেব ও সন্নত। সন্নত হল সেই ই'তিকাহ, যা বান্দা আল্লাহর নৈকট্য ও সওয়াব লাভের উদ্দেশ্যে রসূল ﷺ-এর অনুকরণ করে স্বেচ্ছায় করে থাকে। আর এই ই'তিকাহ রমায়ান মাসের শেষ দশকে করাই হল তাকীদপ্রাপ্ত; যেমন এ কথা পূর্বে বলা হয়েছে।

পক্ষান্তরে ওয়াজেব হল সেই ই'তিকাহ, যা বান্দা খোদ নিজের জন্য ওয়াজেব করে নিয়েছে। চাহে তা সাধারণ নযর মেনে অথবা শর্তভিত্তিক বিলম্বিত নযর মেনে হোক। যেমন কেউ যদি বলে, আমি আল্লাহর ওয়াস্তে ই'তিকাহ করার নযর মানলাম অথবা আল্লাহ আমার রোগীকে আরোগ্য দান করলে আমি তাঁর জন্য ই'তিকাহ করব - তাহলে সে ই'তিকাহ পালন করা ওয়াজেব।

মহানবী ﷺ বলেন, “যে ব্যক্তি আল্লাহর আনুগত্য (ইবাদত) করার নযর মানে, সে যেন তা পালন করে।”<sup>1</sup>

একদা উমার (رضي الله عنه) বললেন, হে আল্লাহর রসূল! আমি জাহেলী যুগে মাসজিদুল হারামে এক রাত্রি ই'তিকাহ করার নযর মেনেছি। মহানবী ﷺ বললেন, “তুমি তোমার নযর পুরা কর।”<sup>2</sup>

### ❖ ই'তিকাহের সময় ৪

ওয়াজেব ই'তিকাহ ঠিক সেই সময় মত আদায় করা জরুরী, যে সময় নযর-ওয়াল তাই নযরে উল্লেখ করেছে। সে যদি এক দিন বা তার বেশী ই'তিকাহ করার নযর মানে, তাহলে তাকে তাই পালন করা ওয়াজেব হবে, যা তার নযরে উল্লেখ করেছে।

আর মুস্তাহাব ই'তিকাহের জন্য কোন নির্দিষ্ট সময় নেই। এমন ই'তিকাহ নিয়ত করে মসজিদে অবস্থান করলেই বাস্তবায়ন হয়; চাহে সে সময় লম্বা হোক অথবা সংক্ষিপ্ত। মসজিদে অবস্থানকাল পর্যন্ত সওয়াব লাভ হবে। মসজিদ থেকে বের হয়ে গিয়ে পুনরায় ফিরে এসে ই'তিকাহ করার

<sup>1</sup> (বুখারী ৬৬৯৬নং, সুনানে আরবাআহ; আবু দাউদ, তিরমিযী, নাসাই ও ইবনে মাজাহ)

<sup>2</sup> (বুখারী ২০৩২নং)



ইচ্ছা করলে নিয়ত নবায়ন করতে হবে।<sup>1</sup>

মহানবী ﷺ ১০ দিন ই'তিকাহ করেছেন; যেমন শেষ জীবনে তিনি ২০ দিন ই'তিকাহ করেছেন। অনুরূপ তিনি রমাযানের প্রথম দশকে, অতঃপর মধ্যম দশকে অতঃপর শেষ দশকে ই'তিকাহ করেছেন।<sup>2</sup>

উমার (رضي الله عنه) তাঁকে জিজ্ঞাসা করলেন, আমি জাহেলী যুগে মাসজিদুল হারামে এক রাত্রি ই'তিকাহ করার নয়র মেনেছি। উত্তরে মহানবী ﷺ বললেন, “তুমি তোমার নয়র পুরা কর।”<sup>3</sup>

এ সব কিছু এ কথারই দলীল যে, ই'তিকাহের জন্য কোন নির্দিষ্ট সময় নেই।

যেমন ই'তিকাহ রমাযানের মধ্যেই সীমাবদ্ধ নয়। কারণ, মহানবী ﷺ উমার (رضي الله عنه)-কে তাঁর ই'তিকাহের নয়র পালন করতে অনুমতি দিলেন। আর তা ছিল রমাযান ছাড়া অন্য কোন মাসে। অতএব সন্নত হল রমাযানে এবং বিশেষ করে কেবল তার শেষ দশকে ই'তিকাহ করা। যেহেতু শরীয়তের আহকাম রসূল ﷺ-এর আমল থেকেই গ্রহণ করতে হবে। আর তিনি কাযা করা ছাড়া অরমাযানে ই'তিকাহ করেন নি। তদনুরূপ আমরা জানি না যে, সাহাবাদের কেউ কাযা ছাড়া অরমাযানে ই'তিকাহ করেছেন।

কিন্তু উমার (رضي الله عنه) যখন ফতোয়া চাইলেন, তখন তিনি তাঁকে (অরমাযানে) ই'তিকাহের নয়র পুরা করার অনুমতি দিলেন। কিন্তু তিনি উম্মতের জন্য তা সাধারণ শরয়ী নিয়ম হিসাবে ঘোষণা করে জান নি; যাতে লোকেদেরকে বলা যাবে যে, ‘তোমরা মসজিদে রমাযান-অরমাযানে যে কোন সময় ই'তিকাহ কর; এটাই হল সন্নত।’

সুতরাং বাহ্যতঃ যা বুঝা যায় তা এই যে, যদি কোন মুসলিম অরমাযানে ই'তিকাহে বসে, তাহলে তাতে আপত্তির কিছু নেই। আর এ কথাও বলা যাবে না যে, তা বিদআত। কারণ, মহানবী ﷺ উমার (رضي الله عنه)-

<sup>1</sup> (ফিকহস সূনাহ ১/৪২০)

<sup>2</sup> (বুখারী ২০১৬, মুসলিম ১১৬৭নং)

<sup>3</sup> (বুখারী ২০৩২নং)

কে তাঁর ই'তিকাহের নযর পুরা করতে অনুমতি দিয়েছেন। পক্ষান্তরে যদি সে নযর মকরুহ অথবা হারাম হত, তাহলে তা পুরা করার অনুমতি দিতেন না। কিন্তু আমরা প্রত্যেকের কাছে এ চাইতে পারি না যে, সে যে কোন সময় ই'তিকাহ করবে। বরং আমরা তাকে বলব, শ্রেষ্ঠ পথনির্দেশ হল, মুহাম্মাদ ﷺ-এর পথনির্দেশ। যদি তিনি জানতেন যে, অরমাযানে বরং রমাযানের শেষ দশক ছাড়া অন্য সময়ের ই'তিকাহের কোন বৈশিষ্ট্য বা সওয়াব আছে, তাহলে তিনি আমলে পরিণত করার জন্য উম্মতের কাছে তা প্রচার করে যেতেন। অতএব আমাদের জন্য উত্তম হল রসূল ﷺ-এর অনুসরণ করা।<sup>1</sup>

### ❖ ই'তিকাহের শর্তাবলী :

ই'তিকাহ শুদ্ধ হওয়ার জন্য কিছু শর্ত রয়েছে :-

১. ই'তিকাহকারীকে মুসলিম হতে হবে।
২. জ্ঞানসম্পন্ন হতে হবে।
৩. ভালো মন্দের বুঝ-শক্তিসম্পন্ন হতে হবে।
৪. তাতে তার নিয়ত হতে হবে। প্রিয় নবী ﷺ বলেন, “যাবতীয় আমল নিয়তের উপর নির্ভরশীল। সুতরাং প্রত্যেক ব্যক্তির তা-ই প্রাপ্য হয়, যার সে নিয়ত করে থাকে।”

৫. ই'তিকাহ মসজিদে হতে হবে। যেহেতু মহান আল্লাহ বলেন,

﴿وَلَا تَبَاشِرُوهُنَّ وَأَنْتُمْ عَاكِفُونَ فِي الْمَسَاجِدِ﴾

অর্থাৎ, আর মসজিদে ই'তিকাহরত অবস্থায় তোমরা স্ত্রী-গমন করো না। (কুরআনুল কারীম ২/১৮৭) বলা বাহুল্য, তিনি ই'তিকাহের স্থান হিসাবে মসজিদের কথা উল্লেখ করেছেন। অতএব মসজিদ ছাড়া অন্য কোন স্থানে ই'তিকাহ শুদ্ধ হলে আয়াতে তার উল্লেখ আসত না।<sup>2</sup>

অতঃপর জানার কথা যে, ই'তিকাহ ব্যাপকভাবে যে কোন মসজিদে

<sup>1</sup> (দ্রঃ আশশারহুল মুমতে' ৬/৫০৬-৫০৮)

<sup>2</sup> (আশশারহুল মুমতে' ৬/৫০২, ফিকহস সুন্নাহ ১/৪২১)

বসেই করা যায়। কিন্তু এতে কোন সন্দেহ নেই যে, মাহাত্ম্যপূর্ণ ৩টি মসজিদ; অর্থাৎ মাসজিদুল হারাম, মাসজিদে নববী এবং মাসজিদে আকসাতে ই'তিকাফ করা সবচেয়ে উত্তম। যেমন উক্ত ৩টি মসজিদে নামায পড়া অন্যান্য মসজিদের তুলনায় বহুগুণে উত্তম।<sup>1</sup>

মসজিদের শর্ত হল, তাতে যেন জামাআত কায়েম হয়। অবশ্য জুমআহ কায়েম হওয়া শর্ত নয়।<sup>2</sup> তবে উত্তম হল জামে' মসজিদেই ই'তিকাফ করা। যেহেতু মহানবী ﷺ জামে' মসজিদে ই'তিকাফ করেছেন। তাছাড়া সকল নামাযের জামাআতে নামাযী সংখ্যা তাতেই বেশী হয় এবং যাতে জুমআহ পড়ার জন্য নিজের ই'তিকাফ-গাহ ছেড়ে কোন জামে' মসজিদে যাওয়ার জন্য বাধ্যতামূলকভাবে বের হতে না হয়।<sup>3</sup> পরন্তু আয়েশা (রাঃ) বলেন, 'ই'তিকাফকারীর জন্য সুন্নত হল, সে কোন রোগীকে দেখা করতে যাবে না ---। আর জামে' মসজিদ ছাড়া অন্য কোন মসজিদে ই'তিকাফ নেই।'<sup>4</sup>

জ্ঞাতব্য যে, মহিলার জন্য তার বাড়ির মসজিদে (যেখানে সে ৫ অঙ্ক নামায পড়ে সেখানে) ই'তিকাফ শুদ্ধ নয়। কারণ, তা আসলে কোন অর্থেই মসজিদ নয়।

৬. ই'তিকাফকারীকে (বীর্যপাত, মাসিক বা নিফাস-জনিত কারণে ঘটিত) বড় নাপাকী থেকে পবিত্র থাকতে হবে।

৭. কোন প্রকার ফিতনার আশঙ্কা না থাকলে মহিলা যে কোন মসজিদে ই'তিকাফ করতে পারে। বলা বাহুল্য, কোন প্রকার ফিতনার ভয় থাকলে মসজিদে ই'তিকাফ করতে অনুমতি দেওয়া যাবে না। কারণ, সওয়াবের কাজ করতে গিয়ে গোনাহ ঘটে যাওয়ার আশঙ্কা থাকলে সওয়াবের কাজ করতে বাধা দেওয়া ওয়াজেব।<sup>5</sup>

তদুপরি শর্ত হল, স্বামী যেন মহিলাকে সে কাজে অনুমতি দেয়।

<sup>1</sup> (আশশারহুল মুমতে' ৬/৫০৫)

<sup>2</sup> (ঐ ৬/৫১১)

<sup>3</sup> (ফিকহস সুন্নাহ ১/৪২১, তাযকীর ইবাদির রাহমান, ফীমা অরাদা বিসিয়ামি শাহরি রামাযান ২৬পৃঃ)

<sup>4</sup> (সহীহ আবু দাউদ, আলবানী ২১৬০নং)

<sup>5</sup> (আশশারহুল মুমতে' ৬/৫১১)

নচেৎ, তার অনুমতি না নিয়েই স্ত্রী ই'তিকাফে বসলে স্বামী ই'তিকাফ ভাঙ্গার জন্য তাকে বাধ্য করতে পারে। মহানবী ﷺ-এর স্ত্রীগণের তাঁবু টাঙ্গানোর পর তিনি তাঁদেরকে ই'তিকাফ করতে বাধ্য দিয়েছিলেন।<sup>1</sup>

আর সঠিক অভিমত এই যে, ই'তিকাফের জন্য রোযা থাকা এবং সময় নির্ধারিত করা শর্ত নয়। এ কথার দলীল হল, উপর্যুক্ত হযরত উমার (رضي الله عنه) এর হাদীস।<sup>2</sup> যেহেতু তিনি রাতে ই'তিকাফ করার নয়র মেনেছিলেন; অথচ রাতে রোযা হয় না।

অবশ্য ই'তিকাফের জন্য রোযা মুস্তাহাব। কেননা, মহান আল্লাহ ই'তিকাফের কথা রোযার সাথে উল্লেখ করেছেন। আর রসূল ﷺ কাযা ছাড়া যে ই'তিকাফ করেছেন, তা রোযা রাখা অবস্থায় করেছেন। পরন্তু আয়েশা (রাঃ) বলেন, 'ই'তিকাফকারীর জন্য সুন্নত হল, সে কোন রোগীকে দেখা করতে যাবে না --। আর রোযা ছাড়া ই'তিকাফ নেই।--'<sup>3</sup>

পক্ষান্তরে সবচেয়ে উত্তম হল রমাযানের শেষ দশকেই ই'তিকাফ করা; যেমন এ কথা পূর্বে আলোচিত হয়েছে।

### ❖ ই'তিকাফ-গাহে প্রবেশ করার সময় :

পূর্বে উল্লেখ করা হয়েছে যে, মুস্তাহাব ই'তিকাফের জন্য কোন ধরাবাঁধা সময় নেই। সুতরাং ই'তিকাফকারী যখনই মসজিদে প্রবেশ করবে এবং সেখানে অবস্থান করে আল্লাহর নৈকট্য লাভের নিয়ত করবে, তখনই সে সেখান থেকে বের না হওয়া পর্যন্ত ই'তিকাফকারী বলে গণ্য হবে। কিন্তু সে যদি রমাযানের শেষ দশকে ই'তিকাফ করতে চায়, তাহলে প্রথম (২১শের) রাত্রি আসার (২০শের সূর্য ডোবার) পূর্বে মসজিদে প্রবেশ করবে। কারণ, মহানবী ﷺ বলেন, "যে ব্যক্তি আমার সাথে ই'তিকাফ করতে চায়, সে যেন শেষ দশকে ই'তিকাফ করে।"<sup>4</sup> এখানে শেষ দশক বলতে শেষ দশটি রাতকে বুঝিয়েছেন। আর শেষ দশ রাতের প্রথম রাত

<sup>1</sup> (বুখারী ২০৩৩, মুসলিম ১১৭২নং)

<sup>2</sup> (আশ'শারহুল মুমতে' ৬/৫০৯, কাইফা নাদ্বু রামাযান ২৫পৃঃ)

<sup>3</sup> (সহীহ আবু দাউদ ২১৬০নং)

<sup>4</sup> (বুখারী ২০২৭নং)

হল ২১শের রাত।

পক্ষান্তরে সহীহায়নে প্রমাণিত যে, মহানবী ﷺ ফজরের নামায পড়ে তাঁর ই'তিকাফ-গাহে প্রবেশ করলেন।<sup>1</sup> এর অর্থ এই যে, ঐ সময় তিনি মসজিদের ভিতরে ই'তিকাফের জন্য নির্দিষ্ট জায়গায় প্রবেশ করলেন। যেহেতু তিনি মসজিদের ভিতর বিশেষ এক জায়গায় ই'তিকাফ করতেন। যেমন সহীহ মুসলিমে বর্ণিত যে, তিনি পশম নির্মিত তুর্কী ছোট এক তাঁবুর ভিতরে ই'তিকাফ করেছেন।<sup>2</sup> কিন্তু ই'তিকাফের জন্য তাঁর মসজিদে প্রবেশ করার সময় ছিল রাতের প্রথমাংশ।<sup>3</sup>

যে ব্যক্তি রমায়ানের শেষ দশকে ই'তিকাফ করবে, সে মসজিদ থেকে বের হবে মাসের শেষ দিনের সূর্য অস্ত যাওয়ার পর। অবশ্য কিছু সলফ মনে করেন যে, শেষ দশকের ই'তিকাফকারী ঈদের রাতটাও মসজিদে কাটিয়ে পরদিন সকালে ঈদের নামায পড়ে তবে ঘরে ফিরবে।<sup>4</sup>

আর যে ব্যক্তি একদিন অথবা নির্দিষ্ট কয়েক দিন ই'তিকাফ করার নযর মেনেছে, অথবা অনুরূপ নফল ই'তিকাফ করতে চায়, সে ব্যক্তি ফজর উদয় হওয়ার আগে আগে ই'তিকাফ-গাহে প্রবেশ করবে এবং সূর্য পরিপূর্ণরূপে অস্ত যাওয়ার পরে সেখান হতে বের হবে।

পক্ষান্তরে যে ব্যক্তি এক রাত অথবা নির্দিষ্ট কয়েক রাত ই'তিকাফ করার নযর মেনেছে, অথবা অনুরূপ নফল ই'তিকাফ করতে চায়, সে ব্যক্তি পরিপূর্ণরূপে সূর্য অস্ত যাওয়ার আগে আগে ই'তিকাফ-গাহে প্রবেশ করবে এবং স্পষ্টরূপে ফজর উদয় হওয়ার পরে সেখান হতে বের হবে।<sup>5</sup>

### ❖ ই'তিকাফকারীর জন্য যা করা মুস্তাহাব :

১। ই'তিকাফকারীর জন্য বেশী বেশী নফল ইবাদত করা, নিজেকে নামায, কুরআন তেলাঅত, যিক্র, ইস্তিগফার, দরুদ ও সালাম, দুআ

<sup>1</sup> (বুখারী ২০৪১, মুসলিম ১১৭৩নং)

<sup>2</sup> (মুসলিম ১১৬৭নং)

<sup>3</sup> (ফিকহুস সুন্নাহ ১/৪২২, দুরুসু রামায়ান অকাফাত লিস-সায়েমীন ৮০পৃঃ)

<sup>4</sup> (ফিকহুস সুন্নাহ ১/৪২৩, আহকামুস সাওমি অল-ই'তিকাফ, আবু সারী যঃ আব্দুল হাদী ২০১পৃঃ)

<sup>5</sup> (ঐ)

ইত্যাদি ইবাদতে মশগুল রাখা মুস্তাহাব; যে ইবাদত দ্বারা বান্দা আল্লাহর নৈকট্য লাভ করতে এবং মুসলিম তার মহান সৃষ্টিকর্তার সাথে সম্পর্ক কায়েম করতে পারে।

প্রকাশ যে, শরয়ী ইল্ম আলোচনা করা, (দ্বীনী বই-পুস্তক পাঠ করা,) তফসীর, হাদীস, আখিয়া ও সালেহীনদের জীবনী গ্রন্থ পাঠ করা এবং দ্বীনে ইসলাম ও ফিক্‌হ সম্বন্ধীয় যে কোন বই-পুস্তক পাঠ করাও উক্ত ইবাদতের পর্যায়ভুক্ত।<sup>1</sup>

তদনুরূপ মসজিদে অনুষ্ঠিত ইলমী মজলিসেও সে অংশগ্রহণ করতে পারে। তবে উত্তম হল, বিশেষ ইবাদত দ্বারা ই'তিকাফ করা; যেমন নামায, যিকুর, কুরআন তেলাঅত প্রভৃতি। অবশ্য দিনে বা রাতে ২/১ টি দর্সে উপস্থিত হওয়া দৃষণীয় নয়। কিন্তু ইলমী মজলিস যদি একটানা হতেই থাকে এবং ই'তিকাফকারীও সেই দর্সসমূহের পূর্বালোচনা ও পুনরালোচনা করতে থাকে, আর অনেক বৈঠক বা জালসায় উপস্থিত হয়ে বিশেষ ইবাদত করতে সুযোগ না পায়, তাহলে নিঃসন্দেহে তা ক্রটির কথা। পক্ষান্তরে সাময়িক ও স্বল্প দর্সে ২/১ বার হাযির হলে কোন ক্ষতি হয় না।<sup>2</sup>

২। ই'তিকাফকারী অপ্রয়োজনীয় ও বাজে কথা বলা থেকে দূরে থাকবে এবং তর্কাতর্কি, হুজত-ঝগড়া ও গালাগালি করা থেকে বিরত থাকবে।

৩। মসজিদের ভিতরে একটি জায়গা নির্দিষ্ট করে সেখানে অবস্থান করবে। নাফে' বলেন, 'আব্দুল্লাহ বিন উমার মসজিদের সেই জায়গাটিকে দেখিয়েছেন, যে জায়গায় আল্লাহর রসূল ﷺ ই'তিকাফ করতেন।'<sup>3</sup>

### ❖ ই'তিকাফকারীর জন্য যা করা বৈধ :

১। অতি প্রয়োজনীয় ব্যাপারে ই'তিকাফকারী মসজিদ থেকে বের হতে পারে। যেমন ব্যক্তিগত প্রয়োজনে পানাহার করতে, পরনের কাপড় বা শীতের ঢাকা আনতে এবং পেশাব-পায়খানা করতে বের হওয়া বৈধ।

<sup>1</sup> (ফিক্‌হস সুন্নাহ ৪/৪২৩)

<sup>2</sup> (আশশারহুল মুমতে' ৬/৫০৩, ৫২৯)

<sup>3</sup> (মুসলিম ১১৭১নং)

তদনুরূপ শরয়ী প্রয়োজনে; যেমন নাপাকীর গোসল করতে অথবা ওযু করতে মসজিদের বাইরে যাওয়া অবৈধ নয়।<sup>1</sup>

মা আয়েশা (রাঃ) বলেন, ‘(ই’তিকাফের সময়) নবী ﷺ ব্যক্তিগত প্রয়োজন ছাড়া ঘরে আসতেন না।’

তিনি আরো বলেন, ‘ই’তিকাফকারীর জন্য সুন্নত হল, সে কোন রোগীকে দেখা করতে যাবে না, কোন জানাযায় অংশগ্রহণ করবে না, স্ত্রী-স্পর্শ, কোলাকুলি, বা সঙ্গম করবে না, আর অতি প্রয়োজন ছাড়া মসজিদ থেকে বের হবে না।’<sup>2</sup>

২। মসজিদের ভিতরে ই’তিকাফকারী পানাহার করতে ও ঘুমাতে পারে। তবে মসজিদের পবিত্রতা ও পরিচ্ছন্নতার খেয়াল অবশ্যই রাখতে হবে।

৩। নিজের অথবা অন্যের প্রয়োজনে বৈধ কথা বলতে পারে।

৪। মাথা আঁচড়ানো, লম্বা নখ কাটা, দৈহিক পরিচ্ছন্নতার খেয়াল রাখা, সুন্দর পোশাক পরা, আতর ব্যবহার করা ইত্যাদি কর্ম ই’তিকাফকারীর জন্য বৈধ।

মহানবী ﷺ ই’তিকাফ অবস্থায় নিজের মাথাকে মসজিদ থেকে বের করে হজরায় আয়েশার সামনে ঝুঁকিয়ে দিতেন এবং তিনি মাসিক অবস্থাতেও তাঁর মাথা ধুয়ে দিতেন এবং আঁচড়ে দিতেন।<sup>3</sup>

৫। ই’তিকাফ অবস্থায় যদি পরিবারের কেউ ই’তিকাফকারীর সাথে মসজিদে দেখা করতে আসে, তাহলে তাকে আগিয়ে বিদায় দেওয়ার জন্য মসজিদ থেকে বের হওয়া বৈধ। হযরত সাফিয়্যাহ মহানবী ﷺ-কে দেখা করতে এলে তিনি এরূপ করেছিলেন।<sup>4</sup>

### ❖ ই’তিকাফকারীর জন্য যা করা মকরুহঃ

ই’তিকাফকারীর জন্য কোন কিছু ক্রয়-বিক্রয় করা, অপয়োজনে কথা বলা, ইবাদত মনে করে প্রয়োজনেও বিলকুল কথা না বলা ইত্যাদি মকরুহ।<sup>5</sup>

<sup>1</sup> (আশ্শারহুল মুমত’ ৬/৫২৩)

<sup>2</sup> (সহীহ আবু দাউদ ২১৬০নং)

<sup>3</sup> (বুখারী ২০২৮, ২০৩০, মুসলিম ২৯৭নং)

<sup>4</sup> (বুখারী ২০৩৫, মুসলিম ২১৭৫নং)

<sup>5</sup> (ফিকহুস সুন্নাহ ১/৪২৪, কাইফা নাজ্জুত রামাযান ২৬-২৭পৃঃ)

❖ ই'তিকাহফ যাতে বাতিল হয়ে যায় :

১। অতি প্রয়োজন ছাড়া মসজিদ থেকে সামান্য ক্ষণের জন্যও ইচ্ছাকৃত বের হলে ই'তিকাহফ নষ্ট হয়ে যায়। যেহেতু মসজিদে অবস্থান করা ই'তিকাহফের জন্য অন্যতম শর্ত অথবা রুক্ন।

২। স্ত্রী-সহবাস করে ফেললে ই'তিকাহফ বাতিল। কারণ মহান আল্লাহ বলেন,

﴿وَلَا تَبَاشِرُوهُنَّ وَأَنْتُمْ عَاكِفُونَ فِي الْمَسَاجِدِ، تِلْكَ حُدُودُ اللَّهِ فَلَا

تَقْرُبُوهَا﴾

অর্থাৎ, আর মসজিদে ই'তিকাহফরত অবস্থায় তোমরা স্ত্রী-গমন করো না। এ হল আল্লাহর নির্ধারিত সীমা। অতএব তার নিকটবর্তী হয়ো না। (কুরআনুল কারীম ২/১৮৭)

৩। নেশা বা মস্তিষ্ক-বিকৃতির ফলে জ্ঞানশূন্য হয়ে গেলে ই'তিকাহফ বাতিল হয়ে যায়। কারণ তাতে মানুষের ভালো-মন্দের তমীয থাকে না।

৪। মহিলাদের মাসিক বা নিফাস শুরু হলে ই'তিকাহফ বাতিল। কারণ, পবিত্রতা একটি শর্ত।

৫। কোন কথা বা কর্মের মাধ্যমে শির্ক, কুফর করলে বা মূর্তাদ্দ হয়ে গেলে ই'তিকাহফ বাতিল হয়ে যায়। মহান আল্লাহ বলেন,

﴿لَيْسَ أَشْرَكَتَ لِيَحْبِطَنَّ عَمَلَكَ﴾

অর্থাৎ, তুমি শির্ক করলে তোমার আমল পণ্ড হয়ে যাবে।

(কুরআনুল কারীম ৩৯/৬৫)

❖ ই'তিকাহফ ভঙ্গ এবং তার কাযা করা :

ই'তিকাহফকারী যতটা সময় ই'তিকাহফ করার নিয়ত করেছিল ততটা সময় পূর্ণ হওয়ার আগে সে তা ভঙ্গ করতে পারে। একদা রসূলুল্লাহ ﷺ তাঁর স্ত্রীদের ই'তিকাহফের তাঁবু তৈরী দেখে তা ভেঙ্গে ফেলতে আদেশ

<sup>1</sup> (ফিকহুস সুন্নাহ ১/৪২৬, কাইফা নাজ্জিত রামায়ান ২৭৭ঃ, আহকামুস সাওমি অল-ই'তিকাহফ, আবু সারী মঃ আব্দুল হাদী ২০৫পৃঃ)



করলেন এবং নিয়ত করার পরে তাঁদের সাথে নিজেও ই'তিকাহ ত্যাগ করলেন। অতঃপর তিনি সেই ই'তিকাহ শওয়াল মাসের প্রথম দশকে কাযা করেন।<sup>1</sup>

উক্ত হাদীস অনুসারে যে ব্যক্তি নফল ই'তিকাহ শুরু করার পর ভঙ্গ করে তার জন্য তা কাযা করা মুস্তাহাব। পক্ষান্তরে যে ব্যক্তি নযরের ই'তিকাহ শুরু করার পর কোন অসুবিধার ফলে ভঙ্গ করে, সুযোগ ও সামর্থ্য হলে তার জন্য তা কাযা করা ওয়াজেব। কিন্তু তা কাযা করার পূর্বেই সে যদি মারা যায়, তাহলে তার তরফ থেকে তার নিকটবর্তী ওয়ারেস কাযা করবে।

### ❖ নির্দিষ্ট মসজিদে ই'তিকাহের নযর :

যে ব্যক্তি মাসজিদুল হারামে ই'তিকাহ করার নিয়ত করেছে, তার জন্য অন্য মসজিদে ই'তিকাহ করা জায়েয নয়। যে ব্যক্তি মসজিদে নববীতে ই'তিকাহ করার নযর মানে, তার জন্যও সেখানেই ই'তিকাহ করা ওয়াজেব। অবশ্য সে মাসজিদুল হারামে ই'তিকাহ করতে পারে। কারণ, এ মসজিদ মসজিদে নববী অপেক্ষা শ্রেষ্ঠ। অনুরূপ যদি কেউ মাসজিদুল আকসাতে ই'তিকাহ করার নযর মানে, তার জন্য উক্ত তিনটি মসজিদের যে কোন একটিতে ই'তিকাহ পালন করা ওয়াজেব।

পক্ষান্তরে যে ব্যক্তি উক্ত তিনটি মসজিদ ছাড়া অন্য মসজিদে ই'তিকাহ করার নযর মানে, তার জন্য ঐ মসজিদে তা পালন করা জরুরী নয়। বরং ইচ্ছামত সে যে কোন মসজিদে ই'তিকাহ করতে পারে। যেহেতু মহান আল্লাহ তাঁর ইবাদতের জন্য কোন নির্দিষ্ট জায়গা নির্বাচন করেন নি। আর যেহেতু উক্ত তিনটি মসজিদ ছাড়া অন্যান্য মসজিদগুলোর পারস্পরিক কোন পৃথক মর্যাদা নেই।<sup>2</sup>

পরিশেষে ব্রাদারানে ইসলাম! এই মৃতপ্রায় সুনুতকে জীবিত করার জন্য, এর কথা নিজ পরিবার-পরিজন ও ভাই-বন্ধুদের কাছে প্রচার করার জন্য যত্নবান হন। প্রচার ও পালন করুন নিজ সমাজ ও জামাআতের মসজিদে। অবশ্যই আল্লাহ আপনাদেরকে ই'তিকাহের সওয়াবের সাথে

<sup>1</sup> (বুখারী ২০৩৩, মুসলিম ১১৭৩নং)

<sup>2</sup> (ফিকহুস সুন্নাহ ১/৪২৮, কাইফা নাসিখ রামাযান ২৮পৃঃ)

সাথে তাদের ই'তিকাফের সওয়াবও দান করবেন, যারা আপনার অনুসরণ করে তা পালন করবে।

## ৮। শবেকদর অন্বেষণ

রমায়ান মাসের শেষ দশকের বেজোড় সংখ্যার রাত্রিগুলোতে শবেকদর অনুসন্ধান করা মুস্তাহাব। মহানবী ﷺ এর অনুসন্धानে উক্ত রাত্রিগুলিতে বড় মেহনত করতেন। আর এ কথা পূর্বে বলা হয়েছে যে, রমায়ানের শেষ দশক এসে উপস্থিত হলে আল্লাহর রসূল ﷺ (ইবাদতের জন্য) নিজের কোমর (লুঙ্গি) বেঁধে নিতেন, সারারাত্রি জাগরণ করতেন এবং আপন পরিজনকেও জাগাতেন। তাছাড়া শবেকদরের সন্ধানে ও আশায় তিনি ঐ শেষ দশকের দিবারাত্রি ই'তিকাফ করতেন।

আসুন! আমরা দেখি শবেকদর কি? তার কদর কতটুকু? এবং তার আহকাম কি?

### ❖ শবেকদরের নাম শবেকদর কেন?

আরবীতে 'লাইলাতুল ক্বাদর'-এর ফারসী, উর্দু, হিন্দী ও বাংলাতে অর্থ হল শবেকদর। আরবীতে 'লাইলাহ' এবং ফারসীতে 'শব' শব্দের মানে হল রাত। কিন্তু 'ক্বাদর' শব্দের মানে বিভিন্ন হতে পারে। আর সে জন্যই এর নামকরণের কারণও বিভিন্ন। যেমন :-

১। ক্বাদর মানে তকদীর। সুতরাং লাইলাতুল ক্বাদর বা শবেকদরের মানে তকদীরের রাত বা ভাগ্য-রজনী। যেহেতু এই রাতে মহান আল্লাহ আগামী এক বছরের জন্য সৃষ্টির রুখী, মৃত্যু ও ঘটনাঘটনের কথা লিপিবদ্ধ করে থাকেন। যেমন তিনি এ কথা কুরআনে বলেন,

﴿فِيهَا يُفْرَقُ كُلُّ أَمْرٍ حَكِيمٍ﴾

অর্থাৎ, এই রজনীতে প্রত্যেক গুরুত্বপূর্ণ বিষয় স্থিরীকৃত হয়।

(কুরআনুল কারীম ৪৪/৪)

আর এই তকদীর; যা বাৎসরিক বিস্তারিত আকারে লিখা হয়। এ ছাড়া মাতৃগর্ভে ভ্রূণ থাকা অবস্থায় লিখা হয় সারা জীবনের তকদীর। আর আদি

তকদীর; যা মহান আল্লাহ আসমান-যমীন সৃষ্টি করার ৫০ হাজার বছর পূর্বে 'লাওহে মাহফূয'-এ লিখে রেখেছেন।

২। ক্বাদরের আর একটি অর্থ হল, কদর, শান, মর্যাদা, মাহাত্ম্য ইত্যাদি। যেমন বলা হয়ে থাকে, সমাজে অমুকের বড় কদর আছে। অর্থাৎ, তার মর্যাদা ও সম্মান আছে। অতএব এ অর্থে শবেকদরের মানে হবে মহিয়সী রজনী।

৩। উক্ত কদর যে রাত জেগে ইবাদত করে তারই। এর পূর্বে যে কদর তার ছিল না, রাত জেগে শবেকদর পাওয়ার পর আল্লাহর কাছে সে কদর লাভ হয় এবং তাঁর কাছে তাঁর সম্মান ও মর্যাদা বৃদ্ধি হয়। আর তার জন্যই একে শবেকদর বলে।

৪। ঐ কদরের রাতে আমলেরও বড় কদর ও মাহাত্ম্য রয়েছে। সে জন্যও তাকে শবেকদর বলা হয়।

৫। ক্বাদরের আর এক মানে হল সংকীর্ণতা। এ রাতে আসমান থেকে যমীনে এত বেশী সংখ্যক ফিরিশ্তা অবতরণ করেন যে, পৃথিবীতে তাঁদের জায়গা হয় না। বরং তাঁদের সমাবেশের জন্য পৃথিবী সংকীর্ণ হয়। তাই এ রাতকে শবেকদর বা সংকীর্ণতার রাত বলা হয়।

### ❖ শবেকদরের মাহাত্ম্য :

১। শবেকদরের রয়েছে বিশাল মর্যাদা ও মাহাত্ম্য। মহান আল্লাহ এই রাতে কুরআন অবতীর্ণ করেছেন এবং সে রাতের মাহাত্ম্য ও ফযীলত বর্ণনা করার জন্য কুরআন মাজীদের পূর্ণ একটি সূরা অবতীর্ণ করেছেন এবং সেই সূরার নামকরণও হয়েছে তারই নামে। মহান আল্লাহ বলেন,

﴿إِنَّا أَنْزَلْنَاهُ فِي لَيْلَةِ الْقَدْرِ، وَمَا أَدْرَاكَ مَا لَيْلَةُ الْقَدْرِ، لَيْلَةُ الْقَدْرِ

خَيْرٌ مِّنْ أَلْفِ شَهْرٍ﴾

অর্থাৎ, নিশ্চয় আমি ঐ কুরআনকে শবেকদরে অবতীর্ণ করেছি। তুমি কি জান, শবেকদর কি? শবেকদর হল হাজার মাস অপেক্ষা শ্রেষ্ঠ।

(কুরআনুল কারীম ৯৭/১-৩)

এক হাজার মাস সমান ৩০ হাজার রাত্রি। অর্থাৎ এই রাতের মর্যাদা ৩০,০০০ গুণ অপেক্ষাও বেশী! সুতরাং বলা যায় যে, এই রাতের ১টি তসবীহ অন্যান্য রাতের ৩০,০০০ তসবীহ অপেক্ষা উত্তম। অনুরূপ এই রাতের ১ রাকআত নামায অন্যান্য রাতের ৩০,০০০ রাকআত অপেক্ষা উত্তম।

বলা বাহুল্য, এই রাতের আমল শবেকদর বিহীন অন্যান্য ৩০ হাজার রাতের আমল অপেক্ষা অধিক শ্রেষ্ঠ। সুতরাং যে ব্যক্তি এই রাতে ইবাদত করল, আসলে সে যেন ৮৩ বছর ৪ মাস অপেক্ষাও বেশী সময় ধরে ইবাদত করল।

২। শবেকদরের রাত হল মুবারক রাত, অতি বর্কতময়, কল্যাণময় ও মঙ্গলময় রাত। মহান আল্লাহ বলেন,

﴿إِنَّا أَنْزَلْنَاهُ فِي لَيْلَةِ مُبَارَكَةٍ﴾

অর্থাৎ, আমি এ কুরআনকে বর্কতময় রজনীতে অবতীর্ণ করেছি।

(কুরআনুল কারীম ৪৪/৩)

উক্ত বর্কতময় রাত্রি হল 'লাইলাতুল ক্বাদর' বা শবেকদর। আর শবেকদর নিঃসন্দেহে রমাযানে। বলা বাহুল্য, ঐ রাত্রি শবেবরাতের রাত্রি নয়; যেমন অনেকে মনে করে থাকে এবং ঐ রাত্রে বৃথা মনগড়া ইবাদত করে থাকে। কারণ, কুরআন (লাওহে মাহফূয থেকে) অবতীর্ণ হয়েছে (অথবা তার অবতারণ শুরু হয়েছে) রমাযান মাসে। কুরআন বলে,

﴿شَهْرُ رَمَضَانَ الَّذِي أُنزِلَ فِيهِ الْقُرْآنُ﴾

অর্থাৎ, রমাযান মাস; যে মাসে কুরআন অবতীর্ণ হয়েছে।

(কুরআনুল কারীম ২/১৮৫)

আর তিনি বলেন,

﴿إِنَّا أَنْزَلْنَاهُ فِي لَيْلَةِ الْقَدْرِ﴾

অর্থাৎ, নিশ্চয় আমি ঐ কুরআনকে শবেকদরে অবতীর্ণ করেছি।

(কুরআনুল কারীম ৯৭/১-৩)

আর এ কথা বিদিত যে, শবেকদর হল রমাযানে; শা'বানে নয়।

﴿فِيهَا يُفْرَقُ كُلُّ أَمْرٍ حَكِيمٍ﴾

৩। এই রাত সেই ভাগ্য-রাত; যাতে প্রত্যেক গুরুত্বপূর্ণ বিষয় স্থিরীকৃত হয়। (কুরআনুল কারীম ৪৪/৪)

৪। এটা হল সেই রাত; যে রাতে প্রত্যেক কাজের জন্য ফিরিশ্তাকুল তাঁদের প্রতিপালকের আদেশে অবতীর্ণ হন। অর্থাৎ, যে কাজের ফায়সালা ঐ রাতে করা হয় তা কার্যকরী করার জন্য তাঁরা অবতরণ করেন। মহান আল্লাহ বলেন,

﴿تَنْزِيلُ الْمَلَائِكَةِ وَالرُّوحِ فِيهَا بِإِذْنِ رَبِّهِمْ مِنْ كُلِّ أَمْرٍ﴾

৫। এ রাত হল সালাম ও শান্তির রাত। মহান আল্লাহ বলেন,

﴿سَلَامٌ هِيَ حَتَّىٰ مَطَلَعِ الْفَجْرِ﴾

অর্থাৎ, সে রজনী ফজর উদয় পর্যন্ত শান্তিময়।

পূর্ণ রাতটাই শান্তিতে পরিপূর্ণ; তার মধ্যে কোন প্রকার অশান্তি নেই। রাত্রি জাগরণকারী মুমিন নারী-পুরুষের জন্য এ হল শান্তির রাত্রি। শয়তান তাদের মাঝে কোন প্রকার অশান্তি আনয়ন করতে পারে না। অথবা সে রাত্রি হল নিরাপদ। শয়তান সে রাত্রে কোন প্রকার অশান্তি ঘটাতে পারে না। অথবা সে রাত হল সালামের রাত। এ রাতে অবতীর্ণ ফিরিশ্তাকুল ইবাদতকারী মুমিনদেরকে সালাম জানায়।<sup>1</sup>

৬। এ রাত্রি হল কিয়াম ও গোনাহ-খাতা মাফ করাবার রাত্রি। মহানবী ﷺ বলেন, “যে ব্যক্তি ঈমান রেখে ও নেকী লাভের আশা করে শবেকদরের রাত্রি কিয়াম করে (নামায পড়ে), সে ব্যক্তির পূর্বেকার গোনাহসমূহ মাফ হয়ে যায়।”<sup>2</sup>

<sup>1</sup> (ভাফসীর ফাতহুল ক্বাদীর ৫/৬৮০-৬৮১, শারহুস সাদর বিযিক্বরি লাইলাতিল ক্বাদর, ইমাম শাওকানী ২৪-২৫ পৃঃ)

<sup>2</sup> (বুখারী : ৩৫, মুসলিম : ৭৬০ নং, সুনানে আরবাতাহ; আবু দাউদ, তিরমিযী, নাসাঈ ও ইবনে মাজাহ)।

বলা বাহুল্য, এ রাত্রি হল ইবাদতের রাত্রি। এ রাত্রি ধুমধাম করে পান-ভোজনের, আমোদ-খুশীর রাত্রি নয়। আসলে যে ব্যক্তি এ রাত্রের কল্যাণ থেকে বঞ্চিত হয়, সেই সকল প্রকার কল্যাণ থেকে বঞ্চিত।

### ❖ শবেকদর কোন্ রাতটি?

রমায়ান মাসের শেষ দশকের যে কোন একটি রাত্রি শবেকদরের রাত্রি। একদা মহানবী ﷺ শবেকদরের অব্বেষণে রমায়ানের প্রথম দশকে ই'তিকাফ করলেন। অতঃপর মাঝের দশকে ই'তিকাফ করে ২০শের ফজরে বললেন, “আমাকে শবেকদর দেখানো হয়েছিল; কিন্তু পরে ভুলিয়ে দেওয়া হয়েছে। অতএব তোমরা শেষ দশকের বিজোড় রাত্রে তা অনুসন্ধান কর। আর আমি দেখেছি যে, আমি পানি ও কাদাতে সিঁজদা করছি।”<sup>1</sup> অতঃপর ২১শের রাত্রিতে বৃষ্টি হয়েছিল। অতএব সে বছরে ঐ ২১শের রাতেই শবেকদর হয়েছিল।

পূর্বোক্ত হাদীসের ইস্তিত অনুসারে শেষ দশকের বিজোড় রাত্রিগুলোতে শবেকদর হওয়ার সম্ভাবনা বেশী। সুতরাং ২১, ২৩, ২৫, ২৭ ও ২৯ এই ৫ রাত হল শবেকদর হওয়ার অধিক আশাব্যঞ্জক রাত। অবশ্য এর মানে এই নয় যে, বিজোড় রাত্রি ছাড়া জোড় রাত্রিতে শবেকদর হবে না। বরং শবেকদর জোড়-বিজোড় যে কোন রাত্রিতেই হতে পারে। তবে বিজোড় রাতে শবেকদর সংঘটিত হওয়াটাই অধিক সম্ভাবনাময় ও আশাব্যঞ্জক।<sup>2</sup>

শেষ দশকের মধ্যে শেষ সাত রাত্রিগুলো অধিক আশাব্যঞ্জক। মহানবী ﷺ বলেন, “আমি দেখেছি যে, তোমাদের সবারই স্বপ্ন শেষ সাত রাতের ব্যাপারে একমত হয়েছে। সুতরাং যে ব্যক্তি শবেকদর অনুসন্ধান করতে চায়, সে যেন শেষ সাত রাতগুলিতে করে।”<sup>3</sup>

অবশ্য এর অর্থ যদি ‘কেবল ঐ বছরের রমায়ানের শেষ সাত রাতের কোন এক রাতে শবেকদর হবে’ হয় এবং তার অর্থ ‘আগামী প্রত্যেক রমায়ানে হবে’ না হয় তাহলে। কারণ, এরূপ অর্থ হওয়ার সম্ভাবনাও নাকচ করা যায় না। তাছাড়া যেহেতু মহানবী ﷺ তাঁর শেষ জীবন অবধি

<sup>1</sup> (বুখারী ২০১৬, মুসলিম ১১৬৭নং)

<sup>2</sup> (আশশারহুল মুমতে' ৬/৪৯৬)

<sup>3</sup> (আহমাদ, মুসনাদ ২/৬, বুখারী ২০১৫, মালেক, মুওয়াত্তা, মুসলিম ১১৬৫নং)

রমায়ানের শেষ দশকের পুরোটাই ই'তিকাক করে গেছেন এবং এক বছর শবেকদর ২১শের রাত্রিতেও হয়েছে - যেমন এ কথা পূর্বে উল্লেখ করা হয়েছে।<sup>1</sup>

শেষ দশকের বিজোড় রাত্রিগুলির মধ্যে ২৭শের রাত্রি শবেকদরের জন্য অধিক আশাব্যঞ্জক। কেননা, উবাই বিন কা'ব (رضي الله عنه) 'ইন শাআল্লাহ' না বলেই কসম খেয়ে বলতেন, 'শবেকদর রাত্রি হল ২৭শের রাত্রি; ঐ রাত্রিতে কিয়াম করতে আল্লাহর রসূল (ﷺ) আমাদেরকে আদেশ করেছেন।'<sup>2</sup>

অনুরূপভাবে মুআবিয়া (رضي الله عنه) মহানবী (ﷺ)-এর নিকট থেকে বর্ণনা করে বলেন, '২৭শের রাত্রি হল শবেকদরের রাত্রি।'<sup>3</sup>

কিন্তু ঐ রাতে হওয়াই জরুরী নয়। কারণ, এ ছাড়া অন্যান্য হাদীস রয়েছে, যার দ্বারা বুঝা যায় যে, শবেকদর অন্য তারীখের রাতেও হয়ে থাকে।

বলা বাহুল্য, শবেকদরের রাত প্রত্যেক বছরের জন্য একটি মাত্রই রাত নয়। বরং তা বিভিন্ন রাতে সংঘটিত হতে পারে। সুতরাং কোন বছরে ২৯শে, কোন বছরে ২৫শে, আবার কোন বছরে ২৪শের রাতেও শবেকদর হতে পারে। আর এই অর্থে শবেকদর প্রসঙ্গে বর্ণিত সমস্ত হাদীসের মাঝে পরস্পর-বিরোধিতা দূর হয়ে যাবে।

শবেকদর একটি নির্দিষ্ট রাত না হয়ে এক এক বছরে শেষ দশকের এক এক রাতে হওয়ার পশ্চাতে হিকমত এই যে, যাতে অলস বান্দা কেবল একটি রাত জাগরণ ও কিয়াম করেই ক্ষান্ত না হয়ে যায় এবং সেই রাতের মর্যাদা ও ফযীলতের উপর নির্ভর করে অন্যান্য রাতে ইবাদত ত্যাগ না করে বসে। পক্ষান্তরে অনির্দিষ্ট হলে এবং প্রত্যেক রাতের মধ্যে যে কোন একটি রাতের শবেকদর হওয়ার সম্ভাবনা থাকলে বান্দা শেষ দশকের পুরোটাই কিয়াম ও ইবাদত করতে আগ্রহী হবে। আর এতে রয়েছে তারই লাভ।<sup>4</sup>

<sup>1</sup> (আশ্শারহুল মুমতে' ৬/৪৯৩)

<sup>2</sup> (মুসলিম ৭৬২নং)

<sup>3</sup> (সহীহ আবু দাউদ ১২৩৬নং)

<sup>4</sup> (আশ্শারহুল মুমতে' ৬/৪৯৪)

ঠিক হুবহু একই যুক্তি হল মহানবী ﷺ-এর হৃদয় থেকে শবেকদর (তারীখ) ভুলিয়ে দেওয়ার পিছনে।<sup>1</sup> আর এতে রয়েছে সেই মঙ্গল; যার প্রতি ইঙ্গিত করে মহানবী ﷺ বলেছেন, “আমি শবেকদর সম্বন্ধে তোমাদেরকে খবর দেওয়ার জন্য বের হয়ে এলাম। কিন্তু অমুক ও অমুকের কলহ করার ফলে শবেকদরের সে খবর তুলে নেওয়া হল। এতে সম্ভবতঃ তোমাদের জন্য মঙ্গল আছে। সুতরাং তোমরা নবম, সপ্তম এবং পঞ্চম রাত্রে তা অনুসন্ধান কর।”<sup>2</sup>

শবেকদরের সওয়াব অর্জনের জন্য শবেকদর কোন্ রাত্রে হচ্ছে তা জানা বা দেখা শর্ত নয়। তবে ইবাদতের রাত্রে শবেকদর সংঘটিত হওয়া এবং তার অনুসন্धानে সওয়াবের আশা রাখা শর্ত। শবেকদর কোন্ রাত্রে ঘটছে তা জানা যেতে পারে। আল্লাহ যাকে তওফীক দেন, সে বিভিন্ন লক্ষণ দেখে শবেকদর বুঝতে পারে। সাহাবাগণ (রাযি.) একাধিক নিদর্শন দেখে জানতে পারতেন শবেকদর ঘটীর কথা। তবে তা জানা বা দেখা না গেলে যে তার সওয়াব পাওয়া যাবে না - তা নয়। বরং যে ব্যক্তি ঈমান ও সওয়াবের আশা রেখে সে রাত্রিতে ইবাদত করবে, সেই তার সওয়াবের অধিকারী হবে; চাহে সে শবেকদর দেখতে পাক বা না-ই পাক।

বলা বাহুল্য, মুসলিমের উচিত, সওয়াব ও নেকী অর্জনের উদ্দেশ্যে মহানবী ﷺ-এর আদেশ ও নির্দেশমত রমাযানের শেষ দশকে শবেকদর অব্বেষণ করতে যত্নবান ও আগ্রহী হওয়া। অতঃপর দশটি রাত্রে ঈমান ও নেকীর আশা রাখার সাথে ইবাদত করতে করতে যে কোন রাত্রে যখন শবেকদর লাভ করবে, তখন সে সেই রাতের অগাধ সওয়াবের অধিকারী হয়ে যাবে; যদিও সে বুঝতে না পারে যে, ঐ দশ রাতের মধ্যে কোন রাতটি শবেকদররূপে অতিবাহিত হয়ে গেল। মহানবী ﷺ বলেন, “যে ব্যক্তি ঈমান রেখে ও নেকী লাভের আশা করে শবেকদরের রাত্রি কিয়াম করে (নামায পড়ে), সে ব্যক্তির পূর্বকার গোনাহসমূহ মাফ হয়ে যায়।”<sup>3</sup> অন্য এক বর্ণনায় আছে, “যে তার ঝোঁজে কিয়াম করল এবং সে তা পেতে

<sup>1</sup> (শারহুস সাদর বিযিকরি লাইলাতিল ক্বাদর ৪৯৭ঃ)

<sup>2</sup> (বুখারী ২০২৩নং)

<sup>3</sup> (বুখারী ৩৫, মুসলিম ৭৬০ নং, সুনানে আরবাআহ; আবু দাউদ, তিরমিযী, নাসাঈ ও ইবনে মাজাহ)



তওফীক লাভ করল তার পূর্বকার গোনাহসমূহ মাফ হয়ে গেল।”<sup>1</sup> আর একটি বর্ণনায় আছে, “যে ব্যক্তি শবেকদরে কিয়াম করবে এবং সে তা ঈমান ও নেকীর আশা রাখার সাথে পেয়ে যাবে; তার গোনাহসমূহ মাফ হয়ে যাবে।”<sup>2</sup>

আর এ সব সেই ব্যক্তির ধারণাকে খণ্ডন করে, যে মনে করে যে, যে ব্যক্তি শবেকদর মনে করে কোন রাতে কিয়াম করবে, তার শবেকদরের সওয়াব লাভ হবে; যদিও সে রাতে শবেকদর না হয়।<sup>3</sup>

### ❖ শবেকদরের আলামতসমূহ ৪

শবেকদরের কিছু আলামত আছে যা রাত মধ্যেই দেখা যায় এবং আর কিছু আলামত আছে যা রাতের পরে সকালে দেখা যায়। যে সব আলামত রাতে পরিলক্ষিত হয় তা নিম্নরূপ ৪-

১. শবেকদরের রাতের আকাশ অস্বাভাবিক উজ্জ্বল থাকে। অবশ্য এ আলামত শহর বা গ্রামের ভিতর বিদ্যুতের আলোর মাঝে থেকে লক্ষ্য করা সম্ভব নয়। কিন্তু যারা আলো থেকে দূরে মাঠে-ময়দানে থাকে, তারা সে উজ্জ্বল্য লক্ষ্য করতে পারে।

২. অন্যান্য রাতের তুলনায় শবেকদরের রাতে মুমিন তার হৃদয়ে এক ধরনের প্রশান্ততা, স্বস্তি ও শান্তি বোধ করে।

৩. অন্যান্য রাতের তুলনায় মুমিন শবেকদরের রাতে কিয়াম বা নামাযে অধিক মিষ্টতা অনুভব করে।

৪. এই রাতে বাতাস নিস্তব্ধ থাকে। অর্থাৎ, সে রাতে ঝোড়ো বা জোরে হাওয়া চলে না। আবহাওয়া অনুকূল থাকে। মহানবী ﷺ বলেন, “শবেকদরের রাত উজ্জ্বল।”<sup>4</sup> অন্য এক বর্ণনায় তিনি বলেন, “নাতিশীতোষ্ণ; না ঠাণ্ডা, না গরম।”<sup>5</sup>

<sup>1</sup> (আহমাদ, মুসনাদ ৫/৩১৮, ২২৬১২নং)

<sup>2</sup> (মুসলিম ৭৬০নং)

<sup>3</sup> (মাজায়াতুল বুহুসিল ইসলামিয়াহ ২০/১৮৬-১৮৭)

<sup>4</sup> (আহমাদ, মুসনাদ, আব্বারানী, মুজাম, ইবনে খুযাইমাহ, সহীহ ২১৯২, প্রমুখ, সহীহুল জামেইস সাগীর, আলবানী ৫৪৭২, ৫৪৭৫নং)

<sup>5</sup> (ঐ)

৫. শবেকদরের রাতে উস্কা ছুটে না।<sup>1</sup>

৬. এ রাতে বৃষ্টি হতে পারে। মহানবী ﷺ বলেন, “আমাকে শবেকদর দেখানো হয়েছিল; কিন্তু পরে ভুলিয়ে দেওয়া হয়েছে। অতএব তোমরা শেষ দশকের বিজোড় রাতে তা অনুসন্ধান কর। আর আমি দেখেছি যে, আমি পানি ও কাদাতে সিজদা করছি।”<sup>2</sup> অতঃপর ২১শের রাত্রিতে সত্যই বৃষ্টি হয়েছিল।

৭. শবেকদর কোন নেক বান্দা স্বপ্নের মাধ্যমেও দেখতে পারেন। যেমন কিছু সাহাবা তা দেখেছিলেন।

পক্ষান্তরে যে সব আলামত রাতের পরে সকালে দেখা যায় তা হল এই যে, সে রাতের সকালে উদয়কালে সূর্য হবে সাদা; তার কোন কিরণ থাকবে না।<sup>3</sup> অথবা ক্ষীণ রক্তিম অবস্থায় উদিত হবে;<sup>4</sup> ঠিক পূর্ণিমার রাতের চাঁদের মত। অর্থাৎ, তার রশ্মি চারিদিকে বিকীর্ণ হবে না।

আর লোক মুখে যে সব আলামতের কথা প্রচলিত; যেমন : সে রাতে কুকুর ভেকায় না বা কম ভেকায়, গাছ-পালা মাটিতে নুয়ে পড়ে আল্লাহকে সিজদা করে, সমুদ্রের লবণাক্ত পানি মিঠা হয়ে যায়, নূরের বলকে অন্ধকার জায়গা আলোকিত হয়ে যায়, নেক লোকেরা ফিরিশতার সালাম গুনতে পান ইত্যাদি আলামতসমূহ কাল্পনিক। এগুলি শরয়ী দলীল দ্বারা প্রমাণিত নয়। তাছাড়া এ সব কথা নিশ্চিতরূপে অভিজ্ঞতা ও বাস্তববিরোধী।<sup>5</sup>

### ❖ শবেকদরের দুআ :

মা আয়েশা (রাঃ) কর্তৃক বর্ণিত, তিনি বলেন, আমি বললাম, হে আল্লাহর রসূল! আমি শবেকদর লাভ করলে তাতে কি দুআ পাঠ করব? উত্তরে তিনি বললেন, “তুমি বলো,

اللَّهُمَّ إِنَّكَ عَفْوٌ تُحِبُّ الْعَفْوَ فَاعْفُ عَنِّي.

<sup>1</sup> (ঐ)

<sup>2</sup> (বুখারী ২০১৬, মুসলিম ১১৬৭নং)

<sup>3</sup> (মুসলিম ৭৬২নং)

<sup>4</sup> (সহীহুল জামেইস সাগীর, আলবানী ৫৪৭৫নং)

<sup>5</sup> (দুরুসু রামাযান অকাফাত লিস-সায়েমীন ৯২পৃঃ, আশশারহুল মুমতে' ৬/৪৯৮-৪৯৯)

**উচ্চারণঃ-** আল্লা-হুমা ইন্নাকা আফুউবুন তুহিব্বুল আফওয়া, ফা'ফু আন্নী।<sup>1</sup>

اللَّهُمَّ إِنَّكَ عَفْوٌ كَرِيمٌ تُحِبُّ الْعَفْوَ فَاعْفُ عَنِّي.

**উচ্চারণঃ-** আল্লা-হুমা ইন্নাকা আফুউবুন কারীমুন তুহিব্বুল আফওয়া, ফা'ফু আন্নী।<sup>2</sup>

**অর্থঃ-** হে আল্লাহ! নিশ্চয় তুমি ক্ষমাশীল (মহানুভব), ক্ষমাকে পছন্দ কর। অতএব তুমি আমাকে ক্ষমা করে দাও।

<sup>1</sup> (আহমাদ, মুসনাদ ৬/১৭১, ১৮২, ১৮৩, ২৫৮, নাসাঈ আমানুল ইয়াওমি জল-লাইলাহ ৮৭২নং, ইবনে মাজাহ ৩৮৫০, হাকেম, মুত্তাদরাক ১/৫৩০)

<sup>2</sup> (তিরমিযী ৩৫১৩নং)

## একাদশ অধ্যায়

### ফিতুরার বিবরণ

‘সাদাকাতুল ফিতুর’কে ‘যাকাতুল ফিতুর’ বলা হয়। ‘সাদাকাহ’ শব্দটি শরয়ী পরিভাষায় ফরয যাকাতের অর্থে ব্যবহৃত। আর এ ব্যবহার কুরআন ও হাদীসে বহু জায়গায় পরিলক্ষিত হয়। পক্ষান্তরে ‘ফিতুর’ মানে হল, রোযা ছাড়া। সুতরাং ‘যাকাতুল ফিতুর’-এর মানে হল, সেই যাকাত; যা রমায়ানের রোযা ছাড়ার কারণে ফরয হয়। একে ‘যাকাতুল ফিতুরাহ’ও বলা হয়। ‘ফিতুরাহ’ মানে প্রকৃতি। যেহেতু এ যাকাত আত্মশুদ্ধি ও আত্মার আমলকে নির্মল করার জন্য দেওয়া ওয়াজেব, তাই এর নাম যাকাতুল ফিতুরাহ।<sup>1</sup>

#### ❖ সাদাকাতুল ফিতুরার মান :

ফিতুরার যাকাত আদায় করা ফরয। আল্লাহর রসূল ﷺ এ যাকাতকে মুসলিম উম্মাহর জন্য ফরয করেছেন। ইবনে উমার (رضي الله عنه) বলেন, ‘আল্লাহর রসূল ﷺ মুসলিমদের স্বাধীন ও ক্রীতদাস, পুরুষ ও নারী এবং ছোট ও বড় সকলের জন্য এক সা’ (প্রায় আড়াই কেজি) খেজুর বা যব খাদ্য (আদায়) ফরয করেছেন।’<sup>2</sup>

#### ❖ সাদাকাতুল ফিতুরার হিকমত :

সাদাকাতুল ফিতুর সন দুই হিজরীর শা’বান মাসে বিধিবদ্ধ হয়। এ সদকাহ ফরয করা হয় রোযাদারকে সেই অবাঞ্ছনীয় অসারতা ও যৌনাচারের মলিনতা থেকে পবিত্র করার জন্য, যা সে রোযা অবস্থায় করে ফেলেছে। এই সদকাহ হবে তার রোযার মধ্যে ঘটিত ক্রটির সংশোধনী। যেহেতু নেকীর কাজ পাপকে ধ্বংস করে দেয়।

এ সদকাহ ফরয করা হয়েছে, যাতে সেই ঈদের খুশী ও আনন্দের দিনে গরীব-মিসকীনদের সহজলব্ধ আহার হয়। যাতে তারাও ধনীদের সাথে ঈদের আনন্দে শরীক হতে পারে। যারা আজ আনে কাল খায়, যাদের ভিক্ষা করে দিনপাত হয়, এক মুঠো খাবারের জন্য যাদেরকে

<sup>1</sup> (ফিকহয যাকাত, ইউসুফ কারযাবী ২/৯১৭)

<sup>2</sup> (বুখারী ১৫০৩, মুসলিম ৯৮৪৮)

লোকের দ্বারস্থ হতে হয়, তাদেরকে অন্ততঃপক্ষে ঈদের দিনটাতেও যেন লাঞ্ছিত হতে না হয় এবং ঘরে খাবার দেখে যাতে মনের ভিতর খুশীর ঢেউ আসে, তার জন্যই সমাজ-বিজ্ঞানী দীন-দরদী দ্বীনের নবী ﷺ এই সুব্যবস্থা করে গেছেন।

এই শেযোক্ত হিকমতের জন্য নিফাসবতী ও ছোট শিশু অরোযাদারের উপরেও উক্ত সদকাহ ফরয করা হয়েছে। ইবনে আব্বাস (رضي الله عنه) বলেন, ‘আল্লাহর রসূল ﷺ রোযাদারের অসারতা ও যৌনাচারের পঙ্কিলতা থেকে পবিত্রতা এবং মিসকীনদের আহার স্বরূপ ফরয করেছেন ---।’<sup>1</sup>

যেমন এই সদকাহ আদায় করতে হয় মহান আল্লাহর কৃতজ্ঞতা স্বরূপ; যেহেতু তিনি রোযাদারকে পূর্ণ এক মাস রোযা রাখার তওফীক দান করেছেন।<sup>2</sup>

ফিতুরার সদকাহ হল দেহের যাকাত। যেহেতু মহান আল্লাহ এই দেহকে একটি বছর অবশিষ্ট রেখেছেন এবং নিরাপত্তা ও সুস্বাস্থ্য হেন নেয়ামত বান্দাকে দিয়ে রেখেছেন।<sup>3</sup>

ফিতুরার যাকাত ফরয করা হয়েছে আনুগত্যের মাসের শেষে; যাতে আত্মশুদ্ধির প্রক্রিয়া পরিপূর্ণ হয়। যেহেতু আল্লাহর আনুগত্যের কাজ করে এবং নিষিদ্ধ জিনিস বর্জন করে আত্মা বিশুদ্ধ ও পবিত্র হয়। তদনুরূপ মাল খরচ করলেও পবিত্রতা লাভ হয়। আর এ জন্যই মাল দানকে ‘যাকাত’ (পবিত্রতা) বলা হয়।<sup>4</sup>

### ❖ কার উপরে ওয়াজেব ঃ

ফিতুরার যাকাত প্রত্যেক সেই মুসলিমের উপর ফরয, ঈদের রাত ও দিনে যার একান্ত প্রয়োজনীয় এবং নিজের তথা তার পরিবারের আহারের চেয়ে অতিরিক্ত খাদ্য মজুদ থাকে। আর এ ফরযের ব্যাপারে সকল ব্যক্তিত্ব সমান। এতে স্বাধীন ও ক্রীতদাস, পুরুষ ও নারী, ছোট ও বড়, ধনী ও

<sup>1</sup> (সহীহ আবু দাউদ, আলবানী ১৪২০, ইবনে মাজাহ ১৮২৭, দারাকুত্বনী, সুনান, হাকেম, মুত্তাদারাক ১/৪০৯, বাইহাকী ৪/১৬৩)

<sup>2</sup> (আশশারহুল মুমতে’ ৬/১৫১)

<sup>3</sup> (ইতহাফঃ ৮২পৃঃ)

<sup>4</sup> (সুআলান ফিস-সিয়াম, ইবনে উষাইমীন ১৩)

গরীব, শহরবাসী ও মরুবাসী (বেদুইন) এবং রোযাদার ও অরোযাদারের মাঝে কোন পার্থক্য নেই। এক কথায় এ যাকাত সকলের তরফ থেকে আদায়যোগ্য।

এ সদকাহ ফরয হওয়ার জন্য যাকাতের নিসাব হওয়া শর্ত নয়। যেহেতু তা ব্যক্তির উপর ফরয, মালের উপর নয়। মালের সাথে তার কোন সম্পর্কও নেই এবং মাল বেশী হলে তার পরিমাণ বেশীও হয় না। বলা বাহুল্য, এ সদকাহ কাফফারার মত; যা ধনী-গরীব সকলেই আদায় করতে বাধ্য। যেমন “প্রত্যেক স্বাধীন ও ক্রীতদাস বান্দার জন্য---”<sup>1</sup> হাদীসের এই শব্দও ধনী-গরীব সকলের জন্য ব্যাপক; চাহে সে নিসাবের মালিক হোক অথবা না হোক।

আবু হুরাইরা (رضي الله عنه) বলতেন, ‘---(ফিতরার যাকাত ফরয) প্রত্যেক স্বাধীন ও ক্রীতদাস, পুরুষ ও নারী, ছোট ও বড়, গরীব ও ধনীর উপর।’<sup>2</sup>

পক্ষান্তরে মহানবী (صلى الله عليه وسلم)-এর হাদীস, “ধনী অবস্থা ছাড়া কোন সদকাহ নেই।”<sup>3</sup> এর অর্থ হল, মালের সদকাহ। আর ফিতরার যাকাত খাস দেহাত্তার সদকাহ।<sup>4</sup>

ফিতরার সদকাহ আদায় করার জন্য মূল সম্পদ; যেমন জমি-জায়গা, আসবাব-পত্র এবং মহিলার ব্যবহারের অলঙ্কার বিক্রয় করা জরুরী নয়। অবশ্য যে জিনিস তার প্রয়োজনের অতিরিক্ত এবং যা বিক্রয় করা সম্ভব, তা বিক্রয় করে ফিতরার সদকাহ আদায় করা ওয়াজেব। যেহেতু মৌলিক কোন ক্ষতি ছাড়া তা আদায় করা সম্ভব। সুতরাং যেমন প্রয়োজনের অতিরিক্ত উদ্বৃত্ত খাদ্য-সামগ্রী থাকলে আদায় করতে হত, তেমনি অতিরিক্ত বিক্রয়যোগ্য জিনিস থাকলে তা বিক্রয় করে ফিতরার সদকাহ আদায় করতে হবে।<sup>5</sup>

<sup>1</sup> (বুখারী ১৫০৪, মুসলিম ৯৮৪নং)

<sup>2</sup> (আহমাদ, মুসনাদ ২/২৭৭, দারাকুতুনী, সুনান, বাইহাকী ৪/১৬৪, মাজমাউয যাওয়ায়েদ ৩/৮০)

<sup>3</sup> (বুখারী ৫৫৭পৃঃ তালীক, আহমাদ, মুসনাদ ২/২৩০, ৪৩৫)

<sup>4</sup> (আল-মুগনী ৩/৭৪, ফিকহুয যাকাত ২/৯২৭-৯২৯)

<sup>5</sup> (আল-মুগনী ৩/৭৬, ফিকহুয যাকাত ২/৯৩০-৯৩১)

যে ব্যক্তির সদকাহ আদায় করার মত কিছু আছে; কিন্তু তার ঐ পরিমাণ দেনা আছে, তবুও তাকে তা আদায় করতে হবে। তবে যদি ঋণদাতা তার ঋণ পরিশোধ নেওয়ার জন্য তাগাদা করে থাকে, তাহলে সে ক্ষেত্রে আগে ঋণ পরিশোধ করাই আবশ্যিক; আর তার জন্য যাকাত ফরয নয়।<sup>1</sup> পরন্তু যাকাত ওয়াজেব হওয়ার আগে যদি দেনা শোধ করার সময় উপস্থিত হয়ে থাকে, তাহলে ঋণদাতার পক্ষ থেকে তাগাদা না থাকলেও আগে দেনা শোধ করতে হবে এবং ফিতরার যাকাত মাফ হয়ে যাবে।<sup>2</sup>

যার কাছে বর্তমানে কিছু নেই, কিন্তু পরে আসবে; যেমন চাকুরীর বেতন, তাকে ঋণ করে সদকাহ আদায় করতে হবে।

যদি কারো ঘরে আড়াই কেজি পরিমাণ চাইতে কম খাদ্য থাকে, তাহলে সে তাই আদায় করবে। কারণ, মহান আল্লাহ বলেন,

﴿فَاتَّقُوا اللَّهَ مَا اسْتَطَعْتُمْ﴾

“তোমরা যথাসাধ্য আল্লাহকে ভয় কর।” (কুরআনুল কারীম ৬৪/১৬) আর মহানবী ﷺ বলেন, “আমি যখন তোমাদেরকে কিছু আদেশ করি, তখন তোমরা তা যথাসাধ্য (যতটা পার) পালন কর।”<sup>3</sup>

যার ভরণ-পোষণ করা ওয়াজেব, তার তরফ থেকেও ফিতরার যাকাত আদায় করা ওয়াজেব; যেমন স্ত্রী-সন্তান প্রভৃতি - যদি তারা নিজেদের যাকাত নিজেরা আদায় করতে সক্ষম না হয় তাহলে। অন্যথা তারা নিজেরা নিজেদের ফিতরাহ আদায় করলে সেটাই উত্তম। যেহেতু শরীয়তের আদেশে প্রত্যেক ব্যক্তিকে সরাসরি সম্বোধন করা হয়।<sup>4</sup> তাছাড়া ইবনে উমার (رضي الله عنه)-এর হাদীসে বলা হয়েছে যে, আল্লাহর রসূল ﷺ ছোট-বড় এবং স্বাধীন-ক্রীতদাস; যাদের ভরণ-পোষণ তোমাদেরকে করতে হয় তাদের সকলের পক্ষ থেকে ফিতরার সদকাহ আদায় করতে আদেশ

<sup>1</sup> (ফিকহুয় যাকাত ২/৯৩১)

<sup>2</sup> (আশ্শারহুল মুমতে' ৬/১৫৫)

<sup>3</sup> (বুখারী ৭২৮৮, মুসলিম ১৩৩৭, নাসাই, ইবনে মাজাহ) (মাজালিসু শাহরি রামাযান, ইবনে উযাইমীন মজলিস নং ২৮)

<sup>4</sup> (মাজালিসু শাহরি রামাযান মজলিস নং ২৮)

করেছেন।<sup>1</sup>

মাতৃজঠরে জ্ঞানের বয়স যদি ১২০ দিন হয়ে থাকে, তাহলে তার পক্ষ থেকেও ফিতরার যাকাত আদায় করা মুস্তাহাব বলে কিছু উলামা মনে করেন। বলা বাহুল্য, জ্ঞানের তরফ থেকে ফিতরাহ আদায় ওয়াজেব নয়।<sup>2</sup>

### ❖ ফিতরার যাকাতের পরিমাণ কত?

ফিতরার সদকাহ ওয়াজেব হল এক সা' পরিমাণ। এখানে সা' বলতে মদীনায়ে প্রচলিত নববী সা' উদ্দিষ্ট। পৃথিবীর অন্য কোন অঞ্চলে সা' প্রচলিত থাকলেও তা যদি মাদানী সা' থেকে মাপে ভিন্ন হয়, তাহলে ফিতরাহ আদায়ের ক্ষেত্রে সে সা'-এর মাপ গ্রহণযোগ্য নয়।

নববী সা'-এর মাপ অনুযায়ী বর্তমান যুগে ভাল ধরনের গমের ওজন হয় ২ কেজি ৪০ গ্রাম।<sup>3</sup> অবশ্য চাল ইত্যাদি সলিট খাদ্য-দ্রব্যের ওজন তার থেকে বেশী হবে। অতএব এক সা' পরিমাণ খাদ্যের মাঝামাঝি ওজন হবে মোটামুটি আড়াই কেজি মত।<sup>4</sup>

পক্ষান্তরে অর্ধ সা' গম ফিতরা দেওয়ার ব্যাপারটা মুআবিয়া (رضي الله عنه) এর নিজস্ব মত; যে মতের বিরোধিতা করেছেন আবু সাঈদ খুদরী (رضي الله عنه)। তিনি বলেন, আল্লাহর রসূল (ﷺ) যখন আমাদের মাঝে ছিলেন, তখন আমরা ফিতরার সদকাহ প্রত্যেক ছোট ও বড়, স্বাধীন ও ক্রীতদাসের তরফ থেকে এক সা' খাদ্য; এক সা' পনির, এক সা' যব, এক সা' খেজুর অথবা এক সা' কিসমিস আদায় দিতাম। এই ভাবেই আমরা সদকাহ আদায় দিতাম; অতঃপর একদা মুআবিয়া বিন আবু সুফিয়ান হুজ্ব অথবা উমরাহ করতে এসে (মদীনায়ে) এলেন। সেই সময় তিনি মিঘরে খুতবাহ দেওয়ার সময় লোকদের উদ্দেশ্যে যে সব কথা বলেছিলেন, তার মধ্যে একটি কথা ছিল এই যে, 'আমি মনে করি শামের অর্ধ সা' (উৎকৃষ্ট) গম এক সা' খেজুরের সমতুল্য।' ফলে লোকেরা তাঁর এ মত গ্রহণ করে নিল। আবু সাঈদ বলেন, 'কিন্তু আমি ততটা পরিমাণ

<sup>1</sup> (দারাকুতুনী, সুনান, বাইহাকী ৪/১৬১, ইরঃ ৮৩৫নং)

<sup>2</sup> (ফিকহু যাকাত ২/৯২৭, আশশারহুল মুমতে' ৬/১৬২)

<sup>3</sup> (আশশারহুল মুমতে' ৬/১৭৬)

<sup>4</sup> (তায়কীর ইবাদির রাহমান, ফীমা অরাদা বিসিয়ামি শাহরি রামাযান ৩১পৃঃ, যাদুস সায়েম অফাযলুল ক্বায়েম ২৯পৃঃ)



খাদ্যই আজীবন আদায় দিতে থাকব, যতটা পরিমাণ আমি পূর্বে (আল্লাহর রসূল ﷺ-এর যুগে) আদায় দিতাম।<sup>1</sup>

ত্বাহাবী প্রমুখ হাদীসগ্রন্থের এক বর্ণনায় আছে, আবু সাঈদ বলেন, ‘ আমি ততটা পরিমাণ খাদ্যই আদায় দিতে থাকব, যতটা পরিমাণ আমি আল্লাহর রসূল ﷺ-এর যুগে আদায় দিতাম; এক সা’ খেজুর, এক সা’ যব, এক সা’ কিসমিস অথবা এক সা’ পনীর।’ এক ব্যক্তি তাঁকে বলল, ‘অথবা অর্ধ সা’ গম?’ তিনি বললেন, ‘না। এটা হল মুআবিয়ার মূল্য নির্ধারণ; আমি তা গ্রহণ করি না এবং তার (এ মতের) উপর আমলও করি না।<sup>2</sup>

এক সা’ গম ফিতরাহ দেওয়ার কথা মহানবী ﷺ থেকে প্রমাণিত নয়। যেমন অর্ধ সা’ গম ফিতরাহ দেওয়ার হাদীস সহীহর দর্জায় পৌছে না।

বলা বাহুল্য, ফিতরার মূল্য নির্ধারণ সঠিক হবে না। বরং মূল্য প্রত্যেক যুগে এবং প্রত্যেক দেশে ভিন্ন ভিন্ন হবে। কোন সময় এমনও হতে পারে যে, (খেজুরের পরিমাণে) ফিতরায় কয়েক সা’ গম আদায় দিতে হবে।

মোটকথা, সা’-এর পরিমাপকেই ফিতরার মাপকাঠি গণ্য করা হল মৌলিক ব্যাপার এবং তাতেই রয়েছে সর্বপ্রকার খাদ্য এবং সর্বযুগের জন্য পূর্বসতর্কতামূলক আমল। আর এই মত অনুসরণ করার মাধ্যমেই এ ব্যাপারে মতভেদকে এড়ানো সম্ভব হবে এবং মান্য করা হবে সুনিশ্চিতভাবে প্রমাণিত হাদীসকে।<sup>3</sup>

❖ সাদাকাতুল ফিতুর কোন্ খাদ্য থেকে আদায় করতে হবে?

সাদাকাতুল ফিতুর দেশের প্রধান খাদ্য থেকে হওয়াই বাঞ্ছনীয়; যদিও হাদীসে সে খাদ্যের উল্লেখ নেই, যেমন চাল। পক্ষান্তরে যে সব খাদ্যের কথা হাদীসে স্পষ্ট উল্লেখ এসেছে; যেমন খেজুর, যব, কিসমিস ও পনীর - এ সব খাদ্য আল্লাহর রসূল ﷺ-এর যুগের মত দেশের প্রধান খাদ্য না হলে তা থেকে ফিতরা আদায় যথেষ্ট হবে না। হাদীসে ঐ চারটি খাদ্যের উল্লেখ আসার কারণ হল, সে যুগে মদীনায় সেগুলি প্রধান খাদ্যসামগ্রীরূপে

<sup>1</sup> (বুখারী ১৫০৮, মুসলিম ৯৮৫, আবু দাউদ ১৬১৬নং)

<sup>2</sup> (ইরওয়াউল গালীল, আলবানী ৩/৩৩৯)

<sup>3</sup> (ফিকহুয যাকাত ২/৯৪০-৯৪১, আশশারহুল মুমতে’ ৬/১৭৯-১৮০)

ব্যবহার হত। সুতরাং তার উল্লেখ উদাহরণস্বরূপ করা হয়েছে; নির্ধারণস্বরূপ নয়। আবু সাঈদ (رضي الله عنه) বলেন, ‘আমরা আল্লাহর রসূল (ﷺ)-এর যামানায় ঈদের দিন এক সা’ খাদ্য আদায় দিতাম। আর তখন আমাদের খাদ্য ছিল, যব, কিসমিস, পনীর ও খেজুর।’<sup>1</sup>

এখানে ‘খাদ্য’ বলে মৌলিক উপাদানের প্রতি ইঙ্গিত রয়েছে। অর্থাৎ, ফিতরা ছিল মানুষের খাদ্য ও আহার; যা খেয়ে লোকেরা জীবন ধারণ করত। এ কথার সমর্থন করে ইবনে আব্বাস (رضي الله عنه)-এর হাদীস; তিনি বলেন, ‘আল্লাহর রসূল (ﷺ) রোযাদারের অসারতা ও যৌনাচারের পঙ্কিলতা থেকে পবিত্রতা এবং মিসকীনদের আহার স্বরূপ (সাদাকাতুল ফিতুর) ফরয করেছেন ---।’<sup>2</sup>

সুতরাং যে দেশের প্রধান খাদ্য কোন শস্য অথবা ফল না হয়; বরং গোশত হয়, যেমন যারা পৃথিবীর উত্তর মেরুতে বসবাস করে তাদের প্রধান খাদ্য হল গোশত, তারা যদি ফিতুরায় গোশত দান করে, তাহলে সঠিক মত এই যে, নিঃসন্দেহে তা যথেষ্ট হবে।

সারকথা, দেশের প্রধান খাদ্য শস্য, ফল বা গোশত যাই হোক না কেন, ফিতুরায় তা দান করলে ফিতরা আদায় হয়ে যাবে। তাতে সে খাদ্যের কথা হাদীসে স্পষ্ট উল্লেখ থাক অথবা না থাক।<sup>3</sup>

উক্ত আলোচনার প্রেক্ষাপটে বলা যায় যে, ফিতুরায় টাকা-পয়সা, কাঁথা-বালিশ-চাটাই, লেবাস-পোশাক, পশুখাদ্য অথবা কোন আসবাব-পত্র দান করলে তা যথেষ্ট নয়। কারণ, তা আল্লাহর রসূল (ﷺ)-এর নির্দেশ-বিরোধী। আর তিনি বলেছেন, “যে ব্যক্তি এমন কোন কাজ করে, যাতে আমাদের নির্দেশ নেই, তা প্রত্যাখ্যাত।”<sup>4</sup> “যে ব্যক্তি আমাদের এ ব্যাপারে নতুন কিছু উদ্ভাবন করে যা তার অন্তর্ভুক্ত নয়, তা প্রত্যাখ্যাত।”<sup>5</sup>

<sup>1</sup> (বুখারী ১৫১০নং)

<sup>2</sup> (সহীহ আবু দাউদ ১৪২০, ইবনে মাজাহ ১৮২৭, দারাকুত্বনী, সুনান, হাকেম, মুত্তাদারাক ১/৪০৯, বাইহাকী ৪/১৬৩)

<sup>3</sup> (আশশারহুল মুমতে’ ৬/১৮০-১৮৩)

<sup>4</sup> (আহমাদ, মুসনাদ ২/১৪৬, বুখারী তা’লীক ১৫৩৯পৃঃ, মুসলিম ১৭১৮নং, আবু দাউদ, ইবনে মাজাহ)

<sup>5</sup> (আহমাদ, মুসনাদ ৬/২৭০, বুখারী ২৬৯৭, মুসলিম ১৭১৮, ইবনে মাজাহ)

টাকা-পয়সা হিসাবে (রূপার) দিরহাম এবং (সোনার) দীনার মুদ্রা আল্লাহর রসূল ﷺ-এর যামানায় মজুদ ছিল। কিন্তু তা সত্ত্বেও তিনি ফিতরার যাকাতে এক সা' খাদ্য দান করতেই আদেশ করলেন এবং তার মূল্য দান করার এখতিয়ার ঘোষণা করলেন না। সুতরাং ফিতরায় খাদ্যের দাম আদায় দেওয়া সাহাবা (রাযি.)-গণের বিরুদ্ধাচরণ। যেহেতু তাঁরা ফিতরার সদকায় এক সা' খাদ্যই দান করতেন। পরন্তু আল্লাহর রসূল ﷺ বলেছেন, “তোমরা আমার সুন্নাহ (তরীকা) ও আমার পরবর্তী সুপথপ্রাপ্ত খলীফাদের সুন্নাহ অবলম্বন কর। তা খুব সুদৃঢ়ভাবে ধারণ কর। আর অভিনব কর্মাবলী থেকে সাবধান থেকে। ---”<sup>1</sup>

তাছাড়া ফিতরার যাকাত নির্দিষ্ট দ্রব্য থেকে আদায়যোগ্য একটি ফরয ইবাদত। অতএব নির্দিষ্ট ঐ দ্রব্য ছাড়া অন্য দ্রব্য আদায়ের মাধ্যমে ঐ ফরয পালন হবে না; যেমন তার নির্দিষ্ট সময় ছাড়া অন্য সময়ে তার আদায় যথেষ্ট হবে না। পক্ষান্তরে ফিতরায় খাদ্য দান করা ইসলামের একটি স্পষ্ট প্রতীক। কিন্তু মূল্য আদায় দিলে তা গোপন দানে পরিণত হয়ে যায়। বলা বাহুল্য, সুন্নাহর অনুসরণ করাই আমাদের জন্য উত্তম এবং তাতেই আছে সার্বিক মঙ্গল।<sup>2</sup>

বুঝা গেল যে, গ্রাম-শহর সকল স্থানে প্রধান খাদ্য চাল ফিতরা দেওয়ার পরিবর্তে তার নির্দিষ্ট মূল্য আদায় করা যথেষ্ট নয়। চাকুরী-জীবী হলেও তাকে চাল ক্রয় করেই ফিতরা দিতে হবে। অবশ্য তার কোন এমন প্রতিনিধি অথবা কোন এমন সংস্থাকে টাকা দেওয়া চলবে, যে খাদ্য ক্রয় করে ঈদের আগে গরীবদের হাতে পৌঁছে দেবে।

আর দানের ক্ষেত্রে মধ্যম ধরনের চাল এখতিয়ার করা বাঞ্ছনীয়। নচেৎ ইচ্ছাকৃত নিম্নমানের চাল দান করলে মহান আল্লাহর দরবারে তা গ্রহণযোগ্য হবে না। মহান আল্লাহ বলেন,

<sup>1</sup> (আহমাদ, মুসনাদ ৪/১২৬, ১২৭, আবু দাউদ ৪৬০৭, তিরমিযী ২৬৭৬, ইবনে মাজাহ ৪৩, ৪৪, ইবনে হিব্বান, সহীহ, হাকেম, মুত্তাদ্রাক ১/৯৫ প্রমুখ, ইরওয়াউল গালীল, আলবানী ২৪৫৫নং)

<sup>2</sup> (মাজালিসু শাহরি রামায়ান মজলিস নং ২৮, ফুসুহুন ফিস-সিয়ামি অত-তারাবীহি অফ-যাকাহ ৩০পৃঃ)

﴿وَلَا تَيْمَمُوا الْحَيْثَ مِنْهُ تُنْفِقُونَ وَلَسْتُمْ بِآخِذِيهِ إِلَّا أَنْ تُغْمِضُوا فِيهِ﴾

অর্থাৎ, (হে ঈমানদারগণ! তোমরা তোমাদের উপার্জিত এবং ভূমি হতে উৎপাদনকৃত বস্তুর মধ্যে যা উৎকৃষ্ট তা দান কর।) আর তা হতে মন্দ জিনিস দান করো না; অথচ চোখ বন্ধ করে ছাড়া তোমরা নিজে তা গ্রহণ করবে না। (কুরআনুল কারীম ২/২৬৭)

### ❖ ফিতরা কখন ওয়াজেব হয়?

রমায়ানের শেষ দিনের সূর্য অস্ত যাওয়ার সাথে সাথে ফিতরার যাকাত ওয়াজেব হয়। এ সময় হল রমায়ানের শেষ রোযা ইফতার করার সময়। আর এ সময়ের দিকে সম্বন্ধ করেই তার নাম হয়েছে 'সাদাকাতুল ফিতুর'। বলা বাহুল্য, ইফতার করার সময় বাস্তবায়িত হয় ঈদের রাতের সন্ধ্যায় সূর্য ডোবার সাথে সাথে। অতএব এ সময়ে যে শরীয়তের আজ্ঞাপ্রাপ্ত থাকবে কেবল তারই উপর ঐ যাকাত ওয়াজেব এবং তার পরে কেউ আজ্ঞাপ্রাপ্ত হলে তা ওয়াজেব নয়।

যেমন ঈদের রাতের সূর্য ডোবার সামান্যক্ষণ পর যদি কেউ ইসলামে দীক্ষিত হয় অথবা কোন শিশু জন্মগ্রহণ করে, অথবা শেষ রমায়ানের সূর্য ডোবার সামান্যক্ষণ পূর্বে যদি কেউ মারা যায়, তাহলে উক্ত প্রকার লোকেদের উপর ফিতরা ওয়াজেব নয়। অবশ্য মায়ের গর্ভে জ্ঞানের তরফ থেকে যাকাত দেওয়া অনেক উলামা মুস্তাহাব বলেছেন; যেমন সে কথা পূর্বেই উল্লেখ হয়েছে।

পক্ষান্তরে ঐ দিনের সূর্য ডোবার সামান্যক্ষণ আগে যদি কেউ ইসলামে দীক্ষিত হয় অথবা কোন শিশু জন্মগ্রহণ করে, অথবা সূর্য ডোবার সামান্যক্ষণ পরে যদি কেউ মারা যায়, তাহলে উক্ত প্রকার লোকেদের উপর ফিতরা ওয়াজেব।<sup>1</sup>

### ❖ ফিতরা কখন দিতে হবে?

ফিতরা আদায় করার দুটি সময় আছে; তার মধ্যে একটি সময়ে আদায় দিলে ফযীলত পাওয়া যাবে এবং অন্য একটির সময়ে দান করলে যথেষ্ট হয়ে যাবে। প্রথম সময়ে দিতে হয় এবং দ্বিতীয় সময়ে দেওয়া চলে।

<sup>1</sup> (আশ্শারহুল মুমতে' ৬/১৬৬-১৬৭, মাজালিসু শাহরি রামায়ান মজলিস নং ২৮)

প্রথম সময়ে দেওয়াই বিধেয় এবং দ্বিতীয় সময়ে দেওয়া বৈধ।

এই যাকাত আদায়ের ফযীলতের সময় হল, ঈদের সকালে নামাযের পূর্বে। আবু সাঈদ খুদরী (রহঃ) বলেন, ‘আমরা নবী (সঃ)-এর যুগে ঈদুল ফিতুরের দিন এক সা’ খাদ্য দান করতাম।’<sup>1</sup>

ইবনে উমার (রহঃ) বলেন, ‘নবী (সঃ) লোকেদের ঈদের নামাযের জন্য বের হওয়ার পূর্বে ফিতরার যাকাত আদায় দেওয়ার আদেশ দিয়েছেন।’<sup>2</sup>

ইবনে উয়াইনাহ তাঁর তফসীর-গ্রন্থে আমর বিন দীনার থেকে বর্ণনা করেছেন, ইকরামা বলেন, ‘লোকে তার ফিতরার যাকাত ঈদের নামাযের পূর্বে (মিসকীনদেরকে) পেশ করে দেবে। যেহেতু মহান আল্লাহ বলেন,

﴿قَدْ أَفْلَحَ مَنْ تَزَكَّىٰ وَذَكَرَ اسْمَ رَبِّهِ فَصَلَّىٰ﴾

অর্থাৎ, সেই ব্যক্তি সাফল্য লাভ করবে, যে (যাকাত দিয়ে) পবিত্র হবে এবং তার প্রভুর নাম স্মরণ করে নামায পড়বে। (কুরআনুল কারীম ৮৭/১৪-১৫)

এই জন্যই ঈদুল ফিতুরের নামায দেবী করে পড়া উত্তম। যাতে ফিতরা আদায় দেওয়ার জন্য সময় সংকীর্ণ না হয়।

এই যাকাত আদায়ের বৈধ সময় হল ঈদের আগে দু-এক দিন। নাফে’ বলেন, ‘ইবনে উমার (রহঃ) ছোট-বড় সকলের তরফ থেকে ফিতরা দিতেন; এমন কি আমার ছেলের তরফ থেকেও তিনি ফিতরা বের করতেন। আর তাদেরকে দান করতেন, যারা তা গ্রহণ করত। তাদেরকে ঈদের এক অথবা দুই দিন আগে দিয়ে দেওয়া হত।’<sup>3</sup>

এ যাকাত দিতে ঈদের নামাযের পর পর্যন্ত দেবী করা বৈধ নয়। সুতরাং যে ব্যক্তি ঈদের নামাযের পর তা আদায় দেয়, তার যাকাত কবুল হয় না। কারণ, তার কাজ মহানবী (সঃ)-এর নির্দেশ-বিরোধী। ইবনে আব্বাসের হাদীসে বর্ণিত, মহানবী (সঃ) বলেন, ‘যে ব্যক্তি তা নামাযের পূর্বে আদায় দেয় তার যাকাত কবুল হয়। আর যে তা নামাযের পরে

<sup>1</sup> (বুখারী ১৫১০নং)

<sup>2</sup> (বুখারী ১৫০৯, মুসলিম ৯৮৬নং)

<sup>3</sup> (বুখারী ১৫১১, আবু দাউদ ১৬১০নং)

আদায় দেয়, তার সে যাকাত সাধারণ দান বলে গণ্য হয়।”<sup>1</sup>

অবশ্য কোন অসুবিধার জন্য নামাযের পর দিলে তার যাকাত কবুল হয়ে যাবে। যেমন, যদি কেউ ঈদের সকালে এমন জায়গায় থাকে, যেখানে যাকাত নেওয়ার মত লোক নেই, অথবা সকালে হঠাৎ করে ঈদের খবর এলে ফিতরা আদায় দেওয়ার সুযোগ না পেলে, অথবা অপর কাউকে তা আদায় দেওয়ার ভার দেওয়ার পর সে তা ভুলে গেলে ঈদের নামাযের পর তা আদায় দিলে দোষাবহ নয়। যেহেতু এ ব্যাপারে তার ওজর গ্রহণযোগ্য।

ওয়াজেব হল, যথা সময়ে ঈদের নামাযের পূর্বেই গরীব-মিসকীনদের হাতে অথবা তাদের কোন প্রতিনিধির হাতে পৌছে যাওয়া। যাকে দেওয়ার ইচ্ছা ছিল তাকে বা তার প্রতিনিধিকে সে সময় না পাওয়া গেলে অন্য হকদারকে দান করে দিতে হবে। তবুও যথা সময় অতিবাহিত করা যাবে না।<sup>2</sup>

পক্ষান্তরে ইবনে উমার কর্তৃক যে হাদীস বর্ণিত আছে; ‘ঈদের নামাযের জন্য বের হয়ে যাওয়ার পূর্বে আমাদেরকে ফিতরার যাকাত বের করে দেওয়ার আদেশ দেওয়া হত। অতঃপর নামায থেকে ফিরার পর আল্লাহর রসূল ﷺ তা মিসকীনদের মাঝে বন্টন করে দিতেন---।’ তা সহীহ নয়; বরং তা অপ্ৰামাণ্য ও যযীফ।<sup>3</sup>

### ❖ যাকাত কোথায় দিতে হবে?

যাকাত আদায় করার সময় মুসলিম যে জায়গায় থাকে, সে জায়গার দরিদ্র মানুষদের মাঝে বিতরণ করতে হবে। তাতে সে জায়গা তার স্থায়ী আবাসভূমি হোক অথবা অস্থায়ী প্রবাসভূমি। বিশেষ করে সে জায়গা যদি মাহাত্ম্যপূর্ণ হয়; যেমন মক্কা ও মদীনা, অথবা সে জায়গার গরীব মানুষরা বেশী অভাবী হয়, তাহলে সে জায়গাতেই যাকাত বন্টন করা কর্তব্য।

কিন্তু অবস্থান ক্ষেত্রে যদি সদকাহ গ্রহণকারী কোন গরীব মানুষ না থাকে, অথবা হকদার লোক জানা না থাকে, তাহলে যেখানে আছে সেখানে

<sup>1</sup> (সহীহ আবু দাউদ ১৪২০, ইবনে মাজাহ ১৮২৭, হাকেম, মুস্তাদ্দ্রাক ১/৪০৯, বাইহাকী ৪/১৬৩)

<sup>2</sup> (মাজালিসু শাহরি রামাযান মজলিস নং ২৮)

<sup>3</sup> (ইরওয়াউল গালীল, আলবানী ৮৪৪নং দ্রঃ)

কোন প্রতিনিধিকে যাকাত বিতরণ করার ভার অর্পণ করতে হবে। তবে অবশ্যই তাদের হাতে সেই যাকাত ঙ্গদের নামাযের আগে পৌছতে হবে।<sup>1</sup>

### ❖ যাকাতের হকদার ও বন্টন-পদ্ধতি

ফিতরার যাকাতের হকদার হল গরীব মানুষরা এবং সেই ঋণগ্রস্ত মানুষরা, যারা তাদের ঋণ পরিশোধ করতে পারছে না। এই শ্রেণীর মানুষদেরকে তাদের প্রয়োজন অনুযায়ী যাকাত দেওয়া যাবে।

একটি ফিতরা কয়েকটি মিসকীনকে দেওয়া চলবে। যেমন কয়েকটি ফিতরা দেওয়া চলবে একটি মাত্র মিসকীনকে। যেহেতু মহানবী ﷺ কত দিতে হবে তা নির্ধারণ করেছেন; কিন্তু কয়জন মিসকীনকে দিতে হবে, তা নির্ধারণ করেন নি।

সুতরাং যদি কয়েক জন মিলে নিজ নিজ ফিতরা মেপে এক জায়গায় জমা করে এবং তারপর না মেপেই মিসকীনদের মাঝে বিতরণ করে তাহলে তাতে কোন ক্ষতি নেই। তবে এ কথা মিসকীনদেরকে জানিয়ে দেওয়া উচিত যে, তারা ঐ দানের পরিমাণ জানে না। নচেৎ, মাপা আছে মনে করে কেউ ঐ ফিতরা নিজের তরফ থেকে আদায় দিলে ধোকায় পড়তে পারে।

বলা বাহুল্য, মিসকীন কারো কাছ থেকে ফিতরা নিয়ে সেই ফিতরাই নিজের অথবা পরিবারের কারো তরফ থেকে অন্য মিসকীনকে ফিতরা হিসাবে দিতে পারে। অবশ্য সে তা মেপে নেবে অথবা যে দিয়েছে তার কাছ থেকে বিশ্বাস্যরূপে জেনে নেবে যে, তা পরিপূর্ণ একটি ফিতরা।<sup>2</sup>

<sup>1</sup> (মাজল্লাতুদ দা'ওয়া ১৬৭৪/৪১)

<sup>2</sup> (মাজলিসু শাহরি রামাযান মজলিস নং ২৮)

## দ্বাদশ অধ্যায়

### ঈদ ও তার বিভিন্ন আহকাম

ঈদ হল সেই দিন পালনের নাম, যা মানুষের চিরাচরিত অভ্যাস। ঈদ মানে ফিরে আসা। যেহেতু খুশীর বার্তা নিয়ে ঈদ বাৎসরিক বারবার ফিরে আসে এবং মানুষ তা বারবার পালন করে, তাই তাকে ঈদ বলা হয়। প্রত্যেক জাতির আচরণে ঈদ পালন করার প্রথা বড় প্রাচীন। প্রত্যেক বড় বড় ঘটনা-প্রবাহকে উপলক্ষ্য করে তারই মাধ্যমে সেই স্মৃতি জাগরণ করে ঈদ (পর্ব) পালন করে থাকে এবং তাতে তারা নানা ধরনের খুশী ও আনন্দ প্রকাশ করে থাকে।

অমুসলিম জাতির পর্ব সাধারণতঃ কোন না কোন বৈষয়িক ব্যাপারের সাথে জড়িত। যেমন নওরোজ, ক্রিসমাস ডে, মাতৃদিবস, ভালোবাসা দিবস, জন্মদিন, বিবাহ-বার্ষিকী প্রভৃতি পর্ব। যেহেতু সৈণ্ডলো তাদের মনগড়া ঈদ, সেহেতু তাতে তাদের সেরেফ বস্তবাদী উৎসব ও আড়ম্বরই পরিলক্ষিত হয়।

পক্ষান্তরে মুসলিম উম্মাহর ঈদ হয় কোন দ্বীনী উপলক্ষ্যকে কেন্দ্র করে। মহান আল্লাহর কোন ইবাদত পরিপূর্ণ করে এবং তাঁর রসূল ﷺ-এর বিধিবদ্ধ শরীয়ত অনুযায়ী তাঁকে সন্তুষ্ট করার মাধ্যমে তা পালন করা হয়। কেননা, মুমিনদের এ দুনিয়ায় খুশী হল একমাত্র মাওলাকে রাজী করেই। যখন মুমিন নিজ মাওলার কোন আনুগত্য পরিপূর্ণ করে এবং তার উপর তাঁর দেওয়া সওয়াব ও পুরস্কার লাভ করে তখনই খুশীর ঢল নেমে আসে তার হৃদয়-মনে। যেহেতু সে বিশ্বাস ও ভরসা রাখে সেই আনুগত্যের উপর তাঁর মাওলার অনুগ্রহ ও ক্ষমার প্রতিশ্রুতির উপর। মহান আল্লাহ বলেন,

﴿قُلْ بِفَضْلِ اللَّهِ وَبِرَحْمَتِهِ فَبِذَلِكَ فَلْيَفْرَحُوا هُوَ خَيْرٌ مِّمَّا يَجْمَعُونَ﴾

অর্থাৎ, তুমি বল, আল্লাহর এই অনুগ্রহ ও করুণা নিয়েই তাদেরকে খুশী হওয়া উচিত। আর তারা যা পৃষ্ঠীভূত করে তা (দুনিয়া) অপেক্ষা এটি শ্রেয়। (কুরআনুল কারীম ১০/৫৮)



হযরত আলী (رضي الله عنه) বলেন, 'যেদিন আমি আল্লাহর কোন প্রকার নাফরমানি করি না, সেদিনই আমার ঈদ।'

অন্যান্য জাতির ঈদ অনেক। কারণ, সেসব ঈদ তাদের নিজস্ব মনগড়া। কিন্তু মুসলিমদের (বাৎসরিক) মাত্র দুটি ঈদ; এর কোন তৃতীয় নেই - ঈদুল ফিতর ও ঈদুল আযহা। আর এ দুটি ঈদ মহান আল্লাহরই বিধান। তিনিই বান্দার জন্য পালনীয় করেছেন। আনাস (رضي الله عنه) বলেন, মহানবী (ﷺ) মদীনায় আগমন করলে দেখলেন, মদীনাবাসীরা দুটি ঈদ পালন করছে। তা দেখে তিনি বললেন, (জাহেলিয়াতে) তোমাদের দুটি দিন ছিল যাতে তোমরা খেলাধুলা করত। এক্ষণে ঐ দিনের পরিবর্তে আল্লাহ তোমাদেরকে দুটি উত্তম দিন প্রদান করেছেন; ঈদুল ফিতর এবং ঈদুল আযহার দিন।'<sup>1</sup>

অবশ্য এ ছাড়া একটি সাপ্তাহিক ঈদ আছে। আর তা হল জুমআহর দিন। সপ্তাহান্তে একবার ফিরে আসে এই ঈদ। অবশ্য এখানে আমাদের আলোচনা হবে ঈদুল ফিতর নিয়ে।<sup>(2)</sup>

### ❖ ঈদের নামাযের গুরুত্ব :

ঈদের খুশীর প্রধান অঙ্গ হল, ঈদের নামায। এই নামায বিধিবদ্ধ হয় হিজরীর প্রথম সনেই। এ নামায ২ রাকআত সূন্নাতে মুআক্কাদাহ। মহানবী (ﷺ) তাঁর জীবনের প্রত্যেক ঈদেই এ নামায আদায় করেছেন এবং পুরুষ ও মহিলা সকলকেই এ নামায আদায় করার জন্য (ঈদগাহে) বের হতে আদেশ করেছেন।<sup>3</sup>

সত্যানুসঙ্গানী বহু উলামা ঈদের নামাযকে ওয়াজেব মনে করেন; যা কোন ওযর ছাড়া মাফ নয়। তাঁরা এর কারণ দর্শিয়ে বলেন, যেহেতু মহানবী (ﷺ) তাঁর জীবনে প্রত্যেকটি ঈদে এ নামায আদায় করেছেন এবং কোন ঈদেই তা ত্যাগ করেন নি। মহিলাদেরকে এ নামায আদায় করার লক্ষ্যে ঘর থেকে বের হতে আদেশ করেছেন। আর আদেশ করার মানেই

<sup>1</sup> (সহীহ আবু দাউদ ১০০৪, নাসাঈ ১৫৫৫নং)

<sup>(২)</sup> ঈদুল আযহা নিয়ে আলোচনা 'যুল-হজ্জের তের দিন'-এ দ্রষ্টব্য।

<sup>3</sup> (ফিকহুস সূন্নাহ ১/২৭৭, তাযকীরু ইবাদির রাহমান, ফীমা অরাদা বিসিয়ামি শাহরি রামাযান ৩৩পৃঃ)

হল তা ওয়াজেব। তাছাড়া ঈদের নামায হল ইসলামের অন্যতম প্রতীক। আর ঈনের প্রতীক ওয়াজেব ছাড়া আর কি হতে পারে? যেমন ঈদ ও জুমআহ একই দিনে একত্রিত হলে এবং ঈদের নামায আদায় করলে আর জুমআহ না পড়লেও চলে। আর এ কথা বিদিত যে, কোন নফল আমল কোন ফরয আমলকে গুরুত্বহীন করতে পারে না।<sup>1</sup>

কিছু যাঁরা বলেন, ঈদের নামায ওয়াজেব নয়; বরং তা সুন্নাতে মুআক্কাদাহ, তাঁরা দলীলস্বরূপ সেই আরব বেদুইনের হাদীসটি পেশ করেন, যে হাদীসে মহানবী ﷺ ঐ বেদুইনকে ইসলামের ফরয আমল শিক্ষা দিলেন এবং তার মধ্যে ৫ অঙ্ক নামাযও শামিল ছিল। বেদুইন তাঁকে জিজ্ঞাসা করল, এ ছাড়া কি আমার উপর অন্য কিছু ফরয আছে? উত্তরে মহানবী ﷺ বললেন, “না, অবশ্য তুমি যদি নফল হিসাবে পড়, (তাহলে সে কথা আলাদা।)”<sup>2</sup> অতএব বুঝা গেল যে, ৫ অঙ্ক নামায ছাড়া অন্য কোন নামায ফরয বা ওয়াজেব নয়।

ঈদের নামায ওয়াজেব না হলেও তার পৃথক বৈশিষ্ট্য ও বড় গুরুত্ব রয়েছে। আর আল্লাহই ভাল জানেন।

## ঈদের আদব

### ❖ ঈদের জন্য গোসল করা :

ঈদের নামাযের জন্য গোসল করা মুস্তাহাব। ইবনে উমার (رضي الله عنه) থেকে বিশুদ্ধ সূত্রে বর্ণিত যে, তিনি ঈদুল ফিতুরের দিন ঈদগাহে যাওয়ার পূর্বে গোসল করতেন।<sup>3</sup>

সাইদ বিন মুসাইয়াব থেকে সহীহ সূত্রে বর্ণিত আছে, তিনি বলেন, ‘ঈদুল ফিতুরের সন্নত হল ৩টি; পায়ে হেঁটে ঈদগাহে যাওয়া, যাওয়ার

<sup>1</sup> (দ্রঃ মাজমু’ ফাতাওয়া ইবনে তাইমিয়াহ ২৩/১৬১, কিতাবুস সালাহ, ইবনুল কাইয়্যেম ইবনুল কাইয়্যেম ১১পৃ, নাইলুল আওতার, ইমাম শওকানী ৩/৩১০-৩১১, আশ্শারহুল মুমতে’ ৫/১৫১, তামামুল মিন্নাহ, আল্লামা আলবানী ৩৪৪পৃ, ফাসিঃ মুসনিদ ১১৬পৃঃ)

<sup>2</sup> (বুখারী ৪৬, মুসলিম ১১নং)

<sup>3</sup> (মালেক, মুওয়াত্তা ৪২৮নং)

আগে কিছু খাওয়া এবং গোসল করা।<sup>1</sup> আর সম্ভবতঃ তিনি এ সুন্নত ৩টি কোন কোন সাহাবা থেকে গ্রহণ করেছেন।

ইমাম নওবী ঈদের নামাযের জন্য গোসল করা মুস্তাহাব হওয়ার ব্যাপারে উলামাগণ একমত আছেন বলে উল্লেখ করেছেন। তাছাড়া যে অর্থে জুমআহ ইত্যাদি সাধারণ সমাবেশের জন্য গোসল করা মুস্তাহাব, সেই অর্থ ঈদেও বর্তমান। বরং সেই অর্থ ঈদে অধিকতর স্পষ্ট।<sup>2</sup>

### ❖ ঈদের জন্য সাজসজ্জা ও সুগন্ধি ব্যবহার :

সহীহ বুখারীতে ‘ঈদ ও তার জন্য সাজসজ্জা গ্রহণ’-এর বাবে বর্ণিত আযারে আব্দুল্লাহ বিন উমার (رضي الله عنه) বলেন, একদা উমার (رضي الله عنه) একটি মোটা রেশমের তৈরী জুব্বা বাজারে বিক্রয় হতে দেখে তিনি তা নিয়ে আল্লাহর রসূল (ﷺ)-এর কাছে এসে বললেন, ‘হে আল্লাহর রসূল! আপনি এটা ক্রয় করে নিন। এটি ঈদ ও বহিরাগত রাজ-প্রতিনিধিদের জন্য পরিধান করে সৌন্দর্য ধারণ করবেন।’ কিন্তু তিনি বললেন, “এটি তো তাদের লেবাস, যাদের (পরকালে) কোন অংশ নেই।”<sup>3</sup>

ইবনে কুদামাহ বলেন, এই হাদীস থেকে বুঝা যায় যে, উক্ত সময়ে সৌন্দর্য ধারণ করা তাঁদের নিকট প্রচলিত ছিল।<sup>4</sup> উক্ত ঘটনায় আল্লাহর রসূল (ﷺ) সৌন্দর্য ধারণের ব্যাপারে আপত্তি জানালেন না। কিন্তু তা ক্রয় করতে আপত্তি জানালেন; কেননা তা ছিল রেশমের তৈরী।<sup>5</sup>

ত্বাবারানীতে ইবনে আব্বাস (رضي الله عنه) কর্তৃক বর্ণিত আছে যে, নবী (ﷺ) ঈদের দিনে একটি লাল রঙের চেক-কাটা চাদর পরতেন।<sup>6</sup>

ইবনে উমার (رضي الله عنه) ঈদের জন্য তাঁর সবচেয়ে বেশী সুন্দর লেবাসটি পরিধান করতেন।<sup>7</sup>

<sup>1</sup> (ইরওয়াউল গালীল, আলবানী ৩/১০৪)

<sup>2</sup> (দুরুসু রামাযান অকাফাত লিস-সায়েমীন ৯৭পৃঃ)

<sup>3</sup> (বুখারী ৯৪৮নং)

<sup>4</sup> (আল-মুগনী ৩/২৫৭)

<sup>5</sup> (দুরুসু রামাযান অকাফাত লিস-সায়েমীন ৯৯পৃঃ)

<sup>6</sup> (সিলসিলাহ সহীহাহ, আলবানী ১২৭৯নং দ্রঃ)

<sup>7</sup> (বাইহাফী ৩/২৮১)

আব্দুল্লাহ বিন উমার (رضي الله عنه) উভয় ঈদে তাঁর সব চাইতে বেশী সুন্দর পোশাকটি পরিধান করতেন।<sup>1</sup>

ইমাম মালেক বলেন, ‘আমি আহলে ইল্‌মদের কাছে শুনেছি, তাঁরা প্রত্যেক ঈদে সাজসজ্জা ও সুগন্ধি ব্যবহারকে মুস্তাহাব মনে করতেন।’

সুতরাং পুরুষের জন্য উচিত হল, ঈদের নামাযের জন্য বের হওয়ার আগে তার সব চাইতে সুন্দর পোশাকটি পরিধান করবে। অবশ্য মহিলারা ঘর থেকে বের হওয়ার সময় (ভিতর বাহিরের) সর্বপ্রকার সৌন্দর্য প্রদর্শন থেকে দূরে থাকবে। যেহেতু বেগানা পুরুষের সম্মুখে মহিলার সৌন্দর্য প্রকাশ করা হারাম। অনুরূপ হারাম - ঘর থেকে বের হওয়ার আগে কোন প্রকার সেন্ট, পারফিউম, আতর বা সুগন্ধময় ক্রিম-পাউডার অথবা অন্য কোন প্রসাধন ব্যবহার। যেমন, বাইরে বের হয়ে তার চলনে, বলনে, ভাবে, ভঙ্গিমায় যেন-তেন প্রকারে কোন পুরুষকে নিজের দিকে আকৃষ্ট করাও বৈধ নয়। যেহেতু সে তো সে সময় কেবল মহান আল্লাহর ইবাদত ও আনুগত্য করার উদ্দেশ্যেই বের হয়। তাহলে যে মুমিন মহিলা তাঁর আনুগত্যে সন্তুষ্টি লাভের উদ্দেশ্যে বের হয়, সে আবার তাঁরই নাফরমানি করে টাইটফিট বা চুস্ত অথবা দৃষ্টি-আকর্ষক রঙিন পোশাক পরিধান করে কি করে অথবা সুগন্ধি ব্যবহার করে বের হয় কিভাবে?<sup>2</sup>

### ❖ ঈদের নামাযের জন্য বের হওয়ার পূর্বে কিছু খাওয়া :

ঈদগাহের জন্য বের হওয়ার পূর্বে ৩ অথবা ৫ বেজোড় সংখ্যক খেজুর খাওয়া মুস্তাহাব। আনাস (رضي الله عنه) বলেন, ‘আল্লাহর রসূল (ﷺ) ঈদুল ফিতরের দিন কিছু খেজুর না খেয়ে বের হতেন না।’ এক বর্ণনায় আছে যে, ‘তিনি তা বেজোড় সংখ্যক খেতেন।’<sup>3</sup>

এই খাওয়ার পিছনে হিকমত হল, যাতে কেউ মনে না করে যে, ঈদের নামায পর্যন্ত রোযা রাখতে হয়। আর এতে রয়েছে রোযা ভেঙ্গে সত্বর মহান আল্লাহর হুকুম পালন।<sup>4</sup>

<sup>1</sup> (বাইহাকী, ফাতহুল বারী ২/৫১০)

<sup>2</sup> (দুরুসু রামাযান অকাফাত লিস-সায়েমীন ৯৯-১০০ পৃঃ)

<sup>3</sup> (বুখারী ৯৫৩, ইবনে মাজাহ ১৭৫৪, ইবনে খুযাইমাহ, সহীহ ১৪২৯নং)

<sup>4</sup> (ফাতহুল বারী ২/৫১৮)


কোন কোন উলামা মনে করেন যে, যদি কেউ ফজর উদয় হওয়ার পরে এবং ফজরের নামায পড়ার আগেও খেয়ে নেয়, তাহলে উদ্দেশ্য সফল হয়ে যাবে। কারণ, সে অবস্থায় সে দিনের বেলায় খেয়েছে বলেই বিবেচিত হবে। অবশ্য উত্তম হল, ঈদগাহে বের হওয়ার অব্যবহিত পূর্বেই তা খাওয়া।<sup>1</sup>


প্রকাশ থাকে যে, খেজুর না পাওয়া গেলে যে কোন খাবার খেলেই যথেষ্ট হবে।


### ❖ ঈদগাহে বের হওয়া ঃ

সুননত এই যে, ঈদের নামাযের জন্য গ্রাম-শহরের বাইরে ঈদগাহ হবে। যেহেতু মহানবী ﷺ উভয় ঈদের দিন মসজিদ ত্যাগ করে ঈদগাহে বের হতেন। অনুরূপ আমল ছিল খুলাফায়ে রাশেদীনের এবং তাঁদের পরবর্তীদের।<sup>2</sup>

### ❖ পায়ে হেঁটে যাওয়া ঃ

পায়ে হেঁটে ঈদগাহে যাওয়া মুস্তাহাব। ইবনে উমার ও অন্যান্য সাহাবা  কর্তৃক বর্ণিত যে, মহানবী ﷺ পায়ে হেঁটে ঈদগাহে যেতেন এবং পায়ে হেঁটেই বাড়ি ফিরতেন।<sup>3</sup>

আলী  বলেন, 'একটি সুননত হল, পায়ে হেঁটে ঈদগাহ যাওয়া।'<sup>4</sup>

এ ছাড়া সাঈদ বিন মুসাইয়েবের উক্তি পূর্বে উল্লিখিত হয়েছে; তিনি বলেছেন, 'ঈদুল ফিতরের সুননত হল ৩টি; পায়ে হেঁটে ঈদগাহে যাওয়া, যাওয়ার আগে কিছু খাওয়া এবং গোসল করা।'<sup>5</sup> যুহরী বলেন, 'আল্লাহর রসূল  কখনো জানাযায় অথবা ঈদুল ফিতরে অথবা ঈদুল আযহায় সওয়ার হয়ে যান নি।'<sup>6</sup> ইমাম আহমাদ বলেন, 'আমরা হেঁটে যাই, আমাদের ঈদগাহ নিকটে। দূরে হলে সওয়ার হয়ে যাওয়ায় দোষ নেই।'<sup>7</sup>

<sup>1</sup> (আশ্শারহুল মুমতে' ৫/১৬১)

<sup>2</sup> (দ্রঃ বুখারী ৯৫৬, মুসলিম ৮৮৯, নাসাই ১৫৭৫, বাইহাকী ৩/২৮০, আহমাদ, মুসনাদ ৩/৩৬, ৫৪)

<sup>3</sup> (সহীহ ইবনে মাজাহ, আলবানী ১০৭০, ১০৭১, ১০৭৩নং)

<sup>4</sup> (তিরমিযী ৫৩০, সহীহ ইবনে মাজাহ, আলবানী ১০৭২, বাইহাকী ৩/২৮১)

<sup>5</sup> (ইরওয়াউল গালীল, আলবানী ৩/১০৪)

<sup>6</sup> (ঐ ৩/১০৩)

<sup>7</sup> (আল-মুগনী ২/৩৭৪)

### ❖ শিশু ও মহিলাদের ঈদগাহে যাওয়া :

শিশু ও মহিলার জন্যও ঈদগাহে যাওয়া বিধেয়। চাহে মহিলা কুমারী হোক অথবা অকুমারী, যুবতী হোক অথবা বৃদ্ধা, পবিত্রা হোক অথবা ঋতুমতী। উম্মে আতিয়াহ বলেন, ‘আমাদেরকে আল্লাহর রসূল ﷺ আদেশ দিয়েছেন যে, আমরা যেন মহিলাদেরকে উভয় ঈদে (ঘর থেকে ঈদগাহে) বের করি। তবে ঋতুমতী মহিলা নামাযের স্থান থেকে দূরে থাকবে। তারা অন্যান্য মঙ্গল ও মুসলিমদের দুআর জন্য উপস্থিত হবে। তারা পুরুষদের পিছনে অবস্থান করবে। পুরুষদের সাথে তারাও (নিঃশব্দে) তকবীর পাঠ করবে।’

তিনি বলেন, আমি বললাম, ‘হে আল্লাহর রসূল! আমাদের কারো কারো চাদর না থাকলে?’ উত্তরে তিনি বললেন, ‘তার কোন বোন তাকে নিজ (অতিরিক্ত অথবা পরিহিত বড়) চাদর পরতে দেবে।’<sup>1</sup>

ইবনে আব্বাস (رضي الله عنه) বলেন, ‘আল্লাহর রসূল ﷺ নিজ কন্যা ও স্ত্রীদেরকে উভয় ঈদে ঈদগাহে বের হতে আদেশ দিতেন।’<sup>2</sup>

বিদিত যে, ঈদগাহে বের হলে মহিলাদের জন্য পর্দা গ্রহণ করা ওয়াজেব। বেপর্দা হয়ে, সেন্ট বা আতর ব্যবহার করে, পুরুষদের দৃষ্টি-আকর্ষী সাজ-সজ্জা করে বের হওয়া বৈধ নয়। বৈধ নয় পুরুষদের পাশাপাশি চলা, তাদের ভিড়ে প্রবেশ করা।

বলা বাহুল্য, পরবর্তী যুগে মহিলা দ্বারা নানা ফাসাদ ও অঘটন ঘটান ফলে যাঁরা তাদেরকে ঈদগাহে যেতে বাধা দেন বা অবৈধ মনে করেন, তাঁদের মত সঠিক নয়। অবশ্য যদি তাঁরা কেবল বেপর্দা মহিলা এবং পর্দায় ঢিল মারে এমন মহিলাদের ক্ষেত্রে ঐ বাধা প্রয়োগ করেন, তাহলে তা সঠিক বলে সকলে মেনে নেবে।<sup>3</sup> পক্ষান্তরে পর্দানশীন মহিলা সহ সকল মহিলার জন্য ঐ বাধা ব্যাপক করা শুদ্ধ নয়। কারণ, মহানবী ﷺ তাদেরকে বের হতে আদেশ করেছেন। এমন কি শায়খুল ইসলাম ইবনে

<sup>1</sup> (বুখারী ৩২৪, ৯৭৪, মুসলিম ৮৯০নং)

<sup>2</sup> (আহমাদ, মুসনাদ ১/২৩১, ইবনে আবী শাইবাহ, মুসান্নাফ প্রমুখ, সিলসিলাহ সহীহাহ, আলবানী ২১১৫, সহীহুল জামেইস সাগীর, আলবানী ৪৮৮৮নং)

<sup>3</sup> (আসইলাতুন অআজবিবাতুন ফী শ্বলাতিল ঈদাঈন ২৬পৃ, মাজাল্লাতুল বায়ান ১৩৬/২৫)

তাইমিয়াহ (রঃ) বলেছেন, 'মহিলাদের জন্য ঈদগাহে বের হওয়া ওয়াজেবও বলা যেতে পারে।'<sup>1</sup>

অতএব স্পষ্ট যে, ঈদের নামায আদায়ের জন্য মহিলাদের মসজিদে অথবা কোন ঘরে জমায়েত হয়ে পৃথকভাবে জামাআত করা এবং মুসলিমদের সাধারণ জামাআতের সাথে তাদের বের না হওয়া মহানবী ﷺ-এর আদেশের পরিপন্থী কাজ। উচিত হল, মহিলাদেরকে পর্দা করা এবং ঈদগাহেও পর্দার ব্যবস্থা করা।

### ❖ ঈদের দিন তকবীর পাঠ :

শেষ রোযার দিন সূর্য অস্ত যাওয়ার পর থেকে ঈদের নামায শুরু হওয়া পর্যন্ত তকবীর পাঠ করা বিধেয়। এর দলীল মহান আল্লাহর স্পষ্ট বাণী :

﴿وَلْتَكْمِلُوا الْعِدَّةَ وَلِتُكَبِّرُوا اللَّهَ عَلَىٰ مَا هَدَاكُمْ وَلَعَلَّكُمْ تَشْكُرُونَ﴾

অর্থাৎ, যেন তোমরা নির্ধারিত সংখ্যা পূরণ করে নিতে পার এবং তোমাদেরকে যে সুপথ দেখিয়েছেন তার জন্য তোমরা আল্লাহর তকবীর পাঠ কর এবং যেন তোমরা কৃতজ্ঞতা প্রকাশ করতে পার।

(কুরআনুল কারীম ২/১৮৫)

কোন কোন উলামা বলেন, এই তকবীর পাঠ করা ওয়াজেব। অবশ্য তা একবার পাঠ করলেই ওয়াজেব পালনে যথেষ্ট হবে।<sup>2</sup>

এই তকবীর আল্লাহর তা'যীম ঘোষণা এবং তাঁর ইবাদত ও শুকরিয়া প্রকাশের উদ্দেশ্যে পুরুষের জন্য মসজিদে, ঘরে, বাজারে ও রাস্তা-ঘাটে উচ্চস্বরে পাঠ করা সুন্নত। সলফদের নিকট ঈদগাহের প্রতি বের হওয়া থেকে শুরু করে ইমাম আসার আগে পর্যন্ত উক্ত তকবীর পাঠ করার কথা অতিশয় প্রসিদ্ধ ছিল। এ কথা সলফদের আমল বর্ণনাকারী এক জামাআত গ্রন্থকার; যেমন ইবনে আবি শাইবাহ, আব্দুর রায়যাক ও ফিরয়াবী তাঁদের এ আমল নিজ নিজ গ্রন্থে বর্ণনা করেছেন। আর মহানবী ﷺ কর্তৃকও এ কথা সরাসরিভাবে বর্ণনা করা হয়েছে।<sup>3</sup>

<sup>1</sup> (আল-ইখতিয়ারাতুল ফিকহিয়াহ, ইবনে তাইমিয়াহ ৮২ পৃঃ, মাজাল্লাতুল বায়ান ১৩৬/২৫)

<sup>2</sup> (মুহাম্মাদ ৫/৮৯)

<sup>3</sup> (ইবওয়াউল গালীল, আলবানী ৩/১২১-১২৩, আল্লামা আলবানী এ ব্যাপারে মারফু' এ মাওকুফ উভয় সূত্রে সহীহ বলেছেন।)

মহানবী ﷺ উচ্চস্বরে তকবীর পাঠ করতে করতে উভয় ঈদে বের হতেন।<sup>1</sup>

❖ তকবীরের শব্দাবলী :

ইবনে মাসউদ (رضي الله عنه) তকবীর পাঠ করে বলতেন,

اللَّهُ أَكْبَرُ، اللَّهُ أَكْبَرُ، لَا إِلَهَ إِلَّا اللَّهُ وَاللَّهُ أَكْبَرُ، اللَّهُ أَكْبَرُ، وَاللَّهُ الْحَمْدُ.

‘আল্লা-হু আকবার, আল্লা-হু আকবার, লা ইলা-হা ইল্লাল্লা-হু অল্লা-হু আকবার, আল্লা-হু আকবার অলিল্লাহিল হাম্দ।’<sup>2</sup>

ইবনে আব্বাস (رضي الله عنه) বলতেন,

اللَّهُ أَكْبَرُ، اللَّهُ أَكْبَرُ، وَاللَّهُ الْحَمْدُ، اللَّهُ أَكْبَرُ وَأَجَلُّ، اللَّهُ أَكْبَرُ

عَلَى مَا هَدَانَا

‘আল্লা-হু আকবার, আল্লা-হু আকবার, আল্লা-হু আকবার, অলিল্লাহিল হাম্দ। আল্লা-হু আকবার অ আজাল্লু, আল্লাহু আকবার আলা মা হাদানা।’<sup>3</sup>

অন্য এক বর্ণনায় আছে,

اللَّهُ أَكْبَرُ كَثِيرًا، اللَّهُ أَكْبَرُ كَثِيرًا، اللَّهُ أَكْبَرُ وَأَجَلُّ، وَاللَّهُ الْحَمْدُ

‘আল্লা-হু আকবার কাবীরা, আল্লা-হু আকবার কাবীরা, আল্লা-হু আকবার অ আজাল্লু, আল্লাহু আকবার, অলিল্লাহিল হাম্দ।’<sup>4</sup>

মহিলারাও এই তকবীর পাঠ করবে, তবে নিম্নস্বরে। যাতে গায়র মাহরাম কোন পুরুষ তার এই তকবীর পাঠের শব্দ না শুনতে পায়। উম্মে আতিয়াহ (রাঃ) বলেন, ‘--- এমনকি আমরা ঋতুমতী মহিলাদেরকেও ঈদগাহে বের করতাম। তারা পুরুষদের পিছনে অবস্থান করত; তাদের তকবীর পড়া শুনে তারাও তকবীর পাঠ করত এবং তাদের দুআ শুনে

<sup>1</sup> (সহীহুল জামেইস সাগীর, আলবানী ৪৯৩৪নং)

<sup>2</sup> (ইবনে আবী শাইবাহ, মুসান্নাফ ৫৬৫০, ৫৬৫২নং, ইরওয়াউল গালীল, আলবানী ৩/১২৫)

<sup>3</sup> (বাইহাকী ৩/৩১৫, ইরওয়াউল গালীল, আলবানী ৩/১২৫)

<sup>4</sup> (ইবনে আবী শাইবাহ, মুসান্নাফ ৫৬৪৫, ৫৬৫৪, ইরওয়াউল গালীল, আলবানী ৩/১২৫)



তারাও দুআ করত। তারা ঐ দিনের বর্কত ও পবিত্রতা আশা করত।<sup>1</sup>

পক্ষান্তরে সমবেত কণ্ঠে সমস্বরে জামাআতী তকবীর অথবা একজন বলার পর অন্য সকলের একই সাথে তকবীর পাঠ বিদআত। যেহেতু যিকুর-আযকারে মহানবী ﷺ-এর আদর্শ হল, প্রত্যেক ব্যক্তি নিজ নিজ যিকুর একাকী পাঠ করবে। সুতরাং তাঁর ও তাঁর সাহাবাদের আদর্শ থেকে বিচ্যুত হওয়া কারো জন্য উচিত নয়।<sup>2</sup>

### ❖ ঈদের নামাযের সময় :

ঈদের নামাযের সময় চাশ্তের নামাযের সময়ের মত। যেহেতু আব্দুল্লাহ বিন বুসর (رضي الله عنه) লোকেদের সাথে ঈদুল ফিতর অথবা ঈদুল আযহার দিনে ঈদগাহে বের হলেন। ইমাম সাহেবের উপস্থিত হতে দেরী দেখে আপত্তি জানিয়ে বললেন, ‘আমরা নবী ﷺ-এর সাথে এতক্ষণ নামায থেকে ফারোগ হয়ে যেতাম।’ আর সে সময়টি ছিল চাশ্তের সময়।<sup>3</sup>

আর চাশ্তের নামাযের সময় শুরু হয় সূর্য যখন দর্শকের চোখে এক বর্শা (এক মিটার) পরিমাণ উপরে ওঠে। অর্থাৎ সূর্য ওঠার মোটামুটি ১৫ মিনিট পরে এই নামায পড়া হয়।<sup>4</sup>

ইবনে বাত্তাল বলেন, ফকীহগণ এ বিষয়ে একমত যে, ঈদের নামায সূর্য উদয় হওয়ার পূর্বে এবং উদয় হওয়ার সময়ে পড়া যাবে না। বরং যখন নফল নামায পড়া বৈধ হয়, তখনই তা পড়া বৈধ।<sup>5</sup> অর্থাৎ নিষিদ্ধ সময় অতিবাহিত হওয়ার পরই ঈদের নামায পড়া চলে।

অবশ্য উলামাগণ ঈদুল আযহার নামাযকে সকাল সকাল এবং ঈদুল ফিতুরের নামাযকে একটু দেরী করে পড়া উত্তম মনে করেছেন। কারণ, প্রত্যেক ঈদের ভিন্ন ভিন্ন ব্যস্তকারী কর্ম রয়েছে। ঈদুল আযহার কর্ম হল কুরবানী; আর তার সময় হল নামাযের পর। পক্ষান্তরে ঈদুল ফিতুরের কর্ম

<sup>1</sup> (বুখারী ৯৭১, মুসলিম ৮৯০নং)

<sup>2</sup> (আসইলাতুন অআজবিবাতুন ফী ফুলাতিল ঈদাঈন ৩১-৩২পৃঃ)

<sup>3</sup> (বুখারী বিনা সনদে প্রত্যয়ের সাথে ১৯১পৃঃ, আবু দাউদ ১১৩৫, ইবনে মাজাহ ১৩১৭, হাকেম, মুস্তাদরাক ১/২৯৫, বাইহাকী.৩/২৮২)

<sup>4</sup> (আশশারহুল মুমতে' ৪/১২২)

<sup>5</sup> (ফাতহুল বারী ২/৫৩০)

হল ফিতরা বন্টন; আর তার সময় হল নামাযের আগে। এ ব্যাপারে মহানবী ﷺ কর্তৃক হাদীস বর্ণিত থাকলেও তা সহীহ নয়।<sup>1</sup>

### ❖ ঈদের নামাযের জন্য আযান ও ইকামত :

ঈদের নামাযের জন্য আযান ও ইকামত নেই। তার জন্য (সূর্য-গ্রহণের নামাযের মত) ‘আস-সালাতু জামেআহ’ বা অন্য কিছু বলে আহবানও নেই। বরং মহানবী ﷺ যখন ঈদগাহে উপস্থিত হতেন, তখন নামায শুরু করতেন। ইবনে আব্বাস (رضي الله عنه) ও জাবের (رضي الله عنه) বলেন, ‘(রসূল ﷺ-এর যুগে) ঈদুল ফিতর বা ঈদুল আযহার নামাযের জন্য আযান দেওয়া হত না।’<sup>2</sup>

জাবের বিন সামুরাহ (رضي الله عنه) বলেন, ‘আমি আল্লাহর রসূল ﷺ-এর সাথে এক-দুইবারের অধিক উভয় ঈদের নামায বিনা আযান ও ইকামতে পড়েছি।’<sup>3</sup>

### ❖ ঈদের নামাযের জন্য সুতরাহ :

ঈদগাহ যদি ফাঁকা মাঠ অথবা ময়দানে হয় এবং সামনে কোন জিনিসের অন্তরাল না থাকে, তাহলে ইমামের সামনে কোন সুতরাহ রেখে নিতে হবে। ইবনে উমার (رضي الله عنه) বলেন, ‘আল্লাহর রসূল ﷺ যখন ঈদগাহে বের হতেন, তখন একটি যুদ্ধাজ্র (বর্শা) সঙ্গে নিতে আদেশ করতেন এবং সেটিকে তাঁর সামনে রাখা হত; অতঃপর তিনি সেটিকে সুতরাহ বানিয়ে নামায পড়তেন। আর লোকেরা তাঁর পিছনে থাকত। এরূপ তিনি সফরেও করতেন।’ আর এখান থেকেই আমীরগণ এ কাজকে অভ্যাস বানিয়েছেন।<sup>4</sup>

ইবনে মাজার এক বর্ণনায় এ কথা বেশী আছে যে, ‘তার (সুতরাহ রাখার) কারণ এই যে, ঈদগাহ ছিল শূন্য ময়দানে; যেখানে সুতরাহ বানাবার মত কিছু ছিল না।’<sup>5</sup>

<sup>1</sup> (ইরওয়াউল গালীল, আলবানী ৩/১০১, তামামুল মিন্নাহ, আল্লামা আলবানী ৩৪৭৭ঃ দ্রঃ)

<sup>2</sup> (বুখারী ৯৬০, মুসলিম ৮৮৬নং)

<sup>3</sup> (মুসলিম ৮৮৭, আবু দাউদ ১১৪৮, তিরমিযী ৫৩২নং)

<sup>4</sup> (আহমাদ, মুসনাদ ২/১৪২, বুখারী ৪৯৪, মুসলিম ৫০১, আবু দাউদ ৬৮৭, ইবনে মাজার ১৩০৪-১৩০৫, বাইহাকী ২/২৬৯)

<sup>5</sup> (সহীহ ইবনে মাজার, আলবানী ১০৭৭নং)

### ❖ ঈদের নামাযের পদ্ধতি ৪

ঈদের নামাযের পদ্ধতি অন্যান্য (ফজরের) নামাযের মতই। অবশ্য এ নামাযে অতিরিক্ত কিছু তকবীর রয়েছে। সুতরাং নামাযী কানের উপরি ভাগ পর্যন্ত দুই হাত তুলে তাহরীমার তাকবীর দিয়ে বুকের উপরে রাখবে। অতঃপর ইস্তিফতাহর দুআ পাঠ করে পরপর ৬বার তকবীর বলবে। ইস্তিফতাহর দুআ তকবীরগুলোর পরে এবং সূরা ফাতিহা পড়ার আগে পড়লেও চলে।<sup>1</sup>

মা আয়েশা (রাঃ) বলেন, ‘আল্লাহর রসূল ﷺ ঈদুল ফিতর ও আযহার নামাযের প্রথম রাকআতে সাত এবং দ্বিতীয় রাকআতে পাঁচ তকবীর দিতেন।’<sup>2</sup> অন্য এক বর্ণনায় আছে, ‘রুকূর দুই তকবীর ছাড়া।’<sup>3</sup>

আব্দুল্লাহ বিন আমর বিন আস (رضي الله عنه) বলেন, আল্লাহর নবী ﷺ বলেন, “ঈদুল ফিতরের (নামাযের) প্রথম রাকআতে তকবীর সাতটি এবং দ্বিতীয় রাকআতে পাঁচটি। আর উভয় রাকআতেই তকবীরের পরে হবে কিরাআত।”<sup>4</sup> অনুরূপ বর্ণনা করেছেন আমর বিন আওফ (رضي الله عنه)।<sup>5</sup>

উপরোক্ত বর্ণনাগুলি একটি অন্যকে শক্তিশালী করে এবং সব মিলে ‘সহীহ’ বা বিশুদ্ধ হাদীসের মান লাভ করে।<sup>6</sup>

উল্লেখিত আমল ছিল সাহাবী আবু হুরাইরা (رضي الله عنه)-এর।<sup>7</sup> ইবনে আব্বাস (رضي الله عنه) ঈদের নামাযের প্রথম রাকআতে তাকবীরে তাহরীমা সহ ৭ তকবীর এবং দ্বিতীয় রাকআতে রুকূর তকবীর সহ ৬ তকবীর দিতেন। আর সকল তকবীর দিতেন কিরাআতের পূর্বে।<sup>8</sup>

<sup>1</sup> (আসইলাতুন আজবিবাতুন ফী দ্বল্যাতিল ঈদাঈন ২৯ পৃঃ দ্রঃ)

<sup>2</sup> (সহীহ আবু দাউদ ১০১৮, হাকেম, মুত্তাদরাফ ১/২৯৮, বাইহাকী ৩/২৮৬)

<sup>3</sup> (সহীহ আবু দাউদ ১০১৯, সহীহ ইবনে মাজাহ, আলবানী ১০৫৮, দারাকুতুনী, সুনান ১৭১০, বাইহাকী ৩/২৮৭)

<sup>4</sup> (আহমাদ, মুসনাদ ২/১৮০, সহীহ আবু দাউদ ১০২০, সহীহ ইবনে মাজাহ, আলবানী ১০৫৫-১০৫৬নং, দারাকুতুনী, সুনান, বাইহাকী, ইবনে আবী শাইবাহ, মুসনাদাফ)

<sup>5</sup> (সহীহ তিরমিযী, আলবানী ৪৪২, সহীহ ইবনে মাজাহ, আলবানী ১০৫৭, ইবনে খুযাইমাহ, সহীহ ১৪৩৮-১৪৩৯নং, দারাকুতুনী, সুনান, বাইহাকী)

<sup>6</sup> (ইরওয়াউল গালীল, আলবানী ৩/১০৬-১১১ দ্রঃ)

<sup>7</sup> (মাঃ, বাইহাকী ৩/২৮৮, ইবনে আবী শাইবাহ, মুসনাদাফ)

<sup>8</sup> (ইবনে আবী শাইবাহ, মুসনাদাফ ৫৭০৩)

পক্ষান্তরে ইবনে আমর ও আয়েশার হাদীসে<sup>1</sup> “তাকবীরে তাহরীমা ছাড়া (৭ তকবীর)” অতিরিক্ত শব্দগুলি যযীফ হওয়ার সাথে সাথে আব্দু দাউদ ও ইবনে মাজার বর্ণনায় উল্লেখ হয় নি। অল্লাহ্ আ’লাম।

ইবনে আব্বাস (رضي الله عنه) থেকে সহীহ সূত্রে ৯+৪ তকবীর বর্ণিত হয়েছে। যেমন তাঁর উক্তি, ‘যার ইচ্ছা সে ৭, যার ইচ্ছা সে ৯, যার ইচ্ছা সে ১১ এবং যার ইচ্ছা সে ১৩ তকবীর দিবে।’ তবে ৭+৫ তকবীরের বর্ণনাই সব চাইতে বেশী শুদ্ধ। সুতরাং বলা যায় যে, এ ব্যাপারে ইবনে আব্বাস (رضي الله عنه) এর নিকট প্রশস্ততা ছিল। আর সহীহ সূত্রে যা বর্ণিত, তাই তিনি বৈধ মনে করেন। অল্লাহ্ আ’লাম।<sup>2</sup>

অতিরিক্ত এই তকবীরগুলো বলা কিন্তু সন্নত। কেউ বললে তার সওয়াব পাবে এবং না বললে তার কোন পাপ হবে না। অবশ্য এ ব্যাপারে শৈথিল্য প্রদর্শন করে তা ত্যাগ করা উচিত নয়। যাতে অন্যান্য নামায থেকে ঈদের নামায পৃথক বৈশিষ্ট্যে মঞ্জিত হয়।<sup>3</sup>

এই ভিত্তিতে যদি কেউ ভুলে গিয়ে তকবীরগুলো ছেড়ে দিয়ে কিরাআত শুরু করে ফেলে, তাহলে তা আর ফিরিয়ে বলতে হবে না। কারণ, তা সন্নত এবং তার নির্দিষ্ট স্থান ছুটে গেছে। যেমন যদি কেউ ভুলে ইস্তিফতাহর দুআ ছেড়ে কিরাআত শুরু করে দেয়, তাহলে তারও কোন ক্ষতি হয় না। আর এর জন্য সহ সিজদাও লাগবে না।<sup>4</sup>

উক্ত তকবীর দেওয়ার সময় প্রত্যেক বারে হাত তোলার ব্যাপারে কোন সহীহ হাদীস নেই; না (মহানবী ﷺ থেকে) মারফু এবং না (কোন সাহাবী থেকে) মাওকুফ।<sup>5</sup> তবে কোন কোন আহলে ইল্ম বলেন যে, ঐ সময় হাত তুলতে হবে। আত্মা বলেন, ‘প্রত্যেক তকবীরের সময় রফয়ে য়াদাইন করবে।’<sup>6</sup> ইমাম মালেক বলেন, ‘প্রত্যেক তকবীরের সময় রফয়ে য়াদাইন কর। তবে এ ব্যাপারে আমি কিছু শুনি নি।’<sup>7</sup>

<sup>1</sup> (দারাকুত্বনী, সুনান ১৭০৪, ১৭১২, ১৭১৪, বাইহাকী ৩/২৮৫)

<sup>2</sup> (ইরওয়াউল গালীল, আলবানী ৩/১১১-১১২ দ্রঃ)

<sup>3</sup> (আল-মুগনী ৩/২৭৫, আসইলাতুন অআজবিবাতুন ফী স্বলাতিল ঈদাঈন ৬পৃঃ)

<sup>4</sup> (আযকার, নওবী ১৫৬পৃঃ, নাইনুল আওতার, ইমাম শওকানী ৩/৩০০, আসইলাতুন অআজবিবাতুন ফী স্বলাতিল ঈদাঈন ১১পৃঃ)

<sup>5</sup> (তামামুল মিন্নাহ, আল্লামা আলবানী ৩৪৯, কারহুল উমদাহ ১৪৭পৃঃ টীকা)

<sup>6</sup> (বাইহাকী ৩/২৯৩)

<sup>7</sup> (ফিরয়্যাবী, ইরওয়াউল গালীল, আলবানী ৩/১১৩)

অবশ্য তকবীর দেওয়ার সময় রফ্য়ে য়াদাইনের ব্যাপারে ওয়াইল বিন হুজ্জর কর্তৃক বর্ণিত একটি ব্যাপক হাদীস রয়েছে। তিনি বলেন, 'নবী ﷺ তকবীরের সাথে তাঁর হাত দুটিকে তুলতেন।'<sup>1</sup> ইমাম আহমাদ বলেন, 'আমি মনে করি যে, এগুলিও ঐ হাদীসের আওতায় পড়বে।'<sup>2</sup>

মুক্তাদী ইমামের অনুসরণ করে নিঃশব্দে তকবীর বলবে; সশব্দে নয়। কারণ, মুক্তাদীর সশব্দে তকবীর বলা বিদআত।<sup>3</sup>

পক্ষান্তরে প্রত্যেক তকবীরের পরে কোন যিক্‌র বা দুআ পাঠের ব্যাপারে মহানবী ﷺ কর্তৃক কিছু বর্ণিত হয় নি। তবে ইবনে মাসউদ (رضي الله عنه)-এর মত হল যে, তকবীরগুলোর মাঝে আল্লাহর প্রশংসা ও স্তুতি এবং নবী ﷺ-এর প্রতি দরুদ পাঠ করতে হয়।<sup>4</sup>

#### ❖ ঈদের নামাযের কিরাআত :

এ নামাযে উচ্চস্বরে সূরা ফাতিহা পাঠ করার পর প্রথম রাকআতে সূরা ক্বাফ এবং দ্বিতীয় রাকআতে সূরা ক্বামার পড়া সন্নত।<sup>5</sup>

অনুরূপ প্রথম রাকআতে সূরা আ'লা এবং দ্বিতীয় রাকআতে সূরা গাশিয়াহ পাঠ করাও সন্নত। এমনকি ঈদ ও জুমআহ একই দিনে সংঘটিত হলে উভয় নামাযেই উভয় সূরা পাঠ করা সন্নত।<sup>6</sup>

#### ❖ ঈদের নামাযের আগে ও পরে নামায :

ঈদের নামাযের আগে-পরে কোন নামায নেই। ইবনে আব্বাস (رضي الله عنه) বলেন, 'নবী ﷺ ঈদুল ফিতরের দিন ঈদগাহে বের হয়ে দুই রাকআত নামায পড়লেন। আর এর আগে বা পরে কোন নামায পড়লেন না।'<sup>7</sup> অনুরূপ বর্ণনা করেছেন ইবনে উমার, ইবনে আম্‌র এবং জাবের (رضي الله عنه)।<sup>8</sup>

<sup>1</sup> (আহমাদ, মুসনাদ ৪/৩১৬, দারেমী, সুনান ১২৩২, ইরওয়াউল গালীল, আলবানী ৬৪১নং)

<sup>2</sup> (ইরওয়াউল গালীল, আলবানী ৩/১১৪)

<sup>3</sup> (মু'জামুল বিদা' ৩৩২পৃঃ)



<sup>4</sup> (বাইহাকী ৩/২৯১, ইরওয়াউল গালীল, আলবানী ৬৪২, তামামুল মিন্নাহ, আল্লামা ৩৫০পৃঃ)

<sup>5</sup> (আহমাদ, মুসনাদ ৫/৭, মুসলিম ৮৯১, আবু দাউদ ১১৫৪, তিরমিযী ৫৩৪, নাসাঈ ১৫৬৬, ইবনে মাজাহ ১২৮২, দারেমী, সুনান ১৫৬৮নং, বাইহাকী ৩/২৯৪)


<sup>6</sup> (মুসলিম ৮৭৮, তিরমিযী ৫৩৩, নাসাঈ ১৫৬৭, ইবনে মাজাহ ১২৮১, ১২৮৩নং)

<sup>7</sup> (আহমাদ, মুসনাদ ৬/৩৫৫, বুখারী ৯৮৯, মুসলিম ৮৮৪, আবু দাউদ ১১৫৯, তিরমিযী ৫৩৭, ইবনে মাজাহ ১২৯১, দাঃ, বাইহাকী ৩/৩০২, ইবনে খুযাইমাহ, সহীহ ১৪৩৬নং)

<sup>8</sup> (ইরওয়াউল গালীল, আলবানী ৩/৯৯-১০০ পৃঃ)

কিছ ঈদের নামায কোন কারণবশতঃ মসজিদে হলে মসজিদে প্রবেশ করে বসার পূর্বে দুই রাকআত নামায পড়তে হবে। যেহেতু আবু কাতাদাহ  বলেন, আল্লাহর রসূল  বলেছেন, “তোমাদের মধ্যে কেউ মসজিদ প্রবেশ করলে সে যেন বসার পূর্বে ২ রাকআত নামায পড়ে নেয়।”<sup>1</sup> অন্য এক বর্ণনায় আছে, “সে যেন ২ রাকআত নামায পড়ার পূর্বে না বসে।”<sup>2</sup>

ঈদগাহ বা মুসাল্লা মসজিদের মত কি না সে নিয়ে মতভেদ রয়েছে। অনেকের মতে ঈদের নামাযের পূর্বে কোন নামায পড়া বিদআত।<sup>3</sup>

ঈদের নামাযের আগে-পরে নামায না থাকার কথা কেবল ঈদগাহের সাথে জড়িত। যেহেতু মহানবী  ঈদের নামায শেষে যখন বাড়ি ফিরতেন, তখন তিনি ২ রাকআত নামায পড়তেন।<sup>4</sup> অবশ্য অনেক উলামা বলেছেন যে, উক্ত নামায ছিল তাঁর চাশতের নামায। (ঈদের দিনের কোন বিশেষ নামায নয়।)<sup>5</sup>

❖ ঈদের নামায পুরো অথবা কিছু অংশ ছুটে গেলে :

ইমামের তকবীর পড়তে শুরু করার পর কেউ জামাআতে शामिल হলে, সে প্রথমে তাহরীমার তকবীর দিবে। অতঃপর বাকী তকবীরে ইমামের অনুসরণ করবে এবং ছুটে যাওয়া আগের তকবীরগুলো মাফ হয়ে যাবে।<sup>6</sup>

ইমামকে রুকু অবস্থায় পেলে তাহরীমার তকবীর দিয়ে (সময় আছে বুঝলে রুকু তকবীর দিয়ে) রুকুতে যাবে। যেহেতু তকবীরগুলো শেষ হওয়ার পর সে शामिल হয়েছে এবং তার যথাস্থানও ছুটে গেছে, তাই তা আর কাযা করতে হবে না।<sup>7</sup>

<sup>1</sup> (বুখারী ৪৪৪, মুসলিম ৭১৪নং প্রমুখ)

<sup>2</sup> (বুখারী ১১৬৭, মুসলিম ৭১৪নং প্রমুখ)

<sup>3</sup> (মু'জামুল বিদা' ৩৩২পৃঃ)

<sup>4</sup> (আহমাদ, মুসনাদ ৩/২৮, ৪০, ইবনে মাজাহ ১২৯৩, হাকেম, মুত্তাদারাক ১/২৯৭, বাইহাকী, ইবনে-রুযাইমাহ, সহীহ ১৪৬৯, ইরওয়াউল গালীল, আলবানী ৩/১০০)

<sup>5</sup> (মাজায়াতুল বায়ান ১৩৫/১১)

<sup>6</sup> (ইবনে উযাইমীন আসইলাতুন অআজবিবাতুন ফী হুলাতিল ঈদাঈন ৭পৃঃ)

<sup>7</sup> (ঐ ১১পৃঃ)

পক্ষান্তরে যদি কেউ কওমায় বা তার পরে জামাআতে शामिल হয়, তাহলে ইমামের দ্বিতীয় রাকআত তার প্রথম ধরে ইমাম সালাম ফিরে দিলে উঠে সে নিজের দ্বিতীয় রাকআত পূরণ করে নেবে এবং ইমাম দ্বিতীয় রাকআতে যেভাবে নামায পড়েছেন, ঠিক সেভাবেই ঐ রাকআত কাযা করবে।<sup>1</sup>

কেউ তাশাহহুদে এসে জামাআতে शामिल হলে ইমামের সাথে তাশাহহুদ পড়ে তাঁর সালাম ফিরার পর উঠে যথা নিয়মে সমস্ত তকবীর সহ ২ রাকআত নামায আদায় করে নেবে।<sup>2</sup>

অনুরূপ যদি কারো জামাআতই ছুটে যায়, তাহলে সেও দুই রাকআত নামায কাযা পড়ে নেবে। ইমাম বুখারী বলেন, ‘বাব ৪ কারো ঈদের নামায ছুটে গেলে ২ রাকআত নামায পড়ে নেবে। তদনুরূপ মহিলা এবং যারা ঘরে ও গ্রামে থেকে যায় তারাও। যেহেতু নবী ﷺ বলেন, “এ হল আমাদের ঈদ, হে মুসলিমগণ!” একদা আনাস বিন মালেক (رضي الله عنه) তাঁর স্বাধীনকৃত দাস ইবনে আবী উতবাহকে আদেশ করলেন, তিনি তাঁর পরিবার ও ছেলেদেরকে জমায়েত করে শহরবাসীদের মতই তকবীর দিয়ে নামায পড়লেন।’<sup>3</sup>

অনুরূপভাবে ইমামের সাথে আনাস (رضي الله عنه) এর ঈদের নামায ছুটে গেলে নিজের পরিবারবর্গকে জমা করে ইমামের মতই সে নামায পড়ে নিতেন।<sup>4</sup> এই মত গ্রহণ করেছেন ইমাম আত্বা,<sup>5</sup> হাসান, ইবরাহীম, আবু ইসহাক, হাম্মাদ প্রমুখ সলফগণ।<sup>6</sup>

পক্ষান্তরে ঈদ হওয়ার খবর সূর্য ঢলার পর জানতে পারা গেলে, রোযা ভেঙ্গে সেদিন নামায না পরে পরের দিন সকালে যথা সময়ে নামায কাযা পড়তে হবে। উমাইর বিন আনাস তাঁর আনসারী চাচাদের কাছ থেকে

<sup>1</sup> (ইবনে আবী শাইবাহ ৫৮১২নং)

<sup>2</sup> (মুগনী ৩/২৮৫)

<sup>3</sup> (বুখারী ১৯৫পৃ, ইবনে আবী শাইবাহ, মুসান্নাফ ৫৮০২নং)

<sup>4</sup> (ফাতহুল বারী ২/৫৫১, কিন্তু আল্লামা আলবানী এটিকে যরীফ বলেছেন। ইরওয়াদুল গালীল, আলবানী ৬৪৮নং দ্রঃ)

<sup>5</sup> (বুখারী ১৯৫পৃ, ইবনে আবী শাইবাহ, মুসান্নাফ ৫৮০১নং)

<sup>6</sup> (ইবনে আবী শাইবাহ, মুসান্নাফ ৫৮০৬-৫৮০৯নং)

বর্ণনা করেছেন, তাঁরা বলেন, ‘একদা শওয়ালের (ঈদের) চাঁদ দেখার দিন আকাশ মেঘাচ্ছন্ন থাকার ফলে চাঁদ না দেখা গেলে আমরা (তার পর দিন) রোযা রাখলাম। দিনের শেষভাগে একটি কাফেলা এসে আল্লাহর রসূল ﷺ-এর কাছে সাক্ষি দিল যে, তারা গতকাল চাঁদ দেখেছে। তিনি লোকদের সেদিনের রোযা ভাঙ্গতে এবং পরের দিন সকালে ঈদের নামাযের জন্য বের হতে আদেশ দিলেন।’<sup>1</sup>

### ❖ ঈদের খুতবাহ :

ঈদের খুতবা হবে নামাযের পর। ইবনে আব্বাস (رضي الله عنه) ও ইবনে উমার (رضي الله عنه) বলেন, ‘আল্লাহর রসূল ﷺ, আবু বাক্বর, উমার ও উসমান উভয় ঈদের নামায খুতবার আগে পড়তেন।’<sup>2</sup>

মহানবী (ﷺ) বলেন, ‘আমাদের আজকের দিনে যে কাজ প্রথম শুরু করব, তা হল নামায।----’<sup>3</sup>

আর জাবের (رضي الله عنه) বলেন, ‘আমি আল্লাহর রসূল ﷺ-এর সাথে ঈদের নামাযে উপস্থিত হয়েছি; তিনি খুতবার আগে নামায শুরু করেছেন।’<sup>4</sup>

আবু সাঈদ খুদরী (رضي الله عنه) বলেন, নবী (ﷺ) ঈদুল ফিতর ও আযহার দিনে ঈদগাহে বের হতেন। তিনি প্রথম কাজ হিসাবে নামায শুরু করতেন। অতঃপর লোকদের দিকে ফিরে দণ্ডায়মান হতেন। লোকেরা নিজ নিজ কাতারে বসে থাকত। তিনি তাদেরকে নসীহত করতেন, অসিয়ত করতেন এবং বিভিন্ন আদেশ দিতেন। কোন যুদ্ধের সৈন্য প্রস্তুত করার থাকলে তা করতেন। কোন কিছুর আদেশ করার থাকলে তা করতেন। অতঃপর তিনি বাড়ি ফিরতেন। তাঁর পরবর্তীকালের লোকেরাও অনুরূপ করতে থাকল। অবশেষে একদা মদীনার আমীর মারওয়ানের সাথে ঈদের নামায পড়তে ঈদুল আযহা অথবা ফিতরের দিন বের হলাম। ঈদগাহে পৌঁছে দেখি কাষীর

<sup>1</sup> (আহমাদ, মুসনাদ ৫/৫৭, আবু দাউদ ১১৫৭, নাসাঈ ১৫৫৬, ইবনে মাজাহ ১৬৫৩, ইবনে আবী শাইবাহ, মুসনাদ, দারাকুতুনী, সুনান, বাইহাকী ৩/৩১৬, ইবওয়াউল গালীল, আলবানী ৬৩৪নং)

<sup>2</sup> (বুখারী ৯৬২-৯৬৩, মুসলিম ৮৮৪, ৮৮৮নং)

<sup>3</sup> (বুখারী ৯৫১, মুসলিম ১৯৬১নং)

<sup>4</sup> (আহমাদ, মুসনাদ ৩/৩১৮, মুসলিম ৮৮৫, নাসাঈ, বাইহাকী ৩/২৯৬, দাঃ)



বিন সাল্ত মিম্বর তৈরী করে রেখেছে। নামায শুরু করার আগেই মারওয়ান তাতে চড়তে গেলেন। আমি তাঁর কাপড় ধরে টান দিলাম। তিনিও আমাকে টান দিলেন। অতঃপর মিম্বরে চড়ে নামাযের আগেই খুতবা দিলেন। (নামাযের পর) আমি তাঁকে বললাম, ‘আল্লাহর কসম! আপনি (সুন্নত) পরিবর্তন করে ফেললেন।’ উত্তরে তিনি বললেন, ‘আবু সাঈদ! আপনি যা জানেন তা গত হয়ে গেছে।’ আমি বললাম, আল্লাহর কসম! আমি যা জানি, তা না জানা জিনিস অপেক্ষা উত্তম।’ মুসলিমের এক বর্ণনায় আছে, ‘কক্ষনো না। সেই সত্তার কসম, যাঁর হাতে আমার প্রাণ আছে! আমি যা জানি, তার থেকে উত্তম কিছু আপনারা আনয়ন করতে পারেন না।’ উত্তরে মারওয়ান বললেন, ‘লোকেরা নামাযের পরে আমাদের খুতবা শুনেতে বসে না। তাই নামাযের পূর্বেই খুতবা দিলাম।’<sup>1</sup>

### ❖ মিম্বরে চড়ে খুতবা :

মহানবী ﷺ এবং তাঁর খুলাফায়ে রাশেদীনের যুগে ঈদগাহে মিম্বর ব্যবহার করা হত না। আবু সাঈদ খুদরী (رضي الله عنه) বলেন, মারওয়ান ঈদের দিন মিম্বর বের করেন এবং নামাযের পূর্বে খুতবা দেন। এ দেখে এক ব্যক্তি দাঁড়িয়ে বলল, ‘হে মারওয়ান! আপনি সুন্নাহর বিপরীত কাজ করলেন; ঈদের দিন মিম্বর বের করেছেন। অথচ তা ইতিপূর্বে বের করা হত না। আর নামাযের আগে খুতবাও দান করেছেন!’

আবু সাঈদ (رضي الله عنه) জিজ্ঞাসা করলেন, ‘ঐ প্রতিবাদকারী কে?’ লোকেরা বলল, ‘অমুকের বেটা অমুক।’ তিনি বললেন, ‘ও তো নিজ কর্তব্য পালন করে দিল। আমি আল্লাহর রসূল ﷺ-কে বলতে শুনেছি যে, “যে ব্যক্তি কোন আপত্তিকর কাজ ঘটতে দেখে এবং নিজ হাত দ্বারা তা পরিবর্তন করার সামর্থ্য রাখে, সে যেন তা পরিবর্তন করে। তাতে সমর্থ না হলে নিজ জিহ্ব দ্বারা, তাতেও সক্ষম না হলে নিজ অন্তর দ্বারা (ঘৃণা জানবে)। আর এটি হল দুর্বলতম ঈমানের পরিচায়ক।”<sup>2</sup>

কিন্তু জাবের (رضي الله عنه)-এর হাদীসে উল্লেখ রয়েছে যে, ‘আল্লাহর নবী ﷺ

<sup>1</sup> (বুখারী ৯৫৬, মুসলিম ৮৮৯নং)

<sup>2</sup> (আহমাদ, মুসনাদ ৩/১০, ৫২, সহীহ আবু দাউদ ১০০৯, তিরমিযী ২১৭২, ইবনে মাজাহ ১২৭৫, হাদীসটির মূল রয়েছে মুসলিমে ৪৯নং)

যখন (খুতবা) শেষ করলেন, তখন নেমে মহিলাদের কাছে এলেন---।<sup>1</sup> এর থেকে বুঝা যায় যে, তিনি কোন উঁচু জায়গাতে চড়েই খুতবা দিতেন। সুতরাং মিম্বর ব্যবহার করা ও না করার ব্যাপারে যে প্রশস্ততা আছে, তা বলাই বাহুল্য।<sup>2</sup>

### ❖ খুতবা কি দিয়ে শুরু হবে?

মহানবী ﷺ তাঁর সমস্ত খুতবা ‘আল-হামদু লিল্লাহি----’ দিয়ে শুরু করতেন। কোন একটি হাদীস দ্বারা এ কথা সংরক্ষিত নেই যে, তিনি তাঁর উভয় ঈদের খুতবা তকবীর দিয়ে শুরু করতেন।<sup>3</sup>

### ❖ খুতবার মাঝে মাঝে তকবীর :

এ কথাও বিশুদ্ধভাবে প্রমাণিত নয় যে, তিনি তাঁর খুতবার মাঝে মাঝে তকবীর পাঠ করতেন। এ বিষয়ে যা বর্ণিত হয়েছে, তা যয়ীফ।<sup>4</sup> সুতরাং ঈদের খুতবাকে তকবীর দিয়ে বৈশিষ্ট্যপূর্ণ করা বৈধ নয়। বাকী থাকল যুহরীর এই কথা যে, ‘ঘর থেকে বের হওয়ার পর থেকে ঈদগাহ পর্যন্ত ইমাম উপস্থিত হওয়া অবধি লোকেরা ঈদের তকবীর পাঠ করত। ইমাম উপস্থিত হলেই সকলে চুপ হয়ে যেত। অতঃপর ইমাম তকবীর দিলে সকলে আবার তকবীর দিত।’<sup>5</sup> এ কথায় ‘ইমাম তকবীর দিলে সকলে আবার তকবীর দিত’ বলে নামায শুরু করার তাহরীমার তকবীরকে বুঝানো হয়েছে; খুতবার ভিতরের তকবীর নয়।<sup>6</sup>

### ❖ খুতবা একটি না দুটি?

স্পষ্টতঃ যা বুঝা যায়, তাতে মনে হয় যে, মহানবী ﷺ-এর ঈদের খুতবা ছিল একটি। সাহাবী জাবের (رضي الله عنه) বলেন, ‘ঈদুল ফিতরের দিন নবী ﷺ দাঁড়িয়ে নামায পড়লেন। তিনি প্রথমে নামায পড়লেন, তারপর

<sup>1</sup> (বুখারী ৯৬১, ৯৭৮, মুসলিম ৮৮৫, আবু দাউদ ১১৪১নং)

<sup>2</sup> (আসইলাতুন অআজবিবাতুন ফী সলাতিল ঈদাঈন ৩-৪পৃঃ)

<sup>3</sup> (মাজমু’ ফাতাওয়া ইবনে তাইমিয়াহ ২২/৩৯৩, যামাঃ ১/৪৪৭ দ্রঃ)

<sup>4</sup> (ইরওয়াউল গালীল, আলবানী ৬৪৭, যয়ীফ ইবনে মাজাহ, আলবানী ২৬৪নং দ্রঃ)

<sup>5</sup> (ইবনে আবী শাইবাহ, মুসান্নাফ, ইরওয়াউল গালীল, আলবানী ৩/১২১)

<sup>6</sup> (মাজান্নাতুল বাযান ১৩৬/২২)

খুতবা দিলেন। খুতবা শেষ করে নেমে এসে তিনি মহিলাদের নিকট এলেন এবং তাদেরকে উপদেশ দিলেন। এই সময় তিনি বিলালের হাতে ভর করে দাঁড়িয়ে ছিলেন।--<sup>1</sup>

বলা বাহুল্য, উক্ত হাদীসে একটি মাত্র খুতবার কথা উল্লেখ হয়েছে। আর মহিলাদেরকে উপদেশ দান করাটাকে দ্বিতীয় খুতবা গণ্য করা সম্ভব নয়। কারণ, তিনি তাদেরকে নিজ নসীহত শুনার উদ্দেশ্যে তাদের কাছে নেমে এসেছিলেন। আর এ কথা কল্পনা করা যায় যে, ঈদের বিশাল জন-সমাবেশে মহিলারা পুরুষদের পিছনে থাকলে দূর থেকে তারা তাঁর খুতবা শুনতে পাচ্ছিল না। (অতএব খুতবা একটাই; শব্দ শুনার উদ্দেশ্যে কেবল জায়গার পরিবর্তন করা হয়েছিল।)

শায়খ ইবনে উষাইমীন (রঃ) বলেন, 'বুখারী-মুসলিম প্রভৃতি হাদীসগ্রন্থে বর্ণিত বিশুদ্ধ হাদীস নিয়ে যে ব্যক্তি চিন্তা-গবেষণা করবে, তার নিকট স্পষ্ট হয়ে উঠবে যে, নবী ﷺ একটার বেশী খুতবা দেননি।'<sup>2</sup>

পক্ষান্তরে 'ঈদের খুতবা দুটি; মাঝখানে বসে ইমাম তা দুইভাগে ভাগ করে নেবে' বলে যে হাদীস বর্ণিত আছে, তা যয়ীফ।<sup>3</sup> ইমাম নওবী বলেন, 'খুতবা ডবল হওয়ার ব্যাপারে কোন হাদীস বিশুদ্ধভাবে প্রমাণিত নেই।'<sup>4</sup>

### ❖ ঈদের খুতবায় মহিলাদের জন্য খাস নসীহত :

ঈদের খুতবায় মহিলাদের জন্য খাস নসীহত করা সুন্নত। যেমন এ কথা পূর্বে উল্লেখিত জাবের (رضي الله عنه)-এর হাদীসে বর্ণিত হয়েছে। অতএব খুতবা মাইকে হলে খুতবার শেষাংশকে মহিলাদের জন্য খাস করবেন ইমাম। কিন্তু যদি মাইকে না হয় এবং মহিলারা পিছন থেকে শুনতে পাচ্ছে না বলে আশঙ্কা হয়, তাহলে তিনি তাদের নিকটবর্তী হবেন। তাঁর সাথে থাকবে দুই বা একটি লোক এবং যথাসাধ্য তিনি ওয়ায করবেন তাদের জন্য।<sup>5</sup>

<sup>1</sup> (বুখারী ৯৬১, ৯৭৮, মুসলিম ৮৮৫, আবু দাউদ ১১৪১নং)

<sup>2</sup> (আশ্শারহুল মুমত' ৫/১৯২)

<sup>3</sup> (তামামুল মিন্নাহ, আল্লামা আলবানী ৩৪৮ পৃঃ, যয়ীফ ইবনে মাজাহ, আলবানী ২৬৫নং দ্রঃ)

<sup>4</sup> (ফিকহুস সুন্নাহ ১/২৮২)

<sup>5</sup> (আসইলাতুন আজ্জবিবাতুন ফী স্বলাতিল ইদাদীন ৮ পৃঃ)

### ❖ খুতবা শোনার গুরুত্ব ৪

ঈদের খুতবা দেওয়া ও শোনা (জুমআর খুতবার মত ওয়াজেব নয়; বরং তা) সুন্নত। আব্দুল্লাহ বিন সায়েব বলেন, একদা আমি আল্লাহর রসূল ﷺ-এর সাথে ঈদের নামাযে উপস্থিত ছিলাম। নামায শেষ করে তিনি বললেন, “আমরা খুতবা দেব; সুতরাং যে ব্যক্তি খুতবা শোনার জন্য বসতে পছন্দ করে সে বসে যাক্। আর যে ব্যক্তি চলে যেতে পছন্দ করে সে চলে যাক্।”<sup>1</sup>

অবশ্য মুমিনের জন্য উচিত এই যে, প্রত্যেক মঙ্গলের প্রতি সে আগ্রহী হবে এবং দুনিয়া ও আখেরাতের জন্য উপকারী বিষয়ের প্রতি যত্নবান হবে। আর খুতবা শোনা নিশ্চয় বড় উপকারী বিষয়।

### ❖ ঈদের দুআ কি?

উম্মে আভ্য়িয়াহর হাদীসে উল্লেখ হয়েছে যে, “ঋতুমতী মহিলারাও মুসলিমদের (ঈদের) জামাআত ও দুআতে উপস্থিত হবে।” অন্য এক বর্ণনায় আছে, “তাদের দুআর মত দুআ করবে।”

ঐ দুআ কি ধরনের দুআ? ঐ দুআ কি মহানবী ﷺ নামাযের পরে দুই হাত তুলে করতেন? নাকি তিনি খুতবার শেষে হাত তুলে দুআ করতেন এবং সাহাবাগণও হাত তুলে তাঁর দুআর উপর ‘আমীন-আমীন’ বলতেন?

শায়খ উবাইদুল্লাহ মুবারকপুরী (রঃ) বলেন, (হাদীসে উল্লেখিত) “মুসলিমদের দুআ”-এই কথাটিকে ঈদের নামাযের পর দুআ করার দলীল মনে করা হয়; যেমন দুআ (মুনাযাত) করা হয় পাঁচ অঙ্ নামাযের পর। কিন্তু এটি (দ্বিধামুক্ত নয়; বরং) যুক্তি সাপেক্ষ। কারণ, উভয় ঈদের নামাযের দুআ নবী ﷺ থেকে প্রমাণিত নয় এবং উক্ত নামাযের পরে দুআর কথাও কেউ বর্ণনা করেন নি। বরং তাঁর তরফ থেকে যা প্রমাণিত তা এই যে, তিনি নামাযের পর খুতবা দিতেন এবং উভয়ের মাঝে কোন অন্য বিষয় দিয়ে পৃথক করতেন না। সুতরাং তাঁর সাধারণ ও ব্যাপক উক্তি

<sup>1</sup> (সহীহ আবু দাউদ ১০২৪, সহীহ ইবনে মাজাহ, আলবানী ১০৬৬, হাকেম, মুত্তাদরাক ১/২৯৫, ইবনে খুযাইমাহ, সহীহ ১৪৬২, ইরওয়াউল গালীল, আলবানী ৬২৯, সহীহুল জামেইস সাগীর, আলবানী ২২৮৯নং, তামামুল মিন্নাহ, আল্লামা আলবানী ৩৫০ পৃঃ)

“মুসলিমদের দুআ”কে দলীলরূপে ধরে থাকা সঠিক নয়। প্রকাশতঃ ঐ দুআ বলতে খুতবার মাঝে যিকর-আযকার ও ওয়ায-নসীহতকে বুঝানো হয়েছে। যেহেতু ‘দাওয়াহ’ শব্দটি ব্যাপক। আর আল্লাহই অধিক জানেন।<sup>1</sup>

অনুরূপভাবে নামাযের ভিতরেও বহু দুআ আছে, যাতে মহিলারা শরীক হতে পারবে; যেমন নামাযীরা তাতে শরীক হবে। এ ছাড়া খুতবাতেও দুআ হয়, যাতে তারা ‘আমীন-আমীন’ বলে শরীক হবে। অপর দিকে নামায বা খুতবার পর হাত তুলে জামাআতী মুনাজাত দলীল সাপেক্ষ। আর তার কোন দলীল পাওয়া যায় না।

### ❖ রাস্তা পরিবর্তন করা :

মসজিদে নববী থেকে মদীনার ঈদগাহ ১০০০ হাত দূরে অবস্থিত ছিল।<sup>2</sup> মহানবী ﷺ ঐ ঈদগাহে পায় হেঁটে উপস্থিত হতেন। কিন্তু ফিরার পথে রাস্তা পরিবর্তন করতেন। অর্থাৎ, যাবার সময় যে পথে যেতেন, সে পথে বাড়ি না ফিরে অন্য পথ ধরে বাড়ি ফিরতেন। জাবের (رضي الله عنه) বলেন, ‘ঈদের দিন বের হলে তিনি রাস্তা পরিবর্তন করতেন।’<sup>3</sup>

আবু হুরাইরা (رضي الله عنه) বলেন, ‘নবী ﷺ যখন ঈদের দিনে এক পথে বের হতেন, তখন অন্য পথে বাড়ি ফিরতেন।’<sup>4</sup> অনুরূপ বর্ণিত আছে আব্দুল্লাহ বিন উমার (رضي الله عنه) কর্তৃকও।<sup>5</sup>

তাঁর এই রাস্তা পরিবর্তনের পশ্চাতে ছিল একাধিক যুক্তি ও হিকমত। যেমন; এতে ইসলামী প্রতীকের সম্যক বহিঃপ্রকাশ ঘটবে। উভয় রাস্তা তাঁর জন্য সাক্ষ্য দেবে। উভয় পথের মুনাফিক বা ইয়াছদীদেরকে ক্ষুব্ধ করা হবে। উভয় পথের লোকেদেরকে সালাম দেওয়া হবে। অথবা তাদেরকে কিছু শিক্ষা দেওয়ার জন্য অথবা তাদেরকে কিছু দান করার জন্য অথবা সাক্ষাৎ করে নিজ আত্মীয়তার বন্ধন বজায় করার জন্য।<sup>6</sup>

<sup>1</sup> (মিরআতুল মাফাতীহ, উবাইদুল্লাহ রহমানী সুবারকপুরী ৫/৩১)

<sup>2</sup> (ফাতহুল বারী ২/৫২১ দৃঃ)

<sup>3</sup> (বুখারী ৯৮৬নং)

<sup>4</sup> (তিরমিযী, হাকেম, মুত্তাদরাক, দারেমী, সুনান ১৫৭৪, সহীহুল জামেইস সাগীর, আলবানী ৪৭১০নং)

<sup>5</sup> (সহীহ আবু দাউদ ১০২৫নং)

<sup>6</sup> (ফাতহুল বারী ২/৫৪৮, যাদুল মা‘আদ ১/৪৪৯, আশ্শারহুল মুমতত’ ১৭১-১৭২)

### ❖ ঈদের মুবারকবাদ :

ঈদে একে অপরকে মুবারকবাদ দেওয়া ঈদের অন্যতম আদব ও বৈশিষ্ট্য। এই মুবারকবাদ সাহাবা (রাযি.)-দের যুগে প্রচলিত ও পরিচিত ছিল। জুবাইর বিন নুফাইর বলেন, আল্লাহর রসূল ﷺ-এর সাহাবাগণ ঈদের দিন একে অন্যের সাথে সাক্ষাৎ হলে বলতেন, 'তাক্বাঝালাল্লাহ্ মিন্না অমিন্ক।'¹

মুহাম্মাদ বিন যিয়াদ আলহানী বলেন, আমি আবু উমামা বাহেলী (رضي الله عنه) ও নবী ﷺ-এর অন্যান্য সাহাবাগণের সাথে ছিলাম। তাঁরা যখনই (ঈদের নামায পড়ে) ফিরে আসতেন, তখনই একে অপরকে বলতেন, 'তাক্বাঝালাল্লাহ্ মিন্না অমিন্ক।'²

অন্য এক বর্ণনায় আছে যে, আমি আবু উমামাকে ঈদে তাঁর সাথীদের জন্য বলতে শুনেছি, 'তাক্বাঝালাল্লাহ্ মিন্না অমিন্কুম।'³

অবশ্য ঈদী মুবারকবাদের শব্দাবলী দেশের প্রচলিত ব্যবহার অনুযায়ী হবে; তবে তাতে এমন শব্দ হলে চলবে না, যা শরীয়তে হারাম। অথবা তা বিজাতীর কাছ থেকে ধার করা বা অনুকরণ করা; অর্থাৎ, তাদের পাল-পর্বনে পরস্পরকে অভিনন্দন জানানোর শব্দ যেন না হয়।⁴

প্রকাশ যে, ঈদের নামাযের পর খাস ঈদী মুআনাকা বা কোলাকুলি শরীয়তে বিধেয় নয়। যেমন ঈদের নামাযের পর কবরস্থানে গিয়ে খাস কবর-যিয়ারত বিদআত।⁵

### ❖ ঈদের খুশী প্রকাশ :

ঈদের দিনে আনন্দ ও খুশীর বহিঃপ্রকাশ ঘটানো দ্বীনের অন্যতম প্রতীক। এ দিনে পরিবার-পরিজনের প্রতি বিভিন্ন প্রকার খরচ ও প্রশস্ততা প্রদর্শন করা উচিত, যাতে তাদের মন-প্রাণ আনন্দিত হয় এবং ইবাদতের

¹ (ফাতহুল বারী ২/৫১৭, তামামুল মিন্নাহ, আল্লামা আলবানী ৩৫৪-৩৫৫পৃঃ)

² (যাইল বাইহাকী ৩/৩২০)

³ (তামামুল মিন্নাহ, আল্লামা আলবানী ৩৫৫পৃঃ)

⁴ (আসইলাতুন আজবিবাতুন ফী শ্বাতিল ঈদাঈন ৭পৃঃ, মাজালাতুল বায়ান ১৩৬/২৬)

⁵ (আহকামুল জানায়েয, আলবানী আলবানী ২৫৮পৃঃ, মু'জামুল বিদা' ১৫৪পৃঃ)

কষ্ট থেকে দেহ স্বস্তি, বিরতি ও প্রশান্তি লাভ করতে পারে।<sup>1</sup>

মা আয়েশা (রাঃ) বলেন, ঈদের দিন আল্লাহর রসূল ﷺ আমার নিকট এলেন। সেই সময় আমার কাছে দুটি কিশোরী ‘দুফ’ (২) বাজিয়ে বুআয (যুদ্ধের বীরত্বের) গীত গাচ্ছিল। অবশ্য তারা গায়িকা ছিল না। তা দেখে আল্লাহর রসূল ﷺ নিজ চেহারা ফিরিয়ে নিলেন। অতঃপর তিনি কাপড় ঢাকা দিয়ে বিছানায় শুয়ে গেলেন। ইত্যবসরে আবু বাক্বর (رضي الله عنه) প্রবেশ করলেন এবং আমাকে ধমক দিয়ে বললেন, ‘শয়তানের সুর আল্লাহর রসূলের কাছে?’

(এ কথা শুনে) আল্লাহর রসূল ﷺ নিজ চেহারা খুলে আবু বাক্বরের দিকে ঘুরে বললেন, “ওদেরকে ছেড়ে দাও, হে আবু বাক্বর। আজ তো ঈদের দিন। প্রত্যেক জাতির ঈদ আছে। আর আজ হল আমাদের ঈদ।” অতঃপর তিনি একটু অন্যমনস্ক হলে আমি তাদেরকে চলে যেতে ইঙ্গিত করলাম। তখন তারা বেরিয়ে গেল।

মা আয়েশা (রাঃ) আরো বলেন, হাবশীগণ ঈদের দিন আল্লাহর রসূল ﷺ-এর মসজিদে যুদ্ধান্ত্র (বর্শা) নিয়ে খেলা করত। কখনো বা আমি তাঁর কাছে ঐ খেলা দেখতে চাইতাম, আর কখনো বা তিনি নিজে বলতেন, “তুমি কি দেখতে চাও?” আমি বলতাম, ‘হ্যাঁ।’ অতঃপর তিনি আমাকে আমার হুজরার দরজায় তাঁর পিছনে দাঁড় করাতেন। আমি (তাঁর আড়াল থেকে) তাঁর কাঁধের উপর দিয়ে ঐ খেলা দেখতাম। তিনি তাঁর কাঁধকে নিচু করে দিতেন। আর আমার গাল তাঁর গালের সাথে লেগে যেত। নিজ চাদর দিয়ে আমাকে পর্দা করতেন। আর খেলোয়াড়দের উদ্দেশ্যে তিনি বলতেন, “শাবাশ! হে বানী আরফিদাহ!” আর ততক্ষণ পর্যন্ত আমি তাদের খেলা দেখতাম, যতক্ষণ না আমি নিজে তা দেখা বন্ধ করতাম এবং দেখতে ক্লান্ত হয়ে পড়তাম। তখন তিনি প্রশ্ন করতেন, “যথেষ্ট হয়েছে?” আমি বলতাম, ‘হ্যাঁ।’ তিনি বলতেন, “অতএব চলে যাও।” সুতরাং তোমরা আন্দাজ কর খেলা-প্রিয়া উদীয়মানা নব কিশোরীর খেলার প্রতি আগ্রহ কত!<sup>3</sup> আর সেদিন আল্লাহর রসূল ﷺ বলেছিলেন, “মদীনার ইয়াহুদ জেনে নিক যে,

<sup>1</sup> (ফাতহুল বারী ২/৫১৪ দৃঃ)

<sup>2</sup> চপচপে আওয়াজ বিশিষ্ট একমুখো ঢোলক বিশেষ।

<sup>3</sup> (আহমাদ, মুসনাদ, বুখারী ৯৫০, ৫২৩৬, মুসলিম ৮৯২, নাসাঈ)

আমাদের দ্বীনে উদারতা আছে (এবং সংকীর্ণতা নেই)। নিশ্চয় আমি সুদৃঢ় উদার দ্বীনসহ প্রেরিত হয়েছি।”<sup>1</sup>

বলা বাহুল্য, মুসলিমদের প্রতি আল্লাহর বিশেষ অনুগ্রহ এই যে, তারা তাদের ঈদ পালন করে খুশী করবে এবং সেই খুশী প্রকাশের ফলে তারা সওয়াব-প্রাপ্তও হবে! কেননা, আনন্দের এই বহিঃপ্রকাশ দ্বীনের একটি প্রতীক।

কিন্তু জ্ঞাতব্যের বিষয় যে, ঐ খুশী প্রকাশ হতে হবে শরীয়তের গণ্ডীর ভিতরে সীমাবদ্ধ উপকরণের মাধ্যমে; আর তা হল কেবল দুফ বাজিয়ে ছোট ছোট মেয়েদের এমন গীত গেয়ে, যা অসার বা অশীল নয়, শিকী বা বিদআতী তথা শরীয়ত-বিরোধী নয়। আর তা শোনার মাধ্যমেও আনন্দ উপভোগ করায় দোষ নেই। বলা বাহুল্য, এ ছাড়া গান-বাজনা করা ও শোনা হারাম।

ঈদের এই পবিত্র খুশীতে অবৈধ খেলা ও ফিল্ম দর্শন-প্রদর্শন, যুবক-যুবতীর খেলা ও অবাধ-ভ্রমণ, ছবি তোলা এবং হারাম গান-বাদ্য ব্যবহার করার মাধ্যমে অবশ্যই বিধেয় খুশীর বহিঃপ্রকাশ হয় না। আসলে খুশীর নামে তা হয় শয়তানী কুপ্রবৃত্তির বশবর্তী বিলাস-কর্ম।<sup>2</sup> সুতরাং আল্লাহ আমাদেরকে পানাহ দিন। আমীন।

প্রকাশ থাকে যে, আতশ বা ফটকাবাজি করে খুশী প্রকাশ করা কোন মুসলিমের জন্য বৈধ নয়। যেহেতু এ খেলাতে রয়েছে অমুসলিমদের সাদৃশ্য অবলম্বন, এতে অহেতুক অর্থ অপচয় হয়, এতে আগুন নিয়ে খেলা করা হয় এবং বিপদের আশঙ্কা থাকে অনেক বেশী।

কোন কোন আল্লাহ-ওয়াল লোক বলেছেন, মানুষ আল্লাহ থেকে গাফেল হয় বলেই গায়রুল্লাহ নিয়ে আনন্দে মেতে ওঠে। অতএব গাফেল নিজ খেল-তামাশা ও কুপ্রবৃত্তি নিয়ে আনন্দিত হয়। আর জ্ঞানী নিজ মাওলাকে নিয়ে আনন্দিত হয়।<sup>3</sup>

জ্ঞাতব্য যে, কিছু লোক আছে যারা ঈদ নিয়ে এই জন্য আনন্দিত হয় যে, রমাযান শেষ হয়ে গেছে এবং রোযা আর রাখতে হবে না। অনেকের

<sup>1</sup> (আহমাদ, মুসনাদ ৬/১১৬, ২৩৩, সিলসিলাহ সহীহাহ, আলবানী ৬/২/১০২৩, আদাবুয যিফাফ, আলবানী ২৭৪পৃঃ)

<sup>2</sup> (মাজল্লাতুল বায়ান ১৩৬/২৭)

<sup>3</sup> (ইতহাক্ফ আহলিল ইসলাম বিআহকামিস সিয়াম ৮৪পৃঃ)



মাথা থেকে রমায়ান ও রোযার যেন বোঝা নেমে যায়। অথচ এমন আচরণ বড় ভ্রান্ত। আসলে মুমিনগণ ঈদ নিয়ে খুশী হয় এই জন্য যে, মহান আল্লাহ তাদেরকে রোযার মাস পূর্ণ করার এবং সম্পূর্ণ মাস রোযা রাখার তওফীক দান করেছেন। যেহেতু তারা এরই মাধ্যমে তাদের মহান প্রভুকে সন্তুষ্ট করার প্রয়াস লাভ করেছে। পক্ষান্তরে তারা এই জন্য আনন্দিত হয় না যে, রোযা শেষ করে ফেলেছে, যে রোযাকে বহু লোকে একটি বড় বোঝা মনে করে থাকে।<sup>1</sup>

দ্বীন-দরদী ভাই মুসলিম! এই খুশীর মুহূর্তে সম্ভব হলে পার্শ্ববর্তী গরীবদেরকে ভুলে যাবেন না। কত গরীব শুধু এই জন্য খুশী করতে পারে না যে, তার ছোট ছেলে-মেয়ের নতুন জামা নেই, কারো বা গোসল করার জন্য সাবান নেই অথবা শখের একদিন মাখার মত আতর নেই। এগুলি ছোট হলেও যদি ঐ দিন তাদেরকে দান করা হয়, তাহলে সেই দিনে খুশী হয় তারা, সেই সাথে খুশী হয় তাদের মা-বাপরা। অতএব আল্লাহ আপনাকে সামর্থ্য দিলে আপনি তাদের সেই শ্রেণীর খুশীর উপকরণ করে দিতে ভুল করবেন না। আল্লাহ আপনাকে নেক বদলা দিন। আমীন।

ঈদ হল একটি অপূর্ব সুযোগ, যে সুযোগে মুমিন তার অন্তর-মন থেকে সেই সকল বিদ্বেষ ও ঈর্ষা থেকে মুক্ত করতে পারে, যা সে ইতিপূর্বে তার কোন মুসলিম ভায়ের প্রতি পোষণ করেছিল। সুতরাং ঈদ হল, মুসলমানদের আপোসে সম্প্রীতি ও একে অন্যের জন্য মন-প্রাণ পরিশ্কার ও উদার করে দেওয়ার এক পরম অবকাশ।

### ❖ জুমআর দিনে ঈদ হলে :

জুমআর দিন ঈদ হলে যে ব্যক্তি ঈদের নামায পড়বে, সে ব্যক্তির জন্য জুমআহ আর ওয়াজেব থাকবে না। যায়দ বিন আরকাম (رضي الله عنه) বলেন, একদা নবী (ﷺ) ঈদের নামায পড়লেন এবং জুমআহ না পড়ার অনুমতি দিলেন। তিনি বললেন, “যে ব্যক্তি জুমআহ পড়তে চায় সে পড়বে।”<sup>2</sup>

আবু হুরাইরা (رضي الله عنه) বলেন, আল্লাহর রসূল (ﷺ) বলেছেন, “তোমাদের

<sup>1</sup> (দুর্কসু রামায়ান অকাফাত লিস-সায়েমীন ১০০পৃঃ)

<sup>2</sup> (সহীহ আবু দাউদ ৯৪৫, নাসাঈ ১৫৯২, ইবনে মাজাহ ১৩১০, ইবনে খুযাইমাহ, সহীহ ১৪৬৪নং)

আজকের এই দিনে দুটি ঈদ সমবেত হয়েছে। সুতরাং যার ইচ্ছা তার জন্য জুমআহ থেকে ঈদের নামায যথেষ্ট। অবশ্য আমরা জুমআহ পড়ব।”<sup>1</sup>

এই হাদীসের ভিত্তিতে ইমাম সাহেবের জন্য মুস্তাহাব জুমআহ কায়েম করা। যাতে তারা জুমআহ পড়তে পারে যারা তা পড়তে চায় এবং তারাও পড়তে পারে যারা ঈদের নামায পড়তে পারে নি। যেহেতু মহানবী ﷺ বলেছেন, “অবশ্য আমরা জুমআহ পড়ব।”

জানা জরুরী যে, যে ব্যক্তি (ঈদের নামায পড়ে) অনুমতি পেয়ে জুমআহ পড়বে না, সে ব্যক্তির জন্য যোহরের নামায মাকফ নয়। কারণ, যোহর হল ওয়াস্তী ফরয নামায। আর তা ত্যাগ করা সম্ভব নয়।<sup>2</sup>

পক্ষান্তরে ইবনে যুবাইর (رضي الله عنه)-এর আমল বর্ণিত যে, তিনি ঈদের দিন আসর পর্যন্ত ঈদের নামায ছাড়া অন্য কিছু পড়েন নি এবং জুমআর জন্যও বের হন নি।<sup>3</sup> কিন্তু হতে পারে যে, তিনি যোহরের নামায ঘরেই পড়ে নিয়েছিলেন। অথবা তিনি ঈদের সময় জুমআর নিয়তে ২ রাকআত নামায পড়েছিলেন এবং ঈদের নামাযকে তারই অনুসারী করে নিয়েছেন।<sup>4</sup> (যেমন তাওয়াফে ইফাযাহ ও বিদায়ী তওয়াফ একই সময়ে ইফাযার নিয়তে করলে একটি তওয়াফই যথেষ্ট।) ইবনে খুযাইমার বর্ণনায় এসেছে যে, তিনি (জুমআহ ও) ঈদের দিন ঈদের নামায পড়ার জন্য বের হতে দেয়ী করলেন। পরিশেষে সূর্য যখন উঁচুতে এল তখন তিনি বের হয়ে মিম্বরে চড়ে দীর্ঘ খুতবাহ দিলেন। অতঃপর ২ রাকআত নামায পড়লেন এবং আর জুমআহ পড়লেন না।<sup>5</sup>

<sup>1</sup> (সহীহ আবু দাউদ ৯৪৮, ইবনে মাজাহ ১৩১১নং)

<sup>2</sup> (আসইলাতুন আজবিবাতুন ফী স্বলাতিল ঈদাঈন ৬-৭পৃঃ, ফাসিঃ মুসনিদ ১১৫পৃঃ)

<sup>3</sup> (সহীহ আবু দাউদ ৯৪৬-৯৪৭নং)

<sup>4</sup> (আউনুল মাবুদ ৩/২৮৭-২৮৯)

<sup>5</sup> (ইবনে খুযাইমাহ, সহীহ ১৪৬৫নং)

## ঈদ সংক্রান্ত আরো কিছু মাসায়েল

### ❖ ঈদের চাঁদ ৪

এ কথা পূর্বেই আলোচিত হয়েছে যে, মেঘ বা অন্য কোন কারণে চাঁদ যথাসময়ে না দেখা গেলে মাসের তারীখ ৩০ পূর্ণ করে নিতে হবে। অবশ্য ঈদের চাঁদ প্রমাণ করার জন্য ২ জন মুসলিমের সাক্ষ্য প্রয়োজন। যেহেতু মহানবী ﷺ বলেন, “তোমরা চাঁদ দেখে রোযা রাখ, চাঁদ দেখে রোযা ছাড়। যদি চাঁদ না দেখা যায়, তাহলে মাস ৩০ পূর্ণ করে নাও। কিন্তু যদি দুই জন মুসলিম সাক্ষ্য দেয়, তাহলে তোমরা রোযা রাখ ও রোযা ছাড়।”<sup>1</sup>

পক্ষান্তরে রোযার মাসের শুরু হওয়ার কথা প্রমাণ করার জন্য এ কথা প্রমাণিত যে, আল্লাহর রসূল ﷺ একজন লোকের সাক্ষি নিয়ে রোযা রেখেছেন।<sup>2</sup>

### ❖ কেউ একা চাঁদ দেখলে ৪

ঈদের চাঁদ কেউ একা দেখলে সে কিন্তু একা একা ঈদ করতে পারে না। বরং চাঁদ দেখা সত্ত্বেও তার জন্য রোযা রাখা ওয়াজেব। কেননা, শওয়ালের চাঁদ দুই জন মুসলিম দেখার সাক্ষ্য না দেওয়া পর্যন্ত শরীয়তের দৃষ্টিতে প্রমাণ হয় না। তা ছাড়া মহানবী ﷺ বলেন, “ঈদ সেদিন, যেদিন লোকেরা ঈদ করে। কুরবানী সেদিন, যেদিন লোকেরা কুরবানী করে।”<sup>3</sup> যেহেতু শরীয়তে জামাআতের বড় মর্যাদা আছে।

মতান্তরে যে ব্যক্তি একা চাঁদ দেখবে সে পরের দিন রোযা রাখবে না। যেহেতু মহানবী ﷺ বলেন, “তোমরা চাঁদ দেখে রোযা রাখ, চাঁদ দেখে রোযা ছাড়।” তবে প্রকাশ্যে নয়, বরং গোপনে ইফতার করবে সে। যাতে সে জামাআত-বিরোধী না হয়ে যায়। অথবা তাকে কেউ অসঙ্গত অপবাদ না দিয়ে বসে। আর আল্লাহই অধিক জানেন।<sup>4</sup>

<sup>1</sup> (আহমাদ, মুসনাদ ৪/৩২১, নাসাঈ, দারাকুতুনী, সুনান, সহীহ নাসাঈ, আলবানী ১৯৯৭, ইরওয়াউল গালীল, আলবানী ৯০৯নং)

<sup>2</sup> (আবু দাউদ ২৩৪২, দাঃ, দারাকুতুনী, সুনান, বাইহাকী ৪/২১২, ইরওয়াউল গালীল, আলবানী ৯০৮নং)

<sup>3</sup> (সহীহ তিরমিযী, আলবানী ৬৪৩, ইরওয়াউল গালীল, আলবানী ৯০৫নং)

<sup>4</sup> (আশ্শারহুল মুমতে' ৬/৩২৯, আসইলাতুন অআজবিবাতুন ফী স্বালাতিল ঈদাঈন ২৫পৃঃ, আহকামুস সাওমি অল-ইতিকাক, আবু সারী মঃ আব্দুল হাদী ৪২পৃঃ)

### ❖ রোযা ২৮টি হলে :

২৮ দিন রোযা রাখার পর শওয়ালের চাঁদ শরয়ী সাক্ষ্য দ্বারা প্রমাণিত হলে জানতে হবে যে, রমায়ান মাসের প্রথম দিন অবশ্যই ছুটে গেছে। সুতরাং সে ক্ষেত্রে ঐ দিন ঈদের পরে কাযা করতে হবে। কারণ, চান্দ্র মাস ২৮ দিনের হতেই পারে না। হয় ৩০ দিনে মাস হবে, নচেৎ ২৯ দিনে।<sup>1</sup>

### ❖ রোযা ৩১টি কখন হয়?

পূর্ব দিককার (প্রাচ্যের) দেশগুলিতে চাঁদ ১ অথবা ২ দিন পরে দেখা দেয়। এখন ২৯শে রমায়ান চাঁদ দেখার পর অথবা ৩০শে রমায়ান ঐ দিককার কোন দেশে সফর করলে সেখানে গিয়ে দেখবে তার পরের দিনও রোযা। সে ক্ষেত্রে তাকে ঐ দেশের মুসলিমদের সাথে রোযা রাখতে হবে। অতঃপর তারা ঈদ করলে তাদের সাথে সেও ঈদ করবে; যদিও তার রোযা ৩১টি হয়ে যায়। কারণ, মহান আল্লাহ বলেন,

﴿فَمَنْ شَهِدَ مِنْكُمُ الشَّهْرَ فَلْيَصُمْهُ﴾

অর্থাৎ, অতএব তোমাদের মধ্যে যে-কেউ এ মাস পাবে সে যেন এ মাসে রোযা রাখে। (কুরআনুল কারীম ২/১৮৫)

আর মহানবী ﷺ বলেন, “রোযা সেদিন, যেদিন লোকেরা রোযা রাখে। ঈদ সেদিন, যেদিন লোকেরা ঈদ করে।”<sup>2</sup>

কিন্তু যদি কেউ পূর্ব থেকে পশ্চিম দিকে ২৮শে রমায়ান সফর করে, অতঃপর তার পর দিনই সেখানে ঈদ হয়, তাহলে সেও রোযা ভেঙ্গে লোকদের সাথে ঈদ করবে। অবশ্য তার পরে সে একটি রোযা কাযা রাখবে। কারণ, মাস ২৯ দিনের কম হয় না। পক্ষান্তরে যদি ২৯শে রমায়ান সফর করে তার পরের দিন ঈদ হয়, তাহলে তাদের সাথে ঈদ করার পর তাকে আর কোন রোযা কাযা করতে হবে না। কারণ, তার ২৯টি রোযা হয়ে গেছে এবং মাস ২৯ দিনেও হয়।<sup>3</sup>

<sup>1</sup> (ফাসিহ মুসনিদ ১৫পৃঃ)

<sup>2</sup> (তিরমিযী, ইরওয়াউল গালীল, আলবানী ৯০৫, সিলসিলাহ সহীহাহ, আলবানী ২২৪নং)

<sup>3</sup> (ইবনে বায, ফাসিহ মুসনিদ ১৬পৃঃ)

পরন্তু যদি কেউ ঈদের দিনে ঈদ করে প্রাচ্যের দেশে সফর করে এবং সেখানে গিয়ে দেখে সেখানকার লোকেদের রোযা চলছে, তাহলে সে ক্ষেত্রে তাকে পানাহার বন্ধ করতে হবে না এবং রোযা কাযা করতেও হবে না। কেননা, সে শরয়ী নিয়ম মতে রোযা ভেঙ্গেছে। অতএব এ দিন তার জন্য পানাহার বৈধ হওয়ার দিন।<sup>1</sup>

<sup>1</sup> (আআসাসিঃ ২৮-পৃঃ)

## ত্রয়োদশ অধ্যায়

### রমাযান পরে কি?

রমাযান বিদায় নিল। ফিরে আসবে আবার প্রায় এক বছর পর। রমাযান চলে গেল। কিন্তু রমাযান পরে মুসলিমের অবস্থা কি, কর্তব্য কি? রমাযানের আমল ভরা দিনগুলি শেষ হয়ে গেল, কিন্তু মুমিনের আমল তো কোন দিনকার জন্য শেষ হওয়ার নয়। যেহেতু যিনি রমাযানের প্রভু, তিনিই শা'বান ও শওয়াল তথা বাকী মাসসমূহ ও সারা বছরের প্রভু।

মুসলিমের কর্তব্য হল, রমাযান মাসে যে সব নেক আমলে অভ্যাসী হয়েছে সেই সব আমল বন্ধ না করে একটানা নিয়মিত করে যাওয়া। মহান আল্লাহ বলেন,

﴿وَاعْبُدْ رَبَّكَ حَتَّىٰ يَأْتِيَكَ الْيَقِينُ﴾

অর্থাৎ, মৃত্যু আসা অবধি তুমি তোমার প্রতিপালকের ইবাদত করতে থাক। (কুরআনুল কারীম ১৫/৯৯)

আর মহানবী ﷺ বলেন, “আল্লাহর নিকট সবচেয়ে সেই আমল অধিক পছন্দনীয়, যা লাগাতার করে যাওয়া হয়; যদিও বা তা পরিমাণে কম হয়।”<sup>1</sup>

শেষ হয়ে গেল সবুরের মাস। আর সবুর হল পরহেযগার মানুষদের সম্বল। বলা বাহুল্য, যেমন সে এ মাসে বড় প্রচেষ্টা ও শ্রম দিয়ে আমল-ইবাদত করেছে, তেমনি পরের মাসগুলিতেও যেন সেই প্রচেষ্টা ও পরিশ্রম বাকী থাকে। তার সমস্ত আমল এমন হওয়া উচিত, যেন সে তা রমাযানেই করছে।

রোযার মাস বিদায় নিয়ে চলে গেল। কিন্তু রোযা বিদায় নেয় নি। যেহেতু রমাযানের রোযা ছাড়াও অন্যান্য সুন্নত ও নফল রোযা রয়েছে; তা যেন তার আমলের খাতা থেকে বাদ না পড়ে।

নামায ও কিয়ামের মাস ফুরিয়ে গেল। কিন্তু নফল নামায ও কিয়াম

<sup>1</sup> (বুখারী ৬৪৬৫, মুসলিম ৭৮৩নং প্রমুখ)

কেবল রোযার মাসেই সীমাবদ্ধ নয়। বরং প্রত্যেক রাতের একটি অংশ তাহাজ্জুদের জন্য মুসলিমের খাস হওয়া উচিত।

এই মাসে সকল মসজিদের ইমাম ও মুসল্লীগণ তাঁদের অন্যান্য (বেনামাযী) ভাইদেরকে হেদায়াতপ্রাপ্ত হয়ে মসজিদে দেখে শত খুশী হয়েছেন, যারা রমায়ানভর পাঁচ অঙ্ক ফরয নামায যথা নিয়মে আদায় করেছে, বরং তারা নিয়মিতভাবে তারাবীহ ও তাহাজ্জুদের নামাযও পড়েছে। পরন্তু তাঁদের আনন্দ আরো বৃদ্ধি হতে থাকে; যদি ঐ ভায়েরা উক্ত অবস্থাতেই প্রতিষ্ঠিত থেকে যায়। (অর্থাৎ বার মাসই নামায পড়ে।) নচেৎ “কিয়ামতে বান্দার নিকট থেকে অন্যান্য আমলের পূর্বে সর্বপ্রথম নামাযের হিসাব নেওয়া হবে। সুতরাং নামায সঠিক হলে তার অন্যান্য আমলও সঠিক বিবেচিত হবে। (নচেৎ না।)”<sup>1</sup>

নেক আমল বা কোনও সৎকর্ম আল্লাহর দরবারে কবুল হওয়ার অন্যতম লক্ষণ এই যে, আমলকারী ঐ কর্মের পরে পুনরায় অন্যান্য সৎকর্ম করে থাকে। সুতরাং রমায়ানের পর আপনার অন্যান্য নেক আমল করতে থাকা এই কথারই লক্ষণ যে, আপনার রোযা ও তারাবীহ মহান আল্লাহ কবুল করে নিয়েছেন। আর হ্যাঁ, খবরদার পুনরায় আপনি আপনার সেই অবস্থায় ফিরে যাবেন না, যে অবস্থা ছিল রমায়ানের পূর্বে। মহান আল্লাহ বলেন,

﴿وَلَا تَكُونُوا كَالَّذِينَ نَقَّضْتُ عَنْهُمْ مِيثَاقَهُمْ لَعَنَّاهُمْ فَسَلُّوا وُجُوهَهُمْ مُسْتَضَاءً وَلَا يَرْجِعُونَ﴾

অর্থাৎ, তোমরা সে নারীর মত হয়ো না, যে তার সূতা মজবুত করে পাকাবার পর ওর পাক খুলে নষ্ট করে দেয়।” (কুরআনুল কারীম ১৬/৯২)

ভাই মুসলিম! আপনি আপনার ঔদাস্য বর্জন করুন। আরামের নিদ্রা থেকে জেগে উঠুন। আপনার সফরের জন্য কিছু পথের সম্বল সংগ্রহ করে নিন। আল্লাহ রক্বুল আলামীনের প্রতি প্রত্যাবর্তন ও রুজু করুন। হয়তো বা আপনি তাঁর সাড়া পাবেন। তাঁর রহমত ও করুণা অর্জন করে আপনি সৌভাগ্যবান হবেন। আল্লাহর অলীদের পথের পথিক হয়ে তাঁদের সাথে

<sup>1</sup> (আহমাদ, মুসনাদ, সুনানে আরবআহ; আবু দাউদ, তিরমিযী, নাসাই ও ইবনে মাজাহ, ত্বাবারানী, যু'জাম, প্রমুখ, সিলসিলাহ সহীহাহ, আলবানী ১৩৫৮-নং)

গিয়ে মিলিত হতে পারবেন।

আল্লাহ ও তাঁর জাহান্নামের ভয়ে নয়নাশ্রু বিগলিত করে রমাযান মাসকে বিদায় জানান। যে ছিল প্রিয়তম, সে বিদায় নিল। তাতে তো আপনার চোখে পানির স্রোত নামারই কথা। কি জানি আবার আগামী বছরে সেই প্রিয়তমের সাথে আপনার সাক্ষাৎ হবে কি না? আবার আপনি ঐ ফরয রোযা পালন করার তওফীক লাভ করবেন কি না? পুনরায় ঐ উদ্দীপনার সাথে জামাআতে ঐ তারাবীহর নামায পড়তে সুযোগ পাবেন কি না?

কাজ শেষে মজুরকে তার মজুরী দিয়ে দেওয়া হয়। আমরা আমাদের কাজ তো শেষ করলাম। কিন্তু হায়! যদি আমরা আমাদের মধ্যে কার কাজ মহান আল্লাহর দরবারে গৃহীত হয়েছে তা জানতে পারতাম, তাহলে তাকে তার উপর মোবারকবাদ জানাতাম। আর কার কাজ গৃহীত নয়, তা জানতে পারলে তার সাথে বসে সমবেদনা ও শোক প্রকাশ করতাম।<sup>1</sup>

<sup>1</sup> (তাওজীহাতুন অফাওয়াএদ লিসসা-য়েমীনা অসসায়েমাত ১০১-১০৬পৃঃ থেকে সংক্ষেপিত)



## চতুর্দশ অধ্যায়

### রমাযানের রোযা কাযা করার বিবরণ

কারো রমাযান মাসের রোযা ছুটে গেলে তা সত্বর কাযা করা ওয়াজেব নয়। বরং এ ব্যাপারে প্রশস্ততা আছে; সুযোগ ও সময় মত তা কাযা করতে পারা যায়। তদনুরূপ কাফ্ফারাও সত্বর আদায় করা ওয়াজেব নয়। যেহেতু মহান আল্লাহ বলেন,

﴿فَمَنْ كَانَ مِنْكُمْ مَرِيضًا أَوْ عَلَىٰ سَفَرٍ فَعِدَّةٌ مِّنْ أَيَّامٍ أُخَرَ﴾

অর্থাৎ, কিন্তু তোমাদের মধ্যে কেউ অসুস্থ বা মুসাফির হলে সে অপর কোন দিন গণনা করবে। (কুরআনুল কারীম ২/১৮৪)

অর্থাৎ, সে অপর কোন দিনে রোযা রেখে নেবে। এখানে মহান আল্লাহ লাগাতার বা সাথে সাথে রাখার শর্ত আরোপ করেন নি। সে শর্তের কথা উল্লেখ থাকলে অবশ্যই তা সত্বর পালনীয় হত। অতএব বুঝা গেল যে, এ ব্যাপারে প্রশস্ততা আছে।<sup>1</sup> বলা বাহুল্য, যদি কেউ তার ছুটে যাওয়া রোযা পিছিয়ে দিয়ে শীতের ছোট ছোট দিনে রাখে, তাহলে তাও তার জন্য বৈধ এবং যথেষ্ট। তাতেও মহান আল্লাহর ঐ ঋণ পরিশোধ হয়ে যাবে।<sup>2</sup>

তবে ঈদের পরে ওজর দূর হয়ে গেলে সুযোগ হওয়ার সাথে সাথে সত্বর কাযা রেখে নেওয়াই উচিত। কারণ, তাতে সত্বর দায়িত্ব পালন হয়ে যায় এবং পূর্বসতর্কতামূলক কর্ম সম্পাদন করা হয়।<sup>3</sup>

মা আয়েশা (রাঃ) বলেন, ‘আমার রমাযানের রোযা কাযা থাকত। কিন্তু সে রোযা শা’বান ছাড়া তার আগে কাযা করতে সক্ষম হতাম না।’ এই কথার এক বর্ণনাকারী ইয়াহয়্যা বিন সাঈদ বলেন, ‘এর কারণ এই যে, নবী ﷺ-এর খিদমত তাঁকে ব্যস্ত করে রাখত। আর তাঁর কাছে তাঁর পৃথক মর্যাদাও ছিল।’<sup>4</sup>

<sup>1</sup> (আশশারহুল মুমতে’ ৬/৪৪৯)

<sup>2</sup> (ফুসসিঃ মুসনিদ ৮১পৃঃ)

<sup>3</sup> (আশশারহুল মুমতে’ ৬/৪৪৬)

<sup>4</sup> (বুস্বারী ১৯৫০, মুসলিম ১১৪৬, আবু দাউদ ২৩৯৯, ইবনে মাজাহ ১৬৬৯, ইবনে খুযাইমাহ, সহীহ ২০৪৬-২০৪৮-নং, বাইহাকী ৪/২৫২)

এখানে মা আয়েশার বাহ্যিক উক্তি এই কথাই দাবী করে যে, তাঁর ব্যস্ততা না থাকলে ছুটে যাওয়া রোযা সত্বরই কাযা করতেন। এ থেকে বুঝা যায় যে, যার কোন ওজর-অসুবিধা নেই, তার জন্য দেরী না করে সত্বর কাযা রেখে নেওয়াই উচিত।<sup>1</sup>

কাযা রোযা ছুটে যাওয়া রোযার মতই। অর্থাৎ, যত দিনকার রোযা ছুটে গেছে, ঠিক তত দিনকারই কাযা করবে; তার বেশী নয়। অবশ্য উভয়ের মাঝে পার্থক্য এই যে, কাযা রোযা লাগাতার রাখা জরুরী নয়। যেহেতু মহান আল্লাহ বলেন,

﴿فَمَنْ كَانَ مِنْكُمْ مَرِيضًا أَوْ عَلَىٰ سَفَرٍ فَعِدَّةٌ مِنْ أَيَّامٍ أُخَرَ﴾

“কিন্তু তোমাদের মধ্যে কেউ অসুস্থ বা মুসাফির হলে সে অপর কোন দিন গণনা করবে।” (কুরআনুল কারীম ২/১৮৪)

অর্থাৎ, যে দিনের রোযা সে ছেড়ে দিয়েছে, সেই দিনগুলোই যেন অন্য দিনে কাযা করে নেয়; নিরবচ্ছিন্নভাবে অথবা বিচ্ছিন্নভাবে। যেহেতু মহান আল্লাহ এখানে রোযা কাযা করার কথাই বলেছেন এবং তার সাথে কোন ধরনের শর্ত আরোপ করেন নি।<sup>2</sup>

পক্ষান্তরে কাযা রোযাসমূহকে ছেড়ে ছেড়ে অথবা লাগাতার রাখার ব্যাপারে কোন মরফু' হাদীস বিশুদ্ধরূপে বর্ণিত হয় নি। সঠিক হল, উভয় প্রকার বৈধ। যেমন আবু হুরাইরা (رضي الله عنه) বলেন, 'ইচ্ছা করলে একটানা রাখবে।'<sup>3</sup>

অবশ্য এতে কোন সন্দেহ নেই যে, তিনটি কারণে কাযা রোযাগুলিকে একটানা -অর্থাৎ মাঝে এক দিনও বাদ না দিয়ে- রেখে নেওয়াই উত্তম :-

প্রথমতঃ একটানা রোযা কাযা রাখাটা আসল রোযার সাথে অধিকতর সামঞ্জস্যপূর্ণ। কারণ, আসল রোযা একটানাই রাখতে হয়।

দ্বিতীয়তঃ লাগাতার রাখলে অতি সত্বর দায়িত্ব-পালন হয়ে যায়।

<sup>1</sup> (তামামুল মিন্নাহ, আল্লামা আলবানী ৪২২পৃঃ ৫ঃ)

<sup>2</sup> (ফিকহুস সুন্নাহ ১/৪১৬)

<sup>3</sup> (ইরওয়াউল গালীল, আলবানী ৪/৯৪-৯৭, তামামুল মিন্নাহ, আল্লামা আলবানী ৪২৪পৃঃ)

যেহেতু একদিন রোযা রেখে মাঝে ২/১ দিন বাদ দিয়ে আবার রাখলে কাযা পূর্ণ করতে বিলম্ব হয়ে যায়। অথচ লাগাতার রেখে নিলে তাড়াতাড়ি শেষ হয়ে যায়।

তৃতীয়তঃ একটানা রোযা রেখে নেওয়াটাই পূর্বসতর্কতামূলক কর্ম। কারণ, মানুষ জানে না যে, আগামীতে তার কি ঘটবে। আজ সুস্থ আছে, কিন্তু কাল হয়তো অসুস্থ হয়ে পড়বে। আজ জীবিত আছে, কিন্তু কাল হয়তো মরণের আহবানে সাড়া দিতে হবে।<sup>1</sup>

অনুরূপভাবে আসল রোযা থেকে কাযা রোযার একটি পার্থক্য এই যে, কাযা রোযা রাখা অবস্থায় দিনের বেলায় সঙ্গম করে ফেললে কোন কাফ্ফারা লাগে না। যেহেতু সেটা রমাযান মাসের বাইরে ঘটে তাই।<sup>2</sup>

❖ আগামী রমাযান পর্যন্ত কাযা রোযা রাখতে না পারলে :

কোন ওযর ব্যতীত রমাযানের কাযা রোযা না রেখে পরবর্তী রমাযান পার করে দেওয়া বৈধ নয়। কার্যক্ষেত্রে কাযা পালন না করতে পারা অবস্থায় দ্বিতীয় রমাযান এসে উপস্থিত হলে বর্তমান রমাযানের রোযা পালন করতে হবে। তারপর (প্রথম সুযোগে) ঐ কাযা রোযা রেখে নিতে হবে। আর এ ক্ষেত্রে কোন ফিদ্যাহ বা দণ্ড-জরিমানা নেই।<sup>3</sup>

পক্ষান্তরে বিনা ওযরে কাযা না তুলে পরবর্তী রমাযান পার করে দিলে গোনাহগার হতে হবে। আর এ ক্ষেত্রে কাযা করার সাথে সাথে প্রত্যেক দিনের বিনিময়ে একটি করে মিসকীনকে খানা দান করতে হবে। এই মত হল কিছু উলামার।<sup>4</sup> যেহেতু এই মত পোষণ করতেন সাহাবী আবু হুরাইরা ও ইবনে আক্বাস (রাযি.)।<sup>5</sup>

অন্য দিকে অন্য কিছু উলামা বলেন যে, কেবল কাযাই করতে হবে;

<sup>1</sup> (আশশারহুল মুমতঃ ৬/৪৪৬)

<sup>2</sup> (ঐ ৬/৪১৩)

<sup>3</sup> (ফিকহস সুন্নাহ ১/৪১৬)

<sup>4</sup> (ফাসিঃ মুসনিদ, ৮-২পৃ, আহকাযুস সাওমি অল-ই'তিকাক, আবু সারী মঃ আব্দুল হাদী ৯৯পৃ)

<sup>5</sup> (দারাকুত্বনী, সুন্নাহ ২৩১৮, ২৩১৯, ২৩২২নং, বাইহাকী ৪/২৫৩)

মিসকীনকে খাদ্য দান করতে হবে না। আর উভয় সাহাবী থেকে যে আসার বর্ণনা করা হয়েছে, তা উক্ত দাবীর দলীল নয়। কারণ, অকাট্য দলীল কেবল কিতাব ও সুন্নাহ থেকেই গৃহীত হবে। পক্ষান্তরে সাহাবাগণের উক্তি দলীল হওয়ার ব্যাপারটা বিবেচনাধীন; বিশেষ করে যখন তাঁদের কথা কুরআনের বাহ্যিক উক্তির প্রতিকূল হয়। আর এখানে কাযা রাখার সাথে মিসকীনকে খানা দান করা ওয়াজেব করার বিধান কুরআনের বাহ্যিক উক্তির বিরোধী। যেহেতু মহান আল্লাহ ভিন্ন দিনে কাযা করা ছাড়া অন্য কিছু ওয়াজেব করেন নি। অতএব এই যুক্তিতে আমরা আল্লাহর বান্দাদেরকে সেই জিনিস পালন করতে বাধ্য করতে পারি না, যে জিনিস পালন করতে তিনি তাদেরকে বাধ্য করেন নি। অবশ্য এ বিষয়ে যদি কোন দায়মুক্তকারী দলীল থাকত, তাহলে সে কথা ভিন্ন ছিল।

পক্ষান্তরে আবু হুরাইরা ও ইবনে আব্বাস (রাযি.) কর্তৃক যে উক্তি বর্ণিত হয়েছে, সে ব্যাপারে বলা যেতে পারে যে, কাযা রাখার সাথে সাথে একটি করে মিসকীন খাইয়ে দেওয়া উত্তম; ওয়াজেব নয়। সুতরাং এ ব্যাপারে সঠিক মত এই যে, পরবর্তী রমায়ান অতিবাহিত করে কাযা রাখলে রোযা ছাড়া অন্য কিছু ওয়াজেব নয়। তবে এ কথা ঠিক যে, এই দেরী করার জন্য সে গোনাহগার হবে।<sup>1</sup>

গত কয়েক বছরের হলেও রমায়ানের রোযা কাযা করা ওয়াজেব। সুতরাং কেউ যদি ২০ বছর বয়সে রোযা রাখতে শুরু করে, তাহলে তাকে সাবালক হওয়ার পর থেকে ৫ বছরের ছাড়া রোযা কাযা করতে হবে। আর সেই সাথে তাকে লজ্জিত হয়ে তওবাও করতে হবে এবং এই সংকল্পবদ্ধ হতে হবে যে, জীবনে পুনঃ কোন দিন রোযা ছাড়বে না।<sup>2</sup>

মা আয়েশা (রাঃ) বলেন, 'আমরা রোযা কাযা করতে আদিষ্ট হতাম এবং নামায কাযা করতে আদিষ্ট হতাম না।'<sup>3</sup>

### ❖ ইচ্ছাকৃত ছাড়া রোযার কাযা :

কিছু সংখ্যক উলামার মত এই যে, যে ব্যক্তি বিনা ওযরে ইচ্ছাকৃত

<sup>1</sup> (আশ্শারহুল মুমতে' ৬/৪৫১)

<sup>2</sup> (মাজল্লাতুল বুহসিল ইসলামিয়াহ ৩০/১০৯)

<sup>3</sup> (মুসলিম ৩৩৫নং)

রমাযানের রোযা ত্যাগ করবে, সে ব্যক্তির পাপ হবে মহাপাপ (কাবীরা)। তাকে সে রোযা কাযা করতে হবে এবং ঐ অপরাধের জন্য আল্লাহর কাছে তওবা করতে হবে। বেশী বেশী করে নফল রোযা ও অন্যান্য ইবাদত করতে হবে, যাতে ফরয ইবাদতের ঐ ক্ষতিপূরণ সম্ভব হয়। আর সম্ভবতঃ আল্লাহ তাআলা তার তওবা কবুল করে তাকে ক্ষমা করে দেবেন।<sup>1</sup>

উক্ত অভিমত সেই রমাযানের দিনের বেলায় স্ত্রী-সঙ্গমকারীর হাদীসকে ভিত্তি করে প্রকাশ করা হয়েছে; যাতে মহানবী ﷺ তাকে ঐ দিনকে কাযা করতে আদেশ করে বলেছিলেন, “একদিন রোযা রাখ এবং আল্লাহর কাছে ক্ষমা প্রার্থনা কর।”<sup>2</sup>

এ ছাড়া তিনি বলেছেন, “রোযা অবস্থায় যে ব্যক্তি বমনকে দমন করতে সক্ষম হয় না, তার জন্য কাযা নেই। পক্ষান্তরে যে ইচ্ছাকৃতভাবে বমি করে, সে যেন ঐ রোযা কাযা করে।”<sup>3</sup>

অন্য কিছু সংখ্যক উলামা বলেন যে, বিনা ওযরে ইচ্ছাকৃত নামায-রোযা ত্যাগকারীর কোন কাযা নেই। আর না-ই তার তা শুদ্ধ হবে। অবশ্য যা কাযা করার ব্যাপারে দলীল আছে তার কথা স্তব্ধ। যেমন রোযা রেখে ইচ্ছাকৃত স্ত্রী-সঙ্গমকারী এবং বমনকারী ব্যক্তি দলীলের ভিত্তিতে রোযা কাযা করবে।<sup>4</sup>

পক্ষান্তরে যে ইচ্ছাকৃতভাবে মোটেই রোযা রাখে না সে ব্যক্তি কিছু উলামার মতে কাফের ও মূর্তাদ হয়ে যাবে। তার জন্য তওবা জরুরী এবং বেশী বেশী নফল ইবাদত করা উচিত। যেমন জরুরী দ্বীনের সকল বিধানকে ঘাড় পেতে মান্য করা। আর উলামাদের সঠিক মতানুসারে তার জন্য কাযা নেই। যেহেতু তার অপরাধ বড় যে, কাযা করে তার খণ্ডন হবে না।<sup>5</sup>

<sup>1</sup> (সাবউনা মাসআলাহ ফিস-সিয়াম ৪৩নং)

<sup>2</sup> (আবু দাউদ ২৩৯৩, ইবনে খুযাইমাহ, সহীহ ১৯৫৪, দারাকুতনী, বাইহাকী ৪/২২৬-২২৭, ইরওয়াউল গালীল ৯৪০নং)

<sup>3</sup> (আহমাদ ২/৪৯৮, আবু দাউদ ২৩৮০, তিরমিযী ৭১৬, ইবনে মাজাহ ১৬৭৬, দারেমী ১৬৮০, ইবনে খুযাইমাহ ১৯৬০, ইবনে হিব্বান, সহীহ, মাওয়ারিদ ৯০৭নং, হাঃ ১/৪২৭, দারাকুতনী, বাইহাকী ৪/২১৯ প্রমুখ, ইরওয়াউল গালীল ৯৩০, সহীহুল জামেইস সাগীর ৬২৪৩নং)

<sup>4</sup> (তামামুল মিন্নাহ, আল্লামা আলবানী ৪২৫-৪২৬পৃঃ)

<sup>5</sup> (ফাতাওয়া ইসলামিয়াহ ২/১৫৪, ফাসিঃ মুসনিদ ৮৪পৃঃ)

### ❖ চিররোগা খাদ্যদানের পর সুস্থ হলে :

কোন চিররোগা লোক প্রত্যেক দিনের পরিবর্তে মিসকীনকে খাদ্য দান করার পর আল্লাহ তাকে আরোগ্য দান করলে তার জন্য ঐ দিনগুলিকে কাযা রাখা জরুরী নয়। যেহেতু রোযার বদলে খাদ্য দান করার ফলে তার দায়িত্ব যথাসময়ে পালন হয়ে গেছে।<sup>1</sup>

কোন রোগী রোগের কারণে রোযা ছেড়ে দিল। তারপর কাযা করার জন্য আরোগ্য লাভের আশায় ছিল। কিন্তু তার রোগ ভালো হল না। বরং জানতে পারল যে, তার রোগ চিরস্থায়ী। এমন লোকের জন্য রোযা কাযা করার বদলে প্রত্যেক দিনের পরিবর্তে এক একটি মিসকীনকে খাদ্য দান করা জরুরী।<sup>2</sup>

একজন রোগী চিররোগ থাকার ফলে রোযা রাখে নি। কিন্তু মিসকীনকে খাদ্যও দান করে নি। অতঃপর কয়েক বছর পার হওয়ার পর সে সুস্থ হয়ে উঠল। এমন রোগীর জন্যও গত রমায়ানসমূহের রোযা কাযা করতে বাধ্য নয়। বরং সে প্রত্যেক দিনের বিনিময়ে একটি করে মিসকীন খাওয়াতে বাধ্য। অবশ্য আগামী রমায়ানে তার জন্য রোযা রাখা অবশ্যই ফরয।<sup>3</sup>

### ❖ কাযা রাখার পূর্বে কি নফল রাখা চলবে?

রমায়ানের কাযা রোযা রাখার জন্য সময় সংকীর্ণ না হলে তার পূর্বে নফল রোযা রাখা বৈধ ও শুদ্ধ। অতএব সময় যথেষ্ট থাকলে ফরয রোযা কাযা করার আগে মুসলিম নফল রোযা রাখতে পারে। যেমন ফরয নামায আদায় করার আগে নফল নামায পড়তে পারে। আর এতে কোন গোনাহ নেই। উভয়ের মধ্যে অনুমিতির কথা সুস্পষ্ট। তবে উত্তম হল প্রথমে ফরয রোযা কাযা রেখে নেওয়া। এমন কি যুলহজ্জের প্রথম ৮ দিন, আরাফার দিন, আশুরার দিন এসে উপস্থিত হলে সে দিনগুলিতেও কাযা রোযা রাখবে। সম্ভবতঃ তাতে কাযা রাখার সওয়াব ও ঐ দিনগুলির ফযীলত উভয়ই লাভ করবে। আর যদি ধরে নেওয়াই যায় যে, কাযা রাখলে ঐ

<sup>1</sup> (সামানিয়া ওয়া আরবাতিন সুআলান ফিস-সিয়াম ৪১ পৃঃ)

<sup>2</sup> (সাবউনা মাসআলাহ ফিস-সিয়াম ২৭নং)

<sup>3</sup> (ইবনে বায, মাজাল্লাতুল বুহসিল ইসলামিয়াহ ৩০/১১২, আশশারহুল মুমতে' ৬/৪৫৩)

দিনগুলির ফযীলত পাবে না, তাহলেও নফল রাখা থেকে ফরয কাযা করার গুরুত্ব ও মাহাত্ম্য অধিক।<sup>1</sup> তা ছাড়া কিছু সংখ্যক উলামা রমায়ানের রোযা কাযা রাখার পূর্বে নফল রোযা রাখা মকরুহ মনে করেছেন।<sup>2</sup>

পক্ষান্তরে শওয়ালের ছয় রোযা রমায়ানের রোযা কাযা করার আগে রাখা যাবে না। রাখলে তা সাধারণ নফলের মান পাবে; শওয়ালের রোযার ফযীলত পাওয়া যাবে না। কেননা, মহানবী ﷺ বলেন, “যে ব্যক্তি রমায়ানের রোযা রাখার পর পর শওয়ালের ছয়টি রোযা রাখে, সে ব্যক্তির সারা বছর রোযা রাখা হয়।”<sup>3</sup> কিন্তু যার রমায়ানের রোযা অবশিষ্ট থাকবে, তার ব্যাপারে এ কথা যথাযথ হবে না যে, সে রমায়ানের রোযা রেখেছে।<sup>4</sup>

### ❖ রোযা কাযা রেখে মারা গেলে :

যে ব্যক্তি নামায কাযা রেখে মারা যায়, সে ব্যক্তির অভিভাবক বা অন্য কেউ তার পক্ষ থেকে সে নামায আদায় করে দিতে পারে না। আর তার জন্য কোন কাফফারা বা কোন ফিদয্যাহ-জরিমানা নেই। তদনুরূপ যে ব্যক্তি রোযা রাখতে অক্ষম, সে ব্যক্তির তরফ থেকে তার জীবনে কেউ তার সেই রোযা রেখে দিতে পারে না। মহান আল্লাহ বলেন,

﴿وَأَنْ لَّيْسَ لِلْإِنْسَانِ إِلَّا مَا سَعَى﴾

অর্থাৎ, আর এই যে, মানুষ যা চেষ্টা করে, তাই সে পেয়ে থাকে।  
(কুরআনুল কারীম ৫৩/৩৯)

যদি কোন ব্যক্তি রমায়ান মাস চলা অবস্থায় মারা যায়, তাহলে মাসের অবশিষ্ট দিনগুলির ব্যাপারে তার উপরে অথবা তার অভিভাবকের উপরে কোন কিছু ওয়াজেব নয়।<sup>5</sup>

কিন্তু কোন রোগী রোগে থাকা অবস্থায় (কিছু বা সম্পূর্ণ) রমায়ান পার

<sup>1</sup> (আশশারহুল মুমতে' ৬/৪৪৮)

<sup>2</sup> (ইবনে আবী শাইবাহ, মুসান্নাফ ২/৩০৬ দ্রঃ)

<sup>3</sup> (মুসলিম ১১৬৪, আবু দাউদ ২৪৩৩, তিরমিযী, ইবনে মাজাহ ১৭১৬নং, দারেমী, প্রমুখ)

<sup>4</sup> (আশশারহুল মুমতে' ৬/৪৪৯, ফইঃ ২/১৬৬)

<sup>5</sup> (সাবউনা মাসআলাহ ফিস-সিয়াম ১৪নং, তায়কীর ইবাদির রাহমান, ফীমা অরাদা বিসিয়ামি শাহরি রামায়ান ৪৯পৃঃ)

হয়ে মারা গেলে তার ব্যাপারে বিস্তারিত বিবরণ আছে ৪-

১। যে রোগীর আরোগ্যের আশা আছে, আরোগ্য পর্যন্ত তার উপর রোযা ওয়াজেব থাকবে। কিন্তু রোগ যদি থেকেই যায় এবং কাযা করার সুযোগ হওয়ার আগেই সে মারা যায়, তাহলে তার উপর কিছুই ওয়াজেব নয়। কারণ, তার উপর ওয়াজেব ছিল কাযা, আর তা করতে সে সুযোগই পায় নি।

২। এমন রোগী যার আরোগ্যের কোন আশা নেই। তার তরফ থেকে শুরু থেকেই মিসকীন খাওয়ানো ওয়াজেব; রোযা কাযার পরিবর্তে নয়। সে মারা গেলে তার তরফ থেকে প্রত্যেক রোযার বিনিময়ে একটি করে মিসকীন খাইয়ে দিলেই ওয়াজেব আদায় হয়ে যাবে। যেহেতু যার ওযর দূর হওয়ার মত নয় -যেমন, অর্ধ বৃদ্ধ এবং চিররোগা, তার তরফ থেকে ১টি রোযার বদলে ১টি মিসকীন খাওয়ানোই ওয়াজেব।

৩। এমন রোগী যার আরোগ্যের আশা ছিল, অতঃপর রমায়ান পরে সে সুস্থও হয়েছে এবং কাযা করার সুযোগও পেয়েছে। কিন্তু কাযা করার আগেই সে মারা গেছে। এমন রোগীর তরফ থেকে তার নিকটাত্মীয় প্রত্যেক রোযার পরিবর্তে একটি করে মিসকীনকে খাদ্য দান করবে।<sup>1</sup>

অবশ্য যদি ঐ মৃতব্যক্তির কোন আত্মীয় তার তরফ থেকে রোযাগুলি কাযা রেখে দিতে চায়, তাহলে তাও কিছু উলামার নিকট শুদ্ধ হয়ে যাবে।<sup>2</sup> যেহেতু মা আয়েশা (রাঃ) কর্তৃক বর্ণিত, মহানবী ﷺ বলেন, “যে ব্যক্তি নিজের দায়িত্বে রোযা থাকা অবস্থায় মারা যাবে, তার তরফ থেকে তার অভিভাবক (ওয়ারেস) রোযা রাখবে।”<sup>3</sup>

অন্য কিছু উলামা এই মতকে প্রাধান্য দেন যে, উক্ত হাদীস নযরের রোযার ব্যাপারে বিবৃত হয়েছে। পক্ষান্তরে রমায়ানের ফরয রোযা বাকী রাখা অবস্থায় মারা গেলে, তার তরফ থেকে কারো রোযা রাখা চলবে না। বরং তার অভিভাবক বা ওয়ারেস তার তরফ থেকে প্রত্যেক দিনের পরিবর্তে ১টি করে মিসকীনকে খাদ্য দান করবে।<sup>4</sup> যেহেতু আমরাহ কর্তৃক

<sup>1</sup> (আশ্শারহুল মুমতে' ৬/৪৫২-৪৫৩)

<sup>2</sup> (আশ্শারহুল মুমতে' ৬/৪৫৫-৪৫৬, সাবউনা মাসআলাহ ফিস-সিয়াম ২৯নং)

<sup>3</sup> (বুখারী ১৯৫২, মুসলিম ১১৪৭নং, প্রমুখ)

<sup>4</sup> (আহকামুল জানায়েয, আলবানী ১৭০পৃ, তামামুল মিন্নাহ, আন্নাযা আলবানী ৪২৭-৪২৮পৃঃ  
দ্রঃ)



বর্ণিত, তাঁর আন্মা রমায়ানের রোযা বাকী রাখা অবস্থায় মারা যান। তিনি আয়েশা (রাঃ)কে জিজ্ঞাসা করলেন, ‘আমি কি তাঁর তরফ থেকে কাযা রেখে দেব?’ উত্তরে তিনি বললেন, ‘না। বরং তাঁর তরফ থেকে প্রত্যেক দিনের পরিবর্তে ১টি করে মিসকীনকে অর্ধ সা’ (মোটামুটি সওয়া ১ কিলো) খাদ্য দান কর।’<sup>1</sup>

ইবনে আব্বাস (رضي الله عنه) কর্তৃক বর্ণিত যে, এক মহিলা আল্লাহর রসূল (ﷺ)-এর নিকট এসে জিজ্ঞাসা করল, ‘হে আল্লাহর রসূল! আমার মা মারা গেছেন। কিন্তু তাঁর যিম্মায় নয়রের রোযা বাকী আছে। এখন আমি কি তাঁর তরফ থেকে রোযা রেখে দোব?’ উত্তরে তিনি বললেন, “তোমার মায়ের যিম্মায় কোন ঋণ বাকী থাকলে তা কি তুমি পরিশোধ করতে? তা কি তার তরফ থেকে আদায় করা হত?” মহিলাটি বলল, ‘জী হ্যাঁ।’ তিনি বললেন, “অতএব তুমি তোমার মায়ের তরফ থেকে রোযা রেখে দাও।”<sup>2</sup>

ইবনে আব্বাস (رضي الله عنه) বলেন, ‘যদি কোন লোক রমায়ানে ব্যাধিগ্রস্ত হয়, অতঃপর সে মারা যায় এবং রোযা (কাযা করার সুযোগ পাওয়া সত্ত্বেও) রোযা না রেখে থাকে, তাহলে তার তরফ থেকে মিসকীন খাইয়ে দিতে হবে; তার জন্য রোযা কাযা নেই। কিন্তু যদি সে নয়রের রোযা না রেখে মারা যায়, তাহলে তার অভিভাবক (বা ওয়ারেস) তার তরফ থেকে সেই রোযা কাযা করে দেবে।’<sup>3</sup>

বলা বাহুল্য, যে ব্যক্তি নয়রের রোযা না রেখে মারা যাবে, তার তরফ থেকে তার ওয়ারেস রোযা রেখে দেবে। আর এই রোযা রেখে দেওয়ার মান হল মুস্তাহাব। কারণ, মহান আল্লাহ বলেন,

﴿وَلَا تَزِرُ وَازِرَةٌ وِزْرَ أُخْرَىٰ﴾

অর্থাৎ, কেউ অপরের ভার বহন করবে না। (কুরআনুল কারীম ৬/১৬৪)

মৃতব্যক্তির তরফ থেকে রোযা রাখার সময় একাধিক রোযা হলে ওয়ারেসরা যদি আপোসে ভাগ করে রাখে, তাহলে তা বৈধ। কিন্তু এই

<sup>1</sup> (ত্বাহাবী, ইবনে হাযম, আহকামুল জানায়েয, আলবানী ১৭০পৃঃ দ্রঃ)

<sup>2</sup> (আহমাদ, মুসনাদ ২/২১৬, বুখারী ১৯৫৩, মুসলিম ১১৪৮, আবু দাউদ ৩৩০৮নং প্রমুখ)

<sup>3</sup> (সহীহ আবু দাউদ ২১০১নং প্রমুখ)

ভাগাভাগি 'যিহার' কিংবা রমায়ানের দিনে সঙ্গম করার কাফ্ফারার রোযায় চলবে না। কারণ, তাতে লাগাতার রোযা হওয়ার শর্ত আছে। আর ভাগাভাগি করে রাখলে নিরবচ্ছিন্নতা থাকে না। অতএব হয় মাত্র একজনই লাগাতার ৬০ রোযা রেখে দেবে। নতুবা ৬০টি মিসকীন খাইয়ে দেবে।<sup>1</sup>



## পঞ্চদশ অধ্যায়

## রোযা ও রমায়ান সম্পর্কিত কিছু যয়ীফ ও জাল হাদীস

রোযা ও রমায়ানকে কেন্দ্র করে বহু যয়ীফ ও জাল হাদীস লোকমুখে তথা বহু বই-পুস্তকে প্রচলিত ও প্রসিদ্ধ হয়ে আছে। এ স্থলে সেই শ্রেণীরই কিছু হাদীস সংক্ষেপে উল্লেখ করব। যাতে পাঠক তা পাঠ করে সতর্ক হতে পারেন এবং তদ্বারা আমল ও তাতে উল্লেখিত কথার উপর বিশ্বাস না করে বসেন। আর এ কথা বিদিত যে, কোন জাল তো দূরের কথা, কোন যয়ীফ হাদীস দ্বারা আমল করা বৈধ নয়; চাহে সে হাদীস আহকাম সম্পর্কিত হোক অথবা ফাযায়েলে আ'মাল সম্পর্কিত। বরং সহীহ ও শুদ্ধভাবে যে সব হাদীস বর্ণিত হয়েছে তাই আমলের জন্য যথেষ্ট; যদি আমরা সত্যপক্ষে আমল করতে চাই।<sup>1</sup> উক্ত প্রকার কিছু হাদীস নিম্নরূপ:-

১। সালমান ফারেসীর লম্বা হাদীস। যাতে আছে; “যে ব্যক্তি তাতে কেউ একটি নফল ইবাদত করবে, সে ব্যক্তি অন্য মাসে একটি ফরয আদায়ের সমান সওয়াব লাভ করবে এবং যে কেউ তাতে একটি ফরয আদায় করবে, তার অন্য মাসে সমস্তটি ফরয আদায় করার সমান লাভ করবে। (এ মাসের ১টি নফল ১টি ফরয এবং ১টি ফরয ৭০টি ফরযের সমতুল্য) ---এ মাসে মুমিনের রুখী বৃদ্ধি করা হয়। --- এ মাসের প্রথম ভাগ রহমত, মধ্য ভাগ মাগফিরাত এবং শেষ ভাগ জাহান্নাম থেকে মুক্তি।---”<sup>2</sup>

২। “রমায়ানের প্রত্যেক রাত্রে মহান আল্লাহ ১০লক্ষ<sup>3</sup> ৬ লক্ষ মানুষকে জাহান্নাম থেকে মুক্ত করেন। এর শেষ রাতে মুক্ত করেন পূর্বে বিগত সকল সংখ্যা পরিমাণ।”<sup>4</sup> অন্য এক বর্ণনায় বলা হয়েছে, “প্রত্যহ ৬০ হাজার মানুষকে মুক্ত করা হয়।”<sup>5</sup>

<sup>1</sup> (সহীহুল জামেইস সাগীর, আলবানী জুমিকা ৪৯-৫৬পৃঃ দ্রঃ)

<sup>2</sup> (মুনকার অথবা যয়ীফ, সিলসিলাহ যয়ীফাহ, আলবানী ৮-৭১নং দ্রঃ)

<sup>3</sup> (যয়ীফ তারগীব, আলবানী ৫৯১নং)

<sup>4</sup> (যয়ীফ তারগীব, আলবানী ৫৯৮নং)

<sup>5</sup> (এ ৫৯৯নং)

৩। “রমাযান মাসের জন্য বেহেশ্তকে সুসজ্জিত করা হয়। প্রথম রাত্রে আরশের নিচে এক প্রকার হাওয়া চলে। --- হুরীগণ বেহেশ্তের উঁচু জায়গায় দাঁড়িয়ে বলতে থাকে, ‘আল্লাহর কাছে আমাদের কোন পয়গামদাতা আছে কি? যার সাথে তিনি আমাদের বিবাহ দেবেন---।’ প্রত্যহ ইফতারের সময় আল্লাহ দশ লাখ জাহান্নামীকে মুক্ত করেন। মাসের শেষ দিনে বিগত সকল সংখ্যক মানুষ মুক্ত করেন। শবেকদরের রাতে কাবার পিঠে সবুজ পতাকা গাড়া হয়।--- ফিরিশ্তাগণ ইবাদতকারীদের সাথে মুসাফাহা করেন---।”<sup>1</sup>

৪। “রমাযান মাসের জন্য বেহেশ্তকে সুসজ্জিত করা হয়। প্রথম রাত্রে আরশের নিচে বেহেশ্তের গাছ-পাতা থেকে হুরীদের উপর এক প্রকার হাওয়া চলে। তখন হুরীগণ বলে, ‘হে রব্ব! তোমার বান্দাগণের মধ্য হতে আমাদের স্বামী নির্বাচন কর; যাদেরকে দেখে আমাদের এবং আমাদেরকে দেখে তাদের চক্ষু শীতল হয়।’<sup>2</sup>

৫। “আল্লাহ রমাযান মাসের প্রথম সকালে কোন মুসলমানকে মাফ না করে ছাড়েন না।”<sup>3</sup>

৬। রমাযানের পর শ্রেষ্ঠ রোযা, রমাযানের তা’যীমে শা’বানের রোযা এবং সবচেয়ে শ্রেষ্ঠ সদকা হল রমাযানের সদকা।”<sup>4</sup>

৭। “শ্রেষ্ঠ দান হল, রমাযান মাসে দান।”<sup>5</sup>

৮। “আমার উম্মতকে রমাযানে পাঁচটি জিনিস দান করা হয়েছে; যা ইতিপূর্বে কোন উম্মতকে দান করা হয় নি। ইফতার করা পর্যন্ত পানির মাছ অথবা ফিরিশ্তারা তাদের জন্য ক্ষমা প্রার্থনা করে। আল্লাহ প্রত্যেক দিন বেহেশ্তকে সুসজ্জিত করে থাকেন।--”<sup>6</sup>

<sup>1</sup> (ঐ ৫৯৪নং)

<sup>2</sup> (সিলসিলাহ যারীফাহ, আলবানী ১৩২৫নং)

<sup>3</sup> (ঐ ২৯৬নং)

<sup>4</sup> (যরীফুল জামেইস সাগীর, আলবানী ১০২৩নং)

<sup>5</sup> (ঐ ১০১৯, ইরওয়াউল গালীল, আলবানী ৮৮৯নং)

<sup>6</sup> (মাজমাউয যাওয়ায়েদ ৩/১৪০, আহমাদ, মুসনাদ ৭৯০৪নং টীকা, যরীফ তারগীব, আলবানী ৫৮৬নং)

৯। “রজব মাস আগত হলে নবী ﷺ দুআ করতেন, ‘হে আল্লাহ আমাদের রজব ও শা’বানে বর্কত দাও এবং রমায়ান পৌছাও।”<sup>1</sup>

১০। “রমায়ান প্রবেশ করলে নবী ﷺ প্রত্যেক বন্দীকে মুক্তি দিতেন এবং প্রত্যেক যাচঞাকারীকে দান করতেন।”<sup>2</sup>

১১। “রমায়ান প্রবেশ করলে নবী ﷺ-এর রঙ বদলে যেত, তাঁর নামায বেড়ে যেত, দুআয় আকুল হতেন---”<sup>3</sup>

১২। “তোমাদের কাছে বর্কতের মাস রমায়ান এসে উপস্থিত হয়েছে। --- আল্লাহ এ মাসে তোমাদের আপোসে প্রতিযোগিতা দেখবেন এবং তোমাদেরকে নিয়ে ফিরিশ্বাদের কাছে গর্ব করবেন।---”<sup>4</sup>

১৩। “রমায়ান মাসের একটি তসবীহ অন্য মাসের হাজার তসবীহ অপেক্ষা শ্রেষ্ঠ।”<sup>5</sup>

১৪। “রমায়ান কি জিনিস তা যদি আমার উম্মত জানত, তাহলে আশা করত যে, সারা বছরটাই যেন রমায়ান হোক। যে কেউ রমায়ানের একটি রোযা রাখবে, তার সঙ্গে মুক্তার তাঁবুতে আয়তলোচনা একটি ছুরীর সাথে বিবাহ দেওয়া হবে। ---প্রত্যেক স্ত্রীর হবে ৭০টি করে ভিন্ন ভিন্ন পরিচ্ছদ। তাকে ৭০ রঙের খোশবু দান করা হবে। ---”<sup>6</sup>

১৫। “রমায়ানের প্রথম রাত্রি এলে আল্লাহ রোযাদার সৃষ্টির প্রতি দৃষ্টিপাত করেন। আর যে বান্দার প্রতি আল্লাহ দৃষ্টিপাত করেন, তিনি তাকে আযাব দেন না। রমায়ানের প্রত্যেক রাত্রে তিনি ১০ লাখ জাহান্নামীকে মুক্তি দেন।---”<sup>7</sup>

১৬। “যে ব্যক্তি মক্কায় রমায়ান পেয়ে সেখানে রোযা রাখে এবং যথাসাধ্য রাতের নামায পড়ে, আল্লাহ তার জন্য অন্য জায়গার ১ লাখ মাস রমায়ানের সওয়াব লিখে দেন---।”<sup>8</sup>

<sup>1</sup> (যয়ীফুল জামে' ৪৩৯৫নং)

<sup>2</sup> (সিলসিলাহ যায়ীফাহ, আলবানী ৩০১৫, যয়ীফুল জামেইস সাগীর, আলবানী ৪৩৯৬নং)

<sup>3</sup> (যয়ীফুল জামেইস সাগীর, আলবানী ৪৩৯৭নং)

<sup>4</sup> (মাজমাউয যাওয়ায়েদ ৩/১৪২, যয়ীফ তারগীব, আলবানী ৫৯২নং)

<sup>5</sup> (যয়ীফ তিরমিযী, আলবানী ৬৮৬নং)

<sup>6</sup> (হাদীসটি জাল, সিলসিলাহ যায়ীফাহ, আলবানী ৩/৪৯৪, যয়ীফ তারগীব, আলবানী ৫৯৬নং)

<sup>7</sup> (হাদীসটি জাল, সিলসিলাহ যায়ীফাহ, আলবানী ২৯৯নং)

<sup>8</sup> (যয়ীফুল জামেইস সাগীর, আলবানী ৫৩৭৫নং)

১৭। “মক্কার একটি রমায়ান অন্য জায়গার হাজার রমায়ান অপেক্ষা শ্রেষ্ঠ।”<sup>1</sup>

১৮। “মদীনার একটি রমায়ান অন্য জায়গার হাজার রমায়ান অপেক্ষা শ্রেষ্ঠ।”<sup>2</sup>

১৯। “তিন ব্যক্তিকে পানাহারের নিয়ামত সম্পর্কে প্রশ্ন করা হবে না; ইফতারকারী, সেহরী খানে-ওয়ালা----।”<sup>3</sup>

২০। “আল্লাহ কিরামান কাতেবীনকে অহী করেছেন যে, আমার রোযাদার বান্দাদের আসরের পর কৃত কোন পাপ লিপিবদ্ধ করো না।”<sup>4</sup>

২১। “---আল্লাহর একটি খাদ্য পরিপূর্ণ সুসজ্জিত খাঞ্চা আছে, যাতে এমন সব খাদ্য আছে যা কোন চক্ষু দর্শন করে নি, কোন কর্ণ শ্রবণ করে নি এবং কারো মানুষের মনেও তা কল্পিত হয় নি। যে খাঞ্চাতে রোযাদাররা ছাড়া অন্য কেউ বসবে না।”<sup>5</sup>

২২। “যে বান্দা আমার সন্তুষ্টি লাভের জন্য রোযা রাখবে, আমি তার দেহকে সুস্থ রাখব এবং তাকে বৃহৎ সওয়াব দান করব।”<sup>6</sup>

২৩। “রোযা রাখ সুস্থ থাকবে।”<sup>7</sup>

২৪। “রোযা হল অর্ধেক ধৈর্য।”<sup>8</sup>

২৫। “প্রত্যেক জিনিসের যাকাত আছে, আর দেহের যাকাত হল রোযা।”<sup>9</sup>

২৬। “রোযাদারের নিকট কেউ খাবার খেলে, খাবার শেষ না হওয়া

<sup>1</sup> (সিলসিলাহ যায়ীফাহ, আলবানী ২/২৩১)

<sup>2</sup> (সিলসিলাহ যায়ীফাহ, আলবানী ৮৩১নং)

<sup>3</sup> (হাদীসটি জাল, সিলসিলাহ যায়ীফাহ, আলবানী ১৯৮০নং)

<sup>4</sup> (আলফাওয়াইদুল মাজমুআহ ফিল আহাদীসিল মাওয়ুআহ, শাওকানী, কিতাবুস সিয়াম, কীলানী ৯৫পৃঃ)

<sup>5</sup> (যয়ীফুল জামেইস সাগীর, আলবানী ৩৫৫৯নং)

<sup>6</sup> (যয়ীফুল জামেইস সাগীর, আলবানী ১৫৭১নং)

<sup>7</sup> (ঐ ৩৫০৪, সিলসিলাহ যায়ীফাহ, আলবানী ২৫৩নং)

<sup>8</sup> (যয়ীফ ইবনে মাজাহ, আলবানী ৩৮২নং)

<sup>9</sup> (ঐ ৩৮২নং)

পর্যন্ত তার জন্য ফিরিশ্তাবর্গ দুআ করতে থাকেন।”<sup>1</sup>

২৭। “রোযাদারের অস্থিসমূহ তসবীহ পাঠ করে, এবং যতক্ষণ তার সামনে ঋণুয়া হয়, ততক্ষণ ফিরিশ্তাগণ তার জন্য দুআ করতে থাকেন।”<sup>2</sup>

২৮। “রোযাদারের ঘুম ইবাদত, তার নীরবতা তসবীহ এবং আমলের সওয়াব বহুগুণ।”<sup>3</sup>

২৯। “রোযাদার ইবাদতে থাকে; যদিও সে বিছানায় গুয়ে থাকে।”<sup>4</sup>

৩০। “রোযা রাখলে সকালে দাঁতন করো এবং বিকালে করো না। কারণ, যে রোযাদারের ঠোঁট দুটি বিকালে শুকিয়ে যায়, কিয়ামতে সেই রোযাদারের চোখের সামনে জ্যোতি হবে।”<sup>5</sup>

৩১। “যে কেউ রোযা নষ্ট করবে, সে যেন একটি উটনী কুরবানী করে। তা করতে না পারলে সে যেন মিসকীনদেরকে ৭৫ কেজি খেজুর দান করে।”<sup>6</sup>

৩২। “যে ব্যক্তি রমাযানের একটি মাত্র রোযা কোন ওয়র ও রোগ বিনা নষ্ট করে দেয় সে ব্যক্তি সারা জীবন রোযা রাখলেও তা পূরণ করতে পারবে না।”<sup>7</sup>

৩৩। “পাঁচটি কাজে রোযা ও ওয়ূ নষ্ট হয়; মিথ্যা বলা, গীবত করা, চুগলী করা, (মহিলার প্রতি) কামদৃষ্টিতে তাকিয়ে দেখা এবং মিথ্যা কসম ঋণুয়া।”<sup>8</sup>

<sup>1</sup> (সিলসিলাহ যারীফাহ, আলবানী ১৩৩২, যরীফ ইবনে মাজাহ, আলবানী ৩৮৪২)

<sup>2</sup> (জাল হাদীস, সিলসিলাহ যারীফাহ, আলবানী ১৩৩১, যরীফ ইবনে মাজাহ, আলবানী ৩৮৫২)

<sup>3</sup> (যরীফুল জামেইস সাগীর, আলবানী ৫৯৭২, সিলসিলাহ যারীফাহ, আলবানী ৫৯৮৪২)

<sup>4</sup> (সিলসিলাহ যারীফাহ, আলবানী ৬৫৩২)

<sup>5</sup> (যরীফুল জামেইস সাগীর, আলবানী ৫৭৯২)

<sup>6</sup> (জাল হাদীস, সিলসিলাহ যারীফাহ, আলবানী ৬২৩, যরীফুল জামেইস সাগীর, আলবানী ৫৪৬১২)

<sup>7</sup> (যরীফ আবু দাউদ, আলবানী ৪১৩, যরীফুল জামেইস সাগীর, আলবানী ৫৪৬২২)

<sup>8</sup> (জাল হাদীস, সিলসিলাহ যারীফাহ, আলবানী ১৭০৮, যরীফুল জামেইস সাগীর, আলবানী ২৮৪৯২)

৩৪। “(যে দুজন মহিলা রক্ত অথবা মাংস ও পুঁজ বমি করেছিল) তারা হালাল জিনিস ব্যবহার না করে রোযা রেখেছিল, কিন্তু আল্লাহ কর্তৃক হারাম জিনিস দ্বারা ইফতার করেছিল। উভয়ে বসে (গীবত করার মাধ্যমে) লোকের গোস্‌ত্‌ খেয়েছিল।”<sup>1</sup>

৩৫। “সফরে রমায়ানের রোযা রাখা, ঘরে থাকা অবস্থায় রোযা নষ্টকারীর মত।”<sup>2</sup>

৩৬। “যে ব্যক্তি হালাল খেজুর দ্বারা ইফতার করবে, তার নামাযকে ৪ শত গুণ বর্ধিত করা হবে।”<sup>3</sup>

৩৭। “যে ব্যক্তি হালাল উপার্জন থেকে রমায়ান মাসে একটি রোযাদারকে ইফতার कराবে, সে ব্যক্তির জন্য রমায়ানের সমস্ত রাত্রে ফিরিশ্‌তাবর্গ দুআ করবেন এবং শবেকদরে জিবরাঈল তার সাথে মুসাফাহা করবেন---।”<sup>4</sup>

৩৮। “ইফতারের সময় রোযাদারের দুআ রদ্‌ করা হয় না।”<sup>5</sup>

৩৯। “প্রত্যেক রোযাদার বান্দার জন্য ইফতারের সময় কবুলযোগ্য দুআ রয়েছে। তা তাকে দুনিয়ায় দান করা হয় অথবা আখেরাতের জন্য জমা রাখা হয়।”<sup>6</sup>

৪০। ইফতারের সময় তিনি বলতেন, “আল্লাহ্‌ম্মা লাকা সুমতু অ আলা রিয়ক্বিকা আফত্বারতু।”<sup>7</sup>

৪১। ইফতারের সময় তিনি বলতেন, “আল্লাহ্‌ম্মা লাকা সুমতু অ আলা রিয়ক্বিকা আফত্বারতু। ফাতাক্বাক্বাল মিন্নী, ইন্নাকা আন্তাস সামীউল আলীম।”<sup>8</sup>

<sup>1</sup> (সিলসিলাহ যারীফাহ, আলবানী ৫১৯নং)

<sup>2</sup> (ঐ ৪৯৮, যরীফ ইবনে মাজাহ, আলবানী ৩৬৫নং)

<sup>3</sup> (হাদীসটি জালাল, কিতাবুস সিয়াম, কীলানী ৯৫পৃঃ, ফাযাআমাঃ)

<sup>4</sup> (সিলসিলাহ যারীফাহ, আলবানী ১৩৩৩নং)

<sup>5</sup> (যরীফ ইবনে মাজাহ, আলবানী ৩৮৭, সিলসিলাহ যারীফাহ, আলবানী ৪৩২৫, ইবওয়াউল গালীল, আলবানী ৯২১নং)

<sup>6</sup> (যরীফুল জামেইস সাগীর, আলবানী ৪৭৩৩নং)

<sup>7</sup> (যরীফুল জামেইস সাগীর ৪৩৪৯নং)

<sup>8</sup> (যরীফুল জামেইস সাগীর, আলবানী ৪৩৫০নং)



৪২। ইফতারের সময় তিনি বলতেন, “আলহামদু লিল্লাহিল্লাযী আআ’নানী ফাসুমতু অরাযাক্বানী ফাআফত্বারতু।”<sup>1</sup>

৪৩। “রমাযানের রাতে মুমিন নামায পড়লে আল্লাহ তার প্রত্যেক সিজদার বিনিময়ে ১৫০০ সওয়াব লিপিবদ্ধ করেন এবং বেহেশতে তার জন্য লাল রঙের প্রবালের একটি গৃহ নির্মাণ করা হয়; তার আছে ৬০০০০ দরজা, প্রত্যেক দরজায় আছে একটি করে স্বর্ণের মহল---। রমাযানের প্রথম রোযা রাখলে পশ্চাতের সকল পাপ মাফ হয়ে যায়---। প্রত্যহ ফজরের নামাযের পর থেকে সূর্যাস্ত পর্যন্ত ৭০০০০ ফিরিশতা তার জন্য ক্ষমা প্রার্থনা করে---। রমাযান মাসের দিনে অথবা রাতে প্রত্যেক সিজদার বিনিময়ে একটি করে (জান্নাতে) বৃক্ষ লাভ হবে; যার ছায়াতলে সওয়ারী ৫০০ বছরের পথ চলবে।”<sup>2</sup>

৪৪। “ঈদের দিন এসে উপস্থিত হলে ফিরিশ্তাবর্গ রাস্তার মোড়ে মোড়ে দাঁড়িয়ে আহবান করেন---। অতঃপর যখন নামায হয়ে যায় তখন আহবানকারী আহবান করে, শোন! তোমাদের প্রতিপালক তোমাদেরকে ক্ষমা করে দিয়েছেন---।’ আর আসমানে এই দিনের নাম হল পুরস্কারের দিন।”<sup>3</sup>

৪৫। “রমাযানের রোযা আকাশ ও পৃথিবীর মাঝে লটকানো থাকে। ফিতরা দিলে তবেই তা উখিত করা হয়।”<sup>4</sup>

৪৬। “যে ব্যক্তি রোযার (শেষ) দশকে ই’তিকাফ করবে, তার দুটি হজ্জ ও দুটি উমরাহ করার সমান সওয়াব লাভ হবে।”<sup>5</sup>

৪৭। “রমাযান বলো না। কারণ, ‘রমাযান’ হল আল্লাহর অন্যতম নাম। বরং তোমরা রমাযান মাস বলো।”<sup>6</sup>

৪৮। “যে ব্যক্তি আল্লাহর সন্তুষ্টি লাভের উদ্দেশ্যে একদিন রোযা

<sup>1</sup> (যয়ীফুল জামেইস সাগীর, আলবানী ৪৩৪৮নং)

<sup>2</sup> (যয়ীফ তারগীব, আলবানী ৫৮৮নং)

<sup>3</sup> (মাজমাউয যাওয়ালেদ ২/২০১, যয়ীফ তারগীব, আলবানী ৫৯৪নং)

<sup>4</sup> (সিলসিলাহ যয়ীফাহ, আলবানী ৪৩নং)

<sup>5</sup> (হাদীসটি জাল, সিলসিলাহ যয়ীফাহ, আলবানী ৫১৮নং)

<sup>6</sup> (মুখালাফাতু রামাযান, শায়খ আব্দুল আযীয সাদহান)

রাখবে, তার কাছ থেকে জাহান্নামকে এত দূরের পথ করে দেবেন; যে পথ একটি কাক ছানা অবস্থা থেকে বুড়ো হয়ে মরা পর্যন্ত উড়ে অতিক্রম করতে পারে।<sup>1</sup>

৪৯। “মুসলিম রোযা রাখলে ---- পাপ থেকে সেই রকম বেরিয়ে আসে, যেমন সাপ বেরিয়ে আসে তার খোলস থেকে।”<sup>2</sup>

৫০। “মুসলিম রোযা রাখলে ---- পাপ থেকে সেই রকম বেরিয়ে আসে, যেমন বেরিয়ে আসে মায়ের পেট থেকে নিষ্পাপ হয়ে।”<sup>3</sup>

৫১। “আল্লাহ নিজের জন্য এই ফায়সালা ও স্থির করে রেখেছেন যে, যে ব্যক্তি কোন গরমের দিনে আল্লাহর ওয়াস্তে নিজেকে (রোযা রেখে) পিপাসিত করবে, আল্লাহ তাকে এই অধিকার দেবেন যে, তিনি কিয়ামতের দিন তার পিপাসা দূর করে দেবেন।”<sup>4</sup>

<sup>1</sup> (যয়ীফ তারগীব, আলবানী ৫৭৪নং)

<sup>2</sup> (যয়ীফ তারগীব, আলবানী ৫৯৫নং)

<sup>3</sup> (যয়ীফ তারগীব, আলবানী ৬০২নং)

<sup>4</sup> (যয়ীফ তারগীব, আলবানী ৫৭৮নং)

## ষষ্ঠদশ অধ্যায়

### রমাযানের কিছু বিদআতের নমুনা

কোন কোন অঞ্চলে বা সমাজে রমাযান মাসে এক এক প্রকার বিদআত প্রচলিত হয়ে পড়েছে। সে সকল বিদআত থেকে সাবধান করার জন্য এখানে কিছু বিদআত উল্লেখ করা সঙ্গত বলে মনে করছি।

১। রোযার নিয়ত মুখে উচ্চারণ করা।

২। “নাওয়াইতু আন আসূমা গাদাম মিন শাহরি রামাযান” বলে বাঁধা নিয়ত বলা।

৩। রমাযানের রাত্রে কুরআন পড়ার জন্য ভাড়াটিয়া কারী ভাড়া করা।<sup>1</sup>

৪। মাইকে এক রাত্রে কুরআন খতম (শবীনা পাঠ) করা।

৫। মীলাদ বা মওলুদ পাঠ করা এবং তার শেষে নবী ﷺ-এর শানে দরুদ পাঠ করার জন্য উঠে দাঁড়িয়ে মনগড়া দরুদ পড়া। সেই সাথে মুনাযাতে আমলের সওয়াব আম্বিয়া ও আওলিয়া বা কোন আত্মীয়র রুহের জন্য বখশে দেওয়া।<sup>2</sup>

৬। পূর্বসতর্কতামূলক কর্ম ভেবে ফজর হওয়ার ৫/১০ মিনিট আগে খাওয়া বন্ধ করা এবং সূর্য অস্ত যাওয়ার ৩/৫ মিনিট পরে ইফতার করা।<sup>3</sup>

৭। সেহরী ও ইফতারের সময় জানানোর উদ্দেশ্যে তোপ দাগা।<sup>4</sup>

৮। সেহরী খেতে জাগানোর উদ্দেশ্যে আযানের পরিবর্তে কুরআন ও গজল পাঠ করা।

৯। মসজিদের মিনারে সেহরী ও ইফতারের জন্য নির্দিষ্ট লাইট ব্যবহার করা। যেমন, সেহরীর সময় শেষ হলে লাল বাতি এবং ইফতারীর

<sup>1</sup> (মু'জামুল বিদা' ২৬৮ পৃঃ, দুরুসু রামাযান অকাফাত লিস-সায়েমীন ৪০ পৃঃ)

<sup>2</sup> (আহকামুল জানায়েয, আলবানী ২৬০-২৬১ পৃঃ)

<sup>3</sup> (ফাতহুল বারী ৪/১৯৯, তামামুল মিনাহ, আল্লামা আলবানী ৪১৫ পৃঃ, মু'জামুল বিদা' ২৬৮, ৩৬১ পৃঃ)

<sup>4</sup> (মু'জামুল বিদা' ২৬৮ পৃঃ)

সময় শুরু হলে সবুজ বাতি জ্বালিয়ে দেওয়া।<sup>1</sup>

১০। সেহরী না খেয়ে অধিক সওয়াবের আশা করা।<sup>2</sup>

১১। কুরআন খতম হওয়ার পর বাকী রাতে তারা বীহ না পড়া।<sup>3</sup>

১২। প্রথমে পানি না খেয়ে আদা ও লবণ দিয়ে ইফতারী করাকে ভালো মনে করা।

১৩। ইফতারের আগে হাত তুলে জামাআতী মুনাযাত করা।

১৪। ইফতারের সময় “আল্লাহুম্মা ইন্নী আসআলুকা বিরাহমাতিকান্নাতী অসিআত কুল্লা শাইইন আন তাগফিরা লী” বলে দুআ করা।<sup>4</sup>

১৫। ইফতারের সময় “আল্লাহুম্মা লাকা সুমতু, অবিকা আ-মানতু, অআলাইকা তাওয়াক্কালতু, অআলা রিয়ক্বিকা আফতারতু, বিরাহমাতিকা ইয়া আরহামুর রা-হিমীন” বলে দুআ করা।

১৬। বিশেষ করে রজব, শাবান ও রমায়ানে মৃতদের কল্যাণের উদ্দেশ্যে দান-খয়রাত করা।<sup>5</sup>

১৭। সারা বছর নামায না পড়ে এবং তার সংকল্প না নিয়ে কেবল রমায়ান মাসে রোযা রেখে (ফরয, সুন্নত ও নফল) নামায পড়া ও তসবীহ আওড়ানো।<sup>6</sup>

১৮। শবেকদরের ১০০ বা ১০০০ রাকআত নামায পড়া।

১৯। শবেকদরে বিশেষ করে ‘সালাতুত তাসবীহ’ নামায পড়া।

২০। কেবল ২৭শের রাতকে শবেকদর মনে করা এবং কেবল সেই রাত জাগরণ করা ও বাকী রাত না জাগা।

<sup>1</sup> (ফাতহুল বারী ৪/১৯৯, মু'জামুল বিদা' ৩৬১ পৃঃ)

<sup>2</sup> (মু'জামুল বিদা' ৩৬১ পৃঃ)

<sup>3</sup> (ঐ ২৬৮ পৃঃ)

<sup>4</sup> (এ ব্যাপারে আসারটি যরীফ। দ্রঃ যরীফ ইবনে মাজাহ, আলবানী ৩৮৭, ইরওয়াউল গালীল, আলবানী ৯২১নং, আর ইফতারীর বিবরণে আলোচিত হয়েছে যে, “যাহাবায যামাউ---” ছাড়া ইফতারীর জন্য অন্য কোন দুআ বিস্কৃতভাবে প্রমাণিত নয়।)

<sup>5</sup> (আহকামুল জানায়েয, আলবানী ২৫৭নং বিদআত, মু'জামুল বিদা' ২৬৯ পৃঃ)

<sup>6</sup> (মু'জামুল বিদা' ২৭০ পৃঃ)

২১। বিশেষ করে শবেকদরের রাতে উমরাহ করা।<sup>1</sup>

২২। বিশেষ করে ২৭শের রাত্রি জাগরণ করে জামাআতী যিক্‌র করা, নানা রকমের পানাহার সামগ্রী তৈরী বা ত্রয় করে পান-ভোজন করা, মিষ্টি বিতরণ করা ও ওয়ায-মাহফিল করা।<sup>2</sup>

২৩। নির্দিষ্ট কোন রাতে একাকী বা জামাআতী নির্দিষ্ট যিক্‌র পড়া।<sup>3</sup>

২৪। সাতাশের রাতে লোকেদের মিষ্টি কিনতে ভিঁড় করা, (তা খাওয়া ও দান করা)।<sup>4</sup>

২৫। ঈদের রাত্রি জাগরণ করে ইবাদত করা। পূর্বে উল্লেখিত হয়েছে যে, এ ব্যাপারে বর্ণিত হাদীসটি জাল।<sup>5</sup>

২৬। রমায়ানের শেষ জুমআহ (বিদায়ী জুমআহ) বিশেষ উদ্দীপনার সাথে পালন করা।

২৭। মা-বাপের নামে বিশেষ ভোজ-অনুষ্ঠান করা।<sup>6</sup>

২৮। শাবানের ১৫ তারীখের রাতে নামায ও দিনে রোযা রাখা।<sup>7</sup> বলা বাহুল্য এ ব্যাপারে কোন সহীহ হাদীস নেই।

সবশেষে এ কথা সকল মুসলিমের জেনে রাখা উচিত যে, নিশ্চয় উত্তম বাণী আল্লাহর গ্রন্থ এবং উত্তম পথ-নির্দেশ মুহাম্মাদ ﷺ -এর পথ-নির্দেশ। সব চেয়ে মন্দ কর্ম দ্বীনের অভিনব রচিত কর্মসমূহ। এবং প্রত্যেক নব কর্মই বিদআত, আর প্রত্যেক বিদআতই ভ্রষ্টতা।” “এবং প্রত্যেক ভ্রষ্টতার স্থান দোযখে।”<sup>8</sup>

<sup>1</sup> (আশ্শারহুল মুমতে' ৬/৪৯৬, ৪৯৭)

<sup>2</sup> (মাজাল্লাতুদ দা'ওয়া, ইবনে বায ১৬৭৪/১৪ রমায়ান ১৪১৯হিঃ)

<sup>3</sup> (ঐ)

<sup>4</sup> (মু'জামুল বিদা' ২৬৯পৃঃ)

<sup>5</sup> (দ্রঃ সিলসিলাহ যারীফাহ, আলবানী ৫২০, ৫২১, ৫২২নং, মু'জামুল বিদা' ৩৩২পৃঃ, দুরুসু রামায়ান অকাফাত লিস-সায়েমীন ১০০পৃঃ)

<sup>6</sup> (ফাসিঃ মুসনিদ ১০৪পৃঃ, তাযকীরু ইবাদির রাহমান, ফীমা অরাদা বিসিয়ামি শাহরি রামায়ান ৫০পৃঃ)

<sup>7</sup> (মু'জামুল বিদা' ৩৬২পৃঃ)

<sup>8</sup> (মুসলিম, নাসাঈ)

মহানবী ﷺ বলেন, “যে ব্যক্তি কোন এমন কাজ করে যার উপর আমাদের কোন নির্দেশ নেই তা প্রত্যাখ্যাত।”<sup>1</sup> তিনি আরো বলেন, “যে ব্যক্তি আমাদের এ (দ্বীন) বিষয়ে কিছু এমন কর্ম উদ্ভাবন করবে যা ওর পর্যায়ভুক্ত নয়, তা প্রত্যাখ্যাত।”<sup>2</sup>

---

<sup>1</sup> (মুসলিম)

<sup>2</sup> (বুখারী, মুসলিম)

## সপ্তদশ অধ্যায়

### সুন্নত ও নফল রোযা

রোযার দ্বিতীয় প্রকার হল সুন্নত, নফল (অতিরিক্ত) রোযা; যা পালন করা মুসলিমের জন্য ওয়াজেব নয়। কিন্তু পালন করলে ফযীলত ও সওয়াবের অধিকারী হওয়া যায়।

মহান আল্লাহর একটি হিকমত ও অনুগ্রহ এই যে, তিনি ফরয ইবাদতের মতই নফল ইবাদতও বিধিবদ্ধ করেছেন। তিনি যে আমল ফরয করেছেন, অনুরূপ সেই আমল নফলও করেছেন বান্দার জন্য। ফরয ইবাদতের মাঝে একদিকে যেমন ঘটিত ত্রুটি নফল ইবাদত দ্বারা পূরণ হয়ে যায়। তেমনি অপর দিকে তারই মাধ্যমে আমলকারীর নেকী ও সওয়াব বৃদ্ধি হয়। পক্ষান্তরে তা বিধিবদ্ধ না হলে তা পালন করা ভ্রষ্টকারী বিদআত বলে গণ্য হত। আর হাদীসে বলা হয়েছে যে, “কিয়ামতের দিন নফল ইবাদত দ্বারা ফরয ইবাদতের অসম্পূর্ণতা পূর্ণ করা হবে।”<sup>1</sup>

### নফল রোযার জন্য নিয়ত :

নফল রোযার নিয়ত ফজরের আগে থেকে হওয়া জরুরী নয়। বরং দিনের বেলায় সূর্য ঢলার আগে বা পরে নিয়ত করলেই রোযা শুদ্ধ হয়ে যায়। অবশ্য ফরয রোযার বেলায় তা হয় না- যেমন পূর্বেই এ কথা আলোচিত হয়েছে। তবে নফল রোযার ক্ষেত্রেও শর্ত হল, যেন নিয়ত করার আগে ফজর উদয় হওয়ার পর কোন রোযা নষ্টকারী জিনিস ব্যবহার না করা হয়। বলা বাহুল্য, যদি তা (পানাহার বা অন্য কিছু) ব্যবহার করে থাকে তাহলে রোযা হবে না।

এ কথার দলীল মা আয়েশার হাদীস; তিনি বলেন, একদা নবী ﷺ তাঁর নিকট এসে জিজ্ঞাসা করলেন, “তোমাদের কাছে (খাবার) কিছু আছে কি?” বললেন, ‘জী না।’ মহানবী ﷺ তখন বললেন, “তাহলে আজকে

<sup>1</sup> (আহমাদ, মুসনাদ ২/৪২৫, আবু দাউদ ৮৬৪নং, তিরমিযী, নাসাই, ইবনে মাজাহ, হাকেম, মুত্তাদ্রাক ১/২৬২, সহীহ আবু দাউদ ৭৭০নং)

আমি রোযা থাকলাম।”<sup>1</sup>

আর এই আমল ছিল সাহাবা (রাযি.)-দের।<sup>2</sup>

কিন্তু জানার কথা যে, দিনের বেলায় নিয়ত করলে, কেবল নিয়ত করার পর থেকেই সওয়াবের অধিকারী হবে। সুতরাং কেউ সূর্য ঢলার সময় নিয়ত করলে সে কেবল অর্ধেক রোযার সওয়াব প্রাপ্ত হবে; তার বেশী নয়।<sup>3</sup> যেহেতু প্রিয় নবী ﷺ বলেন, “যাবতীয় আমল নিয়তের উপর নির্ভরশীল। সুতরাং প্রত্যেক ব্যক্তির তা-ই প্রাপ্য হয়, যার সে নিয়ত করে থাকে।”<sup>4</sup>

## নফল রোযার প্রকারভেদ

নফল রোযা দুই প্রকার; সাধারণ নফল এবং নির্দিষ্ট নফল। এখানে নির্দিষ্ট রোযাসমূহের কথা আলোচনা করা হচ্ছে।

### ১। শওয়ালের ছয় রোযা

যে ব্যক্তির রমায়ানের রোযা পূর্ণ হয়ে যাবে, তার জন্য শওয়াল মাসের ৬টি রোযা রাখা মুস্তাহাব। আর এতে তার জন্য রয়েছে বৃহৎ সওয়াব। মহানবী ﷺ বলেন, “যে ব্যক্তি রমায়ানের রোযা রাখার পরে-পরেই শওয়াল মাসে ছয়টি রোযা পালন করে সে ব্যক্তির পূর্ণ বৎসরের রোযা রাখার সমতুল্য সওয়াব লাভ হয়।”<sup>5</sup>

এই সওয়াব এই জন্য হবে যে, আল্লাহর অনুগ্রহে ১টি কাজের সওয়াব ১০টি করে পাওয়া যায়। অতএব সেই ভিত্তিতে ১ মাসের (৩০ দিনের) রোযা ১০ মাসের (৩০০ দিনের) সমান এবং ৬ দিনের রোযা ২ মাসের (৬০ দিনের) সমান; সর্বমোট ১২ মাস (৩৬০ দিন) বা এক বছরের

<sup>1</sup> (মুসলিম ১১৫৪নং, প্রযুক্ত)

<sup>2</sup> (দ্রঃ বুখারী ৩৭৯পৃঃ)

<sup>3</sup> (আশ্শারহুল মুমতে' ৬/৩৭২-৩৭৪)

<sup>4</sup> (বুখারী ১নং, মুসলিম ১৯০৭নং)

<sup>5</sup> (মুসলিম ১১৬৪নং, সুনানে আরবআহ; আবু দাউদ, তিরমিযী, নাসাই ও ইবনে মাজাহ)



সওয়াব লাভ হয়ে থাকে। আর এই ভাবে সেই রোযাদারের জীবনের প্রত্যেকটি দিন রোযা রাখা হয়! দয়াময় আল্লাহ বলেন,

﴿مَنْ جَاءَ بِالْحَسَنَةِ فَلَهُ عَشْرُ أَمْثَالِهَا﴾

অর্থাৎ, কেউ কোন ভাল কাজ করলে, সে তার ১০ গুণ প্রতিদান পাবে। (কুরআনুল কারীম ৬/১৬০)

এই রোযা বিধিবদ্ধ হওয়ার কারণ -আর আল্লাহই ভাল জানেন - তা হল ফরয নামাযের পর সূনাতে মুআক্কাদার মত। যা ফরয নামাযের উপকারিতা ও তার অসম্পূর্ণতা সম্পূর্ণ করে। অনুরূপ এই ছয় রোযা রমাযানের ফরয রোযার অসম্পূর্ণতা সম্পূর্ণ করে এবং তাতে কোন ক্রটি ঘটে থাকলে তা দূর করে থাকে। সে অসম্পূর্ণতা ও ক্রটির কথা রোযাদার জানতে পারুক অথবা না পারুক।<sup>1</sup>

তা ছাড়া রমাযানের ফরয রোযা রাখার পর পুনরায় রোযা রাখা রমাযানের রোযা কবুল হওয়ার একটি লক্ষণ। যেহেতু মহান আল্লাহ যখন কোন বান্দার নেক আমল কবুল করেন, তখন তার পরেই তাকে আরো নেক আমল করার তওফীক দান করে থাকেন। যেমন উলামাগণ বলে থাকেন, 'নেক কাজের সওয়াব হল, তার পরে পুনঃ নেক কাজ করা।'<sup>2</sup>

এই রোযার উত্তম সময় হল, ঈদের সরাসরি পরের ৬ দিন। কারণ, তাতেই রয়েছে নেক আমলের দিকে সত্বর ধাবমান হওয়ার দলীল। আর এ কথা মহানবী ﷺ-এর এই উক্তি "যে ব্যক্তি রমাযানের রোযা রাখার পরে-পরেই শওয়াল মাসে ছয়টি রোযা পালন করে---" থেকে বুঝা যায়।

তদনুরূপ উত্তম হল, উক্ত ছয় রোযাকে লাগাতার রাখা। কেননা, এমনটি করা রমাযানের অভ্যাস অনুযায়ী সহজসাধ্য। আর তাতে হবে বিধিবদ্ধ নেক আমল করার প্রতি সাগ্রহে ধাবমান হওয়ার পরিচয়।

অবশ্য তা লাগাতার না রেখে বিচ্ছিন্নভাবেও রাখা চলে। যেহেতু হাদীসের অর্থ ব্যাপক। কিন্তু শওয়াল মাস অতিবাহিত হয়ে গেলে তা কাযা

<sup>1</sup> (ফাইয়ুর রাহীমির রাহমান, ফী আহকামি অমাওয়াইমি রামাযান ৭৬পৃঃ)

<sup>2</sup> (ইতহাফু আহলিল ইসলাম বিআহকামিস সিয়াম ৯২পৃঃ)

করা বিধেয় নয়। যেহেতু তা সুন্নত এবং তার যথাসময় পার হয়ে গেছে। তাতে তা কোন ওয়রের ফলে পার হোক অথবা বিনা ওয়রে।<sup>1</sup>

রমায়ানের রোযা কাযা না করে শওয়ালের রোযা রাখা বিধেয় নয়। যেমন কাফ্ফারার রোযা থাকলে তা না রেখে শওয়ালের রোযা রাখা চলে না। আর শওয়াল মাসে রমায়ানের কাযা রাখলে তাই শওয়ালের রোযা বলে যথেষ্ট হবে না।<sup>2</sup>

## ২। আরাফার রোযা

যুল-হজ্জ মাসের ৯ তারীখ হল আরাফার দিন। এই দিনে হাজীগণ আরাফার ময়দানে উপস্থিত হন বলে এই নামকরণ হয়েছে। এই দিনের রোযা রাখার মাহাত্ম্য প্রসঙ্গে মহানবী ﷺ জিজ্ঞাসিত হলে তিনি বলেছিলেন, “(উক্ত রোযা) গত এক বছরের এবং আগামী এক বছরের কৃত পাপরাশিকে মোচন করে দেয়।”<sup>3</sup>

হযরত সাহ্ল বিন সা'দ (رضي الله عنه) হতে বর্ণিত, তিনি বলেন আল্লাহর রসূল ﷺ বলেন, “যে ব্যক্তি আরাফার দিন রোযা রাখে তার উপর্যুপরি দুই বৎসরের পাপরাশি মাফ হয়ে যায়।”<sup>4</sup>

অবশ্য এই রোযা গৃহবাসীর জন্য বিধেয়; আরাফাতে অবস্থানরত হাজীর জন্য তা বিধেয় নয়। কেননা, ঐ দিনে মহানবী ﷺ রোযা রেখেছেন কি না লোকেরা তা নিয়ে সন্দেহ করলে, তাঁর নিকট এক পাত্র দুধ পাঠানো হল। তিনি ঐ দিনের চাশতের সময় তা পান করলেন। সে সময় লোকেরা তাঁর দিকে তাকিয়ে দেখছিল।<sup>5</sup>

আরাফার ময়দানে ঐ রোযা বিধেয় না হওয়ার কারণ এই যে, ঐ দিন হল দুআ ও যিকরের দিন। আর রোযা রাখলে তাতে দুর্বলতা দেখা দিতে

<sup>1</sup> (ইবনে বায : ফাতাওয়া ইসলামিয়াহ ২/১৬৫-১৬৬)

<sup>2</sup> (ইবনে জিবরীন, ফাসিঃ ১০৭পৃঃ)

<sup>3</sup> (আহমাদ, মুসনাদ ৫/২৯৭, মুসলিম ১১৬২নং, আবু দাউদ ২৪২৫নং, তিরমিযী, নাসাই, ইবনে মাজাহ, বাইহাকী ৪/২৮৬)

<sup>4</sup> (আবু য়া'লা, সহীহ তারগীব ৯৯৮নং)

<sup>5</sup> (বুখারী ১৯৮৮, মুসলিম ১১২৩নং)

পারে। তা ছাড়া সেটা হল সফর। আর সফরে রোযা না রাখাটাই উত্তম।<sup>1</sup>

পক্ষান্তরে অহাজীদের জন্য ঐ রোযা বিধেয় হওয়ার পশ্চাতে হিকমত হল, ঐ রোযা রেখে রোযাদার হাজীদের সাদৃশ্য বরণ করতে পারে, তাঁদের কর্মের প্রতি আকাজক্ষী হয় এবং তাঁদের উপর আল্লাহর যে রহমত অবতীর্ণ হয় তাতে शामिल হতে ও সেই রহমতের দরিয়ায় আপুত হতে পারে।<sup>2</sup>

প্রকাশ থাকে যে, রমাযানের কাযা রোযার নিয়তে কেউ আরাফা অথবা আশুরার দিন রোযা রাখলে তার উভয় সওয়াব লাভ হবে ইন শাআল্লাহ।

### ৩। মুহাররাম মাসের রোযা

সুনুত রোযাসমূহের মধ্যে মুহাররাম মাসের (অধিকাংশ দিনের) রোযা অন্যতম। রমাযানের পর পর রয়েছে এই রোযার মান। আল্লাহর রসূল ﷺ বলেছেন, “রমাযানের পর সর্বশ্রেষ্ঠ রোযা হল আল্লাহর মাস মুহাররামের রোযা। আর ফরয নামাযের পর সর্বশ্রেষ্ঠ নামায হল রাতের (তাহাজ্জুদের) নামায।”<sup>3</sup>

### ৪। আশুরার রোযা

মুহাররাম মাসের রোযার মধ্যে সবচেয়ে বেশী তাকীদপ্রাপ্ত হল ঐ মাসের ১০ তারীখ আশুরার দিনের রোযা। রমাযানের রোযা ফরয হওয়ার আগে এই রোযা ওয়াজেব ছিল। রুবাইয়ে’ বিন্তে মুআউবিয বলেন, আল্লাহর রসূল ﷺ আশুরার সকালে মদীনার আশেপাশে আনসারদের বস্তিতে বস্তিতে খবর পাঠিয়ে দিলেন যে, “যে রোযা অবস্থায় সকাল করেছে, সে যেন তার রোযা পূর্ণ করে নেয়। আর যে ব্যক্তি রোযা না রাখা অবস্থায় সকাল করেছে সেও যেন তার বাকী দিন পূর্ণ করে নেয়।”

রুবাইয়ে’ বলেন, ‘আমরা তার পর হতে ঐ রোযা রাখতাম এবং

<sup>1</sup> (দ্রঃ যামাঃ ২/৭৭, আশশারহুল মুমতে’ ৬/৪৭৩)

<sup>2</sup> (ফাইযুর রাহীমির রাহমান, ফী আহকামি অমাওয়াইযি রামাযান ৭৬পৃঃ)

<sup>3</sup> (মুসলিম ১১৬৩নং, সুনানে আরবআহঃ আবু দাউদ, তিরমিখী, নাসাই ও ইবনে মাজাহ, ইবনে খুযাইমাহ, সহীহ)

আমাদের ছোট ছোট বাচ্চাদেরকেও রাখাতাম। তাদের জন্য তুলোর খেলনা তৈরী করতাম এবং তাদেরকে মসজিদে নিয়ে যেতাম। অতঃপর তাদের মধ্যে কেউ খাবারের জন্য কাঁদতে শুরু করলে তাকে ঐ খেলনা দিতাম। আর এইভাবে ইফতারের সময় এসে পৌছত।<sup>1</sup>

মা আয়েশা (রাঃ) বলেন, ‘কুরাইশরা জাহেলিয়াতের যুগে আশূরার রোযা পালন করত। আর আল্লাহর রসূল ﷺ-ও জাহেলিয়াতে ঐ রোযা রাখতেন। (ঐ দিন ছিল কাবায় গিলাফ চড়াবার দিন।) অতঃপর তিনি যখন মদীনায় এলেন, তখনও তিনি ঐ রোযা রাখলেন এবং সকলকে রাখতে আদেশ দিলেন। কিন্তু পরবর্তীতে যখন রমাযানের রোযা ফরয হল, তখন আশূরার রোযা ছেড়ে দিলেন। তখন অবস্থা এই হল যে, যার ইচ্ছা হবে সে রাখবে এবং যার ইচ্ছা হবে সে রাখবে না।’<sup>2</sup>

ইবনে আব্বাস (রাঃ) বলেন, মহানবী ﷺ যখন মক্কা থেকে হিজরত করে মদীনায় এলেন, তখন দেখলেন, ইয়াহুদীরা আশূরার দিনে রোযা পালন করছে। তিনি তাদেরকে জিজ্ঞাসা করলেন, “এটা কি এমন দিন যে, তোমরা এ দিনে রোযা রাখছ?” ইয়াহুদীরা বলল, ‘এ এক উত্তম দিন। এ দিনে আল্লাহ বানী ইসরাঈলকে তাদের শত্রু থেকে পরিত্রাণ দিয়েছিলেন। তাই মুসা এরই কৃতজ্ঞতা জ্ঞাপনের উদ্দেশ্যে এই দিনে রোযা পালন করেছিলেন। (আর সেই জন্যই আমরাও এ দিনে রোযা রেখে থাকি।)’

এ কথা শুনে মহানবী ﷺ বললেন, “মূসার স্মৃতি পালন করার ব্যাপারে তোমাদের চাইতে আমি অধিক হকদার।” সুতরাং তিনি ঐ দিনে রোযা রাখলেন এবং সকলকে রোযা রাখতে আদেশ দিলেন।<sup>3</sup>

বলাই বাহুল্য যে, উক্ত আদেশ ছিল মুস্তাহাব। যেমন মা আয়েশার উক্তিতে তা স্পষ্ট। তা ছাড়া মহানবী ﷺ বলেন, “আজকে আশূরার দিন; এর রোযা আল্লাহ তোমাদের উপর ফরয করেন নি। তবে আমি রোযা রেখেছি। সুতরাং যার ইচ্ছা সে রোযা রাখবে, যার ইচ্ছা সে রাখবে না।”<sup>4</sup>

<sup>1</sup> (আহমাদ, মুসনাদ ৬/৩৫৯, বুখারী ১৯৬০, মুসলিম ১১৩৬, ইবনে খুযাইমাহ, সহীহ ২০৮৮নং, বাইহাকী ৪/২৮৮)

<sup>2</sup> (বুখারী ১৯৫২, ২০০২, মুসলিম ১১২৫নং প্রমুখ)

<sup>3</sup> (বুখারী ২০০৪, মুসলিম ১১৩০নং)

<sup>4</sup> (বুখারী ২০০৩, মুসলিম ১১২৯নং)

আবু কাতাদাহ (رضي الله عنه) হতে বর্ণিত তিনি বলেন, আল্লাহর রসূল (ﷺ) আশুরার দিন রোযা রাখা প্রসঙ্গে জিজ্ঞাসিত হলে তিনি বললেন, “আমি আশা করি যে, (উক্ত রোযা) বিগত এক বছরের পাপরাশি মোচন করে দেবে।”<sup>1</sup>

ইবনে আব্বাস (رضي الله عنه) প্রমুখং বর্ণিত, তিনি বলেন, ‘আল্লাহর রসূল (ﷺ) রমায়ানের রোযার পর আশুরার দিন ছাড়া কোন দিনকে অন্য দিন অপেক্ষা মাহাত্ম্যপূর্ণ মনে করতেন না।’<sup>2</sup> অনুরূপ বর্ণিত আছে বুখারী ও মুসলিম শরীফে।<sup>3</sup>

এক বর্ণনায় আছে, এই রোযা এক বছরের রোযার সমান।<sup>4</sup>

অবশ্য যে ব্যক্তি আশুরার রোযা রাখবে তার জন্য তার একদিন আগে (৯ তারীখে)ও একটি রোযা রাখা সুন্নত। যেহেতু ইবনে আব্বাস (رضي الله عنه) বলেন, আল্লাহর রসূল (ﷺ) যখন আশুরার রোযা রাখলেন এবং সকলকে রাখার আদেশ দিলেন, তখন লোকেরা বলল, ‘হে আল্লাহর রসূল! এ দিনটিকে তো ইয়াহুদ ও নাসারারা তা‘যীম করে থাকে।’ তিনি বললেন, “তাহলে আমরা আগামী বছরে ৯ তারীখেও রোযা রাখব ইনশাআল্লাহ।” কিন্তু আগামী বছর আসার আগেই আল্লাহর রসূল (ﷺ)-এর ইত্তিকাল হয়ে গেল।<sup>5</sup>

ইবনে আব্বাস (رضي الله عنه) বলেন, ‘তোমরা ৯ ও ১০ তারীখে রোযা রাখ।’<sup>6</sup>

পক্ষান্তরে “তোমরা এর একদিন আগে বা একদিন পরে একটি রোযা রাখ” -এই হাদীস সহীহ নয়।<sup>7</sup> তদনুরূপ সহীহ নয় “তোমরা এর একদিন আগে একটি এবং একদিন পরেও একটি রোযা রাখ” -এই হাদীস।<sup>8</sup>

বলা বাহুল্য, ৯ ও ১০ তারীখেই রোযা রাখা সুন্নত। পক্ষান্তরে কেবল

<sup>1</sup> (আহমাদ, মুসনাদ ৫/২৯৭, মুসলিম ১১৬২, আবু দাউদ ২৪২৫, বাইহাকী ৪/২৮৬)

<sup>2</sup> (ভাবারানী, মু‘জাম আওসাত্ব, সহীহ তারগীব, আলবানী ১০০৬ নং)

<sup>3</sup> (বুখারী ২০০৬, মুসলিম ১১৩২নং)

<sup>4</sup> (ইবনে হিব্বান, সহীহ ৩৬৩১নং)

<sup>5</sup> (মুসলিম ১১৩৪, আবু দাউদ ২৪৪৫নং)

<sup>6</sup> (বাইহাকী ৪/২৮৭, আব্দুর রাযযাক, মুসান্নাফ ৭৮৩৯নং)

<sup>7</sup> (ইবনে খুযাইমাহ, সহীহ ২০৯৫নং, আলবানীর টীকা দ্রঃ)

<sup>8</sup> (যামাঃ ২/৭৬ টীকা দ্রঃ)

১০ তারীখে রোযা রাখা মকরুহ।<sup>1</sup> যেহেতু তাতে ইয়াহুদীদের সাদৃশ্য সাধন হয় এবং তা মহানবী ﷺ-এর আশার প্রতিকূল। অবশ্য কেউ কেউ বলেন, ‘মকরুহ নয়। তবে কেউ একদিন (কেবল আশুরার দিন) রোযা রাখলে পূর্ণ সওয়াবের অধিকারী হবে না।’

জ্ঞাতব্য যে, হুসাইন (رضی اللہ عنہ) এর এই দিনে শহীদ হওয়ার সাথে এ রোযার কোন নিকট অথবা দূরতম কোন সম্পর্ক নেই। কারণ, তার পূর্বে মহানবী ﷺ; বরং তাঁর পূর্বে মূসা নবী (رضی اللہ عنہ) এই দিনে রোযা রেখে গেছেন। আর এই দিনে শিয়া সম্প্রদায় যে মাতম ও শোক পালন, মুখ ও বুক চিরে, গালে খাপর মেরে, চুল-জামা ছিঁড়ে, পিঠে চাবুক মেরে আত্মপ্রহার ইত্যাদি করে থাকে, তা জঘন্যতম বিদআত। সনুহাতে এ সবে কখনো ভিত্তি নেই।

তদনুরূপ এই দিনে নিজ পরিবার-পরিজনের উপর খরচ বৃদ্ধি করা, বিশেষ কোন নামায পড়া, দান-খয়রাত করা, বিশেষ করে শরবত-পানি দান করা, কলফ ব্যবহার করা, তেল মাখা, সুবমা ব্যবহার করা প্রভৃতি বিদআত। এ সকল বিদআত হযরত হুসাইন (رضی اللہ عنہ) এর খুনীরাই আবিষ্কার করে গেছে।<sup>2</sup>

## ৫। যুলহজ্জের প্রথম নয় দিনের রোযা

যুলহজ্জ মাসের প্রথম নয় দিন রোযা রাখা মুস্তাহাব। যেহেতু আল্লাহ আয্যা অজাল্ল যুলহজ্জের প্রথম দশ দিনকে অন্যান্য দিনের উপর শ্রেষ্ঠত্ব ও মর্যাদা দান করেছেন। আল্লাহর রসূল ﷺ বলেন। “এই দশদিনের মধ্যে কৃত নেক আমলের চেয়ে আল্লাহর নিকট অধিক পছন্দনীয় আর কোন আমল নেই।” (সাহাবাগণ) বললেন, ‘আল্লাহর পথে জিহাদও নয় কি?’ তিনি বললেন, “আল্লাহর পথে জিহাদও নয়। তবে এমন কোন ব্যক্তি (এর আমল) যে নিজের জান-মাল সহ বের হয় এবং তারপর কিছুও সঙ্গে নিয়ে আর ফিরে আসে না।<sup>3</sup>

<sup>1</sup> (ইবনে বায, ফাতাওয়া ইসলামিয়াহ ২/১৭০)

<sup>2</sup> (তামামুল মিনাহ, আল্লামা আলবানী ৪১২ পৃঃ ৫৪)

<sup>3</sup> (আহমাদ, মুসনাদ ৩/২৯৮, বুখারী ৯৬৯, আবু দাউদ ২৪৩৮, তিরমিযী ৭৫৭, ইবনে মাজাহ ১৭২৭নং)

আর রোযা হল একটি নেক আমল। সুতরাং তা পালন করাও এ দিনগুলিতে মুস্তাহাব।<sup>1</sup>

প্রিয় নবী ﷺ ও এই নয় দিনে রোযা পালন করতেন। তাঁর পত্নী (হযরত হাফসাহ রাঃ) বলেন, “নবী ﷺ যুল হজ্জের নয় দিন, আশূরার দিন এবং প্রত্যেক মাসের তিন দিন; মাসের প্রথম সোমবার এবং বৃহস্পতিবার রোযা রাখতেন।”<sup>2</sup>

বাইহাকী ‘ফাযায়েলুল আওকাত’ এ বলেন, এই হাদীসটি হযরত আয়েশা (রাঃ) এর ঐ হাদীস অপেক্ষা উত্তম যাতে তিনি বলেন, ‘রসূল ﷺ কে (যুলহজ্জের) দশ দিনে কখনো রোযা রাখতে দেখিনি।’<sup>3</sup> কারণ, এ হাদীসটি ঘটনসূচক এবং তা হযরত আয়েশার ঐ অঘটনসূচক হাদীস হতে উত্তম। আর মুহাদ্দেসীনদের একটি নীতি এই যে, যখন ঘটনসূচক ও অঘটনসূচক দু’টি হাদীস পরস্পর-বিরোধী হয় তখন সমন্বয় সাধনের অন্যান্য উপায় না থাকলে ঘটনসূচক হাদীসটিকে প্রাধান্য দেওয়া হয়। কারণ কেউ যদি কিছু ঘটতে না দেখে তবে তার অর্থ এই নয় যে, তা ঘটেই নি। তাই যে ঘটতে দেখেছে তার কথাটিকে ঘটার প্রমাণস্বরূপ গ্রহণ করা হয়।

মোট কথা, যুলহজ্জ মাসের এই নয় দিনে রোযা রাখা মুস্তাহাব। ইমাম নওবী বলেন, ‘ঐ দিনগুলিতে রোযা রাখা পাকা মুস্তাহাব।’<sup>4</sup>

## ৬। শা’বান মাসের অধিকাংশ দিনের রোযা

আল্লাহর রসূল ﷺ শা’বান মাসের অধিকাংশ দিনগুলিতে রোযা রাখতেন। মা আয়েশা (রাঃ) বলেন, ‘আমি আল্লাহর রসূল ﷺ-কে রমাযান ছাড়া অন্য কোন মাস সম্পূর্ণ রোযা রাখতে দেখি নি। আর শা’বান মাস ছাড়া অন্য কোন মাসের অধিকাংশ দিনগুলিতে তাঁকে রোযা রাখতে দেখি নি।’<sup>5</sup>

<sup>1</sup> (আশশারহুল মুমতে’ ৬/৪৭১)

<sup>2</sup> (আবু দাউদ ২৪৩৭, সহীহ আবু দাউদ ২১২৯নং, নাসাঈ)

<sup>3</sup> (মুসলিম ১১৭৬, আবু দাউদ ২৪৩৯, তিরমিযী ৭৫৬, ইবনে মাজাহ ১৭২৯নং)

<sup>4</sup> (শরহুল নওবী ৮/৩২০)

<sup>5</sup> (আহমাদ, মুসনাদ, বুখারী ১৯৬৯, মুসলিম ১১৫৬নং, তিরমিযী, ইবনে মাজাহ)

হযরত উসামাহ বিন যায়দ (رضي الله عنه) কর্তৃক বর্ণিত, তিনি বলেন, 'একদা আমি বললাম, হে আল্লাহর রসূল! আপনাকে শা'বান মাসে যত রোযা রাখতে দেখি তত অন্য কোন মাসে তো রাখতে দেখি না, (এর রহস্য কি)?' উত্তরে তিনি বললেন, "এটা তো সেই মাস, যে মাস সম্বন্ধে মানুষ উদাসীন, যা হল রজব ও রমাযানের মাঝে। আর এটা তো সেই মাস; যাতে বিশু জাহানের প্রতিপালকের নিকট আমলসমূহ পেশ করা হয়। তাই আমি পছন্দ করি যে, আমার রোযা রাখা অবস্থায় আমার আমল (আল্লাহর নিকট) পেশ করা হোক।<sup>1</sup>

মা আয়েশা (রাঃ) বলেন, 'আল্লাহর রসূল (ﷺ)-এর নিকট রোযা রাখার জন্য পছন্দনীয় মাস ছিল শা'বান। তিনি সে মাসের রোযাকে রমাযানের সাথে মিলিত করতেন।'<sup>2</sup>

এখানে তাঁর শা'বানের অধিকাংশ দিনগুলিতে রোযা এবং এই মাসের রোযার সাথে রমাযানের রোযাকে মিলিত করার হাদীসের সাথে রমাযানের ২/১ দিন আগে রোযা রাখতে নিষেধকারী হাদীসের<sup>3</sup> অথবা তার কৃষ্ণপক্ষের দিনগুলিতে রোযা রাখতে নিষেধকারী হাদীসের<sup>4</sup> কোন সংঘর্ষ বা পরস্পর-বিরোধিতা নেই। কেননা, উভয় শ্রেণীর হাদীসের মাঝে সমন্বয় সাধন সম্ভব। আর তা এইভাবে যে, ঐ দিনগুলিতে রোযা রাখা নিষিদ্ধ; যদি অভ্যাসগতভাবে কোন রোযা না পড়ে তাহলে। পক্ষান্তরে অভ্যাসগতভাবে ঐ দিনগুলিতে রোযা পড়লে রাখা বৈধ। আর সেটাই ছিল মহানবী (ﷺ)-এর আমল।<sup>5</sup> অর্থাৎ, তিনি অভ্যাসগতভাবে ঐ দিনগুলিতে রোযা রাখতেন। এখতিয়ার করে নয়।

অন্য দিকে এই মাসের ১৫ তারীখের রোযা রাখা এবং তাতে পৃথক কোন বৈশিষ্ট্য বা মাহাত্ম্য আছে মনে করা বিদআত; যেমন এ কথা পূর্বেও আলোচিত হয়েছে। কেননা, এ ব্যাপারে বর্ণিত কোন হাদীস সহীহ নয়।

<sup>1</sup> (নাসাঈ, সহীহ তারগীব, আলবানী ১০০৮নং, তামামুল মিন্নাহ, আল্লামা আলবানী ৪১২পৃঃ)

<sup>2</sup> (সহীহ আবু দাউদ ২১২৪নং)

<sup>3</sup> (বুখারী ১৯১৪, মুসলিম ১০৮২নং)

<sup>4</sup> (সহীহ আবু দাউদ ২০৪৯, সহীহ তিরমিযী, আলবানী ৫৯০নং)

<sup>5</sup> (আহকামুস সাওমি অল-ই'তিকাক, আবু সারী মঃ আব্দুল হাদী ১৭৪পৃঃ)



## ৭। সোম ও বৃহস্পতিবারের রোযা

প্রত্যেক সপ্তাহের সোম ও বৃহস্পতিবার রোযা রাখা সুন্নত ও মুস্তাহাব। যেহেতু তা ছিল মহানবী ﷺ-এর আমল। আর দিন দুটিতে বিশাধিপতি আল্লাহর নিকট বান্দার আমল পেশ করা হয়।

মা আয়েশা (রাঃ) বলেন, ‘আল্লাহর রসূল ﷺ সোম ও বৃহস্পতিবারে রোযা রাখাকে প্রাধান্য দিতেন।’<sup>1</sup>

আবু হুরাইরা (رضي الله عنه) কর্তৃক বর্ণিত, তিনি বলেন, আল্লাহর রসূল ﷺ বলেন, “সোম ও বৃহস্পতিবার (মানুষের) সকল আমল (আল্লাহর দরবারে) পেশ করা হয়। তাই আমি এটা পছন্দ করি যে, আমার রোযা রাখা অবস্থায় আমার আমল (তাঁর নিকট) পেশ করা হোক।”<sup>2</sup>

উক্ত আবু হুরাইরা (رضي الله عنه) হতেই বর্ণিত, তিনি বলেন আল্লাহর রসূল ﷺ বলেছেন, “প্রত্যেক সোম ও বৃহস্পতিবারে (মানুষের) সকল আমল (আল্লাহর নিকট) পেশ করা হয়। (এবং বেহেশতের দ্বারসমূহ উন্মুক্ত করা হয়।) আর (ঐ উভয় দিনে) আল্লাহ আয্যা অজালু প্রত্যেক সেই ব্যক্তিকে মার্জনা করে দেন যে কোন কিছুকে তাঁর অংশী স্থাপন করে না। তবে সেই ব্যক্তিকে ক্ষমা করেন না যার নিজ ভায়ের সাথে বিদেষ থাকে; এই দুই ব্যক্তির জন্য (ফিরিশতার উদ্দেশ্যে) তিনি বলেন, উভয়ের মিলন না হওয়া পর্যন্ত ওদেরকে অবকাশ দাও। উভয়ের মিলন না হওয়া পর্যন্ত ওদেরকে অবকাশ দাও।”<sup>3</sup>

আবু কাতাদাহ (رضي الله عنه) বলেন, ‘সোমবার রোযা রাখার ব্যাপারে নবী ﷺ জিজ্ঞাসিত হলে তিনি বললেন, “এটা হল সেই দিন, যেদিনে আমার জন্ম হয়েছে এবং আমার উপর সর্বপ্রথম কুরআন অবতীর্ণ হয়েছে।” অন্য এক বর্ণনায় আছে, “ঐ দিনে আমি (নবীরূপে) প্রেরিত হয়েছি।”<sup>4</sup>

<sup>1</sup> (আহমাদ, মুসনাদ ৬/৮০, ৮৯, ১০৬, তিরমিযী, নাসাই, ইবনে মাজাহ ১৭৩৯নং, ইরওয়াউল গালীল, আলবানী ৪/১০৫-১০৬)

<sup>2</sup> (তিরমিযী, সহীহ তারগীব, আলবানী ১০২৭নং)

<sup>3</sup> (আহমাদ, মুসনাদ ২/৩২৯, মুসলিম ২৫৬৫ নং, প্রমুখ)

<sup>4</sup> (আহমাদ, মুসনাদ ৫/২৯৭, ২৯৯, মুসলিম ১১৬২, আবু দাউদ ২৪২৫নং)

## ৮। প্রত্যেক মাসে তিনটি রোযা

প্রত্যেক (চান্দ্র) মাসে ৩টি করে রোযা রাখা মুস্তাহাব। আব্দুল্লাহ বিন আমর বিন আস (رضي الله عنه) বলেন, আল্লাহর রসূল (ﷺ) বলেছেন, “প্রত্যেক মাসে তিনটি রোযা রাখা সারা বছর রোযা রাখার সমতুল্য।”<sup>1</sup>

আবু যার (رضي الله عنه) বলেন, আল্লাহর রসূল (ﷺ) বলেছেন, “যে ব্যক্তি প্রত্যেক মাসে ৩টি করে রোযা রাখবে, তার সারা বছর রোযা রাখা হবে। আল্লাহ আযযা অজাল্লু এর সত্যায়ন অবতীর্ণ করে বলেন, কেউ কোন ভাল কাজ করলে, সে তার ১০ গুণ প্রতিদান পাবে। (কুরআনুল কারীম ৬/১৬০) এক দিন ১০ দিনের সমান।”<sup>2</sup>

ইবনে আব্বাস (رضي الله عنه) হতে বর্ণিত, তিনি বলেন, আল্লাহর রসূল (ﷺ) বলেছেন, “ঈর্ষের (রমাযান) মাসে রোযা আর প্রত্যেক মাসের তিনটি রোযা অন্তরের বিদ্বेष ও খটকা দূর করে দেয়।”<sup>3</sup>

পক্ষান্তরে মহানবী (ﷺ) তাঁর একান্ত ভক্ত আবু হুরাইরা (رضي الله عنه) কে এই রোযা রাখতে অসিয়ত (বিশেষ উপদেশ) করেছেন।<sup>4</sup>

অবশ্য এই তিন রোযা প্রত্যেক চান্দ্র মাসের শুক্লপক্ষের শেষ দিনগুলিতে; অর্থাৎ, ১৩, ১৪ ও ১৫ তারীখে হওয়া মুস্তাহাব। যেহেতু আবু যার (رضي الله عنه) বলেন, আল্লাহর রসূল তাঁকে বলেছেন, “হে আবু যার! মাসে ৩টি রোযা রাখলে ১৩, ১৪ ও ১৫ তারীখে রাখ।”<sup>5</sup>

আল্লাহর রসূল (ﷺ) রাখতেন প্রত্যেক মাসের প্রথম সোমবার, অতঃপর তার পরের বৃহস্পতিবার, অতঃপর তার পরবর্তী বৃহস্পতিবার।<sup>6</sup> কোন কোন বর্ণনা মতে মাসের শুক্লপক্ষের শেষ তিনদিন রোযা রাখতেন।<sup>7</sup> আর কোন কোন বর্ণনা মতে তিনি কোন নির্দিষ্ট দিনের খেয়াল না করেই যে কোন দিনে ৩টি রোযা রাখতেন।<sup>8</sup>

<sup>1</sup> (বুখারী ১৯৭৯নং, মুসলিম ১১৫৯ নং)

<sup>2</sup> (তিরমিযী, ইবনে মাজাহ ১৭০৮নং, ইরওয়াউল গালীল, আলবানী ৪/১০২)

<sup>3</sup> (বায়যার, সহীহ তারগীব, আলবানী ১০১৮নং)

<sup>4</sup> (দ্রঃ আহমাদ, মুসনাদ ২/৪৫৯, বুখারী ১১৭৮, মুসলিম ৭২১, দারেমী, বাইহাকী ৪/২৯৩ প্রমুখ)

<sup>5</sup> (আহমাদ, মুসনাদ ৫/১৬২, ১৭৭, তিরমিযী, নাসাই, বাইহাকী ৪/২৯৪, ইরওয়াউল গালীল, আলবানী ৯৪৭নং)

<sup>6</sup> (আহমাদ, মুসনাদ, আবু দাউদ, নাসাই, তামামুল মিন্নাহ, আনামা আলবানী ৪১৫পৃঃ দ্রঃ)

<sup>7</sup> (সহীহ আবু দাউদ ২১৪০নং)

<sup>8</sup> (মুসলিম ১১৬০, সহীহ আবু দাউদ ২১৪২নং)

## ৯। দাউদী রোযা

যার সামর্থ্য আছে তার জন্য একদিন রোযা থাকা ও তার পরের দিন রোযা না থাকা; ভিন্ন কথায় একদিন পরপর রোযা রাখা মুস্তাহাব। আব্দুল্লাহ বিন আম্র বিন আস (رضي الله عنه) কর্তৃক বর্ণিত, তিনি বলেন, আল্লাহর রসূল (ﷺ) বলেছেন, “আল্লাহর নিকট সর্বাপেক্ষা পছন্দনীয় রোযা হল দাউদ (عليه السلام)-এর রোযা। আর আল্লাহর নিকট সর্বাপেক্ষা পছন্দনীয় নামায হল দাউদ (عليه السلام)-এর নামায। তিনি অর্ধ রাত্রি ঘুমাতে। অতঃপর তৃতীয় প্রহরে নামায পড়ে পুনরায় ষষ্ঠভাগে ঘুমাতে, আর তিনি একদিন পানাহার করতেন ও পরদিন রোযা রাখতেন।”<sup>1</sup>

পরম্ব মহানবী (ﷺ) ইবনে আম্রকে বলেছেন, “তুমি একদিন রোযা থাক এবং একদিন পানাহার কর। এটাই হল দাউদ (عليه السلام)-এর রোযা; যা সর্বশ্রেষ্ঠ রোযা।” ইবনে আম্র বললেন, ‘কিন্তু আমি তার থেকেও উত্তম (প্রত্যেক দিন রোযা রাখতে) পারি।’ তা শুনে মহানবী (ﷺ) বললেন, “(আমি যা বললাম) তার চাইতে উত্তম কিছুই নেই।”<sup>2</sup> অন্য এক বর্ণনায় আছে, মহানবী (ﷺ) তাঁকে বললেন, “দাউদ (عليه السلام)-এর রোযার উপর কোন রোযা নেই। অর্ধ বছর রোযা; একদিন রোযা রাখ এবং তার পরের দিন পানাহার কর।”<sup>3</sup>

বলা বাহুল্য, এ রোযা সামর্থ্যের সাথে সম্পর্ক রাখে। অতএব শর্ত হল, যেন এ রোযা রাখতে গিয়ে স্বাস্থ্য এমন দুর্বল না হয়ে যায়, যাতে নফল রোযা থেকে উত্তম বা গুরুত্বপূর্ণ আমল পালনে ক্রটি পরিলক্ষিত হয়। যেমন, আল্লাহর অন্যান্য হক এবং বান্দার যাবতীয় অধিকার আদায়ে যেন কোন প্রকার ক্রটি প্রকাশ না পায়। নচেৎ, তা বর্জন করাই উত্তম।<sup>4</sup>

<sup>1</sup> (বুখারী ১১৩১, মুসলিম ১১৫৯নং, আবু দাউদ, নাসাই, ইবনে মাজাহ)

<sup>2</sup> (বুখারী ১৯৭৬নং)

<sup>3</sup> (ঐ ১৯৮০নং)

<sup>4</sup> (দ্রঃ আশ্শারহুল মুমতে' ৬/৪৭৪, আহকামুস সাওমি অল-ই'তিকাফ, আবু সারী মঃ আব্দুল হাদী ১৭৬পৃঃ)

## ১০। যৌন-পীড়িত যুবকদের রোযা

যৌন-পীড়িত যে যুবক ব্যভিচারে লিপ্ত হয়ে পড়ার আশঙ্কা করে অথচ ভরণ-পোষণ বহন করার সামর্থ্য না থাকার ফলে বিবাহ করতে পারে না, সে যুবকের জন্য রোযা রাখা বিধেয়।

এ ব্যাপারে মহানবী ﷺ যুবকদেরকে পথনির্দেশ করে বলেন, “হে যুবকদল! তোমাদের মধ্যে যে ব্যক্তি (বিবাহের অর্থাৎ স্ত্রীর ভরণপোষণ ও রতিক্রিয়ার) সামর্থ্য রাখে সে যেন বিবাহ করে। কারণ, বিবাহ চক্ষুকে দস্তুরমত সংযত করে এবং লজ্জাস্থান হিফায়ত করে। আর যে ব্যক্তি ঐ সামর্থ্য রাখে না সে যেন রোযা রাখে। কারণ, তা যৌনেন্দ্রিয় দমনকারী।”<sup>1</sup>

তিনি খাসী হওয়ার কথা অবৈধ ঘোষণা করে বলেন, “আমার উম্মতের খাসী করা হল, রোযা রাখা।”<sup>2</sup>

প্রসঙ্গতঃ উল্লেখ্য যে, এই হল সেই যৌন-পীড়িত ও যৌবনের অগ্নিদাহে দক্ষ এবং বিবাহে অসমর্থ যুবকদের জন্য নবী করীম ﷺ-এর অব্যর্থ চিকিৎসা। আর তা হল রোযা। সুতরাং তাদের জন্য গুণ্ড অভ্যাস হস্তমৈথুন ব্যবহার করা বৈধ নয়। নচেৎ, তারা তাদের দলভুক্ত হয়ে পড়বে, যাদের জন্য বলা হয়েছিল,

﴿أَتَسْتَبْدِلُونَ الَّذِي هُوَ أَدْنَىٰ بِالَّذِي هُوَ خَيْرٌ﴾

“তোমরা কি যা উৎকৃষ্ট তার বিনিময়ে নিকৃষ্ট জিনিস গ্রহণ করতে চাও?” (কুরআনুল কারীম ২/৬১)

আর যেহেতু হস্তমৈথুন অভ্যাসটাই সেই মুমিনদের গুণ নয়, যাদের কথা মহান আল্লাহ নিজ কুরআনে উল্লেখ করেছেন। তিনি বলেন,

﴿وَالَّذِينَ هُمْ لِغُرُوجِهِمْ حَافِظُونَ - إِلَّا عَلَىٰ أَزْوَاجِهِمْ أَوْ مَا مَلَكَتْ أَيْمَانُهُمْ فَإِنَّهُمْ غَيْرُ مَلُومِينَ - فَمَنْ ابْتَغَىٰ وَرَاءَ ذَلِكَ فَأُولَٰئِكَ هُمُ الْعَادُونَ﴾

<sup>1</sup> (আহমাদ, মুসনাদ ১/৫৭, বুখারী ১৯০৫, মুসলিম ১৪০০, আবু দাউদ ২০৪৬, তিরমিযী ১০৮১, নাসাই, ইবনে মাজাহ প্রমুখ, মিশকাতুল মাসাবীহ ৩০৮০নং)

<sup>2</sup> (আহমাদ, মুসনাদ ২/১৭৩ প্রমুখ, সিলসিলাহ সহীহাহ, আলবানী ১৮৩০নং)

অর্থাৎ, যারা নিজেদের যৌনাঙ্গকে সংযত রাখে। তবে নিজেদের পত্নী অথবা অধিকারভুক্ত দাসীদের ক্ষেত্রে অন্যথা করলে তারা নিন্দনীয় হবে না। আর যারা এদের ছাড়া অন্যকে কামনা করে তারাই সীমালংঘনকারী।”

(কুরআনুল কারীম ২৩/৫-৭)

মা আয়েশা (রাঃ) উক্ত আয়াতের তফসীরে বলেন, ‘যে ব্যক্তি নিজের বিবাহিত স্ত্রী অথবা ক্রীতদাসী ছাড়া (যৌনক্ষুধা নিবারণের জন্য) অন্য পথ অবলম্বন করবে সেই সীমালংঘনকারী।’<sup>1</sup>

## ১১। সাধারণ নফল রোযা

সাধারণ নফল রোযা; যা কোন নির্দিষ্ট কারণ বা দিনের সাথে সীমাবদ্ধ নয়। এমন রোযা নিষিদ্ধ দিন ছাড়া যে কোনও দিনে অনির্দিষ্টভাবে রাখা যাবে। মহানবী ﷺ বলেন, “শীতকালের রোযা ঠাণ্ডা গনীমত (যুদ্ধজয়ে লব্ধ সম্পদ)।”

অন্য এক বর্ণনায় তিনি বলেন, “শীতকাল মুমিনের বসন্তকাল। তার রাত্রি লম্বা হওয়ার ফলে সে তাহাজ্জুদ পড়ে এবং তার দিন ছোট হওয়ার ফলে সে রোযা রাখে।”<sup>2</sup>

বলা বাহুল্য, এমন রোযা দ্বীনের সহজ-সরল নিয়ম-নীতির ভিত্তিতেই বিধিবদ্ধ।

## নফল রোযা ভাঙ্গা বৈধ

যে ব্যক্তি নফল রোযা রাখে, তার জন্য তা ভাঙ্গা বা দিনের যে কোন অংশে তা ছেড়ে দেওয়া বৈধ। যেহেতু মহানবী ﷺ বলেন, “নফল রোযাদার নিজের আমীর। ইচ্ছা হলে সে রোযা থাকতে পারে, আবার ইচ্ছা না হলে সে তা ভাঙতেও পারে।”<sup>3</sup>

মা আয়েশা (রাঃ) বলেন, একদা নবী ﷺ তাঁর নিকট এসে জিজ্ঞাসা করলেন, ‘তোমাদের কাছে (খাবার) কিছু আছে কি?’ বললেন, ‘জী না।’

<sup>1</sup> (হাকেম, মুত্তাদ্‌রাক ২/৩৯৩, সিলসিলাহ সহীহাহ, আলবানী ৪/৪৪৬)

<sup>2</sup> (আহমাদ, মুসনাদ প্রমুখ, সিলসিলাহ সহীহাহ, আলবানী ১৯২২নং)

<sup>3</sup> (আহমাদ, মুসনাদ ৬/৩৪১, তিরমিযী, হাকেম, মুত্তাদ্‌রাক ১/৪৩৯, বাইহাকী ৪/২৭৬ প্রমুখ, সহীহুল জামে’ ৩৮-৫৪নং)

মহানবী ﷺ তখন বললেন, “তাহলে আজকে আমি রোযা থাকলাম।” অতঃপর আর একদিন আমাদেরকে হাইস (খেজুর, পনীর ও ঘি একত্রিত করে প্রস্তুত খাদ্য বিশেষ) উপহার দেওয়া হয়েছিল। আমি তার থেকে কিছু অংশ তাঁর জন্য লুকিয়ে রেখেছিলাম। আর তিনি হাইস ভালোবাসতেন। আমি বললাম, ‘হে আল্লাহর রসূল! আজ আমাদেরকে হাইস উপহার দেওয়া হয়েছে। আর আমি আপনার জন্য কিছুটা লুকিয়ে রেখেছি।’ তিনি বললেন, “আমার কাছে নিয়ে এস। আমি সকাল থেকে রোযা অবস্থায় ছিলাম।” এ কথা বলে তিনি তা খেলেন এবং বললেন, “নফল রোযাদারের উদাহরণ ঐ লোকের মত যে নিজ মাল থেকে (নফল) সাদকাহ বের করে। অতঃপর সে চাইলে তা দান করে, না চাইলে রেখে নেয়।”<sup>1</sup>

রোযা ভেঙ্গে ফেললে তা কাযা করা ওয়াজেব নয়। আবু সাঈদ খুদরী (رضي الله عنه) বলেন, একদা আমি আল্লাহর রসূল ﷺ-এর জন্য খাবার তৈরী করলাম। তিনি তাঁর অন্যান্য সহচর সহ আমার বাড়িতে এলেন। অতঃপর যখন খাবার সামনে রাখা হল, তখন দলের মধ্যে একজন বলল, ‘আমার রোযা আছে।’ তা শুনে আল্লাহর রসূল ﷺ বললেন, “তোমাদের ভাই তোমাদেরকে দাওয়াত দিয়ে খরচ (বা কষ্ট) করেছে।” অতঃপর তিনি তার উদ্দেশ্যে বললেন, “রোযা ভেঙ্গে দাও। আর চাইলে তার বিনিময়ে অন্য একদিন রোযা রাখ।”<sup>2</sup>



<sup>1</sup> (আহমাদ, মুসনাদ ৬/৪৯, ২০৭, মুসলিম ১১৫৪, আবু দাউদ ২৪৫৫, নাসাঈ ২৩২১, ইবনে মাজাহ ১৭০১, ইবনে খুযাইমাহ, সহীহ ২১৪১নং, দারাকুতুনী, সুনান, বাইহাকী ৪/২৭৫)

<sup>2</sup> (বাইহাকী ৪/২৭৯, ত্বাবারানী, মু'জাম, ইরওয়াউল গালীল, আলবানী ১৯৫২নং)

## অষ্টদশ অধ্যায়

### যে দিনগুলিতে রোযা রাখা নিষিদ্ধ

মহানবী ﷺ কোন হিকমত ও যুক্তির ফলে মুসলিমকে কতকগুলি দিনে রোযা রাখতে নিষেধ করেছেন। সেই দিনগুলি পরবর্তীতে আলোচিত হল।

### ১। দুই ঈদের দিন

সমস্ত উলামা এ ব্যাপারে একমত যে, উভয় ঈদের দিন রোযা রাখা হারাম। তাতে সে রোযা ফরয হোক; যেমন রমাযানের কাযা বা নযরের রোযা, অথবা নফল হোক। যেহেতু মহানবী ﷺ ঐ দিনে রোযা রাখতে নিষেধ করেছেন।<sup>1</sup>

### ২। তাশরীকের তিন দিন

ঈদুল আযহার পরবর্তী ৩ দিন রোযা রাখা বৈধ নয়। কেননা, মহানবী ﷺ বলেন, “তাশরীকের দিনগুলো পানাহার ও আল্লাহর যিক্র করার দিন।”<sup>2</sup>

যে ব্যক্তির প্রত্যেক সোম ও বৃহস্পতিবার রোযা রাখা অভ্যাস আছে এবং তা যদি তাশরীকের কোন দিন পড়ে, তাহলে তার জন্যও ঐ রোযা রাখা বৈধ নয়। কারণ, সুন্নত কাজ করে হারাম-বিধান লংঘন করা যাবে না।<sup>3</sup>

অবশ্য যে (অমক্কাবাসী) হাজী মিনায় হজ্জের হাদ্ই (কুরবানী) দিতে সক্ষম হয় না, তার জন্য ঐ দিনগুলিতে বিনিমেয় রোযা রাখা বৈধ।

মহান আল্লাহ বলেন,

﴿فَمَنْ تَمَتَّعَ بِالْعُمْرَةِ إِلَى الْحَجِّ فَمَا اسْتَيْسَرَ مِنَ الْهَدْيِ، فَمَنْ لَمْ يَجِدْ

<sup>1</sup> (দ্রঃ বুখারী ১৯৯০, ১৯৯১, ১৯৯৩, ১৯৯৫, মুসলিম ৮২৭, ১১৩৭, ১১৩৮, ১১৪০)

<sup>2</sup> (আহমাদ, মুসনাদ ৪/১৫২, ৫/৭৫, ৭৬, ২২৪, মুসলিম ১১৪১, ১১৪২, সুনানে আরবাবআহ: আবু দাউদ, তিরমিযী, নাসাঈ ও ইবনে মাজাহ)

<sup>3</sup> (আসইলাতুন আজবিবাতুন ফী ফলাতিল ঈদাঈন ২৩পৃঃ)

فَصِيَامُ ثَلَاثَةِ أَيَّامٍ فِي الْحَجِّ وَسَبْعَةٍ إِذَا رَجَعْتُمْ، تِلْكَ عَشْرَةٌ كَامِلَةٌ ﴿

অর্থাৎ, সুতরাং তোমাদের মধ্যে যে ব্যক্তি হজ্জের আগে উমরাহ করে হালাল হয়ে লাভবান হতে (তামাত্তু হজ্জ করতে) চায় সে সহজলভ্য কুরবানী পেশ করবে। কিন্তু যদি কেউ কুরবানী না পায়, তাহলে তাকে হজ্জের সময় ৩দিন এবং ঘরে ফিরে ৭দিন এই পূর্ণ ১০দিন রোযা পালন করতে হবে। (কুরআনুল কারীম ২/১৯৬)

আয়েশা ও ইবনে উমার (رضي الله عنهم) বলেন, 'যে হাজী হাদ্ই দিতে অপারগ সে ছাড়া আর কারো জন্য তাশরীকের দিনগুলিতে রোযা রাখার অনুমতি নেই।'<sup>1</sup>

### ৩। কেবল জুমআর দিন রোযা

জুমআর দিন হল মুসলিমদের সাপ্তাহিক ঈদ। তা ছাড়া এ দিন হল যিকর ও ইবাদতের দিন। তাই তাতে সাহায্য নিতে এ দিনে রোযা না রাখা মুস্তাহাব। পক্ষান্তরে যদি কেউ জুমআর আগে একদিন অথবা পরে একদিন রোযা রাখে, অথবা তার অভ্যাসের কোন রোযা (যেমন গুরুপক্ষের শেষ দিন) পড়ে, অথবা ঐ দিনে আরাফা বা আশূরার রোযা পড়ে, তাহলে তার জন্য সেদিনকার রোযা রাখা মকরুহ নয়।

এক জুমআর দিনে জুয়াইরিয়াহ বিনতে হারেষ রোযা রেখেছিলেন। মহানবী (ﷺ) তাঁর নিকট এসে বললেন, "তুমি কি গতকাল রোযা রেখেছ?" তিনি বললেন, 'জী না।' নবী (ﷺ) বললেন, "আগামী কাল রোযা রাখার ইচ্ছা আছে কি?" তিনি বললেন, 'জী না।' নবী (ﷺ) বললেন, "তাহলে তুমি রোযা ভেঙ্গে ফেল।"<sup>2</sup>

আবু হুরাইরা (رضي الله عنه) কর্তৃক বর্ণিত, আল্লাহর রসূল (ﷺ) বলেন, "তোমাদের মধ্যে কেউ যেন জুমআর দিন রোযা না রাখে। অবশ্য যদি তার একদিন আগে অথবা পরে একটি রোযা রাখে, তাহলে তা রাখতে পারে।"<sup>3</sup>

<sup>1</sup> (বুখারী ১৯৯৭, ১৯৯৮নং)

<sup>2</sup> (আহমাদ, মুসনাদ, বুখারী ১৯৮৬, আবু দাউদ ২৪২২, নাসাই)

<sup>3</sup> (আহমাদ, মুসনাদ ২/৪৯৫, বুখারী ১৯৮৫, মুসলিম ১১৪৪, আবু দাউদ ২৪২০, তিরমিযী, ইবনে মাজাহ ১৭৭৩, ইবনে আবী শাইবাহ, মুসান্নাফ ৯২৪০নং, ইবনে খুযাইমাহ, সহীহ, বাইহাকী)



অন্য এক বর্ণনায় বলেন, “অন্যান্য রাত ছেড়ে জুমআর রাতকে কিয়ামের জন্য খাস করো না এবং অন্যান্য দিন ছেড়ে জুমআর দিনকে রোযার জন্য খাস করো না। অবশ্য কেউ তার অভ্যাসগত রোযা রাখলে ভিন্ন কথা।”<sup>1</sup>

কাইস বিন সাকান বলেন, ‘আব্দুল্লাহর কিছু সঙ্গী-সাথী জুমআর দিনে রোযা রেখে আবু যার (رضي الله عنه) এর নিকট গেলে তিনি তাদেরকে বললেন, ‘তোমাদের উপর কসম রইল! তোমরা অবশ্যই রোযা ভেঙ্গে ফেল। কারণ, জুমআহ হল ঈদের দিন।’<sup>2</sup>

## ৪। কেবল শনিবার রোযা রাখা

ফরয বা নির্দিষ্ট নফল (যেমনঃ অভ্যাসগত গুরুপক্ষের দিন, আরাফা বা আশুরার) রোযা ছাড়া কেবল শনিবার সাধারণ অনির্দিষ্ট নফল রোযা রাখা বৈধ নয়। যেহেতু মহানবী (ﷺ) বলেন, “তোমরা ফরয ছাড়া শনিবার রোযা রেখো না। তোমাদের কেউ যদি ঐ দিন আঙ্গুরের লতা বা গাছের ডাল ছাড়া অন্য কোন খাবার নাও পায়, তাহলে সে যেন তাই চিবিয়ে খায়।”<sup>3</sup>

ত্বীবী বলেন, ‘ফরয’ বলতে রমাযানের ফরয রোযা, নয়র মানা রোযা, কাযা রোযা, কাফফারার রোযা এবং একই অর্থে সুন্নাতে মুআক্কাদাহ রোযা, যেমনঃ আরাফা, আশুরা এবং অভ্যাসগত (গুরুপক্ষের দিনের) রোযা शामिल।<sup>4</sup> অর্থাৎ ঐসব রোযা অন্যান্য দলীলের ভিত্তিতে শনিবারে রাখতে নিষেধ নয়। যেহেতু তারীখের সাথে নির্দিষ্ট সুন্নত রোযাসমূহ যে কোন দিনেই রাখা যাবে।

যেমন তার আগে বা পরে একদিন রোযা রাখলে শনিবার রাখা বৈধ। যেহেতু মহানবী (ﷺ) জুয়াইরিয়াকে বললেন, “তুমি কি আগামী দিন (অর্থাৎ, শনিবার) রোযা রাখবে?” আর তার মানেই হল, শুক্র ও শনিবার

<sup>1</sup> (মুসলিম ১১৪৪নং)

<sup>2</sup> (ইবনে আবী শাইবাহ, মুসান্নাফ ৯২৪৪নং)

<sup>3</sup> (আহমাদ, মুসনাদ ৪/১৮৯, ৬/৩৬৮, সহীহ আবু দাউদ ২১১৬, তিরমিযী ৫৯৪, সহীহ ইবনে মাজ্জাহ, আলবানী ১৪০৩, ইবনে খুযাইমাহ, সহীহ ২১৬৪, দারেমী, সুনান ১৬৯৮নং)

<sup>4</sup> (তুহফাতুল আহওয়ামী ৩/৩৭২)

রোযা রাখলে মকরুহ হবে না।<sup>1</sup>

এই দিনে রোযা রাখা নিষেধ হওয়ার পশ্চাতে যুক্তি ও হিকমত এই যে, ইয়াহুদীরা এই দিনের তা'যীম করত, এই দিন উপবাস করত এবং কাজ-কর্ম ছেড়ে ছুটি পালন করত। সুতরাং সেদিন রোযা রাখলে তাদের সাদৃশ্য প্রকাশ পায়। পক্ষান্তরে আগে বা পরে একদিন মিলিয়ে অথবা নয়র বা কাযা রোযা রাখলে সেদিন রোযা রাখা মকরুহ হবে না।<sup>2</sup>

কিন্তু উম্মে সালামাহ (রাঃ) বলেন যে, 'নবী ﷺ শনিবার রোযা রাখতেন।'<sup>3</sup> বাহ্যতঃ এই হাদীসটি পূর্ববর্ণিত আমলের বিরোধী। তবুও সামঞ্জস্য সাধনের জন্য বলা যায় যে, যখন অবৈধকারী ও বৈধকারী দুটি হাদীস পরস্পর-বিরোধী হয়, তখন অবৈধকারী হাদীসকেই প্রাধান্য দেওয়া হয়। তদনুরূপ মহানবী ﷺ-এর কথা ও আমল পরস্পর-বিরোধী হলে তাঁর কথাকেই অগ্রাধিকার দেওয়া হবে। অতএব এই নীতির ভিত্তিতে কেবল শনিবার রোযা রাখা মকরুহ হবে।<sup>4</sup>

অথবা উম্মু সালামাহ (রাঃ) তাঁকে কোন অভ্যাসগত রোযা রাখতে দেখেছেন।

## ৫। কেবল রবিবার রোযা রাখা

কিছু উলামা কেবল রবিবার রোযা রাখাকে মকরুহ মনে করেছেন। কারণ, রবিবার হল খৃষ্টানদের ঈদ। যেহেতু রোযা রাখাতে এক ধরনের দিনের তা'যীম প্রকাশ পায়। আর কাফেররা তাদের প্রতীক হিসাবে যার তা'যীম করে তার তা'যীম কোন মুসলিমের জন্য বৈধ নয়। পক্ষান্তরে তার সাথে তার পরের দিন একটি রোযা রাখলে আর মকরুহ থাকে না।<sup>5</sup> যেমন ঐ দিনে কোন নয়র, কাযা, আরাফা বা আশুরার রোযা রাখা নিষেধ নয়।

<sup>1</sup> (আশ্শারহুল মুমতে' ৬/৪৬৬)

<sup>2</sup> (ফাইযুর রাহীমির রাহমান, ফী আহকামি অমাওয়ারাইযি রামাযান ৭৯পৃঃ)

<sup>3</sup> (আহমাদ, মুসনাদ ৬/৩২৩, ৩২৪, ইবনে খুযাইমাহ, সহীহ ২১৬৭, ইবনে হিব্বান, সহীহ ৯৪১নং, হাকেম, মুত্তাদরাক ১/৪৩৬, বাইহাকী ৪/৩১৩)

<sup>4</sup> (তামামুল মিন্নাহ, আল্লামা আলবানী ৪০৭পৃঃ)

<sup>5</sup> (আশ্শারহুল মুমতে' ৬/৪৬৭)

## ৬। সন্দেহের দিন রোযা

সন্দেহের দিন হল ৩০শে শা'বান; যখন ২৯ তারিখে আকাশ ধূম্র বা মেঘাচ্ছন্ন থাকার ফলে চাঁদ দেখা সম্ভব হয় না। পক্ষান্তরে ২৯ তারিখে আকাশ পরিষ্কার থাকলে ৩০ তারিখ সন্দেহের দিন থাকে না।

বলা বাহুল্য, ১লা রমাযান কি না তা সন্দেহ করে পূর্বসতর্কতামূলক কাজ ভেবে ঐ দিন রোযা রাখা হারাম। এ কথার দলীল হল আম্মার বিন ইয়াসের (رضي الله عنه)-এর উক্তি, 'যে ব্যক্তি সন্দেহের দিন রোযা রাখল, সে আসলে আবুল কাসেম (رضي الله عنه)-এর নাফরমানী করল।'<sup>1</sup>

মহানবী (صلى الله عليه وسلم) বলেন, "তোমরা রমাযানের আগে আগে এক অথবা দুই দিনের রোযা রেখো না। অবশ্য তার অভ্যাসগত কোন রোযা হলে সে রাখতে পারে।"<sup>2</sup>

আর যেহেতু সন্দেহের দিন রোযা রাখা মহান আল্লাহর শরীয়ত-গণ্ডীর এক প্রকার সীমালংঘন। কারণ, মহান আল্লাহ বলেন,

﴿فَمَنْ شَهِدَ مِنْكُمُ الشَّهْرَ فَلْيَصُمْهُ﴾

অর্থাৎ, তোমাদের মধ্যে যে কেউ এ মাস পাবে সে যেন এ মাসে রোযা রাখে। (কুরআনুল কারীম ২/১৮৫)

আর মহানবী (صلى الله عليه وسلم) বলেন, "তোমরা চাঁদ দেখে রোযা রাখ এবং চাঁদ দেখে ঈদ কর। কিন্তু আকাশে মেঘ থাকলে শা'বানের গুনতি ৩০ পূর্ণ করে নাও।"<sup>3</sup>

যে ব্যক্তি সন্দেহের সাথে ৩০শে শা'বান রোযা রাখে, অতঃপর বুঝতে পারে যে, সেদিন সত্য সত্যই ১লা রমাযান ছিল, সে ব্যক্তি এতদসত্ত্বেও ঐ দিনকার রোযা কাযা করবে। কারণ, সে আসলে ভিত্তিহীন রোযা রেখেছে।

<sup>1</sup> (বুখারী বিনা সনদে ৩৭৬৭, আবু দাউদ ২৩৩৪নং, তিরমিযী, নাসাই, দারেমী, ইবনে হিব্বান, সহীহ, দারেমী, হাকেম, মুত্তাদরাক ১/৪২৪, বাইহাকী ৪/২০৮, ইরওয়াউল গালীল, আলবানী ৯৬১নং)

<sup>2</sup> (বুখারী ১৯১৪, মুসলিম ১০৮২নং)

<sup>3</sup> (বুখারী ১৯০০, মুসলিম ১০৮০নং)

আর যে ব্যক্তি ভিত্তিহীন রোযা রাখে, তার রোযা যথেষ্ট নয়। সে তো আসলে চাঁদ না দেখে, চাঁদের অস্তিত্বের প্রমাণ না নিয়ে রোযা রেখেছে; যদিও প্রকৃতপক্ষে চাঁদ মেঘের আড়ালে বিদ্যমান ছিল।<sup>1</sup>

অবশ্য ঐ সন্দেহের দিন ৩০শে শা'বান যদি কেউ তার অভ্যাসগত রোযা (যেমন সোম অথবা বৃহস্পতিবার বলে) রাখে, তাহলে তা দৃষণীয় নয়; যেমন সে কথা হাদীসেও স্পষ্টভাবে উল্লেখিত হয়েছে।

## ৭। বছরের প্রতিদিন রোযা রাখা

নিষিদ্ধ দিনগুলি ছাড়া বছরের প্রতি দিন রোযা রাখা মকরুহ অথবা হারাম। কারণ, মহানবী ﷺ বলেন, “সে রোযা রাখল না, যে সমস্ত দিনগুলিতে রোযা রাখল।”<sup>2</sup>

তিনি আরো বলেন, “যে ব্যক্তি প্রতিদিন রোযা রাখে, তার রোযা হয় না এবং সে পানাহারও করে না।”<sup>3</sup>

তিনি আরো বলেন, “যে ব্যক্তি প্রতিদিন রোযা রাখে, তার প্রতি জাহান্নামকে এত সংকীর্ণ করা হয়, পরিশেষে তা এতটুকু হয়ে যায়।” আর এ কথা বলার সাথে সাথে তিনি তাঁর হাতের মুঠোকে বন্ধ করলেন।<sup>4</sup>

এখানে জাহান্নাম সংকীর্ণ হওয়ার অর্থ এই যে, জাহান্নামে তার বাসস্থান সংকীর্ণ হবে। যেহেতু সে নিজের জন্য কাঠিন্য পছন্দ করে, কষ্ট সত্ত্বেও তাতে নিজের আত্মাকে উদ্বুদ্ধ করে, মহানবী ﷺ-এর আদর্শ থেকে বিমুখতা প্রকাশ করে এবং এই মনে করে যে, সে যা করছে তা তাঁর আদর্শ থেকে উত্তম।<sup>5</sup>

পক্ষান্তরে মহানবী ﷺ বলেন, “শোন! আমি তোমাদের সবার চাইতে

<sup>1</sup> (ফিকহুস সুন্নাহ ১/৩৯৬, তাযকীরু ইবাদির রাহমান, ফীমা অরাদা বিসিয়ামি শাহরি রামাযান ৩৯ পৃঃ)

<sup>2</sup> (বুখারী ১৯৭৭, মুসলিম ১১৫৯নং প্রমুখ)

<sup>3</sup> (আহমাদ, মুসনাদ ৪/২৪, নাসাঈ, ইবনে মাজাহ ১৭০৫, ইবনে খুযাইমাহ, সহীহ ২১৫০নং, হাকেম, মুত্তাদিরাক ১/৪৩৫, সহীহুল জামেইস সাগীর, আলবানী ৬৩২৩নং)

<sup>4</sup> (আহমাদ, মুসনাদ ৪/৪১৪, বাইহাকী ৪/৩০০, ইবনে খুযাইমাহ, সহীহ ২১৫৪, ২১৫৫নং)

<sup>5</sup> (দ্রঃ ফাতহুল বারী ৪/১৯৩, যামাঃ ২/৮৩)

বেশী আল্লাহকে ভয় করে থাকি, তোমাদের সবার চাইতে আমার তাকওয়া বেশী। কিন্তু আমি রোযা রাখি, আবার তা ত্যাগও করি। রাতে নামায পড়ি, আবার ঘুমিয়েও থাকি। বিবাহ করে স্ত্রী-মিলনও করি। সুতরাং যে ব্যক্তি আমার সন্নত-বিমুখ হবে, সে আমার দলভুক্ত নয়।”<sup>1</sup>

## ৮। সওমে বিসাল

মাঝে ইফতারী না করে এবং সেহরীও না খেয়ে একটানা দুই অথবা ততোধিক দিন রোযা রাখাকে ‘সওমে বিসাল’ বলা হয়। এই শ্রেণীর রোযা রাখতে আল্লাহর রসূল ﷺ নিষেধ করেছেন। যেহেতু তাতে রয়েছে অতিরঞ্জন এবং আত্মপীড়ন।

মহানবী ﷺ বলেন, “তোমরা ‘সওমে বিসাল’ থেকে দূরে থাক।” এ কথা তিনি ৩ বার পুনরাবৃত্তি করলেন। সাহাবাগণ বললেন, “কিন্তু হে আল্লাহর রসূল! আপনি তো বিসাল করে থাকেন?” তিনি বললেন, “এ ব্যাপারে তোমরা আমার মত নও। কারণ, আমি রাক্বি ষাপন করি, আর আমার প্রতিপালক আমাকে পানাহার করিয়ে থাকেন। সুতরাং তোমরা সেই আমল করতে উদ্বুদ্ধ হও, যা করতে তোমরা সক্ষম।”<sup>2</sup>

অবশ্য ইফতারী না করে সেহরী খাওয়া পর্যন্ত ‘বিসাল’ করা চলে; যদি তাতে রোযাদারের কোন কষ্ট না হয়। যেহেতু আবু সাঈদ খুদরী (رض) কর্তৃক বর্ণিত, মহানবী ﷺ বলেছেন, “তোমরা ‘বিসাল’ করো না। কিন্তু যদি তোমাদের মধ্যে কেউ তা করতেই চায়, তাহলে সে সেহরী পর্যন্ত করুক।”<sup>3</sup>

## ৯। স্বামীর বর্তমানে স্ত্রীর রোযা রাখা

স্বামী-স্ত্রীর জীবন বড় মধুর, বড় যৌনসুখময় রোমাঞ্চকর। স্ত্রীর তুলনায় স্বামীই এ সুখ বেশী উপভোগ করে থাকে। তাই মহানবী ﷺ মহিলাকে নিষেধ করলেন, যাতে স্বামী ঘরে থাকলে তার বিনা অনুমতিতে স্ত্রী রোযা না রাখে।

<sup>1</sup> (বুখারী ৫০৬৩, মুসলিম ১৪০১নং, প্রমুখ)

<sup>2</sup> (বুখারী ১৯৬৬, মুসলিম ১১০৩নং, প্রমুখ)

<sup>3</sup> (বুখারী ১৯৬৭নং)

আবু হুরাইরা কর্তৃক বর্ণিত, মহানবী ﷺ বলেন, “মহিলা যেন স্বামীর বর্তমানে তার বিনা অনুমতিতে রমায়ানের রোযা ছাড়া একটি দিনও রোযা না রাখে।”<sup>1</sup>

উলামাগণ উক্ত নিষেধকে হারামের অর্থে ব্যবহার করেন। আর সে জন্যই বিনা অনুমতিতে স্ত্রী নফল রোযা রাখলে স্বামীর জন্য তা নষ্ট করে দেওয়া বৈধ মনে করেন। যেহেতু এটা স্বামীর প্রাপ্য হক এবং স্ত্রীর তরফ থেকে তার অধিকার হরণ। অবশ্য এ অধিকার কেবল নফল রোযায়, রমায়ানের ফরয রোযার ক্ষেত্রে স্বামীর সে অধিকার থাকবে না। আর ফরয রোযা রাখতে স্ত্রীও স্বামীর অনুমতির অপেক্ষা করবে না।

পক্ষান্তরে স্বামী ঘরে না থাকলে তার বিনা অনুমতিতে স্ত্রী নফল রোযা রাখতে পারে। রোযা রাখার পর দিনের বেলায় স্বামী ঘরে ফিরলে, তার অধিকার আছে, সে স্ত্রীর রোযা নষ্ট করতে পারে।

অনুরূপভাবে স্বামী অসুস্থ অথবা সঙ্গমে অক্ষম হলেও স্ত্রী তার বিনা অনুমতিতে রোযা রাখতে পারে।<sup>2</sup>

## ১০। রজব মাসের রোযা

খাস রজব মাসে রোযা রাখা মকরুহ। কারণ, তা জাহেলিয়াতের এক প্রতীক। জাহেলী যুগের লোকেরাই এ মাসের তা'যীম করত। পক্ষান্তরে সুন্নাহতে এর তা'যীমের ব্যাপারে কিছু বর্ণিত হয় নি। আর এ মাসের নামায ও রোযার ব্যাপারে যা কিছু বর্ণনা করা হয়ে থাকে, তার সবটাই মিথ্যা।<sup>3</sup>

## ১১। শবেবরাতের রোযা

১৫ই শা'বানকে শবেবরাত বলা ভুল। যেমন তার রোযাও বিদআত। কারণ, এ ব্যাপারে কোন সহীহ হাদীস বর্ণিত হয় নি। অবশ্য অভ্যাসগতভাবে মাসের ৩টি রোযার ১টি ঐ দিনে হলে দোষাবহ নয়।

<sup>1</sup> (আহমাদ, মুসনাদ ২/২৪৫, ৩১৬, বুখারী ৫১৯৫, মুসলিম ১০২৬, আবু দাউদ ২৪৫৮, তিরমিযী ৭৮-২, ইবনে মাজাহ ১৭৬১, দারেমী, সুন্না ১৬৭১নং, ইবনে হিব্বান, সহীহ ৯৫৪নং, হাকেম, মুত্তাদরাক ৪/১৭৩ প্রমুখ)

<sup>2</sup> (ফিকহুস সুন্নাহ ১/৩৯৭)

<sup>3</sup> (আশ'শারহুল মুমতে' ৬/৪৭৬)

আলহামদু লিল্লাহ। আরবীতে এর লিখা শেষ হল ১/৪/১৪২০হিঃ তারীখে।  
অনুবাদ ও সরাসরি কম্পোজ শেষ হল ৯/১/১৪২৪হিঃ তারীখে।  
والله الموفق، وصلى الله على نبينا محمد وعلى آله وصحبه أجمعين.

সমাপ্ত

## প্রমাণপত্রী

১. আহমাদ, মুসনাদ
২. আসইলাতুন অআজবিবাতুন ফী শ্বালাতিল ইদাঈন
৩. আহকামুল জ্ঞানায়েয, আলবানী
৪. আবু দাউদ
৫. আউনুল মাবুদ
৬. আদাবুয যিফাফ, আলবানী
৭. আব্দুর রায্যাক, মুসান্নাফ
৮. আবু য্যা'লা
৯. আহকামুস সাওম
১০. আহকামুস সাওমি অল-ই'তিকাক, আবু সারী মঃ আব্দুল হাদী
১১. ইবনে আসাকের
১২. ইতহাফু আহলিল ইসলাম বিআহকামিস সিয়াম, জারুদ্বাহ আলি জারুদ্বাহ
১৩. ইবনে আবী শাইবাহ, মুসান্নাফ
১৪. ইবনে খুযাইমাহ, সহীহ
১৫. ইরওয়াউল গালীল, আলবানী
১৬. আল-ইখতিয়ারাতুল ফিকহিয়্যাহ, ইবনে তাইমিয়্যাহ
১৭. ইবনে মাজ্জাহ
১৮. ইবনে হিব্বান, সহীহ
১৯. শারহুল উমদাহ
২০. আল-কাবায়ের, যাহাবী
২১. কাই নাস্তাফীদা মিন রামাযান, ফাহদ বিন সুলাইমান
২২. কাইফা নাস্তাফীদা রামাযান, আব্দুল্লাহ আস-সালেহ
২৩. কিতাবুস সালাহ, ইবনুল কাইয়্যেম
২৪. কিতাবুস সিয়াম, কীলানী
২৫. কুরআন মাজীদ
২৬. তফসীর কুরতুবী
২৭. তাযকীর ইবাদির রাহমান, ফীমা অরাদা বিসিয়ামি শাহরি রামাযান, ইয়াকুব বিন ইউসুফ
২৮. তাফসীর ফাতহুল ক্বাদীর
২৯. তাওজীহাতুন অফাওয়াএদ লিসসা-য়েমীনা অসসায়েমাত
৩০. তামামুল মিন্নাহ, আব্দামা আলবানী
৩১. তাওজীহাত লিস-সায়েমীন অস-সায়েমাত



৩২. তিরমিযী
৩৩. ভাহাবী
৩৪. ত্বাবারানী, মু'জাম
৩৫. দারেমী, সুনান
৩৬. দারাকুত্বনী, সুনান
৩৭. দুরুসু রামাযান অকাফাত লিস্-সায়েমীন, সালমান বিন ফাহদ আল-আওদাহ
৩৮. নাসাঈ
৩৯. নাইলুল আওতার, ইমাম শওকানী
৪০. ফাতাওয়া ইসলামিয়াহ
৪১. ফাতহুল বারী
৪২. ফাতাওয়াল মারআহ
৪৩. আলফাওয়াইদুল মাজমূআহ ফিল আহাদীসিল মাওযুআহ, শাওকানী
৪৪. ফাতাওয়া মুহিন্মাহ, তাভাতাআল্লাকু বিস্-সিয়াম, ইবনে বায
৪৫. ফাইযুর রাহীমির রাহমান, ফী আহকামি অমাওয়াইযি রামাযান, আব্দুল্লাহ তাইয়্যার
৪৬. ফিকহুয যাকাত, ইউসুফ কারযাবী
৪৭. ফিকহুস সুন্নাহ, সাইয়েদ সাবেক
৪৮. ফুসুলুন ফিস্-সিয়ামি অত্-তারাবীহি অয্-যাকাহ, ইবনে উযাইমীন
৪৯. বাহিহাকী
৫০. বাযযার
৫১. বুখারী
৫২. মাজাল্লাতুল বুহূসিল ইসলামিয়াহ
৫৩. মালেক, মুঅত্তা
৫৪. মাজাল্লাতুদ দা'ওয়া, ইবনে বায
৫৫. মাজমূ' ফাতাওয়া, ইবনে তাইমিয়াহ
৫৬. মাজাল্লাতুল বায়ান
৫৭. মাজ্জমাউয যাওয়াদ
৫৮. মাজ্জালিসু শাহরি রামাযান, ইবনে উযাইমীন
৫৯. মিশকাতুল মাসাবীহ
৬০. মিরআতুল মাফাতীহ, উবাইদুল্লাহ রহমানী মুবারকপুরী
৬১. মুসলিম
৬২. আল-মুগনী, ইবনে কুদামাহ
৬৩. মু'জামুল বিদা'
৬৪. আশ্শারহুল মুমতে', ইবনে উযাইমীন

৬৫. ইবনে হাযম
৬৬. যয়ীফ আবু দাউদ, আলবানী
৬৭. যয়ীফ ইবনে মাজ্জাহ, আলবানী
৬৮. যয়ীফুল জামেইস সাগীর, আলবানী
৬৯. যয়ীফ তারগীব, আলবানী
৭০. যয়ীফ তিরমিযী, আলবানী
৭১. যয়ীফ নাসাঈ, আলবানী
৭২. যাদুস সায়েম অফাযলুল ক্বায়েম
৭৩. রিসালাতুন ফিদ্ দিমাহিত ত্বাবিইয়্যাহ, ইবনে উষাইমীন
৭৪. রিসালাতানি মু'জাযাতানি ফিয় যাকাতি অসুসিয়াম, ইবনে বায
৭৫. শারহুস সাদর বিযিকুরি লাইলাতিল ক্বাদর, ইমাম শাওকানী
৭৬. সহীহ আবু দাউদ, আলবানী
৭৭. সহীহ ইবনে মাজ্জাহ, আলবানী
৭৮. সহীহুল জামেইস সাগীর, আলবানী
৭৯. সহীহ তারগীব, আলবানী
৮০. সহীহ তিরমিযী, আলবানী
৮১. সহীহ নাসাঈ, আলবানী
৮২. সাওমু রামাযান, আব্দুর রায়যাক নাওফাল
৮৩. সালাতুল লাইল, আলবানী
৮৪. সালাতুল-লাইলি অভ-তারাবীহ, ইবনে বায
৮৫. সিলসিলাহ যয়ীফাহ, আলবানী
৮৬. সিলসিলাহ সহীহাহ, আলবানী
৮৭. সিফাতু স্বালাতিন নাবী, আলবানী
৮৮. সুনানে আরবাআহ; আবু দাউদ, তিরমিযী, নাসাঈ ও ইবনে মাজ্জাহ
৮৯. হাকেম, মুস্তাদরাক
৯০. হুকমু তারিকিস স্বালাহ, ইবনে উষাইমীন
৯১. হাদিয়্যাতু লিস-সায়েমীন
৯২. হুকমু তারিকিস স্বালাহ, ইবনে উষাইমীন
৯৩. ৪৮ সুআলান ফিস-সিয়াম, ইবনে উষাইমীন
৯৪. ৭০ মাসআলাহ ফিস-সিয়াম, মুহাম্মাদ বিন সালেহ আল-মুনাজ্জিদ

## লেখকের অন্যান্য বই

- ১। কিতাবুত তাওহীদ
- ২। সৎক্ষিপ্ত সালাতে মুবাশিরাহ
- ৩। সালাতে মুবাশিরাহ
- ৪। পথের সম্বল
- ৫। ফিরকাতুন নাজিয়াহ
- ৬। জিভের আপদ
- ৭। ব্যাংকের সুদ কি হালাল?
- ৮। জানাযা দর্পণ
- ৯। বিদআত দর্পণ
- ১০। ফাযায়েলে আমল
- ১১। রাযায়েলে আমল
- ১২। ফাযায়েলে আমল ও রাযায়েলে আমল
- ১৩। আদর্শ বিবাহ ও দাম্পত্য
- ১৪। আদর্শ পরিবার ও পরিবেশ
- ১৫। স্বীনী শিক্ষার নৈতিকতা
- ১৬। স্বীনী শিক্ষার প্রতিবন্ধকতা
- ১৭। সহীহ দু'আ ও যিকর
- ১৮। ফিতনার নীতিমালা
- ১৯। যুব সমস্যা ও তার সঠিক সমাধান
- ২০। উলামার মতানৈক্য
- ২১। মণিমালা
- ২২। দেনা পাওনা
- ২৩। রমায়ানের ফাযায়েল ও রোযার মাসায়েল
- ২৪। যাকাত ও খয়রাত
- ২৫। পথের সন্ধান

- ২৬। সুখের সন্ধান  
 ২৭। শিশু প্রতিপালন  
 ২৮। যুল হিজ্জার তের দিন  
 ২৯। মহানবীর আদর্শ জীবন  
 ৩০। বার মাসে তের পরব  
 ৩১। হাদীস ও সুন্নাহর মূল্যমান  
 ৩২। ইসলামের দৃষ্টিতে স্বাস্থ্য ও চিকিৎসা বিজ্ঞান  
 ৩৩। কাফির বলার মৌলনীতি  
 ৩৪। ইসলামী জীবন ধারা  
 ৩৫। হারাম রুজি ও রোজগার  
 ৩৬। নামাযে বিসমিল্লাহর বিধান  
 ৩৭। আদর্শ ছাত্র জীবন  
 ৩৮। দিগ দর্শন  
 ৩৯। রামাযান স্বাগতম  
 ৪০। বরকতময় দিনগুলো  
 ৪১। বিতর্ক মুনাযাত  
 ৪২। কুইজ প্রশ্নোত্তর  
 ৪৩। বিনা পণের বউ  
 ৪৪। আদর্শ রমণী  
 ৪৫। মুনাফিকী আচরণ  
 ৪৬। নজরুল ইসলামী সঙ্গীত ও কবিতা অনৈসলামী আকীদা  
 ৪৭। আমানত ও খিয়ানত  
 ৪৮। মহান আল্লাহর নাম ও গুণাবলী  
 ৪৯। মরণকে স্মরণ  
 ৫০। সূরাতুস সালাত  
 ৫১। ধর্মের নামে গোড়ামী ও সন্ত্রাস  
 ৫২। রিয়াযুস সালাহীন (তাহকীক সহ)

৫৩। উমরাহ নির্দেশিকা

৫৪। তাফসীর আহসানুল বায়ান (বাংলা তাফসীর) (বাদশাহ ফাহাদ প্রিন্টিং প্রেস থেকে এর উর্দু সংস্করণ প্রকাশিত হয়েছে)।

ইনশাআল্লাহ অতি অল্প সময়ের মধ্যে  
সবগুলো বই তাওহীদ পাবলিকেশন  
থেকে প্রকাশিত হচ্ছে।

যোগাযোগ

তাওহীদ পাবলিকেশন

৯০, হাজী আবদুল্লাহ সরকার লেন, বংশাল, ঢাকা-১১০০

ফোন : ০২৭১১২৭৬২, ০১১৯০৩৬৮২৭২

ইমেল : [tawheedpp@gmail.com](mailto:tawheedpp@gmail.com)

নতুন প্রকাশনার খবর জানতে

আমাদের ইমেলে আপনার ইমেল এ্যাড্রেস যুক্ত করুন।



রমাযানের ফাযায়েল

ও

রোযার মাসায়েল

আবদুল হামীদ ফাইযী